

Namo tassa bhagavato arahato sammāsambuddhassa

Aṅuttaranikāye

Aṭṭhakanipāta-ṭikā

1. Paṭhamapaṇṇāsakaṃ

1. Mettāvaggo

1. Mettāsuttavaṇṇanā

1. Aṭṭhakanipātassa paṭhame **vaḍḍhitāyā**ti bhāvanāpāripūrivasena paribrūhitāya. **Punappunaṃ katāyā**ti bhāvanāya bahulīkaraṇena aparāparaṃ pavattitāya. **Yuttayānasadisakatāyā**ti yathā yuttaājāññayānaṃ chekena sārathinā adhiṭṭhitam yathārucci pavattati, evaṃ yathārucci pavattārahataṃ gamitāya. **Patitṭhānaṭṭhena**ti sabbasampattiadhiṭṭhānaṭṭhena. **Paccupaṭṭhitāyā**ti bhāvanābahulīkārehi pati pati upaṭṭhitāya avijahitāya. **Samantato citāyā**ti sabbabhāgena bhāvanānurūpaṃ cayaṃ gamitāya. Tenāha “**upacitāyā**”ti. **Suṭṭhu samāradhāyā**ti ativiya sammadeva nibbattigatāya.

Yo ca mettam bhāvayatitiādīsu yo koci gahaṭṭho vā pabbajito vā. **Mettanti mettājhānaṃ.**

Appamāṇanti bhāvanāvasena ārammaṇavasena ca appamāṇaṃ. Asubhabhāvanādayo viya hi ārammaṇe ekadesaggahaṇaṃ akatvā anavasesapharaṇavasena anodhiso pharaṇavasena ca, appamāṇārammaṇatāya paguṇabhāvanāvasena ca appamāṇaṃ. **Tanū samyojanā hontīti** mettam pādakaṃ katvā sammāsivā heṭṭhime ariyamagge adhigacchantassa sukheva paṭighasamyojanādayo pahīyamānā tanū hontīti evamettha attho daṭṭhabbo.

Evaṃ kilesappahānaṃca nibbānādhigamaṃca mettābhāvanāya sikhāppattamānisamsaṃ dassetvā idāni aññepi ānisamsaṃ dassetuṃ “**ekampi ce**”tiādi vuttaṃ. Tatha **aduṭṭhacittoti** mettābalena suṭṭhu vikkhambhitabyāpādatāya byāpādena adūsitacitto. **Mettāyati**ti hitapharaṇavasena mettam karoti. **Kusalīti** atisayena kusalavā mahāpuñño, paṭighādiatthavigamena khemī. **Sabbe ca pāṇeti ca**-saddo byatireko. **Manasānukampīti** cittena anukampanto. Idaṃ vuttaṃ hoti – ekasattavisayāpi tāva mettā mahākusalarāsi, sabbe pana pāṇe attano puttaṃ viya hitapharaṇena manasā anukampanto pahukaṃ pahuṃ anappakaṃ ariyantaṃ catusaṭṭhimahākappepi attano vipākappabandhaṃ pavattetuṃ samatthaṃ uḷāraṃ puññaṃ ariyo parisuddhacitto puggalova karoti nipphādetīti. **Sattabharitanti** sattehi aviraḷaṃ, ākiṇṇamanussanti attho.

Saṅgahavatthūnīti (saṃ. ni. ṭī. 1.1.120) lokassa saṅgaṇhanakāraṇāni. Nipphannaśassato nava bhāge kassakassa datvā raññaṃ ekabhāgaggahaṇaṃ **dasamabhāgaggahaṇaṃ**. Evaṃ kassakā haṭṭhatuṭṭhā sassāni sampādentīti āha “**sassasampādane medhāvitāti attho**”ti. Tato orabhāge kira chabhāgaggahaṇaṃ jātaṃ. **Chamāsikanti** channaṃ channaṃ māsānaṃ pahonakaṃ. **Pāsetīti** pāsagate viya karoti. Vācāya piyaṃ vācāpiyaṃ, tassa kammaṃ **vācāpeyyam**. Sabbaso raṭṭhassa iddhādibhāvato **khemaṃ**. **Nirabbudaṃ** coriyābhāvato. Iddhañhi raṭṭhaṃ acoriyaṃ. “**Niraggala**”nti **vuccati** apārutagharabhāvato.

Uddhammūlakaṃ katvāti ummūlaṃ katvā. **Dvīhi pariyaññehīti** mahāyaññassa pubbabhāge pacchā ca pavattetabbehi dvīhi parivārayaññehi. **Satta...pe... bhīsanassāti** sattanavutādhikānaṃ pañcannaṃ pasusatānaṃ māraṇena bheravassa pāpabhīrukānaṃ bhayāvahassa. Tathā hi vadanti –

“Chasatāni niyujjanti, pasūnaṃ majjhime hani;
Assamedhassa yaññaṃ, unāni pasūhi tīhī”ti. (saṃ. ni. ṭī. 1.1.120; a. ni. ṭī. 2.4.39);

Sammanti yugacchidde pakkhipitabbadaṇḍakaṃ. **Pāsantīti** khipanti. **Samhārimehīti** sakaṭehi vahitabbehi. Pubbe kira eko rājā sammāpāsaṃ yajanto sarassatinaditīre pathaviyā vivare dinne nimuggoyeva ahosi. Andhabālabrahmaṇā gatānugatigatā “ayaṃ tassa saggagamanamaggo”ti saññāya tattha sammāpāsaṃ yaññaṃ paṭṭhapenti. Tena vuttaṃ “**nimuggokāsato pabhuṭī**”ti. Ayūpo appakadivaso yāgo, sayūpo bahudivasam sādheyyo **satrayāgo**. Mantapadābhisankhatānaṃ sappimadhūnaṃ “**vāja**”miti samañña. Hiraññasuvaṇṇagomahiṃsādi **sattarasakadakkhiṇassa**. Sāragabbhakoṭṭhāgārādīsu natthi ettha aggaḷāti **niraggaḷo**. Tattha kira yañña attano sāpateyyaṃ anavasesato anigūhitvā niyyātīyati.

Candappabhāti (itivu. aṭṭha. 27) candimasseva pabhāya. **Tārāgaṇāva sabbeti** yathā sabbepi tārāgaṇā candimasobhāya soḷasimpi kalam nāgghanti, evaṃ te assamedhādayo yañña mettassa cittassa vuttalakkaṇena subhāvitassa soḷasimpi kalam nānubhavanti, na pāpuṇanti, nāgghantīti attho.

Idāni aparepi diṭṭhadhammikasamparāyike mettābhāvanāya ānisaṃse dassetuṃ “**yo na hantī**”tiādi vuttaṃ. Tattha **yoti** mettābrahmavihārabhāvanānuyutto puggalo. **Na hantīti** teneva mettābhāvanānubhāvena dūravikkhambhitabyāpādātāya na kañci sattaṃ hiṃsati, leḍḍudaṇḍādīhi na vibādhati vā. **Na ghātetīti** paraṃ samādapetvā na satte mārāpeti na vibādāpeti ca. **Na jinātīti** sārāmbhaviggāhikakathādivasena na kañci jināti sārāmbhasseva abhāvato, jānikaraṇavasena vā aṭṭakaraṇādīnā na kañci jināti. Tenāha “**na attanā parassa jāniṃ karotī**”ti. **Na jāpayeti** parehi payojetvā paresampi dhanajāniṃ na kārāpeyya. Tenāha “**na parena parassa jāniṃ kāretī**”ti. Mettāya vā aṃso aviheṭhanaṭṭhena avayavabhūtoti **mettaṃso**.

Mettāsuttavaṇṇanā niṭṭhitā.

2-4. Paññāsuttādivaṇṇanā

2-4. Dutiye **ādibrahmacariyikāyāti** ādibrahmacariyameva ādibrahmacariyikā. Tenāha “**maggabrahmacariyassa ādibhūtāyā**”ti. **Ariyoti** niddoso parisuddho. Tuṇhībhāvo na titthiyānaṃ mūgabbatagahaṇaṃ viya aparisuddhoti **ariyo tuṇhībhāvo**. **Catutthajjhānanti** ukkaṭṭhaniddesenetaṃ vuttaṃ, paṭhamajjhānādīnīpi ariyo tuṇhībhāvotveva saṅkhaṃ gacchanti. **Jānanti** idaṃ kammaśādhānanti āha “**jānitabbakaṃ jānātī**”ti. Yathā vā ekacco viparītaṃ gaṇhanto jānantopi na jānātī, passantopi na passatī, na evamayam. Ayaṃ pana jānanto jānātī, passanto passatīti evamettha daṭṭhabbo. Tatiyādīni suviññeyyāni.

Paññāsuttādivaṇṇanā niṭṭhitā.

5. Paṭhamalokadhammasuttavaṇṇanā

5. Pañcame **lokassa dhammāti** satta lokassa avassaṃbhāvidhammā. Tenāha “**etehi muttā nāma natthi**”tiādi. Ghāsacchādanādīnaṃ laddhi **lābho**, tāni eva vā laddhabbato **lābho**, tadabhāvo **alābho**, lābhaggaṇena cettha tabbisayo anurodho gahito, alābhaggaṇena virodho. Yasmā lohite sati tadupaghātavasena pubbo viya anurodho laddhāvasaro eva hoti, tasmā vuttaṃ “**lābhe āgate alābho āgatoyevā**”ti. Esa nayo yasādīsūpi. Sesam suviññeyyameva.

Paṭhamalokadhammasuttavaṇṇanā niṭṭhitā.

6-8. Dutiya lokadhammasuttādivaṇṇanā

6-8. Chaṭṭhe adhikaṃ payasati payujjati etenāti **adhippayāso**, savisesaṃ itikattabbakiriyā. Tenāha “**adhikappayogo**”ti. Sattamaṭṭhamesu natthi vattabbaṃ.

Dutiyalokadhammasuttādivaṇṇanā niṭṭhitā.

9. Nandasuttavaṇṇanā

9. Navame duvidhā kulaputtā jātikulaputtā ācārakulaputtā ca. Tattha “tena kho pana samayena raṭṭhapālo kulaputto tasmiṇyeva thullakoṭṭhike aggakulikassa putto”ti (ma. ni. 2.294) evaṃ āgatā uccākulaputtā **jātikulaputtā**. “Saddhāyete kulaputtā agārasmā anagāriyaṃ pabbajitā”ti (ma. ni. 3.78) evaṃ āgatā pana yattha kathaci kule pasutāpi **ācārakulaputtā** nāma. Idha pana uccākulappasutataṃ sandhāya “kulaputtoti, bhikkhave, nandaṃ sammā vadamāno vadeyyā”ti bhagavatā vuttanti āha “**jātikulaputto**”ti. Ubhohipi pana kāraṇehi tassa kulaputtabhāvoyeva. Sesamettha uttānameva.

Nandasuttavaṇṇanā niṭṭhitā.

10. Kāraṇḍavasuttavaṇṇanā

10. Dasame **paṭīcaratīti** paṭīcchādanavasena carati pavattati. Paṭīcchādanaṭṭho eva vā carati-saddo anekathattā dhātūnanti āha “**paṭīcchādeti**”ti. **Aññenāññanti** pana paṭīcchādanākāradassananti āha “**aññena kāraṇenā**”tiādi. Tattha **aññaṃ kāraṇaṃ vacanaṃ vāti** yaṃ codakena cuditakassa dosavibhāvanaṃ kāraṇaṃ, vacanaṃ vā vuttaṃ, taṃ tato aññeneva kāraṇena, vacanena vā paṭīcchādeti. **Kāraṇenāti** codanāya amūlāya amūlikabhāvadīpaniyā yuttiyā vā. **Vacanenāti** tadatthabodhakena vacanena. “Ko āpanno”tiādinā codanaṃ vissajjetvāva vikkhepāpajjanaṃ **aññenāññaṃ paṭīcaraṇaṃ**. **Bahiddhā kathāpanāmanā** nāma “itthannāmaṃ āpattiṃ āpannosī”ti vutte – “pāṭaliputtaṃ gatomhī”tiādinā codanaṃ vissajjetvāti ayameva viseso. Yo hi “āpattiṃ āpannosī”ti vutto “ko āpanno, kiṃ āpanno, kismiṃ āpannā, kaṃ bhaṇatha, kiṃ bhaṇathā”ti vā vadati, “evarūpaṃ kiñci tayā diṭṭha”nti vutte “na suṇāmi”ti sotaṃ vā upaneti, ayaṃ **aññenāññaṃ paṭīcarati** nāma. Yo pana “itthannāmaṃ nāma āpattiṃ āpannosī”ti puṭṭho “pāṭaliputtaṃ gatomhī”ti vatvā puna “na tava pāṭaliputtagamaṇaṃ pucchāma, āpattiṃ pucchāma”ti vutte tato “rājagahaṃ gatomhi. Rājagahaṃ vā yāhi brāhmaṇagahaṃ vā, āpattiṃ āpannosīti. Taṃ tattha me sūkaramaṃsaṃ laddha”ntiādini vadati, ayaṃ **bahiddhā kathaṃ apanāmeti** nāma. **Samaṇakacavaroti** samaṇavesadhāraṇena samaṇappatirūpakatāya samaṇaṇaṃ kacavarabhūtaṃ.

Kāraṇḍavaṃ (su. ni. aṭṭha. 2.283-284) **niddhamathāti** vipannasīlatāya kacavarabhūtaṃ puggalaṃ kacavaramiva anapekkhā apanetha. **Kasambuṃ apakassathāti** kasambubhūtaṇca naṃ khattiyādīnaṃ majjhagataṃ pabhinnapaggharitakuṭṭhaṃ caṇḍālaṃ viya apakaḍḍhatha. Kiṃ kāraṇaṃ? Saṅghārāmo nāma sīlavantānaṃ kato, na dussīlānaṃ. Yato etadeva sandhāyāha “**tato palāpe vāhetha, assamaṇe samaṇamānīne**”ti. Yathā palāpā antosārarahitā ataṇḍulā bahi thusena vīhī viya dissanti, evaṃ pāpabhikkhū anto sīlarahitāpi bahi kāsāvādīparikkhārena bhikkhū viya dissanti, tasmā “palāpā”ti vuccanti. Te palāpe vāhetha opunatha vidhamatha, paramatthato assamaṇe samaṇavesamattena samaṇamānīne. **Kappayavhoti** kappetha, karothāti vuttaṃ hoti. **Patissatāti** sappatissā. Vaṭṭadukkhassa antaṃ karissatha, parinibbānaṃ pāpuṇissathāti attho.

Kāraṇḍavasuttavaṇṇanā niṭṭhitā.

Mettāvaggavaṇṇanā niṭṭhitā.

2. Mahāvaggo

1. Verañjasuttavaṇṇanā

11. Dutiyassa paṭhame **verañjāyaṃ viharatīti** (pārā. aṭṭha. 1.1) ettha **verañjāti** tassa nagarassetam adhivacanam, tassam verañjāyaṃ. Samīpatthe bhummavacanam. **Naḷerupucimandamūleti** ettha **naḷeru** nāma yakkho. **Pucimandoti** nimbarukkho. **Mūlanti** samīpaṃ. Ayañhi mūla-saddo “mūlāni uddhareyya antamaso usīranālimattānīpi” tiādīsu (a. ni. 4.195) mūlamūle dissati. “Lobho akusalamūla” ntiādīsu (dī. ni. 3.305; pari. 323) asādhāraṇahetumhi. “Yāva majjhanhike kāle chāyā pharati, nivāte paṇṇāni patanti, ettāvātā rukkhāmūla” ntiādīsu (pārā. 494) samīpe. Idha pana samīpe adhippeto, tasmā naḷeruyakkhena adhiggahitassa pucimandassa samīpeti evamettha attho daṭṭhabbo. So kira pucimando ramaṇīyo pāsādiko anekesaṃ rukkhānaṃ ādhippaccaṃ viya kurumāno tassa nagarassa avidūre gamanāgamanasampanne ṭhāne ahosi. Atha bhagavā verañjaṃ gantvā patirūpe ṭhāne viharanto tassa rukkhassa samīpe heṭṭhābhāge vihāsi. Tena vuttaṃ “**verañjāyaṃ viharati naḷerupucimandamūle**” ti.

Paccuṭṭhānaṃ (sārattha. ṭī. 1.2) nāma āsanā vuṭṭhānanti āha “**nāsanā vuṭṭhātī**” ti. Nisinnāsanato na vuṭṭhahatīti attho. Ettha ca **jiṇṇe...pe... vayoanuppatteti** upayogavacanam āsanā vuṭṭhānakiriyāpekkhaṃ na hoti. Tasmā “jiṇṇe...pe... vayoanuppatte disvā” ti ajjhāhāraṃ katvā attho veditabbo. Atha vā paccuggamanakiriyāpekkhaṃ upayogavacanam, tasmā **na paccuṭṭhātīti** utṭhāya paccuggamanaṃ na karotīti attho veditabbo. Paccuggamanampi hi paccuṭṭhānanti vuccati. Vuttañhetam “ācariyaṃ pana dūratova disvā paccuṭṭhāya paccuggamanakaraṇam paccuṭṭhānaṃ nāmā” ti. **Nāsanā vuṭṭhātīti** iminā pana paccuggamañbhāvassa upalakkhaṇamattaṃ dassitanti daṭṭhabbam. **Vibhāvane nāma attheti** pakativibhāvanasāṅkhāte atthe. **Na abhivādeti vāti** na abhivādetabbanti vā sallakkhetīti vuttaṃ hoti.

Taṃ aññāṇanti “ayaṃ mama abhivādanādīni kātuṃ araharūpo na hotī” ti ajānavasena pavattaṃ aññāṇam. **Oloketoti** “dukkhaṃ kho agāravo viharati appatisso, kiṃ nu kho ahaṃ samaṇam vā brāhmaṇam vā sakkareyyaṃ garuṃ kareyya” ntiādīsuttavaseneva (a. ni. 4.21) ñānacakkhunā oloketo. **Nipaccakārārahanti** paṇipātārahaṃ. **Sampatijātoti** muhuttajāto, jātasamanantaramevāti vuttaṃ hoti. **Uttarena mukhoti** uttaradisābhimukho. “**Sattapadavītihārena gantvā sakalam dasasahasilokadhātuṃ olokesi**” nti idaṃ –

“Dhammatā esā, bhikkhave, sampatijāto bodhisatto samehi pādehi patiṭṭhahitvā uttarābhimukho sattapadavītihārena gacchati, setamhi chatte anudhāriyamāne sabbā disā viloketi, āsabiñca vācam bhāsati” ti (dī. ni. 2.31) –

Evam pāliyaṃ sattapadavītihārūpari ṭhitassa viya sabbādisānulokanassa kathitattā vuttaṃ, na panetaṃ evam daṭṭhabbam sattapadavītihārato pageva disāvīlokanassa katattā. Mahāsatto hi manussānaṃ hatthato mucchitvā puratthimaṃ disaṃ olokesi, anekāni cakkavālasahassāni ekaṅgaṇāni ahesuṃ. Tatha devamanussā gandhamālādīhi pūjayamānā, “mahāpurisa, idha tumhehi sadisopi natthi, kuto uttaritaro” ti āhaṃsu. Evam catasso disā, catasso anudisā, heṭṭhā, uparīti dasapi disā anuviloketvā attano sadisaṃ adisvā “ayaṃ uttaradisā” ti sattapadavītihārena agamāsīti veditabbā. **Olokesinti** mama puññānubhāvena lokavivaraṇapāṭihāriye jāte paññāyamānaṃ dasasahasilokadhātuṃ maṃsacakkhunāva olokesinti attho.

Mahāpurisoti jātigottakulappadesādivasena mahantapuriso. **Aggoti** guṇehi sabbappadhāno. **Jeṭṭhoti** guṇavaseneva sabbesaṃ vuddhatamo, guṇehi mahallakatamoti vuttaṃ hoti. **Seṭṭhoti** guṇavaseneva sabbesaṃ pasatthataṃ. Atthato pana pacchimāni dve purimasseva vevacanānīti veditabbam. **Tayāti** nissakke karaṇavacanam. **Uttaritaroti** adhikataro. **Patimānesīti** pūjesi. **Āsabhinti** uttamaṃ. Mayhaṃ **abhivādanādiraho puggaloti** mayhaṃ abhivādanādikiriyāya araho anucchaviko puggalo. Nicasāpekkhatāya panettha samāso daṭṭhabbo. **Tathāgatāti** tathāgatato, tathāgatassa santikāti vuttaṃ hoti. **Evarūpanti** abhivādanādisabhāvaṃ. **Paripākasithilabandhananti** paripākena sithilabandhanam.

Taṃ vacananti “nāhaṃ taṃ brāhmaṇā” tiādivacanam. “Nāhaṃ arasarūpo, mādisā vā arasarūpā” ti vutte brāhmaṇo thaddho bhaveyya. Tena vuttam **“cittamudubhāvajanattha”**nti.

Katamo pana soti pariyāyāpekkho pulliṅganiddeso, katamo so pariyāyoti attho? **Jātivasenāti** khattiyādijātivaseṇa. **Upapattivaseṇāti** deveṣu upapattivaseṇa. **Seṭṭhasammatānampīti api**-saddena pageva aseṭṭhasammatānanti dasseti. **Abhinandantānanti** sappītikataṇhāvasena pamodamānānaṃ. **Rajjantānanti** balavarāgavasena rajjantānaṃ. Rūparibhogena uppannataṇhāsampayuttasomanassavedanā rūpato nibbattitvā hadayatappanato ambarasādayo viya rūparasāti vuccanti. **Āviñcantīti** ākaḍḍhanti. **Vatthārammaṇādisāmaggiyanti** vatthuārammaṇādikāraṇasāmaggiyaṃ. **Anukkipantoti** attukkamaṇasavasena kathite brāhmaṇassa asappāyabhāvato attānaṃ anukkipanto anukkamaṇsentō.

Etasmim panatthe karaṇe sāmivacananti “jahitā” ti etasmim atthe **tathāgatassāti** karaṇe sāmivacanam, tathāgatena jahitāti attho. **Mūlanti** bhavamūlaṃ. “Tālavatthukatā” ti vattabbe “oṭṭhamukho” tiādīsu viya majjhepadalopaṃ katvā a-kāraṇca dīgham katvā “tālavatthukatā” ti vuttanti āha **“tālavatthu viya nesam vatthu katanti tālavatthukatā”**ti. Tattha tālassa vatthu **tālavatthu**. Yathā ārāmassa vatthubhūtapubbo padeso ārāmassa abhāve “ārāmatthū” ti vuccati, evaṃ tālassa patiṭṭhitokāso samūlaṃ uddharite tāle padesamatte ṭhite tālassa vatthubhūtapubbattā “tālavatthū” ti vuccati. **Nesanti** rūparasādīnaṃ. Kathaṃ pana tālavatthu viya nesam vatthu katanti āha **“yathā hī”** tiādi. Rūpādiribhogena uppannataṇhāyuttasomanassavedanāsāṅkhātarūparasādīnaṃ cittasantānassa adhiṭṭhānabhāvato vuttam **“tesam pubbe uppannapubbabhāvena vatthumatte cittasantāne kate”** ti. Tattha **pubbeti** pure, sarāgakāletī vuttam hotī. **Tālavatthukatāti vuccantīti** tālavatthu viya attano vatthussa katattā rūparasādayo “tālavatthukatā” ti vuccanti. Etena pahīnakilesānaṃ puna uppattiyā abhāvo dassito.

Avirūḥhidhamattāti avirūḥhisabhāvatāya. Matthakacchinno tālo pattaphalādīnaṃ avatthubhūto tālavatthūti āha **“matthakacchinnatālo viya katā”** ti. Etena “tālavatthu viya katāti tālavatthukatā” ti ayaṃ viggaho dassito. Ettha pana “avatthubhūto tālo viya katāti avatthutālakatā” ti vattabbe visesanassa paranipātaṃ katvā “tālavatthukatā” ti vuttanti daṭṭhabbaṃ. Iminā panatthena idaṃ dasseti – rūparasādivacanena vipākadhammadhammā hutvā pubbe uppannakusalākusalā dhammā gahitā, te uppannāpi matthakasadisānaṃ taṇhāvijjānaṃ maggasatthena chinnattā āyatim tālapattasadiṣe vipākakkhandhe nibbattetuṃ asamattā jātā, tasmā tālavatthu viya katāti tālavatthukatā rūparasādayoti. Imasmim atthe “abhinandantāna” nti iminā padena kusalasomanassampi saṅgahitanti vadanti. **Anabhāvaṃ katāti** ettha **anu**-saddo pacchāsaddena samānatthoti āha **“yathā nesam pacchābhāvo na hotī”** tiādi.

Yaṅca kho tvaṃ sandhāya vadesi, so pariyāyo na hotīti yaṃ vandanādisāmaggirasābhāvasāṅkhātaṃ kāraṇaṃ arasarūpatāya vadesi, taṃ kāraṇaṃ na hoti, na vijjatīti attho. Nanu cāyaṃ brāhmaṇo yaṃ vandanādisāmaggirasābhāvasāṅkhātapariyāyaṃ sandhāya “arasarūpo bhavaṃ gotamo” ti āha, “so pariyāyo natthī” ti vutte vandanādīni bhagavā karotīti āpajjatīti imaṃ aniṭṭhappasaṅgaṃ dassento āha **“nanu cā”** tiādi.

Sabbapariyāyesūti sabbavāresu. **Sandhāyabhāsitamattanti** yaṃ sandhāya brāhmaṇo “nibbhogo bhavaṃ gotamo” tiādimāha. Bhagavā ca yaṃ sandhāya nibbhogatādīṃ attani anujānāti, taṃ sandhāyabhāsitamattaṃ. **Chandarāgaparibhogoti** chandarāgavasena paribhogo. **Aparaṃ pariyāyanti** aññaṃ kāraṇaṃ.

Kulasamudācārakammanti kulācārasāṅkhātaṃ kammaṃ, kulacārittanti attho. **Akiriyaṃti** akaraṇabhāvaṃ. “Anekavīhitānaṃ pāpakānaṃ akusalānaṃ dhammāna” nti sāmāññavacanepi pārisesaññāyato vuttāvasesā akusaladhammā gahetabbāti āha **“ṭhapetvā te dhamme”** tiādi, te yathāvuttakāyaduccaritādike akusaladhamme ṭhapetvāti attho. **Anekavīhitāti** anekappakārā.

Ayaṃ lokatantīti ayaṃ vuḍḍhānaṃ abhivādanādikiriyalakkhaṇā lokappaveṇī.

Anāgāmbrahmaṇaṃ alaṅkāradīsu anāgāmbhikkhūnaṅca cīvarādīsu nikantivasena rāguppati hotīti anāgānimaggena pañcakāmaguṇikarāgasseva pahānaṃ veditabbanti āha

“**pañcakāmaguṇikarāgassā**”ti. Rūpādīsu pañcasu kāmaguṇesu vatthukāmakotṭhāsesu uppajjamāno rāgo “pañcakāmaguṇikarāgo”ti veditabbo. Koṭṭhāsavacano hettha guṇa-saddo “vayoguṇā anupubbaṃ jahantī”tiādīsu (saṃ. ni. 1.4) viya. **Akusalacittadvayasampayuttassāti** domanassasahagatacittadvayasampayuttassa. Mohassa sabbākusalasādhāraṇattā āha “**sabbākusalasambhavassā**”ti. **Avasesānanti** sakkāyadīṭṭhiādīnaṃ.

Jigucchati maññeti ahamabhijāto rūpavā paññavā kathaṃ nāma aññesaṃ abhivādanādīm kareyyanti jigucchati viya, jigucchatīti vā sallakkhemi. Akusaladhamme jigucchamāno tesam samaṅgibhāvampi jigucchatīti vuttaṃ “**akusalānaṃ dhammānaṃ samāpattiyā jigucchati**”ti. **Samāpattīti** etasseva vevacanaṃ **samāpajjanā samaṅgibhāvoti**. **Maṇḍanaajātikoti** maṇḍanakasabhāvo, maṇḍanakasīloti attho. **Jegucchitanti** jigucchanasīlataṃ.

Lokajeṭṭhakakammanti lokajeṭṭhakānaṃ kattabbakammaṃ, loke vā seṭṭhasammataṃ kammaṃ. **Tatrāti** tesu dvīsupi atthavikappesu. Paḍābhīhito attho **padattho**, byañjanatthoti vuttaṃ hoti. **Vinayaṃ vā arahatīti** ettha vinayanaṃ **vinayo**, niggaṇhananti attho. Tenāha “**niggahaṃ arahatīti vuttaṃ hoti**”ti. Nanu ca paṭhamam vuttasu dvīsupi atthavikappesu sakatthe arahatthe ca taddhitapaccayo saddalakkhaṇato dissati, na pana “vinayāya dhammaṃ desetī”ti imasmim atthe. Tasmā kathametta taddhitapaccayoti āha “**vicitrā hi taddhitavutti**”ti. Vicitrā cettha lokappamaṇato veditabbā. Tathā hi yasmim yasmim atthe taddhitappayogo lokassa, tattha tattha taddhitavutti lokato siddhāti vicitrā taddhitavutti, tasmā yathā “mā saddamakāsī”ti vadanto “māsaddiko”ti vuccati, evaṃ vinayāya dhammaṃ desetīti venayikoti vuccatīti adhippāyo.

Kapaṇapurisoti guṇavirahitatāya dīnamanusso. **Byañjanāni avicāretvāti** tissadattādisaddesu viya “imasmim atthe ayaṃ nāma paccayo”ti evaṃ byañjanavicāraṃ akatvā, anipphannapāṭipadikavasenāti vuttaṃ hoti.

“**Devalokagabbhasampattiyā**”ti vatvāpi ṭhapetvā bhummadeve sesadevesu gabbhaggahaṇassa abhāvato paṭisandhiyevettha gabbhasampattīti veditabbāti vuttamevatthaṃ vivaritvā dassento āha “**devalokapaṭisandhipaṭilābhāya samvattati**”ti. **Assāti** abhivādanādisāmīcikammaṃ. **Mātukucchismim paṭisandhiggahaṇe dosaṃ dassentoti** mātito aparisuddhabhāvaṃ dassento, akkositukāmassa dāsīyā puttoti dāsikucchimhi nibbattabhāve dosaṃ dassetvā akkosanaṃ viya bhagavato mātukucchismim paṭisandhiggahaṇe dosaṃ dassetvā akkosantopi evamāhāti adhippāyo. **Gabbhatoti** devalokapaṭisandhito. Tenevāha “**abhabbo devalokūpapattim pāpuṇitunti adhippāyo**”ti. “Hīno vā gabbho assāti apagabbho”ti imassa viggahassa ekena pariyāyena adhippāyaṃ dassento āha “**devalokagabbhaparibāhirattā āyatim hīnagabbhapaṭilābhabhāgī**”ti. **Iti-saddo** hetuattho. Yasmā āyatimpi hīnagabbhapaṭilābhabhāgī, tasmā hīno vā gabbho assāti apagabbhoti adhippāyo. Puna tasseva viggahassa “kodhavasena...pe... dassento”ti heṭṭhā vuttanayassa anurūpaṃ katvā adhippāyaṃ dassento āha “**hīno vāssa mātukucchismim gabbhavāso ahoṣīti adhippāyo**”ti. **Gabbha-saddo** atthi mātukucchipariyāyo “gabbhe vasati māṇavo”tiādīsu (jā. 1.15.363) viya. Atthi mātukucchismim nibbattasattapariyāyo “antamaso gabbhapātanaṃ upādāyā”tiādīsu (mahāva. 129) viya. Tattha mātukucchipariyāyaṃ gahetvā atthaṃ dassento āha “**anāgate gabbhaseyyā**”ti. Gabbhe seyyā **gabbhaseyyā**. **Anuttarena maggenāti** aggamaggena. Kammakilesānaṃ maggena vihatattā āha “**vihatakāraṇattā**”ti. **Itarā tissopīti** aṇḍajasamsedajaopapātikā. Ettha ca yadipi “apagabbho”ti imassa anurūpato gabbhaseyyā eva vattabbā, pasāngato pana labbhamānaṃ sabbampi vattum vaṭṭatīti punabbhavābhinnibbattipi vuttāti veditabbā.

Idāni sattapariyāyassa **gabbha-saddassa** vasena viggahanānattaṃ dassento āha “**apicā**”tiādi. Imasmim pana vikappe gabbhaseyyā punabbhavābhinnibbattīti ubhayampi gabbhaseyyavaseneva

vuttantipi vadanti. Nanu ca “āyatim gabbhaseyyā pahīnā”ti vuttattā gabbhassa seyyā eva pahīnā, na pana gabbhoti āpajjatīti āha “**yathā cā**”tiādi. Atha “abhinibbattī”ti ettakameva avatvā punabbhavaggahaṇaṃ kimatthanti āha “**abhinibbatti ca nāmā**”tiādi. **Apunabbhavabhūtāti** khaṇe khaṇe uppajjamānaṃ dhammānaṃ abhinibbatti.

Dhammadhātunti ettha dhamme anavasese dhāreti yāthāvato upadhāretīti dhammadhātu, dhammānaṃ yathāsabhāvato avabujjhanasabhāvo, sabbaññutaññāṇassetam adhivacanaṃ. **Paṭivijjhivāti** sacchikatvā, paṭilabhitvāti attho, paṭilābhahetūti vuttaṃ hoti. **Desanāvilāsappatto hotīti** rucivasena parivattetvā dassetuṃ samatthataṃ desanāvilāso, taṃ patto adhigatoti attho. **Karuṇāvippahānti** sabbasattesu mahākaruṇāya pharaṇaṃ. Tādīlakkaṇameva puna upamāya vibhāvetvā dassento āha “**pathavīsamacittata**”nti. Yathā pathavī sūciasucinikkhepacchedanabhedanādīsu na vikampati, anurodhavirodhaṃ na pāpuṇāti, evaṃ iṭṭhāniṭṭhesu lābhālābhādīsu anurodhavirodhappahānato avikampitacittatāya pathavīsamacittatanti attho. **Akuppadhammatanti** ettha akuppadhammo nāma phalasaṃpattīti keci vadanti. “Paresu pana akkosantesupi attano pathavīsamacittatāya akuppanasabhāvatanti evamettha attho gahetabbo”ti amhākaṃ khanti. **Jarāya anusaṭanti** jarāya paliveṭṭitaṃ. Brāhmaṇassa vuddhatāya āsannavuttimaraṇanti sambhāvanavasena “**ajja maritvā**”tiādi vuttaṃ. “**Mahantena kho pana ussāhenā**”ti sādhu kho pana tathārūpānaṃ arahataṃ dassanaṃ hotī”ti evaṃ sañjātamahussāhena. **Appaṭisamaṃ purejātabhāvanti** anaññasādhāraṇaṃ purejātabhāvaṃ. Natthi etassa paṭisamoti **appaṭisamo**, purejātabhāvo.

Pakkhe vidhunantāti patte cālentā. **Nikkhamantānanti** niddhāraṇe sāmivacanaṃ, nikkhantesūti attho.

So jeṭṭho iti assa vacanīyoti yo paṭhamataraṃ aṇḍakosato nikkhanto kukkuṭapotako, so jeṭṭhoti vacanīyo assa, bhaveyyāti attho. **Sampaṭipādentoti** saṃsandento. Tibhūmapariyāpannāpi sattā avijjākosassa anto pavīṭṭhā tattha tattha appahīnāya avijjāya veṭṭhitattāti āha “**avijjākosassa anto pavīṭṭhesu sattesū**”ti aṇḍakosanti bījakapālaṃ. **Lokasannivāseti** lokoyeva saṅgamma samāgamma nivāsanaṭṭhena lokasannivāso, sattanikāyo. **Sammāsambodhinti** ettha sammāti aviparītattho, **saṃsaddo** sāmanti imamatthaṃ dīpeti. Tasmā sammā aviparītenākārena sayameva cattāri saccāni bujjhati paṭivijjhātīti **sammāsambodhīti** maggo vuccati. Tenāha “**sammā sāmāñca bodhi**”nti, sammā sayameva ca bujjhanakanti attho. **Sammāti** vā pasatthavacano, **saṃsaddo** sundaravacanoti āha “**atha vā pasatthaṃ sundarañca bodhi**”nti.

Asabbaguṇadāyakattāti sabbaguṇānaṃ adāyakattā. Sabbaguṇe na dadātīti hi **asabbaguṇadāyako**, asamatthasamāsoyaṃ gamakattā yathā “asūriyapassāni mukhānī”ti. **Tisso vijjāti** upanissayavato saheva arahattaphalena tisso vijjā deti. Nanu cettha tīsu vijjāsu āsavakkhayañāṇassa maggapariyāpannattā kathametam yujjati “maggo tisso vijjā deti”ti? Nāyaṃ doso. Satipi āsavakkhayañāṇassa maggapariyāpannabhāve aṭṭhaṅgike magge sati maggañāṇena saddhiṃ tisso vijjā paripuṇṇā hontīti “maggo tisso vijjā deti”ti vuccati. **Cha abhiññāti** etthāpi eseva nayo. **Sāvakaṃpāramiññānti** aggasāvakehi paṭilabhitabbameva lokiyalokuttarañānaṃ. **Paccekaṃbodhiññānti** etthāpi imināva nayena attho vedītabbo. **Abbhaññāsinti** jāniṃ. Jānanañca na anussavādivasenāti āha “**paṭivijjhi**”nti, paccakkhamakāsinti attho. Paṭivedhopi na dūre ṭhitassa lakkhaṇappaṭivedho viyāti āha “**pattomhī**”ti, pāpuṇinti attho. Pāpuṇanañca na sayam gantvāti āha “**adhigatomhī**”ti, santāne uppādanavasena paṭilabhinti attho.

Opammasampaṭipādananti opammatthassa upameyyena sammadeva paṭipādanaṃ. **Atthenāti** upameyyatthena. Yathā kukkuṭiyā aṇḍesu tividhakiriyākaraṇaṃ kukkuṭacchāpakānaṃ aṇḍakosato nikkhamanassa mūlakāraṇaṃ, evaṃ bodhisattabhūtassa bhagavato tividhānupassanākaraṇaṃ avijjāṇḍakosato nikkhamanassa mūlakāraṇanti āha “**yathā hi tassā kukkuṭiyā...pe... tividhānupassanākaraṇa**”nti. “**Santāne**”ti vuttattā aṇḍasadisatā santānassa, bahi nikkhantakukkuṭacchāpakasadisatā buddhaguṇānaṃ, buddhaguṇāti ca atthato buddhoyeva “tathāgatassa

kho etaṃ, vāseṭṭha, adhivacaṇaṃ dhammakāyo itipī’ ti vacanato. **Avijjaṇḍakosassa tanubhāvoti** balavavipassanāvasena avijjaṇḍakosassa tanubhāvo, paṭicchādanasāmañña ca avijjāya aṇḍakosasadisatā. Mudubhūtaṃ kharabhāvāpatti hotīti tannivattanatthaṃ “**thaddhakharabhāvo**” ti vuttaṃ. **Tikkhakharavippasannasūrabhāvoti** ettha pariggayhamānesu saṅkhāresu vipassanāññaṇassa samādhindriyavasena sukhānuppaveso **tikkhatā**, anupavisitvāpi satindriyavasena anatikkaṇaṇato akunṭhatā **kharabhāvo**. Tikkhopi hi ekacco saro lakkhaṃ patvā kunṭho hoti, na tathā idaṃ. Satipi kharabhāve sukhūpavattivasena kilesasamudācārasaṅkhobharahitatāya saddhindriyavasena **pasannabhāvo**, satipi pasannabhāve antarā anosakkivā kilesapaccatthikānaṃ suṭṭhu abhibhavanato vīriyindriyavasena **sūrabhāvo** veditaṃ. Evamimehi pakārehi saṅkhārupekkhāññaṇameva gahitanti daṭṭhabbaṃ. **Vipassanāññaṇassa pariṇāmakāloti** vipassanāya vuṭṭhānagāminibhāvāpatti. Tadā ca sā maggaññaṇagabbhaṃ dhārentī viya hotīti āha “**gabbhaggahaṇakālo**” ti. **Gabbhaṃ gaṇhāpetvāti** saṅkhārupekkhāya anantaraṃ sikhāpattānūlomavipassanāvasena maggavijjāyanatthaṃ gabbhaṃ gaṇhāpetvā. **Abhiññāpakketi** lokiyābhiññāpakke. Lokuttarābhiññā hi avijjaṇḍakosaṃ padālitā. Potthakesu pana katthaci “chābhiññāpakke” ti likhanti, so apāṭhoti veditaṃ.

Jeṭṭho seṭṭhoti vuddhatamattā jeṭṭho, sabbaḡuṇehi uttamattā pasatthamoti seṭṭho.

Idāni “āraddhaṃ kho pana me, brāhmaṇa, vīriya” ntiādikāya desanāya anusandhiṃ dassento āha “**evaṃ bhagavā**” tiādi. Tattha **pubbabhāgato pabhuṭīti** bhāvanāya pubbabhāgīyavīriyārambhādito paṭṭhāya. **Muṭṭhassatināti** vinaṭṭhassatinā, sativirahitenāti attho. **Sāraddhakāyenāti** sadarathakāyena. **Bodhimaṇḍeti** bodhisāṅkhātassa ṇāṇassa maṇḍabhāvappatte ṭhāne. Bodhīti hi paññā vuccati. Sā ettha maṇḍā pasannā jātāti so padeso “bodhimaṇḍo” ti paññāto. **Paggahitanti** ārambhaṃ sīhilaṃ akatvā daḷhaparakkamasāṅkhātussahanabhāvena gahitaṃ. Tenāha “**asithilappavattita**” nti. **Asallinanti** asaṅkucitaṃ kosajjivasena saṅkocaṃ anāpanaṃ. **Upaṭṭhitāti** ogāhanasāṅkhātēna apilāpanabhāvena ārammaṇaṃ upagantvā ṭhitā. Tenāha “**ārammaṇābhimukhībhāvenā**” ti. Sammosassa viddhaṃsanavasena pavattiyā na sammuṭṭhāti **asammuṭṭhā**. Kiṅcāpi cittappassaddhivasena cittameva passaddhaṃ, kāyappassaddhivaseneva ca kāyo passaddho hoti, tathāpi yasmā kāyappassaddhi uppajjamānā cittappassaddhiyā saheva uppajjati, na vinā, tasmā vuttaṃ “**kāyacittappassaddhivasenā**” ti. Kāyappassaddhiyā ubhayesampi kāyānaṃ passambhanāvahattā vuttaṃ “**rūpakāyopi passaddhoyeva hotī**” ti.

So ca khoti so ca kho kāyo. **Vigatadarathoti** vigatakilesadaratho. Nāmakāye hi vigatadarathe rūpakāyopi vūpasantadarathapariḷāho hoti. **Sammā āhitanti** nānārammaṇesu vidhāvanasāṅkhātāṃ vikkhepaṃ vicchinditvā ekasmiṃyeva ārammaṇe avikkhittabhāvāpādanena sammadeva āhitaṃ ṭhapitaṃ. Tenāha “**suṭṭhu ṭhapita**” ntiādi. Cittassa anekaggabhāvo vikkhepavasena cañcalatā, sā sati ekaggaṭāya na hotīti āha “**ekaggaṃ acalaṃ nipphandana**” nti. **Ettāvatāti** “āraddhaṃ kho panā” tiādinā vīriyasatipassaddhisamādhīnaṃ kiccāsiddhidassanena. Nanu ca saddhāpaññānampi kiccāsiddhi jhānassa pubbabhāgappaṭipadāya icchitabbāti? Saccā, sā pana nānantarikabhāvena avuttasiddhāti na gahitā. Asati hi saddhāya vīriyārambhādīnaṃ asambhavoyeva, paññāpariggahe ca nesā asati ṇāyārambhādībhāvo na siyā, tathā asallīnāsamosatādayo vīriyādīnanti asallīnatādiggaṇe vettha paññākiccāsiddhi gahitāti daṭṭhabbaṃ. Jhānabhāvanāyaṃ vā samādhikiccaṃ adhiḡaṃ icchitabbanti dassetaṃ samādhipariyosānāva jhānassa pubbabhāgappaṭipadā kathitāti daṭṭhabbaṃ.

Atītabhave khandhā tappaṭibaddhāni nāmagottāni ca sabbaṃ pubbenivāsaṃtveva gahitanti āha “**kiṃ viditaṃ karoti? Pubbenivāsa**” nti. Moho paṭicchādaḡṭṭhena tamo viya tamoti āha “**sveva moho**” ti. **Obhāsakaraṇaṭṭhenāti** kātabbato karaṇaṃ. Obhāsova karaṇaṃ **obhāsakaraṇaṃ**. Attano paccayehi obhāsabhāvena nibbattetaḡṭṭhenāti attho. **Sesaṃ pasamsāvacaṇanti** paṭipakkhavidhamanapavattivisesānaṃ bodhanaṇo vuttaṃ. **Avijjā vihatāti** etena vijjānaṭṭhena vijjāti ayampi attho dīpitoti daṭṭhabbaṃ. “**Kasmā? Yasmā vijjā uppunnā**” ti etena vijjāpaṭipakkhā avijjā. Paṭipakkhatā cassā pahātabbabhāvena vijjāya ca pahāyakabhāvenāti dasseti. **Esa nayo itarasmimpi**

padadvayeti iminā “tamo vihato vinaṭṭho. Kasmā? Yasmā āloko uppanno”ti imamattham atidisati. Kilesānaṃ ātāpanaparitāpanaṭṭhena vīriyaṃ **ātāpoti** āha “**vīriyātāpena ātāpino**”ti, vīriyavatoti attho. **Pesitattassāti** yathādhīppetatthasiddhiṃ pati vissaṭṭhacittassa. **Yathā appamattassa ātāpino pahitattassa viharatoti** aññassapi kassaci mādisassāti adhippāyo. **Padhānānuyogassāti** sammappadhānamanuyuttassa.

Paccavekkhaṇāṇapariggahitanti na paṭhamadutiyañāṇadvayādhigamaṃ viya kevalanti adhippāyo. **Dassentoti** nigamanavasena dassento. Sarūpato hi pubbe dassitamevāti.

Tikkhattuṃ jātoti iminā pana idaṃ dasseti – “ahaṃ, brāhmaṇa, paṭhamavijjāya jātoyeva purejātassa sahaṃjātassa vā abhāvato sabbesaṃ vuddho mahallako, kimaṅgaṃ pana tīhi vijjāhi tikkhattuṃ jāto”ti. **Pubbenivāsaṇāṇena atītaṃsaṇāṇanti** atītārammaṇasabhāgatāya tabbhāvibhāvato ca pubbenivāsaṇāṇena atītaṃsaṇāṇaṃ pakāsetvāti yojetabbaṃ. Tattha **atītaṃsaṇāṇanti** atītakkhandaḥyatanadhātusankhāte atīte koṭṭhāse appaṭihatañāṇaṃ. Dibbacakkhuñāṇassa paccuppannārammaṇattā yathākammūpagañāṇassa anāgataṃsaṇāṇassa ca dibbacakkhuvaseva ijjanato dibbacakkhuno paribhaṇḍaṇāṇattā dibbacakkhumhiyeva ca ṭhitassa cetopariyañāṇasiddhito vuttaṃ “**dibbacakkhunā paccuppannānāgataṃsaṇāṇa**”nti. Tattha **dibbacakkhunāti** saparibhaṇḍena dibbacakkhuñāṇena. Paccuppannaṃso ca anāgataṃso ca paccuppannānāgataṃsaṃ, tattha ñāṇaṃ **paccuppannānāgataṃsaṇāṇaṃ**. Āsavakkhayañāṇādhigameneva sabbaññutaññāṇassa viya sesāsādhāraṇachañāṇadasabalañāṇāvenīkabuddhadhammādinampi anaññāsādhāraṇānaṃ buddhaguṇānaṃ ijjanato vuttaṃ “**āsavakkhayaṇa sakalalokiyalokuttaraguṇa**”nti. Tenāha “**sabbepi sabbaññuguṇe pakāsetvā**”ti.

Pītivipphāraparipuṇṇagattacittoti pītipharaṇena paripuṇṇakāyacitto. **Aññāṇanti** aññāṇassāti attho. Dhi-saddayogato hi sāmiatthe etaṃ upayogavacanāṃ. Sesamettha suviññeyyameva.

Verañjasuttavaṇṇanā niṭṭhitā.

2. Sīhasuttavaṇṇanā

12. Dutīye santhāgāraṃ (ma. ni. aṭṭha. 1.22; saṃ. ni. aṭṭha. 3.4.243) nāma ekā mahāsālāva. Uyyogakālādīsu hi rājāno tattha ṭhatvā “ettakā purato gacchantu, ettakā pacchā”tiādinā tattha nisīditvā santham karonti, mariyādaṃ bandhanti, tasmā taṃ ṭhānaṃ “**santhāgāra**”nti vuccati. Uyyogaṭṭhānato ca āgantvā yāva gehe gomayaparibhaṇḍādivasena paṭijagganaṃ karonti, tāva ekaṃ dve divase te rājāno tattha santhambhantītipi **santhāgāraṃ**. Tesam rājūnaṃ saha atthānusāsanaṃ agārantipi **santhāgāraṃ**. Gaṇarājāno hi te, tasmā uppannaṃ kiccaṃ ekassa vasena na sijjhati, sabbesaṃ chando laddhuṃ vaṭṭati, tasmā sabbe tattha sannipatitvā anusāsanti. Tena vuttaṃ “**saha atthānusāsanaṃ agāra**”nti. Yasmā vā tattha sannipatitvā “imasmim kāle kasitum vaṭṭati, imasmim kāle vapitu”ntiādinā nayena gharāvāsakiccāni sammantayanti, tasmā chiddāvachiddaṃ gharāvāsaṃ santharantītipi **santhāgāraṃ**.

Puttadāradhanādiupakaraṇapariccāgo **pāramiyo**. Attano āṅgapariccāgo **upapāramiyo**. Attanova jīvitapariccāgo **paramatthapāramiyo**. Nātināṃ atthacariyā **ñātatthacariyā**. Lokassa atthacariyā **lokattatthacariyā**. Kammasakatañāṇavasena anavajjakammāyatanasippāyatanavijjāṭṭhānaparicayavasena khandhāyatanādīparicayavasena lakkhaṇattayātīraṇavasena ca ñāṇacāro **buddhacariyā**. Āṅganayanadhanarajjaputtadāraparijāgavasena **pañca mahāpariccāge pariccajantena**. Satipi mahāpariccāgānaṃ dānapāramibhāve pariccāgavisesasabhāvadassanattañceva sudukkarabhāvadassanattañca pañcamahāpariccāgānaṃ viṣuṃ gahaṇaṃ, tatoyeva ca āṅgapariccāgato viṣuṃ nayanapariccāgaggahaṇaṃ. Pariccāgabhāvasāmaññepi dhanarajjapariccāgato puttadārapariccāgaggahaṇaṇca viṣuṃ kataṃ. Pabbajjāva saṅkhepo.

Sattasu anupassanāsūti aniccānupassanā, dukkhānupassanā, anattānupassanā, nibbidānupassanā,

virāgānupassanā, nirodhānupassanā, paṭinissaggānupassanāti imāsu sattasu anupassanāsu.

Anuviccekāraṇti aveccakaraṇaṃ. Dvīhi kāraṇehi aniyyānikasāsane ʈhitā attano sāvakkattā upagate paggaṇhanti, tāni dassetaṃ “**kasmā**”tiādi vuttaṃ.

Anupubbim kathanti (dī. ni. ʈī. 2.75-76) anupubbaṃ kathetabbakathaṃ. Kā pana sāti? Dānādikathā. Tattha **dānakathā** tāva pacurajanesupi pavattiyā sabbasattasādhāraṇattā sukarattā sīle patiṭṭhānassa upāyabhāvato ca ādito kathitā. Pariccāgasīlo hi puggalo pariggahavattḥūsu nissāṅgabhāvato sukheveva sīlāni samādiyati, tattha ca suppatiṭṭhito hoti. Sīlena dāyakappaṭiggāhakavisuddhito parānuggahaṃ vatvā parapīlānivattivacanato kiriyādhammaṃ vatvā akiriyādhammavacanato, bhogasampattihetaṃ vatvā bhavasampattihetuvacanato ca dānakathānantaraṃ **sīlakathā** kathitā. “Tāṇca sīlaṃ vaṭṭanissitaṃ, ayaṃ bhavasampatti tassa phala”nti dassanattāṃ. “Imehi ca dānasīlamayehi paṇītapāṇītataraḍibhedabhinnehi puññakiriyavattḥūhi eṭā cātumahārājikādīsū paṇītapāṇītataraḍibhedabhinna aparimeyyā dibbabhogasampattiyō laddhabbā”ti dassanattāṃ tadanantaraṃ **saggakathā**. “Svāyaṃ saggo rāgādīhi upakkiliṭṭho, sabbathānupakkiliṭṭho ariyamaggo”ti dassanattāṃ saggānantaraṃ **maggo**, maggaṇca kathentena tadadhigamūpāyasandassanattāṃ saggapariyāpannāpi pageva itare sabbepi kāmā nāma bahvādīnavā aniccā addhuvā vipariṇāmadhammāti **kāmānaṃ ādīnavo**. “Hīnā gammā pothujjanikā anariyā anattasamhitā”ti tesāṃ **okāro** lāmakabhāvo. Sabbepi bhavā kilesānaṃ vatthubhūtāti tattha **samkilesō**. Sabbaso samkilesavippamuttaṃ nibbānanti **nekkhamme ānisamso** ca kathetabboti ayamattho **maggantīti** ettha **iti**-saddena ādi-atthena dīpitoti vedittabbaṃ.

Sukhānaṃ nidānanti diṭṭhadhammikānaṃ samparāyikānaṃ nibbānupasaṃhitānañcāti sabbesampi sukhānaṃ kāraṇaṃ. Yaṇhi kiñci loke bhogasukhaṃ nāma, taṃ sabbāṃ dānādīnanti pākāṭoyamattho. Yaṃ pana jhānavipassanāmaggaḥalanibbānappaṭisaṃyuttaṃ sukhaṃ, tassāpi dānaṃ upanissayapaccayo hotiyeva. **Sampattīnaṃ mūlanti** yā imā loke padesarajjasirissariyasattaratanasamuḍjalacakkavattisampadāti evaṃpabhedā mānusikā sampattiyō, yā ca cātumahārājikādīgatā dibbasampattiyō, yā vā panaññāpi sampattiyō, tāsaṃ sabbāsaṃ idaṃ mūlakāraṇaṃ. **Bhogānanti** bhūñjitabbaṭṭhena “bhogo”ti laddhanāmānaṃ piyamaṇāpiyarūpādīnaṃ tannissayānaṃ vā upabhogasukhānaṃ patiṭṭhā niccalādhiṭṭhānatāya. **Visamagatassāti** byasanappattassa. **Tānanti** rakkhā, tato paripālanato. **Leṇanti** byasanehi paripātiyamānassa olīyanappadeso. **Gatīti** gantabbaṭṭhānaṃ. **Parāyaṇanti** paṭisaraṇaṃ. **Avassayoti** vinipatitū adento nissayo. **Ārammaṇanti** olubbhārammaṇaṃ.

Ratanamayasihāsanasadisanti sabbaratanamayasattaṅgamahāsīhāsanasadisāṃ. Evaṃ hissa mahaggaṃ hutvā sabbaso vinipatitū appadānaṭṭho dīpito hoti. **Mahāpathavīsadisāṃ** gatagataṭṭhāne patiṭṭhānassa labhāpanato. Yathā dubbalassa purisassa ālambanarajju uttiṭṭhato tiṭṭhato ca upatthambho, evaṃ dānaṃ sattānaṃ sampattibhave upapattiyā ʈhitiyā ca paccayoti āha “**ālambanaṭṭhena ālambanarajjusadisā**”nti. **Dukkhanittharaṇaṭṭhenāti** duggatidukkhaṭṭhānanittharaṇaṭṭhena. **Samassāsanaṭṭhenāti** lobhamacchariyādīpaṭisattupaddavato samassāsanaṭṭhena. **Bhayaparittānaṭṭhenāti** dāliddiyabhayato paripālanāṭṭhena. **Maccheramalādīhīti** maccheralobhadosamadaissāmicchādīṭṭhivīcīkicchādīcittamalehi. **Anupalittaṭṭhenāti** anupakkiliṭṭhatāya. **Tesanti** maccheramalādīnaṃ. Tesāṃ eva **durāsadaṭṭhena**. **Asantāsanaṭṭhenāti** santāsahetuabhāvena. Yo hi dāyako dānapati, so sampatīpi na kutoci santasati, pageva āyatīṃ. **Balavantaṭṭhenāti** mahābalavatāya. Dāyako hi dānapati sampati pakkhabalena balavā hoti, āyatīṃ pana kāyabalādīhipi. **Abhimaṅgalasammataṭṭhenāti** “vaḍḍhikāraṇa”nti abhisammatabhāvena. Vipattibhavato sampattibhavūpanayanaṃ **khemantabhūmisampāpanaṃ**.

Idāni mahābodhicariyabhāvenāpi dānaguṇaṃ dassetaṃ “**dānaṃ nāmeta**”ntiādi vuttaṃ. Tattha **attānaṃ niyyātentenāti** etena “dānaphalaṃ sammadeva passantā mahāpurisā attano jīvitampi pariccajanti, tasmā ko nāma viññujātiko bāhire vatthusmiṃ pageva saṅgaṃ kareyyā”ti ovādaṃ deti.

Idāni yā lokiyā lokuttarā ca ukkaṃsagatā sampattiyo, tā sabbā dānatoyeva pavattantīti dassento “**dānañhi**”tiādīmāha. Tattha sakkamārabrahmasampattiyo attahitāya eva, cakkavattisampatti pana attahitāya parahitāya cāti dassetuṃ sā tāsam parato cakkavattisampatti vuttā. Etā lokiyā, imā pana lokuttarāti dassetuṃ “**sāvakaṃpāramiñña**”ntiādi vuttaṃ. Tāsupi ukkaṭṭhukkaṭṭhatarukkaṭṭhatamatam dassetuṃ kamena ñāṇattayaṃ vuttaṃ. Tesam pana dānassa paccayabhāvo heṭṭhā vuttoyeva. Eteneva tassa brahmasampattiyāpi paccayabhāvo dīpitoti veditabbo.

Dānañca nāma dakkhiṇeyyesu hitajjhāsayena pūjanajjhāsayena vā attano santakassa paresaṃ pariccajanaṃ, tasmā dāyako purisapuggalo pare hanti, paresaṃ vā santakaṃ haratīti aṭṭhānametanti āha “**dānaṃ dento sīlaṃ samādātuṃ sakkoti**”ti. **Sīlalaṅkārasadiso alaṅkāro natthi** sobhāvisesāvahattā sīlassa. **Sīlapupphasadisam pupphaṃ natthi**ti etthāpi eseva nayo. **Sīlagandhasadiso gandho natthi**ti ettha “candanam tagaram vāpi”tiādikā (dha. pa. 55) gāthā – “gandho isīnam ciradikkhitānam, kāyā cuto gacchati mālutenā”tiādikā (jā. 2.17.55) jātakagāthāyo ca āharitvā vattabbā. Sīlañhi sattānam ābharaṇaṇceva alaṅkāro ca gandhaviḷeḷepanañca parassa dassanīyabhāvāvahañca. Tenāha “**sīlalaṅkārena hi**”tiādi.

Ayam saggo labbhatīti idam majjhimehi āraddham sīlam sandhāyāha. Tenevāha sakko devarājā –

“Hīnena brahmacariyena, khattiye upapajjati;
Majjhimena ca devattaṃ, uttamena visujjhatī”ti. (jā. 1.8.75);

Iṭṭhoti sukho. **Kantoti** kamanīyo. **Manāpoti** manavaḍḍhanako. Tam pana tassa iṭṭhādibhāvaṃ dassetuṃ “**niccamettha kilā**”tiādi vuttaṃ.

Dosoti aniccatādinā appassādādinā ca dūsitabhāvo, yato te viññūnam cittaṃ nārādhenti. Atha vā ādinam vāti pavattatīti **ādīnavo**, paramakapaṇatā. Tathā ca kāmā yathātatham paccavekkhantānam paccupatiṭṭhanti. **Lāmakabhāvoti** aseṭṭhehi sevitabbo, seṭṭhehi na sevitabbo nihīnabhāvo. **Samkilissananti** vibādhakatā upatāpakatā ca.

Nekkhamme ānisaṃsanti ettha “yattakā kāmesu ādinavā, tappaṭipakkhato tattakā nekkhamme ānisaṃsā. Apica nekkhammaṃ nāmetam asambādham asaṃkiliṭṭham, nikkhantaṃ kāmehi, nikkhantaṃ kāmāsaññāya, nikkhantaṃ kāmavitakkehi, nikkhantaṃ kāmāpariḷāhehi, nikkhantaṃ byāpādasaññāyā”tiādinā nayena nekkhamme ānisaṃse pakāsesi. Pabbajjāyaṃ jhānādīsu ca guṇe vibhāvesi vaṇṇesi. **Kallacittanti** kammaniyacittaṃ heṭṭhā pavattitadesanāya assaddhiyādīnam cittadosānam vigatattā upari desanāya bhājanabhāvūpagamena kammakkhamacittaṃ. Aṭṭhakathāyaṃ pana yasmā assaddhiyādayo cittassa rogabhūtā, tadā te vigatā, tasmā āha “**arogacitta**”nti. **Diṭṭhimānādikilesavigamena muducittaṃ**. Kāmacchandādivigamena **vinīvaraṇacittaṃ**. Sammāpaṭipattiyam ulārapītipāmojjayogena **udaggacittaṃ**. Tattha saddhāsampattiyā **pasannacittaṃ**. Yadā bhagavā aññāsīti sambandho. Atha vā **kallacittanti** kāmacchandavigamena arogacittaṃ. **Muducittanti** byāpādivigamena mettāvasena akāṭhinacittaṃ. **Vinīvaraṇacittanti** uddhaccakukkucavigamena avikkhepato tena apihitacittaṃ. **Udaggacittanti** thinamiddhavigamena sampaggahitavasena alīnacittaṃ. **Pasannacittanti** vicikicchāvigamena sammāpaṭipattiyam adhimuttacittanti evamettha sesapadānam attho veditabbo.

Seyyathāpītiādinā upamāvasena sīhassa kilesappahānam ariyamagguppādānañca dasseti. **Apagatakālakanti** vigatakālakam. **Sammadevāti** suṭṭhudeva. **Rajananti** nīlapītalohitādiraṅgajātam. **Paṭiggaṇheyyāti** gaṇheyya, pabhassaram bhavēyya. **Tasmimēveva āsaneti** tassamyeva nisajjāyaṃ. Etenassa lahuvipassakatā tikkhapaññatā sukhappaṭipadakhippābhīññatā ca dassitā hoti. **Virajanti** apāyagamānīyarāgarajādīnam vigamena virajam. Anavasesadiṭṭhivicikicchāmalāpagamena **vītamalam**. Paṭhamamaggavajjhakilesarajābhāvena vā **virajam**. Pañcavidhadussīlyamalavigamena **vītamalam**. **Tassa uppattiākāradassanatthanti** kasmā vuttaṃ? Nanu maggaññaṃ asaṅkhatadhammārammaṇanti

codanaṃ sandhāyāha “**tañhī**”tiādi. Tattha **paṭivijjhantanti** asammoappaṭivedhavasena paṭivijjhantaṃ. Tenāha “**kiccavasena**”ti. Tatridaṃ upamaṃsaṃsandanaṃ – vatthaṃ viya cittaṃ, vatthassa āgantukamalehi kiliṭṭhabhāvo viya cittaṃ rāgādimalēhi saṃkiliṭṭhabhāvo, dhovanasilātaṃ viya anupubbīkathā, udakaṃ viya saddhā, udakena temetvā ūsagomayachārikakhārehi kālake sammadditvā vatthassa dhovanappayogo viya saddhāsinehena temetvā temetvā satisamādhīpaññāhi dose sithile katvā sutādividhinā cittaṃ sodhane vīriyārambho. Tena payogena vatthe kālakāpagamo viya vīriyārambhena kilesavikkhambhanaṃ, raṅgajātaṃ viya ariyamaggo, tena suddhavatthassa pabhassarabhāvo viya vikkhambhitakilesassa cittaṃ maggena pariyodapananti.

“Diṭṭhadhammo”ti vatvā dassanaṃ nāma ñāṇadassanato aññampi atthīti tannivattanattaṃ “**pattadhammo**”ti vuttaṃ. Patti nāma ñāṇasampattito aññāpi vijjati tato visesanattaṃ “**viditadhammo**”ti vuttaṃ. Sā panesā viditadhammatā dhammesu ekadesenapi hotīti nippadesato viditabhāvaṃ dassetuṃ. “**Pariyogālhaddhammo**”ti vuttaṃ. Tenassa saccābhisambodhamyeva dīpeti. Maggañāṇāñhi ekābhisamayavasena pariññādīkiccaṃ sādheṃtaṃ nippadesena catusaccadhammaṃ samantato ogāḷhaṃ nāma hoti. Tenāha “**diṭṭho ariyasaccadhammo etenāti diṭṭhadhammo**”ti. **Tiṇṇā vicikicchāti** sappaṭibhayakantārasadisā soḷasavatthukā aṭṭhavatthukā ca tiṇṇā nittiṇṇā vicikicchā. **Vigatā kathāmkathāti** pavattiādīsu “evaṃ nu kho, na nu kho”ti evaṃ pavattikā vigatā samucchinnā kathāmkathā. Sārajakarānaṃ pāpadhammānaṃ pahīnattā tappaṭipakkhesu sīlādiguṇesu paṭiṭṭhitattā **vesārajjam** visāradabhāvaṃ veyyattiyam **patto**. Attanā eva paccakkhato diṭṭhattā na paraṃ pacceti, na cassa paro paccetabbo atthīti **aparappaccayo**.

Uddisitvā katanti attānaṃ uddisitvā māraṇavasena kataṃ nibbattaṃ maṃsaṃ. **Paṭiccamanti** ettha kamma-saddo kammaśādhano atītakāliko cāti āha “**attānaṃ paṭiccakata**”nti. **Nimittakammassetam adhvacaṇam** “paṭicca kammaṃ phusati”tiādīsu (jā. 1.4.75) viya. **Nimittakammassāti** nimittabhāvena laddhabbakamma. Karaṇavasena paṭiccamammaṃ ettha atthīti maṃsaṃ **paṭiccamammaṃ** yathā buddhi buddhaṃ. Taṃ etassa atthīti buddho. Sesamettha uttānameva.

Sīhasuttavaṇṇanā niṭṭhitā.

3-4. Assājānīyasuttādivaṇṇanā

13-14. Tatiye **sāṭṭheyyānīti** saṭṭattāni. Sesapadesupi eseva nayo. Tāni panassa sāṭṭheyyādīni kāyacittujukatāpaṭipakkhabhūtā lobhasahagatacittuppādassa pavattiākāravisesā. Tattha yassa kismiñcīdeva ṭhāne ṭhātukāmassa sato yaṃ ṭhānaṃ manussānaṃ sappaṭibhayaṃ, purato gantvā tattheva sappaṭibhayaṭṭhāneva ṭhassāmīti na hoti, vañcanādhīppāyabhāvato ṭhātukāmaṭṭhāneyeva nikhātattambho viya cattāro pāde niccāletvā tiṭṭhati, ayaṃ **satho** nāma, imassa sāṭṭheyyassa pākātakaraṇaṃ. Tathā yassa kismiñcīdeva ṭhāne nivattitvā khandhagataṃ pātetukāmassa sato yaṃ ṭhānaṃ manussānaṃ sappaṭibhayaṃ, purato gantvā tattheva pātesāmīti na hoti, pātetukāmaṭṭhāneyeva nivattitvā pātetī, ayaṃ **kūto** nāma. Yassa kālena vāmato, kālena dakkhiṇato, kālena ujumaggeneva ca gantukāmassa sato yaṃ ṭhānaṃ manussānaṃ sappaṭibhayaṃ, purato gantvā tattheva evaṃ karissāmīti na hoti, yadicchakaṃ gantukāmaṭṭhāneyeva kālena vāmato, kālena dakkhiṇato, kālena ujumaggaṃ gacchati, tathā leṇḍaṃ vā passāvaṃ vā vissajjetukāmassa idaṃ ṭhānaṃ susammaṭṭhaṃ ākiṇṇamanussaṃ ramaṇīyaṃ. Imasmiṃ ṭhāne evarūpaṃ kātuṃ na yuttaṃ, purato gantvā paṭicchannaṭṭhāne karissāmīti na hoti, tattheva karoti, ayaṃ **jimho** nāma. Yassa pana kismiñcī ṭhāne maggā ukkamma nivattitvā paṭimaggam ārohitukāmassa sato yaṃ ṭhānaṃ manussānaṃ sappaṭibhayaṃ, purato gantvā tattheva evaṃ karissāmīti na hoti, paṭimaggam ārohitukāmaṭṭhāneyeva maggā ukkamma nivattitvā paṭimaggam ārohati, ayaṃ **vaṅko** nāma. Iti imaṃ catubbidhampi kiriyaṃ sandhāyetaṃ vuttaṃ “**yāni kho panassa tāni sāṭṭheyyāni...pe... āvikattā hoti**”ti. Catutthe natthi vattaṃ.

Assājānīyasuttādivaṇṇanā niṭṭhitā.

5-8. Malasuttādivaṇṇanā

15-18. Pañcame (dha. pa. aṭṭha. 2.241) yā kāci pariyatti vā sippaṃ vā yasmā asajjhāyantaṃ ananuyuñjantaṃ vinassati, nirantaraṃ vā na upaṭṭhāti, tasmā “**asajjhāyamalā mantā**”ti vuttaṃ. Yasmā pana gharāvāsaṃ vasantaṃ uṭṭhāyutṭhāya jīṇṇappaṭisaṅkharāṇādīni akaraṇtaṃ gharaṃ nāma vinassati, tasmā “**anuṭṭhānamalā gharā**”ti vuttaṃ. Yasmā gihissa vā pabbajitassa vā kosajjavasena sarīrapajaggaṇaṃ vā parikkhārappaṭijaggaṇaṃ vā akaraṇtaṃ kāyo dubbaṇṇo hoti, tasmā “**malaṃ vaṇṇassa kosajja**”nti vuttaṃ. Yasmā pana gāvo rakkhantaṃ pamādasena niddāyantaṃ vā kīḷantaṃ vā tā gāvo atitthapakkhandaṇādīhi vā vāḷamigacorādiupaddavena vā paresaṃ sālikkhattādīni otarivā khādanavasena vā vināsamāpajanti, sayampi daṇḍaṃ vā paribhāsaṃ vā pāpuṇāti, pabbajitaṃ vā pana chadvārādīni arakkhantaṃ pamādasena kilesā otarivā sāsanā cāventi, tasmā “**pamādo rakkhato mala**”nti vuttaṃ. So hissa vināsāvahena malaṭṭhāniyattā **malaṃ**.

Duccaritaṃ aticāro. Aticāriniñhi itthiṃ sāmikopi gehā nīharati, mātāpitūnaṃ santikaṃ gatampi “**tvam kulassa aṅgārabhūtā, akkhīhi na daṭṭhabbā**”ti taṃ mātāpitaropi nīharanti, sā anāthā vicarantī mahādukkhaṃ pāpuṇāti. Tenassā duccaritaṃ “**mala**”nti vuttaṃ. **Dadatoti** dāyakaṃ. Yassa hi khettakasaṅkale “**imasmim khetto sampanne salākabhattādīni dassāmī**”ti cintetvāpi nipphanne sasse maccheraṃ uppajjitvā cāgacittaṃ nivāreti, so maccheravasena cāgacitte aviruhante manussasampatti, dibbasampatti, nibbānasampattī tisso sampattiyo na labhati. Tena vuttaṃ “**maccheraṃ dadato mala**”nti. Aññesupi evarūpesu eseva nayo. **Pāpakā dhammā**ti akusalā dhammā. Te pana idhaloke paraloke ca malameva. **Tatoti** heṭṭhā vuttamalato. **Malataranti** atirekamalaṃ. Chaṭṭhādīni uttānatthāneva.

Malasuttādivaṇṇanā niṭṭhitā.

9. Pahārādasuttavaṇṇanā

19. Navame (udā. aṭṭha. 45; sāratta. ṭī. cūḷavagga 3.384) **asurā**ti devā viya na suranti na kīḷanti na virocantīti asurā. Surā nāma devā, tesam paṭipakkhāti vā **asurā**, vepacittipahārādādayo. Tesam bhavanaṃ sinerussa heṭṭhābhāge. Te tattha pavisaṅkā nikkhamantā sinerupāde maṇḍapādīni nimminivā kīḷantā abhiramanti. Sā tattha tesam abhirati. Ime guṇe disvāti āha “**ye disvā disvā asurā mahāsamudde abhiramanti**”ti.

Yasmā lokiyā jambudīpo, himavā tattha paṭiṭṭhitasamuddadahaḥpabbatā tappabhavā nadiyoti etesu yaṃ yaṃ na manussagocaraṃ, tattha sayam sammūḷhā aññepi sammohayanti, tasmā tattha sammohavidhamanattaṃ “**ayaṃ tvaṃ jambudīpo**”tiādi āradhamaṃ. Dasasahassayojanaparimāṇo āyāmato vitthārato cāti adhippāyo. Tenāha “**tatthā**”tiādi. **Udakena ajjhotthaṇo** tadupabhogisattānaṃ puññakkhayaṇa. Sundaradassanaṃ kūṭanti **sudassanakūṭam**, yaṃ loke “**hemakūṭa**”nti vuccati. **Mūlagandho** kālānusāriyādi. **Sāragandho** candanādi. **Pheggugandho** salalādi. **Tacagandho** lavaṅgādi. **Papaṭikāgandho** kapitthādi. **Rasagandho** sajjulasādi. **Pattagandho** tamālahiriverādi. **Pupphagandho** nāgakusumādi. **Phalagandho** jātiphalādi. **Gandhagandho** sabbesaṃ gandhānaṃ gandho. “**Sabbāni puthulato paññāsa yojanāni, āyāmato pana ubbedhato viya dviyojanasatānevā**”ti vadanti.

Manoharasilātālānīti ratanamayattā manuññasopānasilātālāni. **Supaṭiyattānī**ti tadupabhogisattānaṃ sādharāṇakammunāva suṭṭhu paṭiyattāni susaṅghitāni honti. Macchakacchapādīni udakaṃ malaṃ karonti, tadabhāvato **phalikasadisanimmalodakāni**. Tiriyato dīghaṃ uggatakūṭanti “**tiracchānapabbata**”nti āha. **Purimāni nāmagottānī**ti ettha nadī ninnagātiādikam gottam, gaṅgā yamunātiādikam nāmaṃ.

Savamānāti sandamānā. **Pūratanti** puṇṇabhāvo. **Masāragallaṃ** “**cittaphalika**”ntipi vadanti. **Mahataṃ bhūtānanti** mahantānaṃ sattānaṃ. **Timī timiṅgalā timitimiṅgalā**ti tisso macchajātiyo.

Timiṃ gilanasamatthā timiṃgalā. Timiṃca timiṃgalaṃca gilanasamatthā timitimiṃgalāti vadanti.

Mama sāvakāti sotāpannādike ariyapuggale sandhāya vadati. **Na saṃvasatī**ti uposathakammādivasena saṃvāsaṃ na karoti. **Ukkhipatī**ti apaneti. **Vimuttīrasoti** kilesehi vimuccanaraso. Sabbā hi sāsanasampatti yāvadeva anupādāya āsavehi cittassa vimuttiatthā.

Ratanānīti ratijananatṭhena ratanāni. Satipaṭṭhānādayo hi bhāviyamānā pubbabhāgepi anappakaṃ pītipāmojjaṃ nibbattenti, pageva aparabhāge. Vuttaṃhettaṃ –

“Yato yato sammasati, khandhānaṃ udayabbayaṃ;
Labhati pītipāmojjaṃ, amataṃ taṃ vijānata”nti. (dha. pa. 374) –

Lokiyaratananibbattaṃ pana pītipāmojjaṃ na tassa kalabhāgampi agghati. Apica –

“Cittīkataṃ mahagghaṃca, atulaṃ dullabhadassanaṃ;
Anomasattaparibhogaṃ, ratananti pavuccati”. (dī. ni. aṭṭha. 2.33; saṃ. ni. aṭṭha. 3.5.223; khu. pā. aṭṭha. 6.3; su. ni. aṭṭha. 1.226; mahāni. aṭṭha. 50);

Yadi ca cittīkatādibhāvena ratanaṃ nāma hoti, satipaṭṭhānādīnaṃyeva bhūtaṃ ratanabhāvo. Bodhipakkhiyadhammānaṃhi so ānubhāvo, yaṃ sāvakā sāvakaṃpāramiṇānaṃ, paccekabuddhā paccekabodhiṇānaṃ, sammāsambuddhā sammāsambodhiṃ adhigacchanti āsannaṃkāraṇatā. Āsannaṃkāraṇānaṃhi dānādiupanissayoti evaṃ ratijananatṭhena cittīkatādiatthena ca ratanabhāvo bodhipakkhiyadhammānaṃ sātisayo. Tena vuttaṃ “**tatrimāni ratanāni, seyyathidaṃ. Cattāro satipaṭṭhānā**”tiādi.

Tattha ārammaṇe okkantivā upaṭṭhānatṭhena upaṭṭhānaṃ, satiyeva upaṭṭhānanti **satipaṭṭhānaṃ**. Ārammaṇassa pana kāyādivasena catubbidhattā vuttaṃ “**cattāro satipaṭṭhānā**”ti. Tathā hi kāyavedanācittadhammesu subhasukhaniccaattasaṃñānaṃ pahānato asubhadukkhaniccānattabhāvaggahaṇato ca nesaṃ kāyānupassanādibhāvo vibhatto.

Sammā padahanti etena, sayam vā sammā padahati, pasatthaṃ sundaraṃ vā padahantīti **sammappadhānaṃ**, puggalassa vā sammadeva padhānabhāvakaraṇato **sammappadhānaṃ** vīriyasetaṃ adhivacanaṃ. Tampi anuppannuppannānaṃ akusalānaṃ anuppādanappahānavasena anuppannuppannānaṃ kusalānaṃ dhammānaṃ uppādanaṭṭhāpanavasena ca catukiccasādhakattā vuttaṃ “**cattāro sammappadhānā**”ti.

Ijjhatīti iddhi, samijjhati nipphajjatīti attho. Ijjhanti vā tāya sattā iddhā vuddhā ukkaṃsagatā hontīti iddhi. Iti paṭhamena atthena iddhi eva pādoti **iddhipādo**, iddhikoṭṭhāsoti attho. Dutiyena atthena iddhiyā pādo patiṭṭhā adhigamupāyoti **iddhipādo**. Tena hi uparūparivisesasāṅkhātaṃ iddhiṃ pajjanti pāpuṇanti. Svāyaṃ iddhipādo yasmā chandādike cattāro adhipatidhamme dhure jetṭhake katvā nibbattīyati, tasmā vuttaṃ “**cattāro iddhipādā**”ti.

Pañcindriyānīti saddhādāni pañca indriyāni. Tattha assaddhiyaṃ abhibhavitvā adhimokkhalakkhaṇe indaṭṭhaṃ kāretīti **saddhindriyaṃ**. Kosajjaṃ abhibhavitvā paggahalakkhaṇe, pamādaṃ abhibhavitvā upaṭṭhānalakkhaṇe, vikkhepaṃ abhibhavitvā avikkhepalakkhaṇe, aññānaṃ abhibhavitvā dassanalakkhaṇe indaṭṭhaṃ kāretīti **paññindriyaṃ**.

Tāniyeva assaddhiyādīhi anabhibhavanīyato akampiyatṭhena sampayuttadhammesu thirabhāvena ca **balāni** veditabbāni.

Satta bojjaṅgāti bodhiyā, bodhissa vā aṅgāti **bojjaṅgā**. Yā hi eṣā dhammasāmaggī yāya lokuttaramaggakkhaṇe uppajjamānāya līnuddhaccapatiṭṭhānāyūhanakāmasukhattakilamathānuyogaucchedasassatābhinivesādīnaṃ anekesaṃ upaddavānaṃ paṭipakkhabhūtāya satidhammavicayavīriyapītipassaddhisamādhiupekkhāsāṅkhātāya dhammasāmaggiyā ariyasāvako bujjiḥati, kilesaniddāya vuṭṭhahati, cattāri ariyasaccāni paṭivijjiḥati, nibbānameva vā sacchikarotīti “**bodhī**”ti vuccati. Tassā dhammasāmaggisāṅkhātāya bodhiyā aṅgātipi **bojjaṅgā** jhānaṅgamaggaṅgādayo viya. Yopesa vuttapakārāya dhammasāmaggiyā bujjiḥatīti katvā ariyasāvako “**bodhī**”ti vuccati. Tassa bodhissa aṅgātipi **bojjaṅgā** senaṅgarathaṅgādayo viya. Tenāhu porāṇā “bujjhanakassa puggalassa aṅgāti bojjaṅgā”ti (vibha. aṭṭha. 466; saṃ. ni. aṭṭha. 3.5.182; paṭi. ma. aṭṭha. 2.2.17). “Bodhāya saṃvattantīti bojjaṅgā”tiādīnā (paṭi. ma. 2.17) nāyenaṃ bojjaṅgatto veditabbo.

Ariyo aṭṭhaṅgiko maggoti taṃtaṃmaggavajjhehi kilesehi ārakattā, ariyabhāvakarattā, ariyaphalappaṭilābhakarattā ca ariyo. Sammādiṭṭhiādīni aṭṭhaṅgāni assa atthi, aṭṭha aṅgāniyeva vā aṭṭhaṅgiko. Mārento kilese gacchati nibbānatthikehi vā maggiyati, sayamaṃ vā nibbānaṃ maggatīti maggoti evametesaṃ satipaṭṭhānādīnaṃ atthavibhāgo veditabbo.

Sotāpannoti maggasāṅkhātaṃ sotaṃ āpajjitvā pāpuṇitvā ṭhito, sotāpattiphalatṭhoti attho. **Sotāpattiphalasacchikiriyāya paṭipannoti** sotāpattiphalassa attapaccakkhakarāyā paṭipajjamāno paṭhamamaggaṭṭho, yo aṭṭhamakotipi vuccati. **Sakadāgāmīti** sakideva imaṃ lokaṃ paṭisandhiggahaṇavasena āgamanasīlo dutiyaphalaṭṭho. **Anāgāmīti** paṭisandhiggahaṇavasena kāmaloḥkaṃ anāgamanasīlo tatiyaphalaṭṭho. Yo pana saddhānusārī dhammānusārī ekabījītiyamādiko ariyapuggalavibhāgo, so etesaṃyeva pabhedoti. Sesamaṃ vuttanayasadisameva.

Pahārādasuttavaṇṇanā niṭṭhitā.

10. Uposathasuttavaṇṇanā

20. Dasame **tadahuposatheti** (udā. aṭṭha. 45; sāratta. ṭi. cūḷavagga 3.383) tasmim uposathadivasabhūte ahaṇi. **Uposathakarāṇatthāyāti** ovādapātimokkhaṃ uddisitumaṃ. **Uddhastamaṃ aruṇanti** aruṇuggamaṃ. **Uddisatu, bhante, bhagavā bhikkhūnaṃ pātimokkhanti** thero bhagavantaṃ pātimokkhuddesaṃ yāci. Tasmim kāle “na, bhikkhave, anuposathe uposatho kātabbo”ti (mahāva. 136) sikkhāpadassa apaññattattā. Kasmā pana bhagavā tiyāmarattim vītināmesi? Tato paṭṭhāya ovādapātimokkhaṃ anuddisitukāmo tassa vatthumaṃ pākātaṃ kātumaṃ. **Addasāti** kathaṃ addasa? Attano cetopariyañāṇena tassaṃ parisati bhikkhūnaṃ cittāni pariṇānto tassa dussīlassa cittaṃ passi. Yasmā pana citte diṭṭhe taṃsamaṅgīpuggalo diṭṭho nāma hoti, tasmā “**addasā kho āyasmā mahāmoggallāno taṃ puggalaṃ dussīla**”ntiādi vuttaṃ. Yatheva hi anāgate sattasu divasesu pavattaṃ paresamaṃ cittaṃ cetopariyañāṇalābhī jānāti, evamaṃ atītepīti. **Majjhe bhikkhusaṅghassa nisinnanti** saṅghapariyāpanno viya bhikkhusaṅghassa anto nisinnaṃ. **Diṭṭhosīti** ayaṃ na pakatattoti bhagavatā diṭṭho asi. Yasmā ca evamaṃ diṭṭho, tasmā natthi te tava bhikkhūhi saddhim ekakammādisaṃvāso. Yasmā pana so saṃvāso tava natthi, tasmā utṭhehi, āvusoti evamettha padayojanā veditabbā.

Tatiyampi kho so puggalo tuṇhī ahoṣīti anekavāraṃ vatvāpi “thero sayameva nibbinno oramissatī”ti vā, “idāni imesaṃ paṭipattim jānissāmī”ti vā adhippāyena tuṇhī ahoṣī. **Bāhāyamaṃ gahetvāti** “bhagavatā mayā ca yāthāvato diṭṭho, yāvatatiyamaṃ ‘utṭhehi, āvuso’ti ca vutto na vuṭṭhāti, idānissa nikkāḍḍhanakālo, mā saṅghassa uposathantarāyo ahoṣī”ti taṃ bāhāyamaṃ aggahesi, tathā gahetvā. **Bahi dvārakoṭṭhakā nikkhāmetvāti** dvārakoṭṭhakā dvārasālāto nikkhāmetvā. **Bahīti** pana nikkhāmitaṭṭhānadassanaṃ. Atha vā **bahidvārakoṭṭhakāti** bahidvārakoṭṭhakatopi nikkhāmetvā, na antodvārakoṭṭhakato eva. Ubhayatthāpi vihārato bahikatvāti attho. **Sūcighaṭīkaṃ datvāti** aggaḷasūciñca uparighaṭīkañca ādahitvā, suṭṭhutamaṃ kavātaṃ thaketvāti attho. **Yāva bāhāgahaṇāpi nāmāti** iminā “aparissuddhā, ānanda, parisā”ti vacanaṃ sutvā eva hi tena pakkamitabbamaṃ siyā, evamaṃ apakkamitvā

yāva bāhāgahaṇāpi nāma so moghapuriso āgammessati, acchariyamidanti dasseti. Idañca garahanacchariyamevāti vedittabbaṃ.

Atha bhagavā cintesi – “idāni bhikkhusaṅghe abbudo jāto, aparisuddhā puggalā uposathaṃ āgacchanti, na ca tathāgatā aparisuddhāya parisāya uposathaṃ karonti, pātimokkhaṃ uddisanti. Anuddisante ca bhikkhusaṅghassa uposatho pacchijjati. Yaṃnūnāhaṃ ito paṭṭhāya bhikkhūnaṃyeva pātimokkhuddesaṃ anujāneyya”nti. Evaṃ pana cintetvā bhikkhūnaṃyeva pātimokkhuddesaṃ anujāni. Tena vuttaṃ “**atha kho bhagavā...pe... pātimokkhaṃ uddiseyyāthā**”ti. Tattha **na dānāhanti** idāni ahaṃ uposathaṃ na karissāmi, pātimokkhaṃ na uddisissāmi paccekaṃ **na**-kārena sambandho. Duvidhañhi pātimokkhaṃ – āṇāpātimokkhaṃ, ovādapātimokkhanti. Tesu “suṇātu me, bhante”tiādikaṃ (mahāva. 134) āṇāpātimokkhaṃ. Taṃ sāvakaṃ uddisanti, na buddhā, yaṃ anvaddhamāsaṃ uddisīyati. “Khantī paramaṃ...pe... sabbapāpassa akaraṇaṃ...pe... anupavādo anupaghāto...pe... etaṃ buddhāna sāsana”nti (dī. ni. 2.90; dha. pa. 183-185; udā. 36; netti. 30) imā pana tisso gāthā ovādapātimokkhaṃ nāma. Taṃ buddhāva uddisanti, na sāvakaṃ, channampi vassānaṃ accayena uddisanti. Dīghāyukabuddhānañhi dharamānakāle ayameva pātimokkhuddeso, appāyukabuddhānaṃ pana paṭhamabodhiyaṃyeva. Tato paraṃ itaro. Tañca kho bhikkhūyeva uddisanti, na buddhā, tasmā amhākampi bhagavā vīsativassamattaṃ imaṃ ovādapātimokkhaṃ uddisitvā imaṃ antarāyaṃ disvā tato paraṃ na uddisi. **Aṭṭhānanti** akāraṇaṃ. **Anavakāso**ti tasseva vevacanaṃ. Kāraṇaṃhi yathā tiṭṭhati ettha phalaṃ tadāyattavuttitāyāti “**ṭhāna**”nti vuccati, evaṃ “**avakāso**”ti vuccati. **Yanti** kiriyāparāmasanaṃ.

Aṭṭhime, bhikkhave, mahāsamuddeti ko anusandhi? Yvāyaṃ aparisuddhāya parisāya pātimokkhassa anuddeso vutto, so imasmiṃ dhammavinaye acchariyo abbhuto dhammoti taṃ aparehipi sattahi acchariyabbhutadhammehi saddhiṃ vibhajitvā dassetukāmo paṭhamam tāva tesam upamābhāvena mahāsamudde aṭṭha acchariyabbhutadhamme dassento sathā “**aṭṭhime, bhikkhave, mahāsamudde**”tiādimaṃha.

Uposathasuttavaṇṇanā niṭṭhitā.

Mahāvaggavaṇṇanā niṭṭhitā.

3. Gahapativaggo

1-7. Paṭhamauggasuttādivaṇṇanā

21-27. Tatiyassa paṭhamadutiyesu natthi vattabbaṃ. Tatiye “hatthago”ti vattabbe “**hatthako**”ti vuttaṃ. So hi rājapurisānaṃ hatthato yakkhassa hatthaṃ, yakkhassa hatthato bhagavato hatthaṃ, bhagavato hatthato puna rājapurisānaṃ hatthaṃ gatattā nāmato **hatthako ālavakoti** jāto. Tenāha “**ālavakayakkhassa hatthato hatthehi sampañcchittā hatthakoti laddhanāmo rājakumāro**”ti. Catutthādīni uttānathāneva.

Paṭhamauggasuttādivaṇṇanā niṭṭhitā.

8. Dutiyabalasuttavaṇṇanā

28. Aṭṭhame khīṇāsavassa sabbesaṃ saṅkhārānaṃ aniccatā asammohavasena kiccato maggapaññāya suppaṭividdhā, vipassanāya ārammaṇakaraṇavasenaṃpīti dassento āha “**sahavipassanāya maggapaññāyā**”ti. **Ime kāmā**ti dvepi kāme vadati. Kilesavasena uppajjamāno hi pariḷāho vatthukāmasannissayo vatthukāmavisayo vāti dvepi sapariḷāhaṭṭhena aṅgārakāsu viyāti “**aṅgārakāsūpamā**”ti vuttā. Anto vuccati lāmakaṭṭhena taṇhā, byantaṃ vigatantaṃ bhūtanti **byantibhūtanti** āha “**vigatantabhūta**”nti, nittaṇhanti attho.

Dutiyabalasuttavaṇṇanā niṭṭhitā.

9. Akkhaṇasuttavaṇṇanā

29. Navame yasmā mahiddhikapetā devāsurānaṃ āvāhaṃ gacchanti, vivāhaṃ na gacchanti, tasmā pettivisayeneva asurakāyo gahitoti veditabbo. Petāsuraṃ pana petā evāti tesam petehi saṅgaho avuttasiddhova.

Akkhaṇasuttavaṇṇanā niṭṭhitā.

10. Anuruddhamahāvitakkasuttavaṇṇanā

30. Dasame **appicchassāti** na icchassa. Abhāvattho hettha **appasaddo** “appaḍaṃsamakasavātātapā”tiādīsu (a. ni. 10.11) viya. Paccayesu appiccho **paccayappiccho**, cīvarādīpaccayesu icchārahito. **Adhigamappicchoti** jhānādiadhigamavibhāvane icchārahito. **Pariyattiappicchoti** pariyattiyam bāhusaccavibhāvane icchārahito. **Dhutaṅgappicchoti** dhutaṅgesu appiccho dhutaṅgabhāvavibhāvane icchārahito. **Santaguṇaniguhanenāti** attani saṃvijjānānaṃ jhānādiguṇānaṃceva bāhusaccaguṇassa dhutaṅgaguṇassa ca niguhanena chādanena. **Sampajjati** nipphajjati sījjhati. **No mahicchassāti** mahatiyā icchāya samannāgatassa no sampajjati anudhammassapi anipphajjanato. **Pavivittassāti** pakārehi vivittassa. Tenāha “**kāyacittaupadhivivekehi vivittassā**”ti. **Ārambhavatthuvasenāti** bhāvanābhīyogavasena ekībhāvova kāyavivekoti adhippeto, na gaṇasaṅgaṇikābhāvamattanti dasseti. **Kammanti** yogakammaṃ.

Sattehi kilesehi ca saṅgaṇaṃ samodhānaṃ saṅgaṇikā, sā āramitabbaṭṭhena āramo etassāti **saṅgaṇikārāmo**, tassa. Tenāha “**gaṇasaṅgaṇikāya cevā**”tiādi. **Āraddhavīriyassāti** paggaḥitavīriyassa. Tañca kho upadhiviveke ninnatāvasena “ayaṃ dhammo”ti vacanato. Esa nayo itaresupi. Vivatṭanissitaṃyeva hi samādhānaṃ idhādhippetam, tathā paññāpi. Kamma-katapaññāya hi tṭhito kammavasena bhavesu nānappakāro anattoti jānanto kammakkhayakaraṃ ñāṇaṃ abhipattheti, tadatthañca ussāhaṃ karoti. Mānādayo sattasantānaṃ saṃsāre papañcenti vitthārentīti **papañcāti** āha “**taṇhāmānadiṭṭhipapañcarahitattā**”tiādi. Sesamettha suviññeyyameva.

Anuruddhamahāvitakkasuttavaṇṇanā niṭṭhitā.

Gahapativaggavaṇṇanā niṭṭhitā.

4. Dānavaggo

1-4. Paṭhamadānasuttādivaṇṇanā

31-34. Catutthassa paṭhame **āsajjāti** yassa deti, tassa āgamanahetu tena samāgamanimittam. **Bhayāti** bhayahetu. Nanu bhayaṃ nāma laddhakāmatārāgādayo viya cetanāya avisuddhikaram, taṃ kasmā idha gahitanti? Nayidaṃ tādīsaṃ vohārabhayādiṃ sandhāya vuttanti dassetuṃ “**ayaṃ adāyako akārako**”tiādi vuttam. **Adāsi meti** yaṃ pubbe kataṃ upakāraṃ cintevā dīyati, taṃ sandhāya vuttam. **Dassati meti** paccupakārāsīyā yaṃ dīyati, taṃ sandhāya vadati. **Sāhu dānanti** dānaṃ nāmetam paṇḍitapaññāntanti sādhusamācāre tṭhāvā deti. **Alaṅkārattanti** upasobhanattham. Dānañhi datvā taṃ paccavekkhantassa pāmojjapītisomanassādayo uppajjanti, lobhadosaissāmaccherādayopi vidūrī bhavanti. Idāni dānaṃ anukūladhammaparibrūhanena paccanīkadhammavidūrīkaraṇena ca bhāvanācittassa upasobhanāya ca parikkhārāya ca hotīti “**alaṅkārattañceva parikkhārattañca deti**”ti vuttam. Tenāha “**dānañhi cittaṃ muduṃ karoti**”tiādi. **Muducitto hoti** laddhā dāyake “iminā mayhaṃ saṅgaho kato”ti, dātāpi laddhari. Tena vuttam “**ubhinnampi cittaṃ muduṃ karoti**”ti.

Adantadamananti adantā anassavāpissa dānena dantā assavā honti, vase vattanti. **Adānaṃ dantadūsakanti** adānaṃ pubbe dantānaṃ assavānaṃpi vighātuppādanena cittaṃ dūseti. **Unnamanti** dāyakaṃ piyaṃvadā ca paresaṃ garucittikāraṭṭhānatāya. **Namanti**paṭiggāhakā dānena piyavācāya ca laddhasaṅgahāsaṅgāhakānaṃ.

Cittālaṅkāradānameva uttamaṃ anupakkiliṭṭhatāya suparisuddhatāya guṇavisesapaccayatāya ca. Dutiyādīni uttānatthāneva.

Paṭhamadānasuttādivaṇṇanā niṭṭhitā.

5. Dānūpapattisuttavaṇṇanā

35. Pañcame **dānapaccayā**ti dānakāraṇā, dānamayapuññaṃ katattā upacittatī attho. **Upapattiyoti** manussesu devesu ca nibbattiyo. **Ṭhapetī** ekavārameva anuppajjitvā yathā upari tenevākārena pavattati, evaṃ ṭhapeti. Tadeva cassa adhiṭṭhānanti āha “**tasseva vevacana**”nti. **Vaḍḍhetī** brūheti na hāpeti. **Vimuttanti** adhimuttaṃ, ninnaṃ poṇaṃ pabbhārenti attho. **Vimuttanti** vā vissatṭhaṃ. Nippariyāyato **uttari** nāma paṇītaṃ majjhepi hīnamajjhimavibhāgassa labbhanatoti vuttaṃ “**uttari abhāvīanti tato uparimaggaphalattāya abhāvīta**”nti. **Samvattati** tathāpaṇihitaṃ dānamayaṃ cittaṃ. Yaṃ pana pāḷiyaṃ “**tañca kho**”tiādi vuttaṃ, taṃ taturapattiyā vibandhakaradussīlyābhāvadassanaparaṃ daṭṭhabbaṃ, na dānamayassa puññaṃ kevalassa taṃsamvattanatādassanaparanti daṭṭhabbaṃ. **Samucchinnaṃ rāgassā**ti samucchinnaṃ kāmāraṅgassa. Tassa hi siyā brahmaloke upapatti, na samucchinnaṃ bhavarāgassa. Vītarāgaggahaṇena cettha kāmesu vītarāgatā adhippetā, yāya brahmalokūpapatti siyā. Tenāha “**dānamattenevā**”tiādi. Yadi evaṃ dānaṃ tattha kimatthiyanti āha “**dānaṃ paṇā**”tiādi. **Dānena muducittoti** baddhāghāte veripuggalepi attano dānasampañchanena mudubhūtacitto.

Dānūpapattisuttavaṇṇanā niṭṭhitā.

6. Puññakiriyavatthusuttavaṇṇanā

36. Chaṭṭhe puṇṇabhavaphalaṃ nibbattenti, attano santānaṃ punantīti vā puññaṃ ca tāni hetupaccayehi kattabbato kiriyā cāti puññakiriyā, tāyeva ca tesāṃ tesāṃ piyamanāpatādīānisamāsaṃ vatthubhāvato **puññakiriyavatthūni**.

Anucchinnaṃ bhavamūlassa anuggahavasena, pūjāvasena vā attano deyyadhammassa parassa pariccāgacetanā dīyati etenāti dānaṃ, dānameva **dānamayaṃ**. Padapūraṇamattaṃ maya-saddo. Cīvarādīsu catūsu paccayesu (dī. ni. aṭṭha. 3.305), annādīsu vā dasasu dānavatthūsu, rūpādīsu vā chasu ārammaṇesu taṃ taṃ dentassa tesāṃ uppādanato paṭṭhāya pubbabhāge pariccāgakāle pacchā somanassacittena anussaraṇe cāti tīsu kālesu pavattacetanā **dānamayaṃ puññakiriyavatthu** nāma.

Niccaśīlauposathasīlādivasena pañca aṭṭha dasa vā sīlāni samādiyantassa “sīlapūraṇatthaṃ pabbajissāmī”ti vihāraṃ gacchantassa pabbajantassa, manorathaṃ matthakaṃ pāpetvā “pabbajito vatamhi sādhu suṭṭhū”ti āvajjentassa, saddhāya pātimokkhaṃ paripūrentassa, paññāya cīvarādīke paccaye paccavekkhantassa, satiyā āpāthagatesu rūpādīsu cakkhuvārādīni samvarantassa, vīriyena ājīvaṃ sodhentassa ca pavattacetanā sīlati, sīletīti vā **sīlamayaṃ puññakiriyavatthu** nāma.

Paṭisambhidāyaṃ (paṭi. ma. 1.48) vuttena vipassanāmaggena cakkhuṃ aniccato dukkhato anattato vipassantassa, sotāṃ...pe... ghānaṃ...pe... jīvaṃ...pe... kāyaṃ...pe... rūpe...pe... dhamme...pe... cakkhuvīññaṃ...pe... manovīññaṃ...pe... cakkhusamphassaṃ...pe... manosamphassaṃ...pe... cakkhusamphassaṃ vedanaṃ...pe... manosamphassaṃ vedanaṃ...pe... jarāmaṇaṃ aniccato dukkhato anattato vipassantassa yā cetanā, yā ca pathavīkaṣiṇādīsu sabbāsu aṭṭhattimsāya ārammaṇesu

pavattā jhānacetanā, yā ca anavajjesu kammāyatanasippāyatanavijjāṭṭhānesu paricayamanasikārādivasena pavattā cetanā, sabbā sā bhāveti etāyāti bhāvanāmayaṃ vuttanayena puññakiriyavatthu cāti **bhāvanāmayaṃ puññakiriyavatthu**.

Ekamekañcetta yathārahaṃ pubbhāgato paṭṭhāya karontassa kāyakammaṃ hoti. Tadattham vācam nicchārentassa vacīkammaṃ. Kāyaṅgaṃ vācaṅgañca acopetvā manasā cintayantassa manokammaṃ. Annādāni dentassa cāpi “annadānādāni demī”ti vā, dānapāramiṃ āvajjetvā vā dānakāle dānamayaṃ puññakiriyavatthu hoti. Yathā hi kevalaṃ “annadānādāni demī”ti dānakāle dānamayaṃ puññakiriyavatthu hoti, evaṃ “idaṃ dānamayaṃ sammāsambodhiyā paccayo hotū”ti dānapāramiṃ āvajjetvā dānakālepi dānasīseneva pavattitattā. Vattasīse ṭhatvā dadanto “etaṃ dānaṃ nāma mayhaṃ kulavaṃsahetu pavenīcāritta”nti cārittasīsena vā dento cārittasīlattā sīlamayaṃ. Khayato vayato sammāsanam paṭṭhapetvā dadato bhāvanāmayaṃ puññakiriyavatthu hoti. Yathā hi deyyadhammapariccāgavasena vattamānāpi dānacetanā vattasīse ṭhatvā dadato sīlamayaṃ puññakiriyavatthu hoti pubbhāhisāṅkhārassa aparabhāge cetanāya ca tathāpavattattā.

Puññakiriyavatthusuttavaṇṇanā niṭṭhitā.

7-8. Sappurisdānasuttādivaṇṇanā

37-38. Sattame **viceyya detīti** ettha dve vicinanāni dakkhiṇeyyavicinanam, dakkhiṇāvicinanañca. Tesu vipannasīle ito bahiddhā pañcanavutī pāsaṅḍabhede ca dakkhiṇeyye pahāya sīlādiguṇasampannānam sāsane pabbajitānam dānaṃ **dakkhiṇeyyavicinanam** nāma. Lāmakalāmake paccaye apanetvā paṇītapāṇīte vicinitvā tesam dānaṃ **dakkhiṇāvicinanam** nāma. Tenāha “**imassa dinnam mahapphalam bhavissati**”tiādi. Aṭṭhame natthi vattabbaṃ.

Sappurisdānasuttādivaṇṇanā niṭṭhitā.

9-10. Abhisandasuttādivaṇṇanā

39-40. Navame **puññābhisandāti** puññanadiyo. **Kusalābhisandāti** kusalānam pavāhā. **Sukhassāhārāti** sukhapaccayā. Aggānīti nātattā **aggaññāni**. Cirarattaṃ nātattā **rattaññāni**. Ariyānam sādhuṇam vaṃsānīti nātattā **vaṃsaññāni**. Porāṇānam ādīpurisānam etānīti **porāṇāni**. Sabbaso kenacipi pakārena sādhuhi na kiṇṇāni na khittāni chaḍḍitānīti **asaṃkiṇṇāni**. Ayañca nayo nesaṃ yathā atīte, evaṃ etarahi anāgate cāti āha “**asaṃkiṇṇapubbāni na saṃkiyanti na saṃkiyissanti**”ti. Tato eva **appaṭikuṭṭhāni**. Na hi kadāci viññū samaṇabrāhmaṇā himsādīpāpadhammaṃ anujānanti. **Aparimāṇānam sattānam abhayaṃ detīti** sabbesu bhūtesu nihitadaṇḍattā sakalassapi sattakāyassa bhayābhāvaṃ deti. **Averanti** verābhāvaṃ. **Abyābajjhanti** niddukkhattaṃ. Evamettha saṅkhepato pālīvaṇṇanā veditabbā. Dasame natthi vattabbaṃ.

Abhisandasuttādivaṇṇanā niṭṭhitā.

Dānavaggavaṇṇanā niṭṭhitā.

5. Uposathavaggo

1-8. Saṃkhittūposathasuttādivaṇṇanā

41-48. Pañcamassa paṭhamādīsū natthi vattabbaṃ. Chaṭṭhe (saṃ. ni. ṭī. 1.1.165) pañca aṅgāni etassāti pañcaṅgaṃ, pañcaṅgameva pañcaṅgikaṃ, tassa **pañcaṅgikassa**. Mahatī daddarī vīṇāvisesopi ātatamevāti “**cammāpariyonaddhesū**”ti visesaṃ kamaṃ. **Ekatalatūriyam**

kumbhathunadaddarikādi. **Ubhayatalaṃ** bherimudiṅgādi. Cammapariyonaddhaṃ hutvā vinibaddhaṃ **ātatavitataṃ**. **Sabbaso pariyanaddhaṃ** nāma caturassaambaṇaṃ paṇavādi ca. Gomukhādīnampi ettheva saṅgaho daṭṭhabbo. **Vamsādīti ādi**-saddena saṅkhādīnaṃ saṅgaho. **Sammādīti** sammatālakamsatālasilāsālākātālādi. Tattha **sammataḷaṃ** nāma dantamayatāḷaṃ. **Kamsatāḷaṃ** lohamayaṃ. Silāmayāṃ ayopattena ca vādanatāḷaṃ **silāsālākātāḷaṃ**. **Sumucchitassāti** suṭṭhu paṭiyattassa. **Pamāṇeti** nātidalḥanātisithilasāṅkhāte majjhime mucchanāpamāṇe. **Chekoti** paṭu paṭṭho. So cassa paṭubhāvo manoharoti āha “**sundaro**”ti. **Raṅjetunti** rāgaṃ uppādetuṃ. **Khamatevāti** rocateva. **Na nibbindatīti** na tajjeti, sotasukhabhāvato piyāyitabbova hoti.

Bhattāraṃ nātimaññatīti sāmikaṃ muñcivā aññaṃ manasāpi na pattheti. **Uṭṭhāhikāti** uṭṭhānavīriyasampannā. **Analasāti** nikkosajjā. **Saṅgahitaparijjanāti** sammānanādīhi ceva chaṇādīsu pesetabba-piyabhaṇḍādi paṇṇākārapesanādīhi ca saṅgahitaparijjanā. Idha **parijano** nāma sāmikassa ceva attano ca ñātijano. **Sambhatanti** kasivañijjādīni katvā ābhatadhaṃ. Sattamaṭṭhamāni uttānatthāni.

Samkhittūposathasuttādivaṇṇanā niṭṭhitā.

9-10. Paṭhamaidhalokikasuttādivaṇṇanā

49-50. Navame **idhalokavijayāyāti** idhalokavijinanatthāya abhibhavatthāya. Yo hi diṭṭhadhammikaṃ anattaṃ parivajjanavasena abhibhavati, tato eva tadattaṃ sampādeti, so idhalokavijayāya paṭipanno nāma hoti paccatthikaniggaṇhanato sadatthasampādanato ca. Tenāha “**ayaṃsa loko āradḍho hoti**”ti. (Pasaṃsāvahato tayidaṃ pasaṃsāvahaṇaṃ kittisaddena idhaloke saddānaṃ cittatosanaviddheyabhāvāpādanena ca hotīti daṭṭhabbaṃ.) **Susaṃvihitakammantoti** yāgubhattapacanakālādīni anatikkaṃitvā tassa tassa sādhukaṃ karaṇena suṭṭhu saṃvihitakammanto. **Paralokavijayāyāti** paralokassa vijinanatthāya abhibhavatthāya. Yo hi samparāyikaṃ anattaṃ parivajjanavasena abhibhavati, tato eva tadattaṃ sampādeti, so paralokavijayāya paṭipanno nāma hoti. Sesam sabbattha uttānameva.

Paṭhamaidhalokikasuttādivaṇṇanā niṭṭhitā.

Uposathavaggavaṇṇanā niṭṭhitā.

Paṭhamapaṇṇāsakaṃ niṭṭhitaṃ.

2. Dutiyapaṇṇāsakaṃ

(6) 1. Gotamīvaggo

1-3. Gotamīsuttādivaṇṇanā

51-53. Chatṭhassa paṭhame (sārattha. ṭī. cūlavagga 3.402) **gotamīti** gottaṃ. Nāmakaraṇādivase panassā laddhasakkārā brāhmaṇā lakkhaṇasampattiṃ disvā “sace ayaṃ dhītaraṃ labhissati, cakkavattirañño mahesī bhavissati. Sace puttaṃ labhissati, cakkavattirajā bhavissatīti ubhayathāpi mahatīyevassā pajā bhavissatī”ti byākariṃsu. Athassā “mahāpajāpatī”ti nāmaṃ akaṃsu. Tenāha “**puttapajāya ceva dhītupajāya ca mahantattā evaṃladdhanāmā**”ti.

“Attadaṇḍā bhayaṃ jātaṃ, janaṃ passatha medhagaṃ;
Saṃvegaṃ kittayissāmi, yathā saṃvijitaṃ mayā”ti. (su. ni. 941; mahāni. 170) –

Ādinā **attadaṇḍasuttaṃ kathesi**. Taṃtampalobhanakiriya kāyavācāhi parakkamantiyo ukkaṇṭhantūti

sāsanam pesenti nāmāti katvā vuttam “**sāsanam pesetvā**”ti. **Kuṇāladahanti** kuṇāladahatīram. **Anabhiratiṃ vinodetvā**ti itthīnam dosadassanamukhena kāmānam vokārasamkilesavibhāvanena anabhiratiṃ vinodetvā.

Āpādikāti samvaddhakā, tumhākam hatthapādesu kiccam asādhentesu hatthe ca pāde ca vaḍḍhetvā paṭijaggitāti attho. **Posikā**ti divasassa dve tayo vāre nahāpetvā bhojetvā pāyevā tumhe posesi. **Thaññaṃ pāyesī**ti nandakumāro kira bodhisattato katipāheneva daharo, tasmim jāte mahāpajāpati attano puttam dhātīnam datvā sayam bodhisattassa dhātikiccam sādhayamānā attano thaññaṃ pāyesi. Tam sandhāya thero evamāha. **Daharoti** taruṇo. **Yuvā**ti yobbaññe thito. **Maṇḍanakajātiko**ti alaṅkārasabhāvo. Tattha koci taruṇopi yuvā na hoti yathā atitaruṇo. Koci yuvāpi maṇḍanakajātiko na hoti yathā upasantasabhāvo, ālasiyabyasanādīhi vā abhibhūto. Idha pana daharo ceva yuvā ca maṇḍanakajātiko ca adhippeto, tasmā evamāha. Uppalādīni maṇḍanakajātiko ca lokasammatattā vuttāni.

Mātugāmassa pabbajitattāti idam pañcavassasatato uddham aṭṭhatvā pañcasuyeva vassasatesu saddhammaṭṭhitiyā kāraṇanidassanam. **Paṭisambhidāpabhedappattakhīṇāsavavaseneva vuttanti** ettha paṭisambhidāpattakhīṇāsavaggahaṇena jhānānipi gahitāneva honti. Na hi nijjhānakānam sabbappakārasampatti ijhatīti vadanti. **Sukkhavipassakakhīṇāsavavasena vassasahassantiādinā** ca yam vuttam, tam khandhakabhāṇakānam matena vuttanti veditabbam. **Vinayaṭṭhakathāyampi** (cūḷava. aṭṭha. 403) imināva nayena vuttam.

Dīghanikāyaṭṭhakathāyam (dī. ni. aṭṭha. 3.161) pana “paṭisambhidāppattehi vassasahassam aṭṭhāsi, chaḷabhiññehi vassasahassam, tevijjehi vassasahassam, sukkhavipassakehi vassasahassam, pātimokkhena vassasahassam aṭṭhāsi”ti vuttam. Idhāpi **sāsanantaradhānakathāyam** (a. ni. aṭṭha. 1.1.130) “buddhānañhi parinibbānato vassasahassameva paṭisambhidā nibbattetum sakkonti, tato param cha abhiññā, tato tāpi nibbattetum asakkontā tisso vijjā nibbattenti, gacchante gacchante kāle tāpi nibbattetum asakkontā sukkhavipassakā honti. Eteneva upāyena anāgāmino, sakadāgāmino, sotāpannā”ti vuttam.

Samyuttanikāyaṭṭhakathāyam (sam. ni. aṭṭha. 2.2.156) pana “paṭhamabodhiyañhi bhikkhū paṭisambhidāpattā ahesum. Atha kāle gacchante paṭisambhidā pāpuṇitum na sakkhimṣu, chaḷabhiññā ahesum. Tato cha abhiññā pattum asakkontā tisso vijjā pāpuṇimṣu. Idāni kāle gacchante tisso vijjā pāpuṇitum asakkontā āsavakkhayamattam pāpuṇissanti, tampi asakkontā anāgāmiphalam, tampi asakkontā sakadāgāmiphalam, tampi asakkontā sotāpattiphalam, gacchante kāle sotāpattiphalampi pattum na sakkhissanti”ti vuttam. Yasmā cetam sabbam aññamaññappaṭiviruddham, tasmā tesam tesam bhāṇakānam matameva ācariyena tattha tattha dassitanti gahetabbam. Aññathā hi ācariyasappaṭiviruddham, tasmā tesam tesam bhāṇakānam matameva ācariyena tattha tattha dassitanti gahetabbam. Aññathā hi ācariyasappaṭiviruddham, tasmā tesam tesam bhāṇakānam matameva ācariyena tattha tattha dassitanti gahetabbam. Aññathā hi ācariyasappaṭiviruddham, tasmā tesam tesam bhāṇakānam matameva ācariyena tattha tattha dassitanti gahetabbam.

Tāniyevāti tāniyeva pañcavassasahassāni. Pariyattimūlakam sāsananti āha “**na hi pariyattiyā asati paṭivedho atthī**”tiādi. Pariyattiyā hi antarāhitāya paṭipattiantaradhāyati, paṭipattiyā antarāhitāya adhigamo antaradhāyati. Kimkāraṇā? Ayañhi pariyatti paṭipattiyā paccayo hoti, paṭipatti adhigamassa. Iti paṭipattitopi pariyattiyeva pamāṇam. Dutiyatatiyesu natthi vattabbam.

Gotamīsuttādivaṇṇanā niṭṭhitā.

4-5. Dīghajāṇusuttādivaṇṇanā

54-55. Catutthe (dī. ni. aṭṭha. 3.265) **ekena bhoge bhuñjeyyā**ti ekena koṭṭhāsena bhoge bhuñjeyya, vinibhuñjeyya vāti attho. **Dvīhi kammanti** dvīhi koṭṭhāsehi kasivaññijjādikkammam payojeyya. **Nidhāpeyyā**ti catutthakoṭṭhāsam nidhetvā ṭhapeyya, nidahitvā bhūmigatam katvā ṭhapeyyāti attho. **Āpadāsu bhavissatī**ti kulānañhi na sabbakālam ekasadisam vattati, kadāci rājaaggicoradubbhikkhādivasena āpadā uppajjanti, tasmā evam āpadāsu uppannāsu bhavissatīti ekam

koṭṭhāsaṃ nidhāpeyyāti vuttaṃ. Imesu pana catūsu koṭṭhāsesu kataraṃ koṭṭhāsaṃ gahetvā kusalaṃ kātābanti? “Bhoge bhuñjeyyā”ti vuttakoṭṭhāsaṃ. Tato gaṇhitvā hi bhikkhūnampi kapaṇaddhikānampi dānaṃ dātābbaṃ, pesakāraṇhāpitādīnaṃ vetanaṃ dātābbaṃ. Samaṇabrāhmaṇakapaṇaddhikādīnaṃ dānavasena ceva, adhivatthadevatādīnaṃ petabalivasena, nhāpitādīnaṃ vetanasena ca viniyogopi upayogo eva.

Apentī gacchantī, apentā vā etehīti apāyā, apāyā eva mukhāni dvārānīti **apāyamukhāni**. **Vināsadvārānīti** etthāpi eseva nayo. Pañcame natthi vattaṃ.

Dīghajāṇusuttādivaṇṇanā niṭṭhitā.

6-8. Bhayasuttādivaṇṇanā

56-58. Chaṭṭhe gabbhavāso idha uttarapadalopena gabbho vuttoti āha “**gabbhoti gabbhavāso**”ti. Sattamaṭṭhamāni uttānatthāni.

Bhayasuttādivaṇṇanā niṭṭhitā.

6-10. Puggalasuttādivaṇṇanā

59-60. Navame **dānaṃ dadantānanti** dakkhiṇeyyaṃ uddissa dānaṃ dentānaṃ. Upadhī vipaccanti etena, upadhīsu vā vipaccati, upadhayo vā vipākā etassāti **upadhivipākaṃ**. **Saṅghe dīnaṃ mahapphalanti** ariyasāṅghe dīnaṃ vipphāraṭṭhānaṃ hoti, vipulaphalanti attho. Dasame natthi vattaṃ.

Puggalasuttādivaṇṇanā niṭṭhitā.

Gotamīvaggavaṇṇanā niṭṭhitā.

(7) 2. Bhūmicālavaggo

1-5. Icchāsuttādivaṇṇanā

61-65. Sattamassa paṭhamādīni suviññeyyāni. Pañcame (dī.ni.ṭī. 2.173) abhibhavatīti abhibhu, parikkammaṃ, ñāṇaṃ vā. Abhibhu āyatanāṃ etassāti **abhibhāyatanāṃ**, jhānaṃ. Abhibhavitaṃ vā ārammaṇasaṅkhātāṃ āyatanāṃ etassāti **abhibhāyatanāṃ**. Atha vā ārammaṇābhibhavanato abhītu ca taṃ āyatanāṃca yogino sukhavisesānaṃ adhiṭṭhānabhāvato manāyatanadhammāyatanabhāvato cātipi sasampayuttajjhānaṃ **abhibhāyatanāṃ**. Tenāha “**abhibhavanakāraṇāni**”tiādi. **Tāni hīti** abhibhāyatanasaññitāni jhānāni. “Puggalassa ñāṇuttariyatāyā”ti idaṃ ubhayatthāpi yojetābbaṃ. Kathaṃ? **Paṭipakkhabhāvena paccanīkadhamme abhibhavanti puggalassa ñāṇuttariyatāya ārammaṇāni abhibhavanti**. Ñāṇabaleneva hi ārammaṇābhibhavanaṃ viya paṭipakkhābhibhavopīti.

Parikkammavasena ajjhataṃ rūpasāññī, na appanāvasena. Na hi paṭibhāganimitārammaṇā appanā ajjhataṃ viya sambhavati. **Taṃ pana** ajjhataṃ parikkammavasena laddhaṃ kasiṇanimittaṃ **avisuddhameva hoti**, na bahiddhāparikkammavasena laddhaṃ viya visuddhaṃ.

Parittānīti yathā laddhāni suppasarāvamattāni. Tenāha “**avaḍḍhitāni**”ti. **Parittavasenevāti** vaṇṇavasena ābhoge vijjānānāni parittavaseneva **idaṃ abhibhāyatanāṃ vuttaṃ**. Parittatā hettha abhibhavanassa kāraṇaṃ. Vaṇṇābhoge satipi asatipi abhibhāyatanabhāvanā nāma tikkhapaññasseva sambhavati, na itarassāti āha “**ñāṇuttariko puggalo**”ti. **Abhibhavitvā samāpajjatīti** ettha

abhibhavanam samāpajjanañca upacārajjhānādhigamasamanantameva appanājhānuppādananti āha “**saha nimittuppādenevettha appanam pāpeti**”ti. **Saha nimittuppādenāti** ca appanāparivāsābhāvassa lakkhaṇavacanametam. Yo “khippābhiñño”ti vuccati, tatopi ñāṇuttarasseva abhibhāyatanabhāvanā. **Etthāti** etasmiṃ nimitte. **Appanam pāpeti**ti bhāvanam appanam neti.

Ettha ca keci “uppanne upacārajjhāne tam ārabba ye hetthimantena dve tayo javanavārā pavattanti, te upacārajjhānapakkhikā eva, tadanantarañca bhavaṅgarivāseṇa upacārasevanāya ca vinā appanā hoti, saha nimittuppādeneva appanam pāpeti”ti vadanti, tam tesam matimattam. Na hi parivāsikakammena appanāvāro icchito, nāpi mahaggaṭṭappamāñajjhānesu viya upacārajjhāne ekantato paccavekkhāñā icchitabbā, tasmā upacārajjhānādhigamato param katipayabhavaṅgacittāvasāne appanam pāpuṇanto “saha nimittuppādenevettha appanam pāpeti”ti vutto. “Saha nimittuppādenā”ti ca adhippāyikamidaṃ vacanam, na nītattham. Adhippāyo vuttanayeneva vedittabbo.

Na antosamāpattiyam tadā tathārūpassa ābhogassa asambhavato, samāpattito vuṭṭhitassa ābhogo pubbhāgabhāvanāya vasena jhānakkhaṇe pavattam abhibhavanākāram gahetvā pavattoti daṭṭhabbam. **Abhidhammaṭṭhakathāyam** (dha. sa. aṭṭha. 204) pana “iminā panassa pubbhago kathito”ti vuttam. Antosamāpattiyam tathā ābhogābhāve kasmā “jhānasaññāyapī”ti vuttanti āha “**abhibhavana...pe... atthi**”ti.

Vaḍḍhitappamāñānīti vipulappamāñānīti attho, na ekaṅguladvāṅgulādivasena vaḍḍhiṃ pāpitānīti tathāvaḍḍhanassevettha asambhavato. Tenāha “**mahantānī**”ti. **Bhattavaḍḍhitakanti** bhuñjanabhājane vaḍḍhitvā dinnam bhattam, ekāsane purisena bhuñjitabbhattato upaḍḍhabhattanti attho.

Rūpe saññā rūpasaññā, sā assa atthīti rūpasaññī, na rūpasaññī **arūpasaññī**. Saññāsīseṇa jhānam vadati. Rūpasaññāya anuppādanamevettha **alābhīti**. **Bahiddhāva uppānanti** bahiddhāvattusmiṃyeva uppānam. **Abhidhamme** (dha. sa. 204-209) pana “ajjhataṃ arūpasaññī bahiddhā rūpāni passati parittāni suvaṇṇadubbaññāni, appamāñāni suvaṇṇadubbaññānī”ti evam catunnam abhibhāyatanānam āgatattā **abhidhammaṭṭhakathāyam** “kasmā pana yathā suttante ajjhataṃ rūpasaññī eko bahiddhā rūpāni passati parittānītiādi vuttam, evam avatvā idha catūsupi abhibhāyatanesu ajjhataṃ arūpasaññītāva vuttā”ti codanam katvā “ajjhatarūpānam anabhibhavanīyato”ti kāraṇam vatvā “tatha vā idha vā bahiddhā rūpāneva abhibhavitabbāni, tasmā tāni niyamatova vattabbānīti tatrāpi idhāpi vuttāni, ‘ajjhataṃ rūpasaññī’ti idaṃ pana satthu desanāvīlāsamattamevā”ti vuttam.

Ettha ca vaṇṇābhogarahitāni sahitāni ca sabbāni “parittāni suvaṇṇadubbaññānī”ti vuttāni, tathā “appamāñāni suvaṇṇadubbaññānī”ti. Atthi hi so pariyāyo “parittāni abhibhuyya, tāni ce kadāci vaṇṇavasena ābhujitāni honti suvaṇṇadubbaññāni abhibhuyyā”ti. Pariyāyakathā hi suttantadesanāti. Abhidhamme pana nippariyāyadesanattā vaṇṇābhogarahitāni viṣum vuttāni, tathā sahitāni. Atthi hi ubhayattha abhibhavanavisesoti, tathā idha pariyāyadesanattā vimokkhānampi abhibhavanapariyāyo atthīti “ajjhataṃ rūpasaññī”tiādīnā paṭhamadutiyaabhibhāyatanesu paṭhamavimokkho, tatiyacatutthaabhibhāyatanesu dutiyavimokkho, vaṇṇābhāyatanesu tatiyavimokkho ca abhibhavanappavattito saṅgahito. **Abhidhamme** (dha. sa. 204-209, 247-249) pana nippariyāyadesanattā vimokkhābhāyatanāni asaṅkarato dassetuṃ vimokkhe vajjjetvā abhibhāyatanāni kathitāni. Sabbāni ca vimokkhakiccāni jhānāni vimokkhadesanāyam vuttāni. Tadetam “ajjhataṃ rūpasaññī”ti āgatassa abhibhāyatanadvayassa abhidhamme abhibhāyatanesu avacanato “rūpī rūpāni passati”tiādīnañca sabbavimokkhakiccāsādhāraṇavacanabhāvato vavatthānam katanti viññāyati. “Ajjhatarūpānam anabhibhavanīyato”ti idaṃ abhidhamme kathaṅgāni “ajjhataṃ rūpāni passati”ti avatvā sabbattha yaṃ vuttam “bahiddhā rūpāni passati”ti, tassa kāraṇavacanam. Tena yaṃ aññahetukam, tam tena hetunā vuttam. Yaṃ pana desanāvīlāsahetukam ajjhataṃ arūpasaññītāya eva abhidhamme vacanam, na tassa aññam kāraṇam maggitabbanti dasseti.

Ajjhatarūpānam anabhibhavanīyatā ca tesam bahiddhārūpānam viya avibhūtattā desanāvīlāso ca

yathāvuttavavatthānavasena veditabbo veneyyajjhāsāyavasena vijjamānapariyāyakathābhāvato. “Suvaṇṇadubbaṇṇāni”ti eteneva siddhattā na nīlādīabhībhāyatanāni vattabbānīti ce? Taṃ na. Nīlādīsu katādhikārānaṃ nīlādībhāvasseva abhībhavanakāraṇattā. Na hi tesāṃ parisuddhāparisuddhavaṇṇānaṃ parittatā vā appamānatā vā abhībhavanakāraṇaṃ, atha kho nīlādībhāvo evāti. Etesu ca parittādikasiṇarūpesu yaṃ yaṃ caritassa imāni abhībhāyatanāni ijjhanti, taṃ dassetuṃ “**imesu panā**”tiādi vuttaṃ. **Sabbasaṅgāhikavasenā**ti nīlavaṇṇanīlanidassananīlanībhāsānaṃ sādharmaṇavasena. **Vaṇṇavasenā**ti sabhāvavaṇṇavasena. **Nidassanavasenā**ti passitabbatāvasena cakkhuvīññādiviññānavīthiyā gahetabbatāvasena. **Obhāsavasenā**ti sappabhāsātāya avabhāsanavasena.

Icchāsuttādivaṇṇanā niṭṭhitā.

6. Vimokkhasuttavaṇṇanā

66. Chaṭṭhe (dī. ni. ṭī. 2.129) **kenaṭṭhenā**ti kena sabhāvena. Sabhāvo hi ñāṇena yāthāvato araṇīyato ñātābbato “attho”ti vuccati, so eva ttha-kārassa tṭha-kāraṃ katvā “atṭho”ti vutto. **Adhimuccanaṭṭhenā**ti adhikaṃ savisesaṃ muccanaṭṭhena. Etena satipi sabbassapi rūpāvacarajjhānassa vikkhambhanavasena paṭipakkhato vimuttabhāve yena bhāvanāvisesena taṃ jhānaṃ sātisaṃ yaṃ paṭipakkhato vimuccitvā pavattati, so bhāvanāviseso dīpito. Bhavati hi samānajātiyuttopi bhāvanāvisesena pavattiākāraṇaviseso. Yathā taṃ saddhāvimuttato diṭṭhippattassa, tathā paccanīkadhammehi suṭṭhu vimuttatāya eva aniggahitabhāvena nirāsaṅkatāya abhirativasena suṭṭhu adhimuccanaṭṭhenapi **vimokkho**. Tenāha “**ārammaṇe cā**”tiādi. **Ayaṃ panatthoti** ayaṃ adhimuccanaṭṭho **pacchime vimokkhe** nirodhe **natthi**. Kevalo vimuttaṭṭho eva tattha labbhati, taṃ sayameva parato vakkhati.

Rūpīti yenāyaṃ sasantaṭipariyāpannena rūpena samannāgato, taṃ yassa jhānassa hetubhāvena visiṭṭharūpaṃ hoti, yena visiṭṭhena rūpena “rūpī”ti vucceyya rūpīsaddassa atisaṃyatthadīpanato, tadeva sasantaṭipariyāpannarūpassa vasena paṭiladdhajjhānaṃ idha paramatthato rūpibhāvasādhakanti daṭṭhabbaṃ. Tenāha “**ajjhatta**”ntiādi. **Rūpajjhānaṃ rūpaṃ** uttarapadalopena. **Rūpānī**ti panettha purimapadalopo daṭṭhabbo. Tena vuttaṃ “**nīlakasiṇādīni rūpāni**”ti. Rūpe kasiṇarūpe saññā rūpasaññā, sā etassa atthīti rūpasaññī, saññāsīsena jhānaṃ vadati. Tappaṭipakkhena **arūpasaññī**. Tenāha “**ajjhattaṃ na rūpasaññī**”tiādi.

Anto appanāyaṃ “subha”nti ābhogo natthīti iminā pubbābhogavasena tathā adhimutti siyāti dasseti. Evañhettha tathāvattabbatāpatticodanā anavaṭṭhānā hoti. Yasmā suvisuddhesu nīlādīsu vaṇṇakasiṇesu tattha katādhikārānaṃ abhirativasena suṭṭhu adhimuccanaṭṭho sambhavati, tasmā aṭṭhakathāyaṃ tathā tatiyo vimokkho saṃvaṇṇito. Yasmā pana mettādivasena pavattamānā bhāvanā satte appaṭikūlato dahanti, te subhato adhimuccitvā pavattati, tasmā **paṭisambhidāmagge** (paṭi. ma. 1.212-213) brahmavihārabhāvanā “subhavimokkho”ti vuttā. Tayidaṃ ubhayampi tena tena pariyaṇena vuttattā na virujjhatīti daṭṭhabbaṃ.

Sabbasoti anavasesato. Na hi catunnaṃ arūpakkhandhānaṃ ekadesopi tattha avasissati. **Vissaṭṭhattāti** yathāparicchinakāle nirodhitattā. **Uttamo vimokkho nāma** ariyeheva samāpajjitabbato ariyaphalaparīyosānattā diṭṭheva dhamme nibbānappattibhāvato ca.

Vimokkhasuttavaṇṇanā niṭṭhitā.

7. Anariyavohārasuttavaṇṇanā

67. Sattame anariyānaṃ lāmakānaṃ vohāro **anariyavohāro**. **Diṭṭhavādītāti** diṭṭhaṃ mayāti evaṃ vādītā. Evaṃ sesesupi. Ettha ca taṃtaṃsamuṭṭhāpakacetanāvasena attho veditabbo. Tenāha “**yāhi**

cetanāhī’tiādi.

Anariyavohārasuttavaṇṇanā niṭṭhitā.

9. Parisāsuttavaṇṇanā

69. Navame (dī. ni. ṭī. 2.172) samāgantabbato, samāgacchatīti vā samāgamo, parisā. Bimbisārappamukho samāgamo **bimbisārasamāgamo**. Sesadvayepi eseva nayo. Bimbisāra...pe... samāgamasadisam khattiyaparisanti yojanā. **Aññesu cakkavālesupi labbhateva** satthu khattiyaparisādiupasaṅkamanam. Ādīto tehi saddhiṃ satthu bhāsanam **ālāpo**, kathanappaṭikathanam **sallāpo**. Dhammūpasamhitā pucchāpaṭipucchā **dhammasākacchā**. **Saṅghānam paṭicca kathitam** saṅghānapariyāyattā vaṇṇa-saddassa “mahantam hatthirājavanam abhinimminivā”tiādīsu (sam. ni. 1.138) viya. **Tesanti** padam ubhayapadāpekkham “tesampi lakkhaṇasaṅghānam viya satthu sarīrasaṅghānam tesam kevalam paññāyati evā”ti. Nāpi āmuttamaṇikuṇḍalo bhagavā hotīti yojanā. **Chinnassarāti** dvidhā bhinnassarā. **Gaggarassarāti** jajjaritassarā. **Bhāsantaranti** tesam sattānam bhāsāto aññam bhāsam. **Vīmaṃsāti** cintanā. **Kimattham...pe... desetīti** idam nanu attānam jānāpetvā dhamme kathite tesam sātisayo pasādo hotīti iminā adhippāyena vuttam? Yesam attānam ajānāpetvāva dhamme kathite pasādo hoti, na jānāpetvā, tādise sandhāya sathā tathā karoti. Tattha payojanamāha “**vāsanatthāyā**”ti. **Evam sutopīti** evam aviññādesako aviññātāgamanopi suto dhammo attano dhammasudhammatāyeva **anāgate paccayo hoti** suṇantassa.

Parisāsuttavaṇṇanā niṭṭhitā.

10. Bhūmicālasuttavaṇṇanā

70. Dasame (dī. ni. ṭī. 2.167; sam. ni. ṭī. 2.5.822) **udenayakkhassa cetiyatṭhāneti** udenassa nāma yakkhassa āyatanabhāvena iṭṭhakāhi kate mahājanassa cittikataṭṭhāne. **Katavihāro**ti bhagavantam uddissa katavihāro. **Vuccatīti** purimavohārena “udenam cetiya”nti vuccati. **Gotamakādīsupīti** “gotakam cetiya”ntiādīsupi. **Eseva nayoti** cetiyatṭhāne katavihārabhāvam atidisati. Tathā hi **sattambanti** kikissa rañño dhītarō satta kumāriyo samvegajātā gehato nikkhamivā tattha padhānam padahimsu, tam ṭhānam “**sattambam cetiya**”nti vadanti. **Bahuputtakanti** ca bahupāroho eko nigrodharukkho, tasmim adhivattham devatam bahū manussā putte patthenti, tadupādāya tam ṭhānam “**bahuputtakam cetiya**”nti paññāyittha. **Sārandadassa** nāma yakkhassa vasitattṭhānam, **cāpālassa** nāma yakkhassa vasitattṭhānam, iti sabbānevetāni buddhuppādato pubbadevatā pariggahetvā cetiyavohārena voharītāni, bhagavato vihāre katepi tatheva sañjānanti. **Ramaṇīyāti** ettha vesāliyā tāva bhūmibhāgasampattiyā sulabhapiṇḍatāya ramaṇīyabhāvo veditabbo. Vihāranam pana nagarato nātīdūratāya naccāsannatāya gamanāgamanasampattiyā anākīṇṇavihāratṭhānatāya chāyudakasampattiyā pavivekapatirūpatāya ca ramaṇīyatā daṭṭhabbā.

Vaḍḍhitāti bhāvanāpāripūrivāsena paribrūhitā. **Punappunam katāti** bhāvanāya bahulīkaraṇena aparāparam pavattitā. **Yuttayānam viya katāti** yathā yuttamājāññāyānam chekena sārathinā adhiṭṭhitam yathārucci pavattati, evam yathārucci pavattirahatam gamitā. **Paṭiṭṭhānatṭhenāti** adhiṭṭhānatṭhena. **Vatthu viya katāti** sabbaso upakkilesavisodhanena iddhivisayatāya paṭiṭṭhānabhāvato suvisodhitaparissayavatthu viya katā. **Adhiṭṭhitāti** paṭipakkhadūrībhāvato subhāvītabhāvena tamtamadhiṭṭhānayogyatāya ṭhapitā. **Samantato citāti** sabbabhāgena bhāvanupacayam gamitā. Tenāha “**suvaḍḍhitā**”ti. **Suṭṭhu samāradhāti** iddhībhāvanāya sikhāppattiyā sammadeva samsevītā.

Aniyamenāti “yassa kassacī”ti aniyamavacanena. **Niyamētvāti** “tathāgatassā”ti sarūpadassanena niyamētvā. **Āyuppamāṇanti** (dī. ni. ṭī. 1.40; dī. ni. abhi. ṭī. 1.40) paramāyuppamāṇam vadati. Kim panettha paramāyu nāma, katham vā tam paricchinnappamāṇanti? Vuccate – yo tesam tesam sattānam tasmim tasmim bhavaviseṣe purimasiddhabhavapatthanūpanissayavasena

sarīrāvayavavaṇṇasaṅghānappamāṇādivisesā viya taṃtaṃgatinikāyādīsu yebhuyyena niyataparicchedo gabbhaseyyakakāmāvacaradevarūpāvacarasattānaṃ sukkasoṇitautubhojanādiutuāḍipaccuppannapaccayūpatthambhito vipākappabandhassa ṭhitikālaniyamo. So yathāsakaṃ khaṇamattāvaṭṭhāyīnampi attano sahaḷātānaṃ rūpārūpadhamānaṃ ṭhapanākāravuttitāya pavattanakāni rūpārūpajīvitindriyāni yasmā na kevalaṃ tesāṃ khaṇaṭṭhitīyā eva kāraṇabhāvena anupālakāni, atha kho yāva bhavaṅgupacchedā anupabandhassa avicchedahetubhāvenapi, tasmā āyuhetukattā kāraṇūpacārena āyu, ukkaṃsaparicchedavasena paramāyūti ca vuccati. Taṃ pana devānaṃ nerayikānaṃ uttarakurukānaṃca niyataparicchedaṃ. Uttarakurukānaṃ pana ekantanīyataparicchedameva, avasiṭṭhamanussapetātiracchānānaṃ pana ciraṭṭhitisaṃvattanīkammabahule kāle taṃkammasahitasantājanītasukkaṇṇitapaccayānaṃ taṃmūlakānaṃca candasūriyasamavisamaparivattanāḍijānītautuāhārādisamavisamapaccayānaṃca vasena cirācirakālato aniyataparicchedaṃ, tassa ca yathā purimasiddhabhavaṃpatthanāvasena taṃtaṃgatinikāyādīsu vaṇṇasaṅghānādivisesanīyamo siddho dassanānussavādīhi, tathā ādīto gahaṇasiddhiyā. Evaṃ tāsū tāsū upapattīsū nibbattasattānaṃ yebhuyyena samappamāṇaṭṭhitikālaṃ dassanānussavehi labhivā taṃparamataṃ ajjhosāya pavattitabhavaṃpatthanāvasena ādīto paricchedanīyamo veditabbo. Yasmā pana kammaṃ tāsū tāsū upapattīsū yathā taṃtaṃupapattinīyatavaṇṇāḍīnībbattane samatthaṃ, evaṃ niyatāyuparicchedāsu upapattīsū paricchedātikkaṃmena vipākanībbattane samatthaṃ na hoti, tasmā vuttaṃ “**tasmīṃ tasmīṃ kāle yaṃ manussānaṃ āyuppamāṇaṃ, taṃ paripuṇṇaṃ karonto tiṭṭheyā**”ti.

Mahāsīvatthero pana “mahābodhisattānaṃ carimabhava paṭisandhidāyīno kammaṃsa asaṅkhyeyyāyukatāsāṃvattanasamatthataṃ hadaye ṭhapetvā buddhānaṃca āyusaṅkhārassa pariṣayavikkhambhanasamatthatā pāliyaṃ āgatā evāti imaṃ bhaddakappameva tiṭṭheyā”ti avoca. **Khaṇḍicādīhi abhībhuyatīti** etena yathā iddhibalena jarāya na paṭighāto, evaṃ tena maraṇassapi na paṭighātoti atthato āpannamevāti. “Kva saro khitto, kva ca nipatito”ti aññathā vuṭṭhitenapi theravādena aṭṭhakathāvacanameva samatthitanti daṭṭhabbaṃ. Tenāha “**yo pana vuccati...pe... niyāmita**”nti.

Oḷārike nimitteti thūle saññuppādane. Thūlasaññuppādanañhetā “tiṭṭhatu bhagavā kappā”nti sakalaṃ kappāṃ avatṭhānāyācanāya, yadidaṃ “yassa kassaci, ānanda, cattāro iddhipādā bhāvītā”tiādinā aññāpadesena attano caturiddhipādabhāvanānubhāvena kappāṃ avatṭhānasamatthatāvībhāvanaṃ. **Obhāseti** pākaṭavacane. Pākaṭavacanañhetā, yadidaṃ pariyāyaṃ muñcitvā ujukameva attano adhippāyavībhāvanaṃ. **Pariyūṭṭhitacitto**ti yathā kiñci atthānatthaṃ sallakkhetuṃ na sakkā, evaṃ abhībhūtacitto. So pana abhībhavo mahatā udakoghena appakassa udakassa ajjhottharaṇaṃ viya ahoṣīti vuttaṃ “**ajjhotthaṭacitto**”ti. **Aññoti** therato, ariyehi vā aññopi yo koci puthujjano. Puthujjanaggahaṇaṇicettha yathā sabbena sabbaṃ appahīnavipallāso mārena pariyūṭṭhitacitto kiñci atthānatthaṃ sallakkhetuṃ na sakkoti, evaṃ thero bhagavatā katanimittobhāsaṃ sabbaso na sallakkhesīti dassanatthaṃ. Tenāha “**māro hī**”tiādi.

Cattāro vipallāsāti asubhe “subha”nti saññāvipallāso, cittavipallāso, dukkhe “sukha”nti saññāvipallāso, cittavipallāsoti ime cattāro vipallāsā. **Tenāti** yadipi itare aṭṭha vipallāsā pahīnā, tathāpi yathāvuttānaṃ catunnaṃ vipallāsānaṃ appahīnabhāvena. **Assāti** therassa. **Maddatīti** phusanamattena maddanto viya hoti, aññathā tena maddite sattānaṃ maraṇameva siyā. **Kim sakkhissati**, na sakkhissatīti adhippāyo. Kasmā na sakkhissati, nanu esa aggasāvakkassa kucchim pavīṭṭhoti? Saccāṃ pavīṭṭho, taṃca kho attano ānubhāvadassanatthaṃ, na vibādhanādhīppāyena. Vibādhanādhīppāyena pana idha “kim sakkhissatī”ti vuttaṃ hadayamaddanassa adhiḷatattā. **Nimittobhāsanti** ettha “tiṭṭhatu bhagavā kappā”nti sakalakappāṃ avatṭhānāyācanāya “yassa kassaci, ānanda, cattāro iddhipādā bhāvītā”tiādinā aññāpadesena attano caturiddhipādabhāvanānubhāvena kappāṃ avatṭhānasamatthatāvasena saññuppādanaṃ nimittaṃ. Tathā pana pariyāyaṃ muñcitvā ujukameva attano adhippāyavībhāvanaṃ obhāso. **Jānantoyevāti** mārena pariyūṭṭhitabhāvaṃ jānantoyeva. Attano aparādhahetuto sattānaṃ soko tanuko hoti, na balavāti āha “**dosāropanena sokatanukaraṇattha**”nti. Kim pana thero mārena pariyūṭṭhitacittakāle pavattim pacchā jānātīti? Na jānāti sabhāvena, buddhānubhāvena pana jānāti.

Gaccha tvam, ānandāti yasmā divāvihāratthāya idhāgato, tasmā, ānanda, gaccha tvam yathārucitatthānaṃ divāvihārāya. Tenāha “**yassadāni kālaṃ maññāsī**”ti. **Anatthe niyojento** guṇamāraṇena **māreti**, virāgavibandhanena vā jātinimittatāya tattha tattha jātaṃ mārento viya hotīti “**māretīti māro**”ti vuttaṃ. Ati viya pāpatāya **pāpimā**. Kaṇhadhammehi samannāgato **kaṇho**. Virāgādiguṇānaṃ antakaraṇato **antako**. Sattānaṃ anattāhavaṃ paṭipattiṃ na muñcatīti **namuci**. Attano mārapāsenā pamatte bandhati, pamattā vā bandhū etassāti **pamattabandhu**. Sattamasattāhato paraṃ satta ahāni sandhāyāha “**aṭṭhame sattāhe**”ti na pana pallaṅkasattāhādi viya niyatakiccassa aṭṭhamasattāhassa nāma labbhanato. Sattamasattāhassa hi parato ajapālanigrodhamūle mahābrahmuno sakkassa ca devaraṇṇo paṭiññātadhammadesanaṃ bhagavantam ṇatvā “idāni satte dhammadesanāya mama visayaṃ samatikkamāpessatī”ti sañjātaḍomanasso hutvā tthito cintesi – “handā dānāhaṃ naṃ upāyena parinibbāpessāmi, evamassa manoratho aññāhattaṃ gamissati, mama ca manoratho ijjhissatī”ti. Evaṃ pana cintevā bhagavantam upasaṅkamitvā ekamantaṃ tthito “parinibbātu dāni, bhante, bhagavā”tiādinaṃ parinibbānaṃ yāci. Taṃ sandhāya vuttaṃ “**aṭṭhame sattāhe**”tiādi. Tattha **ajjāti** āyusaṅkhārossajjanadivasam sandhāyāha. **Bhagavā cassa** atibandhanādhippāyaṃ jānantopi taṃ anāvikatvā parinibbānassa akālabhāvameva pakāsentō yācanaṃ **paṭikkhipi**. Tenāha “**na tāvāha**”ntiādi.

Maggavasena byattāti saccasampāvedhavyattiyena byattā. **Tatheva vinitāti** maggavaseneva kilesānaṃ samucchadavinayena vinitā. **Tathā visāradāti** ariyamaggādhigameneva satthusāsane vesārajappattiyā visāradā, sārājjakarānaṃ diṭṭhivicikicchādipāpadhammānaṃ vigamena visāradabhāvaṃ pattāti attho. Yassa sutassa vasena vaṭṭadukkhatō nissaraṇam sambhavati, taṃ idha ukkatthānidhesena sutanti adhippetanti āha “**tepiṭakavasenā**”ti. Tiṇṇam piṭakānaṃ samūho **tepiṭakam**, tīṇi vā piṭakāni tipīṭakam, tipīṭakameva **tepiṭakam**, tassa vasena. **Tamevāti** yaṃ taṃ tepiṭakam sotabbabhāvena “suta”nti vuttaṃ, tameva. **Dhammanti** pariyattidhammaṃ. **Dhārentīti** suvaṇṇabhājane pakkhittasīhavasam viya avinassantaṃ katvā suppaguṇasuppavattibhāvena dhārenti hadaye tthapenti. Iti pariyattidhammavasena bahussutadhammadharabhāvaṃ dassetvā idāni paṭivedhadhammavasenapi taṃ dassetuṃ “**atha vā**”tiādi vuttaṃ. **Ariyadhammassāti** maggaphaladhammassa, navavidhassapi vā lokuttaradhammassa. **Anudhammabhūtaṃ** adhigamāya anurūpadhammabhūtaṃ. **Anucchavikappaṭipadanti** ca tameva vipassanādhammamāha, chabbidhā visuddhiyo vā. **Anudhammanti** tassā yathāvuttappaṭipadāya anurūpaṃ abhisallekhitam appichatādidhammaṃ. **Caraṇasīlāti** samādāya vattanasīlā. Anumaggaphaladhammo etissāti vā **anudhammā**, vuṭṭhānagāminiṃ vipassanā. Tassā caraṇasīlā. **Attano ācariyavādanti** attano ācariyassa sammāsambuddhassa vādaṃ. Sadevakassa lokassa ācārasikkhāpanena **ācariyo**, bhagavā, tassa vādo, catusaccadesanā.

Ācikkhissantīti ādito kathessanti, attanā uggahitaniyāmena pare uggaṇhāpessantīti attho. **Desessantīti** vācessanti, pāḷiṃ sammā pabodhessantīti attho. **Paññāpessantīti** pajānāpessanti, saṅkāsessantīti attho. **Paṭṭhapessantīti** pakārehi tthapessanti, pakāsessantīti attho. **Vivarissantīti** vivaṭṭam karissanti. **Vibhajissantīti** vibhattam karissanti. **Uttānikarissantīti** anuttānaṃ gambhīraṃ uttānaṃ pākātam karissanti. **Sahadhammenāti** ettha **dhamma**-saddo kāraṇapariyāyo “hetumhi ṇāṇam dhammapaṭisambhidā”tiādīsu (vibha. 720) viyāti āha “**sahetukena sakāraṇena vacanenā**”ti. **Sappāṭihāriyanti** sanissaraṇam. Yathā paravādaṃ bhañjitvā sakavādo paṭiṭṭhahati, evam hetudāharaṇehi yathādhigatamattham sampādetvā dhammaṃ kathessanti. Tenāha “**niyyānikam katvā dhammaṃ desessantī**”ti, navavidham lokuttaradhammaṃ pabodhessantīti attho. Ettha ca “paññāpessantī”tiādīhi chahi padehi cha atthapadāni dassitāni, ādito pana dvīhi padehi cha byañjanapadāni. Ettāvātā tepiṭakam buddhavacanaṃ samvaṇṇanāyena saṅgahetvā dassitam hoti. Vuttañhetam **nettiyam** (netti. saṅgahavāro) “dvādasa padāni suttaṃ, taṃ sabbaṃ byañjanaṅca attho cā”ti.

Sikkhāttayasāṅgahitanti adhisīlasikkhādisikkhāttayasāṅgahaṃ. **Sakalam** sāsanabrahmacariyanti anavasesam satthusāsanabhūtam seṭṭhacariyam. **Samiddhanti** sammadeva vaḍḍhitaṃ. **Jhānassādavasenāti** tehi tehi bhikkhūhi samadhigatajjhānasukhavasena. **Vuddhippattanti** ulārapaṇītabhāvūpagamena sabbaso parivuddhimupagataṃ. **Sabbapāliphullaṃ viya abhiññāsampattivāsena** abhiññāsampadāhi sāsanābhivuddhiyā matthakappattito. **Paṭiṭṭhitavasenāti**

patiṭṭhānavasena, patiṭṭhappattiyāti attho. Paṭivedhavasena bahuno janassa hitanti **bāhujaññaṃ**. Tenāha “**mahājanābhisaṃmayavasena**”ti. Puthu puthulaṃ bhūtaṃ jātaṃ, puthu vā puthuttaṃ pattanti **puthubhūtaṃ**. Tenāha “**sabbā...pe... patta**”nti. **Suṭṭhu pakāsanti** suṭṭhu sammadeva ādikalyāṇādibhāvena paveditaṃ.

Satiṃ sūpaṭṭhitaṃ katvāti ayaṃ kāyādivibhāgo attabhāvasaññito dukkhabhāro mayā ettakaṃ kālaṃ vahito, idāni pana na vahitabbo, etassa avahanatthañhi cirataraṃ kālaṃ ariyamaggasambhāro sambhato, svāyaṃ ariyamaggo paṭividdho. Yato ime kāyādayo asubhādito sabhāvādito sammadeva pariññātāti catubbidhampi sammāsatiṃ yatātathaṃ visaye suṭṭhu upaṭṭhitaṃ katvā. **Nāṇena paricchindivāti** imassa attabhāvasaññitassa dukkhabhāraṃ vahane payoṇanabhūtaṃ attahitaṃ tāva bodhimūle eva parisamāpitaṃ, parahitaṃ pana buddhaveneyyavinayaṃ parisamāpitabbaṃ, taṃ idāni māsaṭṭayeneva parisamāpanaṃ pāpuṇissati, ahampi visākhāpuṇṇamāyaṃ parinibbāyissāmīti evaṃ buddhaññaṇena paricchindivā sabbabhāgena nicchayaṃ katvā. **Āyusañkhāraṃ vissajjīti** āyuno jīvitassa abhisañkhāraṃ phalasaṃpattidhammaṃ na saṃpajjissāmīti vissajji. Taṃvissajjaneneva tena abhisañkharīyaṃ jīvitasañkhāraṃ “na pavattessāmī”ti vissajji. Tenāha “**tatthā**”tiādi.

Ṭhānamahantatāyapī pavattiākāramahantatāyapī **mahanto pathavīkampo**. Tattha ṭhānamahantatāya bhūmicālassa mahantattaṃ dassetuṃ “**tadā kira...pe... kampitthā**”ti vuttaṃ. Sā pana jābhikkhettabhūtā dasasahassī lokadhātu eva, na yā kāci. Yā mahābhinihāramahābhijātīdīsūpi kampittha, tadāpi tattikāya eva kampāne kiṃ kāraṇaṃ? Jātikkettabhāvena tasseva ādito pariggahassa katattā, pariggahakaraṇaṃ cassa dhammatāvasena veditabbaṃ. Tathā hi purimabuddhānampi tāvattakameva jātikkettaṃ ahoṣi. Tathā hi vuttaṃ “dasasahassī lokadhātu, nissaddā hoti nirākulā... pe... mahāsamuddo ābhujati, dasasahassī pakampatī”ti (bu. vaṃ. 2.84-91) ca ādi. Udakapariyantaṃ katvā chappakārapavedhanaṃ avītarāge bhīṃsetīti bhīṃsano, so eva **bhīṃsanakoti** āha “**bhayaṇako**”ti. **Devabheriyoti** devadundubhisaddassa pariyaṇavacanamattaṃ. Na cettha kāci bherī “dundubhī”ti adhippetā, atha kho uppātabhāvena labbhamāno ākāśagato nigghosāsaddo. Tenāha “**devo**”tiādi. **Devoti** megho. Tassa hi gajjabhāvena ākāśassa vassābhāvena sukkhagajjitasāññite sadde niccharante devadundubhisamaññā. Tenāha “**devo sukkhagajjitaṃ gajjī**”ti.

Pīvegavissatṭhanti “evaṃ cirataraṃ kālaṃ vahito ayaṃ attabhāvasaññito dukkhabhāro, idāni na cirasseva nikkhipissāmī”ti sañjātasomanasso bhagavā sabhāveneva pīvegavissatṭhaṃ udānaṃ udānesi. Evaṃ pana udānentena ayampi attho sādhitō hotīti dassanattaṃ aṭṭhakathāyaṃ “**kasmā**”tiādi vuttaṃ.

Tuliyatīti **tulanti** tula-saddo kammaśādhanti dassetuṃ “**tulita**”tiādi vuttaṃ. Appānubhāvātāya **paricchinnaṃ**. Tathā hi taṃ parito khaṇḍitabhāvena “paritta”nti vuccati. Paṭipakkhāvikkhambhanato dīghasantānatāya vipulaphalatāya ca **na tulaṃ** na paricchinnaṃ. Yehi kāraṇehi pubbe avisesato mahaggataṃ “atula”nti vuttaṃ, tāni kāraṇāni rūpāvacarato arūpassa sātisaṇṇāni vijjantīti arūpāvacaraṃ “atula”nti vuttaṃ itaraṇca “tula”nti. **Appavipākanti** tīsūpi kammesu yaṃ tanuvipākaṃ hīnaṃ, taṃ tulaṃ. **Bahuvipākanti** yaṃ mahāvipākaṃ paṇītaṃ, taṃ atulaṃ. Yaṃ panettha majjhimāṃ, taṃ hīnaṃ ukkaṭṭhanti dvīdhā bhindivā dvīsūpi bhāgesu pakkhipitabbaṃ. Hīnattikavaṇṇanāyaṃ (dha. sa. aṭṭha. 14) vuttanāyena vā appabahuvipākataṃ niddhāretvā tassa vasena tulātulabhāvo veditabbo. Sambhavati etasmāti **sambhavoti** āha “**sambhavahetubhūta**”nti. **Niyakajjhataratoti** sasantānadhammesu vipassanāvasena gocarāsevanāya ca nirato. Savipākampi samānaṃ pavattivipākamattadāyikammaṃ savipākātṭhena sambhavaṃ, na ca taṃ kāmādivibhāvabhisañkhāraṃ tato viśesanattaṃ “sambhava”nti vatvā “**bhavaśākhāra**”nti vuttaṃ. **Ossajjīti** ariyamaggā avassajji. **Kavacaṃ viya** attabhāvaṃ pariyaṇandhitvā ṭhitaṃ attani sambhūtattā **attasambhavaṃ** kilesaṇca abhindīti kilesabhedasahabhāvīkammossajjanaṃ dassento tadubhayassa kāraṇamavoca “**ajjhatarato samāhito**”ti.

Paṭhamavikappe avasajjanameva vuttaṃ, ettha avasajjanākāroti taṃ dassento “**atha vā**”tiādimāha. Tattha **tīrentoti** “uppādo bhayaṃ, anuppādo khema”ntiādinā (paṭi. ma. 1.10) vīmaṃsanto. “**Tulento**

tīrento”tiādinā saṅkhepato vuttamatthaṃ vitthārato dassetuṃ **“pañcakkhandhā**”tiādiṃ vatvā bhavasāṅkhārassa avasajjanākāraṃ sarūpato dasseti. **Evanti**tiādinā pana udānagāthāvaṇṇanāyaṃ ādito vuttamatthaṃ nigamavasena dasseti.

Yanti (dī. ni. tī. 2.171) karaṇe, adhikaraṇe vā paccattavacananti āha **“yena samayena, yasmim vā samaye**”ti. **Ukkhepakavātā**ti udakasandhāarakavātaṃ upacchinditvā t̥hitaṭṭhānato khepakavātā. **Saṭṭhi...pe... bahalanti** idaṃ tassa vātassa ubbedhappamāṇameva gahetvā vuttaṃ, āyānavitthārato pana dasasahassacakkavāḷappamāṇaṃ koṭisatasahassacakkavāḷappamāṇampi udakasandhāarakavātaṃ upacchindatiyeva. **Ākāseti** pubbe vātena patit̥ṭhitākāse. **Puna vātoti** ukkhepakavāte tathā katvā vigate udakasandhāarakavāto puna **ābandhitvā gaṇhāti**. Yathā taṃ udakaṃ na bhassati, evaṃ upatthambhentaṃ ābandhanavitānavasena bandhitvā gaṇhāti. **Tato udakaṃ uggacchatī**ti tato ābandhitvā gahaṇato tena vātena uṭṭhāpitaṃ udakaṃ uggacchati upari gacchati. **Hotiyevāti** antarantarā hotiyeva. **Bahubhāvenāti** mahāpathaviyā mahantabhāvena. Sakalā hi mahāpathavī tadā oggacchati ca uggacchati ca, tasmā kampanaṃ na paññāyati.

Ijghanassāti icchitatthasijghanassa anubhavitabbassa issariyasampattiādikassa. **Parittāti** paṭiladdhamattā nātisubhāvitā. Tathā ca bhāvanā balavatī na hotīti āha **“dubbalā**”ti. Saññāsīsenā hi bhāvanā vuttā. **Appamāṇāti** paguṇā subhāvitā. Sā hi thirā dalhatarā hotīti āha **“balavā**”ti. **“Parittā pathavīsaññā, appamāṇā āposaññā**”ti desanāmettaṃ, āposaññāya pana subhāvitāya pathavīkampō sukheveva ijhatīti ayamettha adhippāyo veditabbo. **Samvejento vā** dibbasampattiyā pamattaṃ sakkāṃ devarājānaṃ, **vīmaṃsanto vā** tāvadeva samadhigataṃ attano iddhibalaṃ. So kirāyasmā (dī. ni. aṭṭha. 2.171) khuragge arahattaṃ patvā cintesi – “atthi nu kho koci bhikkhu yena pabbajitadvaseyeva arahattaṃ patvā vejayanto pāsādo kampitapubbo”ti. Tato “natthi koci”ti ñatvā “ahaṃ kameppamā”ti abhiññābalena vejayantamatthake t̥hatvā pādena paharitvā kompetuṃ nāsakkhi. Atha naṃ sakkassa nāṭakittiyo āhaṃsu – “putta saṅgharakkhita, tvaṃ pūṭigandheneva sīsenā vejayantaṃ kompetuṃ icchasi, suppatiṭṭhito, tāta, pāsādo, kathaṃ kompetuṃ sakkhissasi”ti.

Sāmaṇero “imā devatā mayā saddhiṃ keḷiṃ karonti, ahaṃ kho pana ācariyaṃ nālatthaṃ, kahaṃ nu kho me ācariyo sāmuddikamahānāgatthero”ti āvajjtvā “mahāsamudde udakaleṇaṃ māpetvā divāvihāraṃ nisinna”ti ñatvā tattha gantvā therāṃ vanditvā aṭṭhāsi. Tato naṃ thero, “tāta saṅgharakkhita, asikkhitvāva yuddhaṃ pavit̥ṭhosi”ti vatvā “nāsakkhi, tāta, vejayantaṃ kompetu”nti pucchi. Ācariyaṃ, bhante, nālatthanti. Atha naṃ thero, “tāta, tumhādisse akampente añño ko kameppati, diṭṭhapubbaṃ te, tāta, udakapiṭṭhe gomayakhaṇḍaṃ pilavantaṃ, tāta, kapallapūvaṃ paccantaṃ antantena paricchinnanti iminā opammaṇa jānāhi”ti āha. So “vaṭṭissati, bhante, ettakenā”ti vatvā “pāsādena patit̥ṭhitokāsaṃ udakaṃ hotū”ti adhit̥ṭhāya vejayantābhimukho agamāsi. Devadhītarō taṃ disvā “ekavāraṃ lajjitvā gato, punapi sāmaṇero eti, punapi eti”ti vadim̥su. Sakko devarājā “mā mayhaṃ puttana saddhiṃ kathayittha, idāni tena ācariyo laddho khaṇena pāsādaṃ kameppati”ti āha. Sāmaṇeropi pādaṅgut̥ṭhena pāsādathūpikaṃ pahari, pāsādo catūhi disāhi oṇamati. Devatā “patiṭṭhātuṃ dehi, tāta, pāsādassa, patiṭṭhātuṃ dehi, tāta, pāsādassā”ti viravim̥su. Sāmaṇero pāsādaṃ yathāṭṭhāne t̥hapetvā pāsādamatthake t̥hatvā udānaṃ udānesi –

“Ajjevāhaṃ pabbajito, ajja pattāsavakkhayaṃ;
Ajja kampemi pāsādaṃ, aho buddhassuḷāratā.

“Ajjevāhaṃ pabbajito, ajja pattāsavakkhayaṃ;
Ajja kampemi pāsādaṃ, aho dhammassuḷāratā.

“Ajjevāhaṃ pabbajito, ajja pattāsavakkhayaṃ;
Ajja kampemi pāsādaṃ, aho saṅghassuḷāratā”ti.

“Dhammatā esā, bhikkhave, yadā bodhisatto tusitakāyā cavitvā mātukucchiṃ okkamati”ti (dī. ni.

2.18) vatvā “ayañca dasasahassī lokadhātu saṅkampi sampakampi sampavedhī”ti (dī. ni. 2.18), tathā “dhammatā eṣā, bhikkhave, yadā bodhisatto mātukucchimhā nikkhamatī”ti (dī. ni. 2.32) vatvā “ayañca dasasahassī lokadhātu saṅkampi sampakampi sampavedhī”ti (dī. ni. 2.32) ca mahāsattassa gabbhokkantiyaṃ abhijātiñca dhammatāvasena mahāpadāne pathavīkampassa vuttattā itaresupī catūsu thānesu pathavīkampo dhammatāvasenevāti atthato vuttametanti daṭṭhabbaṃ.

Idāni nesam pathavīkampānaṃ kāraṇato pavattiākārato ca vibhāgaṃ dassetuṃ “**iti imesū**”tiādi vuttaṃ. **Dhātukopenāti** ukkhepakavātasāṅkhātāya vāyodhātuyā pakopena. **Iddhānubhāvenāti** ñāṇiddhiyā, kammavipākajiddhiyā vā sabhāvena, tejenāti attho. **Puññatejenāti** puññānubhāvena, mahābodhisattassa puññabalenāti attho. **Ñāṇatejenāti** anaññasādhāraṇena paṭivedhaññānubhāvena. **Sādhukāradānavasenāti** yathā anaññasādhāraṇappaṭivedhaññānubhāvena abhihatā mahāpathavī abhisambodhiyaṃ kampittha, evaṃ anaññasādhāraṇena desanāññānubhāvena abhihatā mahāpathavī kampittha, taṃ panassā sādhukāradānaṃ viya hotīti “sādhukāradānavasenā”ti vuttaṃ.

Yena pana bhagavā asītianubyañjanappaṭimaṇḍitadvattimsamahāpurisalakkhaṇavicitrarūpakāyo sabbākāraparisuddhasīlakkhandhādiguṇaratanasamiddhidhammakāyo puññamahattathāmamahattaidhimahattayasamahattapaññāmahattānaṃ paramukkaṃsagato asamo asamasamo appaṭipuggalo arahaṃ sammāsambuddho attano attabhāvasaññitaṃ khandhapañcakam kappam vā kappāvasesam vā thapetuṃ samatthopi saṅkhatadhammaparijigucchanākārappavattena ñāṇavisesena tiṇāyapi amaññamāno āyusaṅkhārossajjanavidhinā nirapekkho ossajji. Tadanubhāvābhīhatā mahāpathavī āyusaṅkharossajjane akampittha. Taṃ panassā kāruññasabhāvasaṅghitā viya hotīti vuttaṃ “**kāruññabhāvenā**”ti.

Yasmā bhagavā parinibbānasamaye catuvīsati koṭisatasahassasāṅkhā samāpattiyo samāpajji, antarantarā phalasaṃpattisaṃpajjanena tassa pubbabhāge sātisaṃyā tikkhaṃ sūraṃ vipassanāññāṇaṃ pavattesi. “Yadatthañca mayā evaṃ sucirakālaṃ anaññasādhāraṇo paramukkaṃsagato ñāṇasambhāro sambhato, anuttaro ca vimokkho samadhigato, tassa vata me sikhāppattaphalabhūtā accantaniṭṭhā anupādisesaparinibbānadhātu ajja samijjhatī”ti bhiyyo ativiya somanassappattassa bhagavato pīti vipphārādiguṇavipulatarānubhāvo parehi asādhāraṇaṇāññātisayo udapādi, yassa samāpattibalasamupabrūhitassa ñāṇātisayassa ānubhāvaṃ sandhāya idaṃ vuttaṃ “dveme piṇḍapātā samasaṃphalā samasaṃvīpākā”tiādi (udā. 75), tasmā tassānubhāvena samabhihatā mahāpathavī akampittha, taṃ panassā tassam velāyaṃ ārodanākārappatti viya hotīti “**aṭṭhamo ārodanena**”ti vuttaṃ.

Idāni saṅkhepato vuttamatthaṃ vivaranto “**mātukucchiṃ okkamante**”tiādimāha. **Ayaṃ panatthoti** “sādhukāradānavasenā”tiādinā vutta attho. **Pathavīdevatāya vassenāti** ettha samuddadevatā viya mahāpathavīyā adhidevatā kira nāma atthi, tādise kāraṇe sati tassā cittavasena ayaṃ mahāpathavī saṅkampi sampakampi sampavedhati. Yathā vātavalāhakadevatānaṃ cittavasena vātā vāyanti, sītuṇhaabbhavassavalāhakadevatānaṃ cittavasena sītādayo bhavanti, tathā hi visākhapuñṇamāyaṃ abhisambodhiatthaṃ bodhirukkhamūle nisinnassa lokanāthassa antarāyakaṇaṇatthaṃ upaṭṭhitam mārabalaṃ vidhamituṃ –

“Acetanāyaṃ pathavī, aviññāya sukhaṃ dukhaṃ;
Sāpi dānabalā mayhaṃ, sattakkhattuṃ pakampathā”ti. (cariyā. 1.124) –

Vacanasamanantaraṃ mahāpathavī bhijjivā sapaṇisaṃ mārāṃ parivattesi. **Etanti** sādhukāradānādi. Yādi pi natthi acetanattā, dhammatāvasena pana vuttanayena siyāti sakkā vattuṃ. Dhammatā pana atthato dhammabhāvo, so puññadhammassa vā ñāṇadhammassa vā ānubhāvasabhāvoti. Tayidaṃ sabbaṃ vicāritameva. Evañca katvā –

“Ime dhamme sammasato, sabhāvasarasalakkhaṇe;
Dhammatejena vasudhā, dasasahassī pakampathā”ti. (bu. vaṃ. 2.166) –

Ādivacanañca samatthitaṃ hoti.

Ayaṃ pana (dī. ni. aṭṭha. 1.149) mahāpathavī aparesupi aṭṭhasu ṭhānesu akampittha mahābhinnikkhamaṇe bodhimaṇḍūpasāṅkamaṇe paṃsukūlaggahaṇe paṃsukūladhovane kālakārāmasutte gotamakassutte vessantarajātake brahmajāleti. Tattha mahābhinnikkhamaṇabodhimaṇḍūpasāṅkamaṇesu vīriyabalena akampittha. Paṃsukūlaggahaṇe “dvisahassadīpaparivāre nāma cattāro mahādīpe pahāya pabbajitvā susānaṃ gantvā paṃsukūlaṃ gaṇhantena dukkaraṃ bhagavatā kata”nti acchariyavegābhihatā akampittha. Paṃsukūladhovanavessantarajātakesu akālakampanena akampittha. **Kālakārāmagotamakassutesu** (a. ni. 4.24; 3.126) “ahaṃ sakkhī bhagavā”ti sakkhibhāvena akampittha. **Brahmajāle** (dī. ni. 1.147) pana dvāsaṭṭhiyā diṭṭhigatesu vijaṭetvā niggumbaṃ katvā desiyamānesu sādhuḥkārādānavasena akampitthāti veditabbā.

Na kevalaṇca etesuyeva ṭhānesu pathavī akampittha, atha kho tīsu saṅgahesupi mahāmahindattherassa imaṃ dīpaṃ āgantvā jotivane nisīditvā dhammaṃ desitadivasepi akampittha. Kalyāṇiyamahāvihāre ca piṇḍapātiyattherassa cetiyaṅgaṇaṃ sammajjitvā tattheva nisīditvā buddhārammaṇaṃ pītiṃ gahetvā imaṃ suttantaṃ āradhassa suttapariyosāne udakapariyantaṃ katvā akampittha. Lohapāsādassa pācīnaambalaṭṭhikaṭṭhānaṃ nāma ahosi, tattha nisīditvā dīghabhāṇakattherā brahmajālasuttaṃ ārabhiṃsu. Tesam sajjhāyapariyosānepi udakapariyantameva katvā pathavī akampittha.

Yadi evaṃ “aṭṭhime, ānanda, hetū aṭṭha paccayā mahato bhūmicālassa pātubhāvāyā”ti kasmā aṭṭheva hetū vuttāti? Niyamahetubhāvato. Imeyeva hi aṭṭha hetū niyamanti, nāññe. Te hi kadāci sambhavantīti aniyamabhāvato na gaṇitā. Vuttañhetam nāgasenattherena **milindapañhe** (mi. pa. 4.1.4) –

“Aṭṭhime, bhikkhave, hetū aṭṭha paccayā mahato bhūmicālassa pātubhāvāyāti. Yaṃ vessantarena raññā mahādāne dīyamāne sattakkhattuṃ mahāpathavī kampitā, tañca pana akālikaṃ kadācuppattikaṃ aṭṭhahi hetūhi vippamuttaṃ, tasmā agaṇitaṃ aṭṭhahi hetūhi.

“Yathā, mahārāja, loke tayoyeva meghā gaṇiyanti vassiko, hemantiko, pāvusakoti. Yadi te muñcitvā añño megho pavassati, na so megho gaṇiyati sammatehi meghehi, akālameghotveva saṅkhaṃ gacchati, evameva kho, mahārāja, vessantarena raññā mahādāne dīyamāne yaṃ sattakkhattuṃ mahāpathavī kampitā, akālikaṃ etaṃ kadācuppattikaṃ aṭṭhahi hetūhi vippamuttaṃ, na taṃ gaṇiyati aṭṭhahi hetūhi.

“Yathā vā pana, mahārāja, himavantā pabbatā pañca nadisatāni sandanti, tesam, mahārāja, pañcannaṃ nadisatānaṃ daseva nadiyo nadigaṇanāya gaṇiyanti. Seyyathidaṃ – gaṅgā, yamunā, aciravatī, sarabhū, mahī, sindhu, sarassatī, vetravatī, vītaṃsā, candabhāgātī. Avasesā nadiyo nadigaṇanāya agaṇitā. Kiṃkāraṇā? Na tā nadiyo dhuvasalilā, evameva kho, mahārāja, vessantarena raññā mahādāne dīyamāne yaṃ sattakkhattuṃ mahāpathavī kampitā, akālikaṃ etaṃ kadācuppattikaṃ aṭṭhahi hetūhi vippamuttaṃ, na taṃ gaṇiyati aṭṭhahi hetūhi.

“Yathā vā pana, mahārāja, rañño satampi dvisatampi tisatampi amaccā honti, tesam chayeva janā amaccagaṇanāya gaṇiyanti. Seyyathidaṃ – senāpati, purohito, akkhadasso, bhaṇḍāgāriko, chattaḅgāhako, khaggaggāhako, eteyeva amaccagaṇanāya gaṇiyanti. Kiṃkāraṇā? Yuttattā rājaguṇehi. Avasesā agaṇitā, sabbe amaccātveva saṅkhaṃ gacchanti, evameva kho, mahārāja, vessantarena raññā mahādāne dīyamāne yaṃ sattakkhattuṃ mahāpathavī kampitā, akālikaṃ etaṃ kadācuppattikaṃ aṭṭhahi hetūhi vippamuttaṃ, na taṃ gaṇiyati aṭṭhahi hetūhi”ti.

Bhūmicālasuttavaṇṇanā niṭṭhitā.

Cāpālavaggavaṇṇanā niṭṭhitā.

(8) 3. Yamakavaggo

1-10. Saddhāsuttādivaṇṇanā

71-80. Aṭṭhamassa paṭhamādāni uttānatthāneva. Dasame kucchitaṃ sīdatīti **kusīto** da-kārassa ta-kāraṃ katvā. Yassa dhammassa vasena puggalo “kusīto”ti vuccati, so kusitabhāvo idha kusita-saddena vutto. Vināpi hi bhāvajotanasaddaṃ bhāvatto viññāyati yathā “paṭassa sukka”nti, tasmā kusitabhāvavattḥūnīti attho. Tenāha “**kosajjakāraṇānīti attho**”ti. Kammaṃ nāma samaṇasārappaṃ īdisanti āha “**cīvaravicāraṇādī**”ti. **Vīriyanti** padhānavīriyaṃ. Taṃ pana caṅkamanavasena karaṇe kāyikantipi vattabbaṃ labhatīti āha “**duvidhampī**”ti. **Pattiyāti** pāpuṇanattham. **Osīdananti** bhāvanānuyoge saṅkoco. Māsehi ācītaṃ nicītaṃ viyāti **māsācītaṃ**, taṃ maññe. Yasmā māsā tintā visesena garukā hontī, tasmā “**yathā tintamāso**”tiādi vuttaṃ. **Vuṭṭhito hoti** gilānabhāvāti adhippāyo.

Tesanti ārambhavattḥūnaṃ. **Imināva nāyenti** iminā kusītavattḥūsu vutteneva nāyenti “duvidhampī vīriyaṃ ārabhatī”tiādinā. **Idaṃ paṭhamanti** “idaṃ, handāhaṃ, vīriyaṃ ārabhāmī”ti, “evaṃ bhāvanāya abhussahaṇaṃ paṭhamaṃ ārambhavattḥū”tiādinā ca attho vedītabbo. Yathā tathā paṭhamaṃ pavattaṃ abhussahaṇāni upari vīriyārambhassa kāraṇaṃ hoti. Anurūpapaccavekkhaṇasahitāni hi abhussahaṇāni tammūlakāni vā paccavekkhaṇāni aṭṭha ārambhavattḥūnīti vedītabbāni.

Saddhāsuttādivaṇṇanā niṭṭhitā.

Yamakavaggavaṇṇanā niṭṭhitā.

81-626. Sesam uttānameva.

Iti manorathapūraṇiyā aṅguttaranikāya-aṭṭhakathāya

Aṭṭhakanipātavaṇṇanāya anuttānatthadīpanā samattā.

Namo tassa bhagavato arahato sammāsambuddhassa

Aṅguttaranikāye

Navakanipāta-ṭīkā

1. Paṭhamapaṇṇāsakaṃ

1. Sambodhivaggo

1-2. Sambodhisuttādivaṇṇanā

1-2. Navakanipātassa paṭhamadutīyesu natthi vattabbaṃ.

3. Meghiyasuttavaṇṇanā

3. Tatiye (udā. aṭṭha. 31) **meghiyoti** tassa therassa nāmaṃ. **Upaṭṭhāko hotīti** paricārako hoti.

Bhagavato hi paṭhamabodhiyaṃ upaṭṭhākā anibaddhā ahesuṃ. Ekadā nāgasamalo, ekadā nāgito, ekadā upavāṇo, ekadā sunakkhatto, ekadā cundo samaṇuddeso, ekadā sāgato, ekadā meghiyo, tadāpi meghiyattherova upaṭṭhāko hoti. Tenāha “**tena kho pana samayena āyasmā meghiyo bhagavato upaṭṭhāko hoti**”ti.

Kimikālayāti kālakimīnaṃ bahulatāya “kimikāḷā”ti laddhanāmāya nadiyā. **Jaṅghāvihāranti** ciranisajjāya jaṅghāsu uppannakilamathavinodanattaṃ vicaraṇaṃ. **Pāsādikanti** aviraḷarukkhatāya siniddhapattatāya ca passantānaṃ pasādaṃ āvahaṭṭi pāsādikāṃ. Sandacchāyatāya manuññabhūmibhāgatāya ca anto pavīṭṭhānaṃ pītisomanassajananaṭṭhena cittaṃ rametīti **ramaṇīyaṃ**. **Alanti** pariyaṭṭaṃ, yuttantiṭi attho. **Padhānatthikassāti** padhānena bhāvanānuyogena atthikassa. Yasmā so padhānakamme yutto padhānakammiko nāma hoti, tasmā vuttaṃ “**padhānakammikassā**”ti. **Āgaccheyyāhanti** āgaccheyyaṃ ahaṃ. Therena kira pubbe taṃ ṭhānaṃ anuppaṭipāṭiyā pañca jātisatāni raññā eva satā anubhūtapubbaṃ uyyānaṃ ahoṣi, tenassa diṭṭhamatteyeva tattha viharitūṃ cittaṃ nami.

Yāva aññopi koci bhikkhu āgacchatīti añño kocipi bhikkhu mama santikaṃ yāva āgacchati, tāva āgamehīti attho. “Koci bhikkhu dissatī”tipi pāṭho, “āgacchatū”tipi paṭhanti, tathā “dissatū”tipi. **Natthi kiñci uttari karaṇīyanti** catūsu saccesu catūhi maggehi pariññādīnaṃ soḷasannaṃ kiccānaṃ katattā abhisambodhiyā vā adhiगतattā tato aññaṃ uttari karaṇīyaṃ nāma natthi. **Catūsu saccesu catunnaṃ kiccānaṃ katattāti** idaṃ pana maggavasena labbhabhānaṃ bhedaṃ anupekkhitvā vuttaṃ. **Atthi katassa paṭicayoti** mayhaṃ santāne nipphāditassa silādidhammassa ariyamaggassa anadhiगतattā tadattaṃ puna vaḍḍhanasaṅkhāto paṭicayo atthi, icchitabboti attho.

Tividhanāṭakaparivāroti mahantitthiyo majjhimitthiyo atitaruṇitthiyoti evaṃ vadhūkumārikakaññāvattahāhi tividhāhi nāṭakitthīhi parivuto. **Akusalavitakkehīti** yathāvuttehi kāmavitakkādīhi. Apare pana “tasmim vanasaṇḍe pupphaphalapallavādīsu lobhavasena kāmavitakko, kharassarānaṃ pakkhiādīnaṃ saddassavanena byāpādavitaṅko, leḍḍuādīhi tesam viheṭṭhanādhippāyena vihiṃsāvitaṅko. ‘Idhevāhaṃ vaseyya’nti tattha sāpekkhatāvasena vā kāmavitakko, vanacarake tattha tattha disvā tesu cittadubbhanena byāpādavitaṅko, tesam viheṭṭhanādhippāyena vihiṃsāvitaṅko tassa uppajjati”ti vadanti. Yathā tathā vā tassa micchāvitakkaṃ acchariyakāraṇaṃ. **Acchariyaṃ vata, bhoti** garaṇacchariyaṃ nāma kiretaṃ. Yathā āyasmā ānando bhagavato valiagattaṃ disvā avoca “acchariyaṃ, bhante, abbhutaṃ, bhante”ti (saṃ. ni. 5.511). **Samparivāritāti** vokiṇṇā. Attani garumhi ca ekattepi bahuvacanaṃ dissati. “Anvāsatto”tipi pāṭho. Kasmā panassa bhagavā tattha gamanaṃ anujāni? “Ananuññātopi cāyaṃ maṃ ohāya gacchissateva, paricārakāmatāya maññe bhagavā gantuṃ na detīti cassa siyā aññathattaṃ, tadassa dīgharattaṃ ahitāya dukkhāya saṃvatteyyā”ti anujāni.

Evaṃ tasmim attano pavattim ārocetvā nisinne athassa bhagavā sappāyadhammaṃ desento “**aparipakkāya, meghiya, cetovimuttiyā**”tiādīmāha. Tattha “**aparipakkāyā**”ti paripākaṃ appattāya. **Cetovimuttiyā**ti kilesehi cetaso vimuttiyā. Pubbabhāge hi tadanavasena ceva vikkhambhanavasena ca cetaso vimutti hoti, aparabhāge samucchadavasena ceva paṭippassaddhivasena ca. Sāyaṃ vimutti heṭṭhā vitthārato kathitāva, tasmā tattha vuttanayena veditabbā. Tattha vimutti paripācanīyehi dhammehi āsaye paripācīte sodhite vipassanāya maggagabbhaṃ gaṇhantiyā paripākaṃ gacchantiyā cetovimutti paripakkā nāma hoti, tadabhāve aparipakkā.

Katame pana vimutti paripācanīyā dhammā? Saddhindriyādīnaṃ visuddhikaraṇavasena pannarasa dhammā veditabbā. Vuttañhetam –

“Assadde puggale parivajjayato, saddhe puggale sevato bhajato payirupāsato, pasādanīye suttante paccavekkhato imehi tīhākārehi saddhindriyaṃ visujjhati.

“Kusīte puggale parivajjayato, āradhāvīriye puggale sevato bhajato payirupāsato, sammappadhāne paccavekkhato imehi tīhākārehi vīriyindriyaṃ visujjhati.

“Mutṭhassatī puggale parivajjayato, upaṭṭhitassatī puggale sevato bhajato payirupāsato, satipaṭṭhāne paccavekkhato imehi tīhākārehi satindriyaṃ visujjhati.

“Asamāhite puggale parivajjayato, samāhite puggale sevato bhajato payirupāsato, jhānavimokkhe paccavekkhato imehi tīhākārehi samādhindriyaṃ visujjhati.

“Duppaññe puggale parivajjayato, paññavante puggale sevato bhajato payirupāsato, gambhīraññācarīyaṃ paccavekkhato imehi tīhākārehi paññindriyaṃ visujjhati.

“Iti ime pañca puggale parivajjayato, pañca puggale sevato bhajato payirupāsato, pañca suttante paccavekkhato imehi pannarasahi ākārehi imāni pañcindriyāni visujjhanti”ti (paṭi. ma. 1.185).

Aparehipi pannarasahi ākārehi imāni pañcindriyāni visujjhanti. Aparepi pannarasa dhammā vimutti-paripācanīyā. Saddhāpañcamāni indriyāni, anicca-saññā anicce, dukkha-saññā dukkhe, anattasāññā, pahānasāññā, virāgasāññāti imā pañca nibbedhabhāgiyā saññā, kalyāṇamittatā, sīlasaṃvaro, abhisallekhatā, vīriyārambho, nibbedhikapaññāti. Tesu veneyyadamanakusalo satthā veneyyassa meghiyattherassa ajjhāsavāsena idha kalyāṇamittatādayo vimutti-paripācanīye dhamme dassento “**pañca dhammā paripakkāya saṃvattanti**”ti vatvā te vitthārento “**idha, meghiya, bhikkhu kalyāṇamitto hoti**”tiādīmāha.

Tattha **kalyāṇamittoti** kalyāṇo bhaddo sundaro mitto etassāti kalyāṇamitto. Yassa sīlādiguṇasampanno “aghasa tātā hitassa vidhātā”ti evaṃ sabbākāreṇa upakāro mitto hoti, so puggalo kalyāṇamittova. Yathāvutthehi kalyāṇapuggaleheva sabbiriyāpathesu saha ayati pavattati, na vinā tehīti **kalyāṇasahāyo**. Kalyāṇapuggalesu eva cittena ceva kāyena ca ninnapoṇapabbhārahāvena pavattatīti **kalyāṇasampavaṅko**. Padattayena kalyāṇamittasamsagge ādaraṃ uppādeti. **Ayaṃ** kalyāṇamittatāsāṅkhāto brahmacariyavāsassa ādibhāvato sabbesañca kusaladhammānaṃ bahukāratāya padhānabhāvato ca imesu pañcasu dhammesu ādito vuttatā **paṭhamo** anavajjadhammo avisuddhānaṃ saddhādīnaṃ visuddhikaraṇavasena **cetovimuttiyā paripakkāya saṃvattati**. Ettha ca kalyāṇamittassa bahukāratā padhānatā ca “upaḍḍhamidaṃ, bhante, brahmacariyassa yadidaṃ kalyāṇamittatā”ti vadantaṃ dhammabhaṇḍāgarikaṃ “mā hevaṃ, ānandā”ti dvikkhatuṃ paṭisedhetvā “sakalameva hidam, ānanda, brahmacariyaṃ yadidaṃ kalyāṇamittatā kalyāṇasahāyatā”ti – ādisuttapadehi (saṃ. ni. 1.129; 5.2) veditabbā.

Puna caparanti puna ca aparaṃ dhammajātaṃ. **Sīlavāti** ettha kenaṭṭhena sīlaṃ? Sīlanaṭṭhena sīlaṃ. Kimidaṃ sīlanaṃ nāma? Samādhānaṃ, kāyakammādīnaṃ susīlyavasena aviṃṇatāti attho. Atha vā upadhāraṇaṃ, jhānādikusaladhammānaṃ patiṭṭhānavasena ādhārahāvoti attho. Tasmā sīleti, sīlatīti vā sīlaṃ. Ayaṃ tāva saddalakkhaṇanayena sīlaṭṭho. Apare pana “siraṭṭho sīlaṭṭho, sīlataṭṭho, sīlaṭṭho”ti niruttinayena atthaṃ vaṇṇenti. Tayidaṃ pāripūrito atisayato vā sīlaṃ assa atthīti **sīlavā**, sīlasampannoti attho.

Yathā ca sīlavā hoti sīlasampanno, taṃ dassetuṃ “**pātimokkhasaṃvarasaṃvuto**”tiādi vuttaṃ. Tattha **pātimokkhanti** sikkhāpadasīlaṃ. Tañhi yo naṃ pāti rakkhati, taṃ mokkheti moceti āpāyikādīhi dukkhehīti pātimokkhaṃ. Saṃvaraṇaṃ saṃvaro, kāyavācāhi avītikamo. Pātimokkhaveva saṃvaro pātimokkhasaṃvaro, tena saṃvuto pihitakāyavācoti **pātimokkhasaṃvarasaṃvuto**. Idamassa tasmīṃ sīle patiṭṭhitabhāvaparidīpanaṃ. **Viharatīti** tadanurūpavīhārasamaṅgibhāvaparidīpanaṃ. **Ācāragocarasaṃpannoti** heṭṭhā pātimokkhasaṃvarassa upari visesānaṃ yogassa ca upakāradhammaparidīpanaṃ. **Aṇumattesu vajjesu bhayadassāvīti** pātimokkhasīlato acavanadhammatāparidīpanaṃ. **Samādāyāti** sikkhāpadānaṃ anavasesato ādānaparidīpanaṃ. **Sikkhatīti** sikkhāya samaṅgibhāvaparidīpanaṃ. **Sikkhāpadesūti** sikkhitabbadhammaparidīpanaṃ.

Aparo nayo – kilesānaṃ balavabhāvato pāpakiriyāya sukarabhāvato puññakiriyāya ca dukkarabhāvato bahukkhattuṃ apāyesu patanasīloti pātī, puthujjano. Aniccatāya vā bhavādīsu kammavegukkhitto ghaṭṭiyantaṃ viya anavaṭṭhānena paribbhamanato gamanasīloti pātī. Maraṇavasena vā tamhi tamhi sattanikāye attabhāvassa patanasīlo vā pātī, sattasantāno, cittameva vā. Taṃ pātinaṃ saṃsāradukkhatto mokkhetīti **pātimokkhaṃ**. Cittassa hi vimokkhena satto “vimutto”ti vuccati. Vuttañhi “cittavodānā visujjhantī”ti (saṃ. ni. 3.100), “anupādāya āsavehi cittaṃ vimutta”nti (mahāva. 28) ca.

Atha vā avijjādihetunā saṃsāre patati gacchati pavattatīti pātī. “Avijjānīvaraṇānaṃ sattānaṃ taṇhāsaṃyojanānaṃ sandhāvataṃ saṃsarata”nti (saṃ. ni. 2.124) hi vuttaṃ. Tassa pātino sattassa taṇhādisaṃkilesattayato mokkho etenāti **pātimokkhaṃ**.

Atha vā pātetī vinipātetī dukkheti pātī, cittaṃ. Vuttañhi “cittena nīyatī loko, cittena parikkassatī”ti (saṃ. ni. 1.62). Tassa pātino mokkho etenāti **pātimokkhaṃ**. Patati vā etena apāyadukkhe saṃsāradukkhe cāti pātī, taṇhādisaṃkilesa. Vuttañhi “taṇhā janeti purisaṃ (saṃ. ni. 1.55). Taṇhādutiyo puriso”ti (a. ni. 4.9; itivu. 15, 105) ca ādī. Tato pātito mokkhoti **pātimokkhaṃ**.

Atha vā patati etthāti pātī, cha ajjhattikabāhirāni āyatanāni. Vuttañhi “chaso loko samuppanno, chaso kubbati santhava”nti (su. ni. 171). Tato chaajjhattikabāhirāyatanasaṅkhātato pātito mokkhoti **pātimokkhaṃ**. Atha vā pāto vinipāto assa atthīti pātī, saṃsāro. Tato mokkhoti **pātimokkhaṃ**. Atha vā sabbalokādhipatibhāvato dhammissaro bhagavā patīti vuccati, muccati etenāti mokkho, patino mokkho tena paññattatīti patimokkho, patimokkho eva **pātimokkhaṃ**. Sabbaguṇānaṃ vā mūlabhāvato uttamaṭṭhena pati ca so yathāvuttenatthena mokkho cāti patimokkho, patimokkho eva **pātimokkhaṃ**. Tathā hi vuttaṃ “pātimokkhanti ādimetaṃ mukhametaṃ pamukhameta”nti (mahāva. 135) vitthāro.

Atha vā **pa**-itī pakāre, **atī**ti accantatthe nipāto, tasmā pakārehi accantaṃ mokkhetīti **pātimokkhaṃ**. Idañhi sīlaṃ sayamaṃ tadanavasena, samādhisahitaṃ paññāsahitañca vikkhambhanavasena samucchadavasena accantaṃ mokkheti mocetīti **pātimokkhaṃ**. Pati pati mokkhoti vā patimokkho, tamhā tamhā vītikkamadosato paccekaṃ mokkhoti attho. Patimokkho eva **pātimokkhaṃ**. Mokkhoti vā nibbānaṃ, tassa mokkhassa paṭibimbabhūtoti patimokkho. Sīlasaṃvaro hi sūriyassa aruṇuggamaṇaṃ viya nibbānassa udayabhūto tappaṭibhāgova yathārahaṃ kilesanibbāpanato. Patimokkhoyeva **pātimokkhaṃ**. Atha vā mokkhaṃ pati vattati, mokkhābhimukhanti vā patimokkhaṃ, patimokkhameva **pātimokkhanti** evaṃ tāva ettha pātimokkhasaddassa attho veditabbo.

Samvarati pidahati etenāti saṃvaro, pātimokkhameva samvaroti pātimokkhasaṃvaro. Atthato pana tato tato vītikkamitabbato viratiyo cetanā ca, tena pātimokkhasaṃvarena upeto samannāgato **pātimokkhasaṃvarasaṃvuto**. Vuttañhetamaṃ bhagavatā – “iminā pātimokkhasaṃvarena upeto hoti samupeto upagato sampanno samannāgato, tena vuccati pātimokkhasaṃvarasaṃvuto”ti (vibha. 511).

Viharatīti iriyāpathavihārena viharati iriyati vattati. **Ācāragocarasaṃpannoti** veḷudānādīmicchājīvassa kāyapāgabbhiyādīnañca akaraṇena sabbaso anācāraṃ vajjetvā kāyiko avītikkamo, vācasiko avītikkamo, kāyikavācasiko avītikkamoti evaṃ vuttabhikkhu sārūpaācārasampattiyā vesiyādiagocaraṃ vajjetvā piṇḍapātādiatthamaṃ upasaṅkamaṇaṃ yuttaṭṭhānasaṅkhātādiagocaracāraṇena ca sampannattā ācāragocarasaṃpanno.

Apica yo bhikkhu satthari sagāravo sappatisso sabrahmacārīsu sagāravo sappatisso hirottappasaṃpanno sunivattho supāro pāsādikena abhikkantena paṭikkantena ālokiteṇa vilokiteṇa samīñjiteṇa pasāriteṇa iriyāpathasaṃpanno indriyesu guttadvāro bhojane mattaññū jāgariyaṃ anuyutto satisampajāññena samannāgato appiccho santuṭṭho pavivitto asaṃsaṭṭho ābhisamācārikesu sakkaccakārī garucittīkārahulo viharati, ayaṃ vuccati **ācārasaṃpanno**.

Gocarō pana upanissayagocarō, ārakkhagocarō, upanibandhagocaroti tividho. Tattha yo dasakathāvattugūṇasamannāgato vuttalakkhaṇo kalyāṇamitto, yaṃ nissāya assutaṃ suṇāti, sutam pariyaḍḍeti, kaṅkhaṃ vitarati, diṭṭhiṃ ujum karoti, cittaṃ pasādeti, yassa ca anusikkhanto saddhāya vaḍḍhati, sīlena, sutena, cāgena, paññāya vaḍḍhati, ayaṃ vuccati **upanissayagocarō**.

Yo bhikkhu antaragharaṃ pavittṭho vīthiṃ paṭipanno okkhittacakkhu yugamattadassī saṃvuto gacchati, na hatthiṃ olokento, na assaṃ, na rathaṃ, na pattiṃ, na itthiṃ, na purisaṃ olokento, na uddhaṃ ullokento, na adho olokento, na disāvidisaṃ pekkhamāno gacchati, ayaṃ **ārakkhagocarō**.

Upanibandhagocarō pana cattāro satipaṭṭhānā, yattha bhikkhu attano cittaṃ upanibandhati. Vuttañhetam bhagavatā – “ko ca, bhikkhave, bhikkhuno gocarō sako pettiko visayo, yadidaṃ cattāro satipaṭṭhānā”ti (saṃ. ni. 5.372). Tattha upanissayagocarassa pubbe vuttatā itaresaṃ vasenettha gocarō vedītabbo. Iti yathāvuttāya ācārasampattiya imāya ca gocarāsampattiya samannāgatatā **ācāragocarāsampanno**.

Aṇumattesu vajjesu bhayadassāvīti appamattakattā aṇuppamāṇesu assatiyā asaṅcicca āpannasekhiyaakusalacittupādādi bhedesu vajjesu bhayadassanaṣīlo. Yo hi bhikkhu paramāṇumattaṃ vajjaṃ aṭṭhasaṭṭhiyojanasatasahasubbedhasinerupabbatarājasadisam katvā passati, yopi sabbalahukaṃ dubbhāsitaṃ pārajikasadisam katvā passati, ayampi aṇumattesu vajjesu bhayadassāvī nāma. **Samādāya sikkhati sikkhāpadesūti** yaṃkiñci sikkhāpadesu sikkhitabbaṃ, taṃ sabbena sabbaṃ sabbathā sabbaṃ anavasesaṃ samādiyitvā sikkhati, vattati pūretīti attho.

Abhisallekhikāti ativiya kilesānaṃ sallekhanīyā, tesam tanubhāvāya pahānāya uttarūpā. **Cetovivaraṇasappāyāti** cetaso paṭicchādakānaṃ nīvaraṇānaṃ dūribhāvakaraṇena cetovivaraṇasaṅkhātānaṃ samathavipassanānaṃ sappāyā, samathavipassanācittasseva vā vivaraṇāya pākāṭikaraṇāya vā sappāyā upakārikāti cetovivaraṇasappāyā.

Idāni yena nibbidādiāvahaṇena ayaṃ kathā abhisallekhikā cetovivaraṇasappāyā ca nāma hoti, taṃ dassetaṃ “**ekantanibbidāyā**”tiādi vuttaṃ. Tattha **ekantanibbidāyāti** ekaṃseneva vaṭṭadukkhatō nibbindanattāyā. **Virāgāya nirodhāyāti** tasseva virajjanattāyā ca nirujjanattāyā ca. **Upasamāyāti** sabbakilesavūpasamāyā. **Abhiññāyāti** sabbassapi abhiññeyyassa abhiññānāyā. **Sambodhāyāti** catumaggasambodhāyā. **Nibbānāyāti** anupādisesanibbānāyā. Etesu hi ādito tīhi padehi vipassanā vuttā, dvīhi nibbānaṃ vuttaṃ. Samathavipassanā ādiṃ katvā nibbānapariyosāno ayaṃ sabbo uttarimanussadhammo dasakathāvattulābhino sijjhatīti dasseti.

Idāni taṃ kathaṃ vibhajitvā dassento “**appicchakathā**”tiādimāha. Tattha **appicchoti** niiccho, tassa kathā **appicchakathā**, appicchabhāvappaṭisaṃyuttakathā vā **appicchakathā**. Ettha ca atriccho, pāpiccho, mahiccho, appicchoti icchāvasena cattāro puggalā. Tesu attanā yathāladdhena lābhena atitto uparūpari lābhaṃ icchanto **atriccho** nāma. Yaṃ sandhāya –

“Catubbhi aṭṭhājḥagamā, aṭṭhāhipi ca soḷasa;
Soḷasāhi ca bāttiṃsa, atricchaṃ cakkamāsado;
Icchāhatassa posassa, cakkam bhamati matthake”ti. (jā. 1.5.103) ca;

“Atricchaṃ atilobhena, atilobhamadena cā”ti. ca vuttaṃ;

Lābhasakkārasilokanikāmayamānāya asantaḡuṇasambhāvanādhippāyo **pāpiccho**. Yaṃ sandhāya vuttaṃ “idhekacco assaddho samāno ‘saddhoti maṃ jano jānātū’ti icchati, dussīlo samāno ‘sīlavāti maṃ jano jānātū’ti icchatī”tiādi (vibha. 851).

Santaḡuṇasambhāvanādhippāyo paṭiggahaṇe amattaññū **mahiccho**, yaṃ sandhāya vuttaṃ

“idhekacco saddho samāno ‘saddhoti maṃ jano jānātū’ti icchati, sīlavā samāno ‘sīlavāti maṃ jano jānātū’ti icchati”tiādi. Duttappiyatāya hissa vijātamātāpi cittaṃ gahetuṃ na sakkoti. Tenetaṃ vuccati –

“Aggikkhandho samuddo ca, mahiccho cāpi puggalo;
Sakaṭena paccaye dentu, tayopete atappayā”ti.

Ete pana atricchatādayo dose ārakā vivajjetvā santaguṇaniguhanādhippāyo paṭiggahaṇe ca mattaññū **appiccho**. Attani vijjamānampi guṇaṃ paṭicchādetukāmatāya saddho samāno “saddhoti maṃ jano jānātū”ti na icchati, sīlavā, bahussuto, pavivitto, āraddhavīriyo, upaṭṭhitassati, samāhito, paññavā samāno “paññavāti maṃ jano jānātū”ti na icchati. Svāyaṃ paccayappiccho, dhutaṅgappiccho, pariattiappiccho adhigamappicchoti catubbidho. Tatha **catūsu paccayesu appiccho** paccayadāyakam deyyadhammaṃ attano thāmañca oloketvā sacepi hi deyyadhammo bahu hoti, dāyako appaṃ dātukāmo, dāyakassa vasena appameva gaṇhāti. Deyyadhammo ce appo, dāyako bahuṃ dātukāmo, deyyadhammassa vasena appameva gaṇhāti. Deyyadhammopi ce bahu, dāyakopi bahuṃ dātukāmo, attano thāmaṃ ñatvā pamāṇayuttameva gaṇhāti. Evarūpo hi bhikkhu anuppannaṃ lābhaṃ uppādeti, uppannaṃ lābhaṃ thāvaram karoti, dāyakānaṃ cittaṃ ārādheti. Dhutaṅgasamādānassa pana attani atthibhāvaṃ na jānāpetukāmo **dhutaṅgappiccho**. Yo attano bahussutabhāvaṃ jānāpetuṃ na icchati, ayaṃ **pariattiappiccho**. Yo pana sotāpannādīsu aññataro hutvā sabrahmacārīnampi attano sotāpannādibhāvaṃ jānāpetuṃ na icchati, ayaṃ **adhigamappiccho**. Evametesam appicchānaṃ yā appicchatā, tassā saddhiṃ sandassanādividhinā anekākāravokārānisamsavibhāvanavasena sappaṭipakkhassa atricchatādibhedassa icchācārassa ādīnavavibhāvanavasena ca pavattā kathā **appicchakathā**.

Santuṭṭhikathāti ettha **santuṭṭhī**ti sakena attanā laddhena tuṭṭhi santuṭṭhi. Atha vā visamaṃ paccayiccham pahāya samaṃ tuṭṭhi santuṭṭhi, santena vā vijjamānena tuṭṭhi santuṭṭhi. Vuttañcetam –

“Atītaṃ nānubaddho so, nappajappamanāgataṃ;
Paccuppanna yāpento, santuṭṭhoti pavuccatī”ti.

Sammā vā ñāyena bhagavatā anuññātavidhinā paccayehi tuṭṭhi santuṭṭhi, atthato itaritarapaccayasantoso, so dvādasavidho hoti. Kathaṃ? Cīvare yathālābhasantoso, yathābalasantoso, yathāsārappasantosoti tividho. Evaṃ piṇḍapātādīsu.

Tatrāyaṃ pabhedavaṇṇanā – idha bhikkhu cīvaram labhati sundaram vā asundaram vā, so teneva yāpeti, aññaṃ na pattheti, labhantopi na gaṇhāti, ayamassa **cīvare yathālābhasantoso**. Atha pana pakatidubbalo vā hoti ābādhajarābhībhūto vā, garucīvaram pārupanto kilamati, so sabhāgena bhikkhunā saddhiṃ taṃ parivattetvā lahukena yāpentopi santuṭṭhova hoti, ayamassa **cīvare yathābalasantoso**. Aparo paṇītapaccayalābhī hoti, so paṭṭacīvarādīnaṃ aññataram mahagghacīvaram bahūni vā labhitvā “idaṃ therānaṃ cirapabbajitānaṃ bahussutānaṃ anurūpaṃ, idaṃ gilānānaṃ dubbalānaṃ appalābhīnaṃ hotū”ti tesam datvā attanā saṅkārakūṭādito vā nantakāni uccinitvā saṅghāṭiṃ katvā tesam vā purāṇacīvarāni gahetvā dhārentopi santuṭṭhova hoti, ayamassa **cīvare yathāsārappasantoso**.

Idha pana bhikkhu piṇḍapātaṃ labhati lūkhaṃ vā paṇītaṃ vā, so teneva yāpeti, aññaṃ na pattheti, labhantopi na gaṇhāti, ayamassa **piṇḍapāte yathālābhasantoso**. Atha pana ābādhiko hoti, lūkhaṃ paṇītaṃ pakativiruddhaṃ byādhiviruddhaṃ vā piṇḍapātaṃ bhuñjitvā gālhaṃ vā rogābādhaṃ pāpuṇāti, so sabhāgassa bhikkhuno datvā tassa hatthato sappāyabhojanaṃ bhuñjitvā samaṇadhammaṃ karontopi santuṭṭhova hoti, ayamassa **piṇḍapāte yathābalasantoso**. Aparo bahuṃ paṇītaṃ piṇḍapātaṃ labhati, so “ayaṃ piṇḍapāto cirapabbajitānaṃ anurūpo”ti cīvaram viya tesam datvā tesam vā sesakaṃ attanā piṇḍāya caritvā missakāhāraṃ vā bhuñjantopi santuṭṭhova hoti, ayamassa **piṇḍapāte yathāsārappasantoso**.

Idha pana bhikkhuno senāsanam pāpuṇāti manāpaṃ vā āmanāpaṃ vā antamaso tiṇasanthārakampi, so teneva santussati, puna aññaṃ sundarataram pāpuṇāti, taṃ na gaṇhāti, ayamassa **senāsane yathālābhasantoso**. Atha pana ābādhiko hoti dubbalo vā, pakativiruddham vā so byādhiviruddham vā senāsanam labhati, yatthassa vasato aphāsu hoti, so taṃ sabhāgassa bhikkhuno datvā tassa santake sappāyaseṇāsane vasitvā samaṇadhammaṃ karontopi santuṭṭhova hoti, ayamassa **senāsane yathābalasantoso**. Aparo sundaram senāsanam pattampi na sampāṭicchati “paṇītasenāsanam nāma pamādatṭhāna”nti, mahāpuññatāya vā leṇamaṇḍapakūṭāgārādīni bahūni paṇītasenāsanāni labhati, so tāni cīvarādīni viya cirapabbajitādīnaṃ datvā yattha katthaci vasantopi santuṭṭhova hoti, ayamassa **senāsane yathāsārappasantoso**.

Idha pana bhikkhu bhesajjam labhati lūkham vā paṇītam vā, so teneva tussati, aññaṃ na pattheti, labhantopi na gaṇhāti, ayam **gilānapaccaye yathālābhasantoso**. Atha pana telena atthiko phāṇitam labhati, so yaṃ labhati, so taṃ sabhāgassa bhikkhuno datvā tassa hatthato telena bhesajjam katvā samaṇadhammaṃ karontopi santuṭṭhova hoti, ayamassa **gilānapaccaye yathābalasantoso**. Aparo mahāpuñño bahuṃ telamadhuphāṇitādīpaṇītabhesajjam labhati, so taṃ cīvarādīni viya cirapabbajitādīnaṃ datvā tesam ābhatakena yena kenaci bhesajjam karontopi santuṭṭhova hoti. Yo pana ekasmiṃ bhājane muttahaṇītakam, ekasmiṃ catumadhuram ṭhapetvā “gaṇhatha, bhante, yadicchasi”ti vuccamāno “sacassa tesu aññatarenapi rogo vūpasammati, idaṃ muttahaṇītakam nāma buddhādīhi vaṇṇita”nti, “pūtimuttahesajjam nissāya pabbajjā, tattha te yāvajīvaṃ ussāho karaṇīyo”ti (mahāva. 128) vacanaṃ anussaranto catumadhuram paṭikkhipitvā muttahaṇītakena bhesajjam karonto paramasantuṭṭhova hoti, ayamassa **gilānapaccaye yathāsārappasantoso**.

So evampabhedo sabbopi santoso santuṭṭhīti pavuccati. Tena vuttaṃ “atthato itarītarapaccayasantoso”ti. Tassā santuṭṭhiyā saddhiṃ sandassanādividhinā ānisaṃsavibhāvanavasena tappaṭipakkhassa atricchatādibhedassa icchācārassa ādīnavavibhāvanavasena ca pavattā kathā **santuṭṭhikathā**. Ito parāsupi kathāsu eseva nayo. Visesamattameva vakkhāma.

Pavivekakathāti ettha kāyaviveko, cittaviveko, upadhivivekoti tayo vivekā. Tesu eko gacchati, eko tiṭṭhati, eko nisīdati, eko seyyam kappeti, eko gāmaṃ piṇḍāya pavisati, eko paṭikkamati, eko abhikkamati, eko caṅkamaṃ adhiṭṭhāti, eko carati, eko viharati, evaṃ sabbiriyāpathesu sabbakiccesu gaṇasaṅgaṇikam pahāya vivittavāso **kāyaviveko** nāma. Aṭṭha samāpattiyo pana **cittaviveko** nāma. Nibbānaṃ **upadhiviveko** nāma. Vuttañhetam “kāyaviveko ca vivekatṭhakāyānaṃ nekkhammābhiraṭānaṃ, cittaviveko ca parisuddhacittānaṃ paramavodānappattānaṃ, upadhiviveko ca nirupadhīnaṃ puggalānaṃ visāṅkhāragatānaṃ”nti (mahāni. 57). Vīvekoyeva paviveko, paviveke paṭisaṃyuttā kathā **pavivekakathā**.

Asaṃsaggakathāti ettha savanasaṃsaggo, dassanasaṃsaggo, samullapanasaṃsaggo, sambhogasaṃsaggo, kāyasaṃsaggoti pañca saṃsaggā. Tesu idhekacco bhikkhu suṇāti “amukasmiṃ ṭhāne gāme vā nigame vā itthī abhirūpā dassanīyā pāsādikā paramāya vaṇṇapokkharatāya samannāgatā”ti, so taṃ sutvā saṃsīdati visīdati, na sakkoti brahmacariyaṃ sandhāretuṃ, sikkham paccakkhāya hīnāyāvattati, evaṃ visabhāgārammaṇassavanena uppannakilesasanthavo **savanasaṃsaggo** nāma. Na heva kho bhikkhu suṇāti, apica kho sāmaṃ passati itthiṃ abhirūpaṃ dassanīyaṃ pāsādikam paramāya vaṇṇapokkharatāya samannāgataṃ, so taṃ disvā saṃsīdati visīdati, na sakkoti brahmacariyaṃ sandhāretuṃ, sikkham paccakkhāya hīnāyāvattati, evaṃ visabhāgārammaṇadassanena uppannakilesasanthavo **dassanasaṃsaggo** nāma. Disvā pana aññaṃaññaṃ ālāpasallāpavasena uppanno kilesasanthavo **samullapanasaṃsaggo** nāma. Saṅgajjagghānādīpi eteneva saṅgayhati. Attano pana santakam yaṃ kiñci mātugāmassa datvā adatvā vā tena dinnassa vanabhaṅginīyādino paribhogavasena uppanno kilesasanthavo **sambhogasaṃsaggo** nāma. Mātugāmassa hatthagāhādīvasena uppannakilesasanthavo **kāyasaṃsaggo** nāma.

Yopi cesa “gihīhi saṃsaṭṭho viharati ananulomikena saṃsaggena sahasokī sahanandī sukhitesu

sukhito dukkhitesu dukkhito uppannesu kiccakaraṇīyesu attanā vo yogaṃ āpajjati’ ti (saṃ. ni. 3.3; mahāni. 164) evaṃ vutto ananulomiko gihisaṃsaggo nāma, yo ca sabrahmacārīhi pi kilesupattihetubhūto saṃsaggo, taṃ sabbaṃ pahāya yvāyaṃ saṃsāre thiratarāṃ saṃvegasāṅkhāresu tībbaṃ bhayaśāññaṃ sarīre paṭikkūlasāññaṃ sabbākusalesu jigucchāpubbaṅgamaṃ hirottappaṃ sabbakiriyāsu satisampajaññanti sabbāṃ paccupaṭṭhapetvā kamaladale jalabindu viya sabbattha alaggabhāvo, ayaṃ sabbasaṃsaggappaṭipakkhatāya asaṃsaggo, tappaṭisaṃyuttā kathā **asaṃsaggakathā**.

Vīriyārambhakathāti ettha vīrassa bhāvo, kammanti vā vīriyaṃ, vidhinā iretabbaṃ pavattetabbanti vā vīriyaṃ, vīriyañca taṃ akusalānaṃ dhammānaṃ pahānāya, kusalānaṃ dhammānaṃ upasampadāya ārabhanāṃ vīriyārambho. Svāyaṃ kāyiko, cetasiko cāti duvidho, ārambhadhātu, nikkamadhātu, parakkamadhātu, cāti tividho, sammappadhānavasena catubbidho. So sabbopi yo bhikkhu gamane uppannakilesaṃ ṭhānaṃ pāpuṇitum na deti, ṭhāne uppannaṃ nisajjaṃ, nisajjāya uppannaṃ sayanaṃ pāpuṇitum na deti, tattha tattheva ajapadena daṇḍena kaṇhasappaṃ uppīetvā gaṇhanto viya tikhiṇena asinā amittaṃ gīvāya paharanto viya sīsaṃ ukkhipitum adavā vīriyabalena niggaṇhāti, tassevaṃ vīriyārambho āradbhavīriyassa vasena vedītabbo, tappaṭisaṃyuttā kathā **vīriyārambhakathā**.

Sīlakathātiādīsu duvidhaṃ sīlaṃ lokiyaṃ lokuttarañca. Tattha **lokiyaṃ** pātimokkhasaṃvarādi catupārisuddhisīlaṃ. **Lokuttaraṃ** maggasīlaṃ phalasīlañca. Tathā **samādhipi**. Vipassanāya pādakabhūtā saha upacārena aṭṭha samāpattiyo **lokiyo** samādhi, maggasampayutto panettha **lokuttaro** samādhi nāma. Tathā **paññāpi**. **Lokiya** sutamayā, cintāmayā, jhānasampayuttā, vipassanāññāñca. Visesato panettha vipassanāpaññā gaṇhetabbā. **Lokuttarā** maggapaññā phalapaññā ca. **Vimutti** ariyaphalavimutti nibbānañca. Apare pana tadanāvikkhambhanasamucchedavimuttīnampi vasenettha atthaṃ saṃvaṇṇenti. **Vimuttiññānadassanampi** ekūnavīsatividhaṃ paccavekkhaṇāññānaṃ. Iti imesaṃ sīlādīnaṃ saddhiṃ sandassanādividhinā anekākāravokāraānisāsaṃvibhāvanavasena ceva tappaṭipakkhānaṃ dussīlyādīnaṃ ādīnavavibhāvanavasena ca pavattā kathā, tappaṭisaṃyuttā kathā vā **sīlādīkathā nāma**.

Ettha ca “attanā ca appiccho hoti, appiccha kathañca paresaṃ kattā” ti (ma. ni. 1.252; a. ni. 10.70) “santuṭṭho hoti itarītarena cīvarena, itarītaracīvarasantuṭṭhiyā ca vaṇṇavādī” ti (saṃ. ni. 2.144; cūḷani. khaggavisāṇapucchānidde 128) ca ādivacanato sayañca appicchatādīguṇasamannāgatena paresampi tadatthāya hitajjhāsayena pavattetabbā tathārūpī kathā. Yā idha abhisallekhikādībhāvena visesetvā vuttā appicchakathādīti vedītabbā. Kārakasēva hi kathā visesato adhippetatthasādhinī. Tathā hi vakkhati – “kalyāṇamittassetāṃ, meghiya, bhikkhuno pāṭikaṅkhaṃ...pe... akasiralābhī” ti (a. ni. 9.3).

Evarūpiyāti īdisāya yathāvuttāya. **Nikāmalābhīti** yathicchitalābhī yathārucilābhī, sabbakālaṃ imaṃ kathaṃ sotum vicāretuñca yathāsukhaṃ labhanto. **Akicchalābhīti** nidukkhalābhī. **Akasiralābhīti** vipulalābhī.

Āradbhavīriyoti paggaḥitavīriyo. **Akusalānaṃ dhammānaṃ pahānāyāti** akosallasambhūtaṭṭhena akusalānaṃ pāpadhammānaṃ pajahanatthāya. **Kusalānaṃ dhammānanti** kucchitānaṃ salanādiatthena anavajjaṭṭhena ca kusalānaṃ saḥavipassanānaṃ maggaphaladhammānaṃ. **Upasampadāyāti** sampādanāya attano santāne uppādanāya. **Thāmaṃvāti** ussolhisaṅkhātena vīriyathāmena samannāgato. **Daḥaparakkamoti** thiraparakkamo asithilavīriyo. **Anikkhattadhuroti** anorohitadhuro anosakkavīriyo.

Paññāvāti vipassanāpaññāya paññavā. **Udayatthagāminiyāti** pañcannaṃ khandhānaṃ udayañca vāyañca paṭivijjhantiyā. **Ariyāyāti** vikkhambhanavasena kilesehi ārakā dūre ṭhitāya niddosāya. **Nibbedhikāyāti** nibbedhabhāgiyāya. **Sammā dukkhakkhayagāminiyāti** vaṭṭadukkhasa khepanato “dukkhakkhayo” ti laddhanāmaṃ ariyamaggaṃ sammā hetunā nayena gacchantiyā. Imesu ca pana pañcasu dhammesu sīlaṃ vīriyaṃ paññā ca yogino ajjhattikaṃ aṅgaṃ, itaradvayaṃ bāhiraṃ aṅgaṃ.

Tatthāpi kalyāṇamittasannissayeneva sesaṃ catubbidhaṃ ijjhāti, kalyāṇamittassevettha bahukāraṃ dassento satthā “**kalyāṇamittassetam, meghiya, bhikkhuno pāṭikaṅkha**”ntiādinā desanaṃ vaḍḍhesi. Tattha **pāṭikaṅkhanti** ekaṃsena icchitabbam, avassaṃbhāvīti attho. **Yanti** kiriyāparāmasanaṃ. Iduṃ vuttaṃ hoti – “sīlavā bhavissatī”ti ettha yadetam kalyāṇamittassa bhikkhuno sīlavantatāya bhavanaṃ sīlasampannattam, tassa bhikkhuno sīlasampannattā etaṃ tassa pāṭikaṅkham, avassaṃbhāvī ekaṃseneva tassa tattha niyojanatoti adhippāyo. **Pāṭimokkhasaṃvarasaṃvuto viharatī**tiādisupi eseva nayo.

Evam bhagavā sadevake loke uttamakalyāṇamittasaṅkhātassa attano vacanaṃ anādiyitvā taṃ vanasaṅgaṃ pavisitvā tādisaṃ vippakāraṃ pattassa āyasmato meghiyassa kalyāṇamittatādinā sakalaṃ sāsanaṃ sampadam dassetvā idānissa tattha ādarājātassa pubbe yehi kāmavitakkādīhi upaddutattā kammaṭṭhānaṃ na sampajjati, tassa tesam ujuvipaccanīkabhūtattā ca bhāvanānayaṃ pakāsetvā tato paraṃ arahattassa kammaṭṭhānaṃ ācikkhanto “**tena ca pana, meghiya, bhikkhunā imesu pañcasu dhammesu paṭiṭṭhāya cattāro dhammā uttari bhāvetabbā**”tiādimāha. Tattha **tenāti** evam kalyāṇamittasannissayena yathāvuttasīlādiguṇasamannāgatena. Tenevāha “**imesu pañcasu dhammesu paṭiṭṭhāyā**”ti. **Uttarīti** āradhataruṇavipassanassa rāgādīparissayā ce uppajjeyyūṃ, tesam visodhanattham tato uddham cattāro dhammā bhāvetabbā uppādetabbā vaḍḍhetabbā ca.

Asubhāti ekādasasu asubhakammaṭṭhānesu yathārahaṃ yattha katthaci asubhabhāvanā. **Rāgassa pahānāyāti** kāmarāgassa pajahanatthāya. Ayamatto sālilāvakopamāya vibhāvetabbo. Evam bhūtaṃ bhāvanāvidhiṃ sandhāya vuttaṃ – “asubhā bhāvetabbā rāgassa pahānāyā”ti. **Mettāti** mettākammaṭṭhānaṃ. **Byāpādassa pahānāyāti** vuttanayeneva uppanassa kopassa pajahanatthāya. **Ānāpānassatīti** soḷasavatthukā ānāpānassatī. **Vitakkupacchedāyāti** vuttanayeneva uppanānaṃ vitakkānaṃ pacchedanatthāya. **Asmimānasamugghātāyāti** “asmī”ti uppajjanakassa navavidhassa mānassa samucchadanatthāya.

Aniccasaññinoti hutvā abhāvato udayabbayavantato pabhaṅguto tāvakālikato niccapaṭikkhepatto ca “sabbe saṅkhārā aniccā”ti (dha. pa. 277; cūḷani. hemakamāṇavapucchāniddeṣo 56) pavattaaniccānupassanāvasena aniccasaññino. **Anattasaññā saṅghātīti** asārakato avasavattanato parato rittato tucchato suññato ca “sabbe dhammā anattā”ti (dha. pa. 279; cūḷani. hemakamāṇavapucchāniddeṣo 56) evam pavattaanattānupassanāsaṅkhātā anattasaññā citte saṅghahati atidaḷhaṃ paṭiṭṭhahati. Aniccalakkhaṇe hi diṭṭhe anattalakkhaṇaṃ diṭṭhameva hoti. Tīsu lakkhaṇesu hi ekasmiṃ diṭṭhe itaradvayaṃ diṭṭhameva hoti. Tena vuttaṃ “aniccasaññino, meghiya, anattasaññā saṅghātī”ti. Anattalakkhaṇe sudiṭṭhe “asmī”ti uppajjanakamāno suppajahova hotīti āha “**anattasaññī asmimānasamugghātāṃ pāpuṇātī**”ti. **Diṭṭheva dhamme nibbānanti** diṭṭheva dhamme imasmiṃyeva attabhāve apaccayaparīnibbānaṃ pāpuṇātī. Ayamettha saṅkhepo, vitthārato pana asubhādibhāvanānayo **visuddhimagge** vuttanayena vedītabbo.

Meghiyasuttavaṇṇanā niṭṭhitā.

4-5. Nandakasuttādivaṇṇanā

4-5. Catutthe āgamayamānoti olokayamāno, buddho sahasā apavisitvā yāva sā kathā niṭṭhāti, tāva aṭṭhāsīti attho. Tenāha “**idamavocāti idam kathāvasānaṃ udikkhamāno**”ti. Aniccadukkhādivasena sabbadhammasantīraṇaṃ **adhipaññāvīpassanāti** āha “**saṅkhārapariggahavīpassanāññāpassā**”ti. **Mānasanti** rāgopi cittampi arahattampi. “Antalikkhacaro pāso, yvāyaṃ carati mānaso”ti (saṃ. ni. 1.151; mahāva. 33) ettha rāgo mānasaṃ. “Cittam mano mānasa”nti (dha. sa. 6) ettha cittam. “Appattamānaso sekho, kālaṃ kayirā jane sutā”ti (saṃ. ni. 1.159) ettha arahattam. Idhāpi arahattameva adhippetam. Tenāha “**appattamānasāti appattaarahattā**”ti. Appattam mānasaṃ arahattam etehīti **appattamānasā**. Idāni cittapariyāyameva mānasasaddam sandhāyāha “**arahattam vā**”tiādi. Pañcamaṃ suviññeyyameva.

Nandakasuttādivaṇṇanā niṭṭhitā.

6. Sevanāsuttavaṇṇanā

6. Chaṭṭhe **jīvitasambhārā**ti jīvitappavattiyā sambhārā paccayā. **Samudānetabbā**ti sammā fīyena anavajjauñchācariyādinā uddhamuddhamānetabbā pāpuṇitabbā. Te pana samudānitā samāhatā nāma hontīti āha “**samāharitabbā**”ti. **Dukkhe**na uppajjantīti sulabhuppādā na honti. Etena gocaraasappāyādibhāvaṃ dasseti. **Rattibhāgaṃ vā divasabhāgaṃ vā**ti bhummatthe upayogavacananti āha “**rattikoṭṭhāse vā divasakoṭṭhāse vā**”ti. **Rattiṃyeva pakkamitabbam** samaṇadhammassa tattha anipphajjanato. **Saṅkhāpī**ti “yadatthamaḥaṃ pabbajito, na metaṃ idha nipphajjati, cīvarādi pana samudāgacchati, nāhaṃ tadattham pabbajito, kiṃ me idha vāsenā”ti paṭisaṅkhāyapi. Tenāha “**sāmaññatthassa bhāvanāpāripūriagamaṃ jānitvā**”ti. Anantaravāre **saṅkhāpī**ti samaṇadhammassa nipphajjanabhāvaṃ jānitvā. **So puggalo anāpucchā pakkamitabbam, nānubandhitabboti** “so puggalo”ti padassa “nānubandhitabbo”ti iminā sambandho. Yassa yena hi sambandho, dūraṭṭhenapi so bhavati. **Taṃ puggalanti** so puggaloti paccattavacanam upayogavasena pariṇāmetvā taṃ puggalam anāpucchā pakkamitabbanti attho. Atthavasena hi vibhattipariṇāmoti. **Āpucchā pakkamitabbanti** ca kataññukataveditāya niyojanam. **Evarūpoti** yaṃ nissāya bhikkhuno guṇehi vuddhiyeva paṭikaṅkhā, paccayehi na parissayo, evarūpo daṇḍakammādīhi niggaṇhāti cepi, na pariccajitabboti dasseti “**sacepi**”tiādinā.

Sevanāsuttavaṇṇanā niṭṭhitā.

7-10. Sutavāsuttādivaṇṇanā

7-10. Sattame **abhabbo khīṇāsavo bhikkhu sañcicca pāṇantiādi** desanāsīsameva, sotāpannādayopi pana abhabbāva, puthujjanakhīṇāsavānaṃ nindāpasamsatthampi evaṃ vuttaṃ. Puthujjano nāma gārayho mātughātādīni karoti, khīṇāsavo pana pāsamsa kunthakipillikaghātādīnipi na karotīti. **Sannidhikāraṃ kāme paribhuñjanti** yathā gihibhūto sannidhiṃ katvā vatthukāme paribhuñjati, evaṃ tilataṇḍulasappinavanitādīni sannidhiṃ katvā idāni paribhuñjitum abhabboti attho. Vatthukāme pana nidahitvā paribhuñjantā tannissitaṃ kilesakāmampi nidahitvā paribhuñjanti nāmāti āha “**vatthukāmakilesakāme**”ti. Nanu ca khīṇāsavasseva vasanaṭṭhāne tilataṇḍulādayo paññāyantīti? Na pana te attano atthāya nidhenti, aphaṣukapabbajitādīnaṃ atthāya nidhenti. Anāgāmissa kathanti? Tassapi pañca kāmaguṇā sabbasova pahīnā, dhammena pana laddhaṃ vicāretvā paribhuñjati. Akappiyakāmaguṇe sandhāyetaṃ vuttaṃ, na mañcapīṭhaattharaṇapāvuraṇādisannissitaṃ. **Seyyāthāpi pubbe agāriyabhūto**ti yathā pubbe gihibhūto paribhuñjati, evaṃ paribhuñjitum abhabbo. Agāramajjhe vasantā hi sotāpannādayo yāvajīvaṃ gihibyañjanena tiṭṭhanti. Khīṇāsavo pana arahattaṃ patvāva manussabhūto parinibbāti vā pabbajati vā. Cātumahārājikādīsu kāmāvacaradevesu muhuttampi na tiṭṭhati. Kasmā? Vivekaṭṭhānassa abhāvā. Bhummadevattabhāve pana ṭhito arahattaṃ patvāpi tiṭṭhati vivekaṭṭhānasambhavā. Aṭṭhamādīni uttānatthāneva.

Sutavāsuttādivaṇṇanā niṭṭhitā.

Sambodhivaggavaṇṇanā niṭṭhitā.

2. Sīhanādavaggo

1. Sīhanādasuttavaṇṇanā

11. Dutiyassa paṭhame avāpurenti vivaranti dvāraṃ etenāti **avāpuraṇam**. Rajaṃ haranti etenāti **rajoharaṇam**. **Kaḷopihatthoti** vilīvamayaabhājanahattho, “cammamayabhājanahattho”ti ca vadanti.

Chinnāni visāṇāni etassāti chinnavisāṇo, usabho ca so chinnavisāṇo cāti **usabhachinnavisāṇo**. Visesanaparoyam samāso. **Ahikuṇapena vāti**ādi atijegucchappaṭikūlakūṇapadassanattam vuttam. **Kaṇṭhe āsattenāti** kenacideva paccatthikena ānetvā kaṇṭhe baddhena, omukkenāti attho. **Aṭṭo** āturo duggandhapīlāya pīlito. **Accayassa paṭiggaṇhanam** vā adhivāsanaṃ. Evañhi so kāraṇe desiyamāne tato vigato nāma hoti. Tenāha “**paṭiggaṇhatūti khamatū**”ti. Sesamettha suviññeyyameva.

Sīhanādasuttavaṇṇanā niṭṭhitā.

2. Saupādisesasuttavaṇṇanā

12. Dutiye bhavassa appamattakatā nāma ittarakālatāyāti āha “**accharāsaṅghātamattampī**”ti.

Saupādisesasuttavaṇṇanā niṭṭhitā.

3. Koṭṭhikasuttavaṇṇanā

13. Tatiye diṭṭhadhammo vuccati paccakkhabhūto attabhāvo, tasmim veditabbaṃ phalaṃ **diṭṭhadhammavedanīyam**. Tenāha “**imasmimyeva attabhāve**”ti. Catuppañcakkhandhaphalatāya saññābhavūpagaṃ kammaṃ **bahuvedanīyam**. Ekakkhandhaphalattā asaññābhavūpagaṃ kammaṃ “**appavedanīya**”nti vuttam. Keci pana “arūpāvacarakammaṃ bahukālam veditabbaphalattā bahuvedanīyam, itaram appavedanīyam. Rūpārūpāvacarakammaṃ vā bahuvedanīyam, parittam kammaṃ appavedanīya”nti vadanti. **Vedanīyanti** paccayantarasaṃvāye vipākuppādanasamattam, na āradhaviṭṭhameva. **Avedanīyanti** paccayavekallena vipaccitum asamattam ahoṣikkammādhedam.

Koṭṭhikasuttavaṇṇanā niṭṭhitā.

4. Samiddhisuttavaṇṇanā

14. Catutthe **samiddhī** therassa kira attabhāvo samiddho abhirūpo pāsādiko, tasmā samiddhīveva saṅkhāto. Tenāha “**attabhāvasamiddhatāyā**”tiādi. **Rūpadhātuādisūti ādi**-saddena saddadhātuādiṃ saṅgaṇhāti.

Samiddhisuttavaṇṇanā niṭṭhitā.

5-9. Gaṇḍasuttādivaṇṇanā

15-19. Pañcame **mātāpettikasambhavassāti** mātito ca pitito ca nibbattena mātāpettikena sukkasoṇitena sambhūtassa. **Ucchādanadhammassāti** ucchādetabbasabhāvassa.

Parimaddanadhammassāti parimadditabbasabhāvassa. Ettha ca odanakummāsūpacayaucchādanapadehi vaḍḍhi kathitā, aniccabhedanaviddhamsanapadehi hāni. Purimehi vā samudayo, pacchimehi atthaṅgamoti evaṃ cātumahābhūtikassa kāyassa vaḍḍhiparihāninibbattibhedā dassitā. Sesam suviññeyyameva. Chaṭṭhādīni uttānatthāni.

Gaṇḍasuttādivaṇṇanā niṭṭhitā.

10. Velāmasuttavaṇṇanā

20. Dasame **sakuṇḍakabhattanti** sakuṇḍakaṃ uttaṇḍulabhattam. Paritthehi sakuṇḍehi taṇḍulehipi saddhim vipakkabhattam uttaṇḍulameva hoti. Bīlaṅgam vuccati āraṇālam, bīlaṅgato nibbattanato tadeva kañjiyato jātanti kañjiyam, tam dutiyam etassāti **bīlaṅgadutiyaṃ**, tam **kañjiyadutiyaṃ** vuttam.

Asakkaritvāti deyyadhammampi puggalampi asakkaritvā. Deyyadhammassa asakkaraṇaṃ asampannakāro, puggalassa asakkaraṇaṃ agarukaraṇaṃ. Deyyadhammaṃ asakkaronto hi uttaṇḍulādidosasamannāgataṃ āhāraṃ deti, na sampannaṃ karoti. Puggalaṃ asakkaronto nisīdanaṭṭhānaṃ asammajjitvā yathā tattha vā nisīdāpetvā yaṃ vā taṃ vā dāraṃ pesetvā deti. **Acittikatvā**ti na cittaṃ katvā, na pūjetvāti attho. Pūjento hi pūjetabbavattumaṃ citte ṭhapeti, na tato bahi karoti. Cittaṃ vā acchariyaṃ katvā paṭipatti cittaṃ karaṇaṃ sambhāvanakiriyā, tappaṭikkhepatō acittikaraṇaṃ asambhāvanakiriyā. **Apaviddhanti** ucchiṭṭhādichāḍḍanīyadhammaṃ viya avakhittakaṃ. Yo hi chāḍḍetukāmo hutvā rogino sarīre odanādīni majjitvā vammike rogaṃ pakkhipanto viya deti, ayaṃ apaviddhaṃ deti nāma. **Anāgamanadiṭṭhikoti** “addhā imassa dānassa phalaṃ mama āgacchatī”ti evaṃ yassa kammassakatadiṭṭhi atthi, so āgamanadiṭṭhiko. Ayaṃ pana na tādisoti anāgamanadiṭṭhiko, phalaṃ pāṭikaṅkhaṃ hutvā na detīti attho. Tenāha “**na kammaṅca phalaṅca saddahitvā detī**”ti.

Velāmoti ettha **mā**-saddo paṭisedhavaçano. Jātigottarūpabhogādiguṇānaṃ velā mariyādā natthi etasminti velāmo. Atha vā yathāvuttaguṇānaṃ velā mariyādā amati osānaṃ gacchati etasminti **velāmo**, velaṃ vā mariyādaṃ amati gacchati atikkamatīti **velāmo**. Tenāha “**jātigotta...pe... evaṃladdhanāmo**”ti. Dīyatīti dānaṃ, dānavatthu. Taṃ aggīyati nissajjīyati etthāti **dānaggaṃ**. Dānaṃ vā gaṇhanti etthāti **dānaggaṃ**, evaṃ **bhattaggaṃ**, parivesanaṭṭhānaṃ. **Dukūlasandanānīti** rajatabhājanādīnissite dukūle khīrassa sandanaṃ etesanti dukūlasandanāni. **Kaṃsūpadhāraṇānīti** rajatamayadohabhājanāni. Tenāha “**rajatamayakhīrapaṭicchakānī**”ti. Rajatamayāni khīrapaṭicchakāni khīrapaṭiggahabhājanāni etesanti **rajatamayakhīrapaṭicchakāni**. **Sodheyyāti** mahapphalabhāvakaraṇena visodheyya. Mahapphalabhāvappattiyā hi dakkhiṇā visujjhati nāma.

Maggenāgataṃ anivattanasaraṇanti iminā lokuttarasaraṇagamaṇaṃ dīpeti. **Apāretiādīnā** lokiyasaraṇagamaṇaṃ vuttaṃ. **Saraṇaṃ** nāma tiṇṇaṃ ratanānaṃ jīvitapariccāgamayaṃ puññaṃ sabbasampattiṃ deti, tasmā mahapphalataranti adhippāyo. Idaṅca – “sace tvaṃ yathā gahitaṃ saraṇaṃ na bhindissasi, evāhaṃ taṃ māremī”ti yadipi koci tiṇhena satthena jīvitā voropeyya, tathāpi “nevāhaṃ buddhaṃ na buddhoti, dhammaṃ na dhammoti, saṅghaṃ na saṅghoti vadāmī”ti dalhataraṃ katvā gahitassa vasena vuttaṃ. **Maggenāgataṃ** lokuttarasīlaṃ sandhāya vadati. **Apāretiādīnā** pana lokiyasīlaṃ vuttaṃ. Sabbesaṃ sattānaṃ jīvitadānādīnīhitadaṇḍatāya sakalalokiyalokuttaraguṇādhiṭṭhānato cassa mahapphalamahānisamsatā veditabbā.

Upasiṅghanamattanti ghāyanamattaṃ. **Gaddohanamattanti** pāṭhantare godohanamattaṃ kālanti attho. So ca na sakalo godohanakkhaṇo adhippetoti dassetuṃ “**gāviyā ekavāraṃ thanañchanamatta**”nti attho vutto. **Añchanamattanti** ākaḍḍhanamattaṃ. Gāviyā thanaṃ gahetvā ekakhīrabinduduhanakālamattampi gadduhanamattanti vadanti. Ettakampi hi kālaṃ yo vasanaḅbhapariveṇavihārūpacāraparicchedena vā aparimāṇāsu lokadhātūsu sabbasatte hitapharaṇaṃ mettacittaṃ bhāvetuṃ sakkoti. Idaṃ tato yathāvuttadānādīto mahapphalataraṃ.

Velāmasuttavaṇṇanā niṭṭhitā.

Sīhanādavaggaṇṇanā niṭṭhitā.

3. Sattāvāsavaggo

1. Tiṭṭhānasuttavaṇṇanā

21. Tatiyassa paṭhame **amamā**ti vatthābharaṇapānabhojanādīsipi mamattavirahitā. **Apariggahāti** itthipariggahena apariggahā. Tesam kira “ayaṃ mayhaṃ bhariyā”ti mamattaṃ na hoti, mātaraṃ vā bhaginiṃ vā disvā chandarāgo na uppajjati. Dhammatāsiddhassa sīlassa ānubhāvena putte diṭṭhamatte eva mātuthanato thaññaṃ paggharati, tena saññāṇena nesam mātari puttassa mātusaññā, mātu ca putte

puttasañña paccupaṭṭhitāti keci.

Apicettha (sārattha. ṭī. 1.1 verañjakaṇḍavaṇṇanā) uttarakurukānaṃ puññānubhāvasiddho ayampi vireso vedītabbo. Tattha kira tesu tesu padesesu ghananicitapattasañchannasākhāpasākhā kūṭāgārasamā manoramā rukkhā tesam manussānaṃ nivesanakiccaṃ sādheti. Yattha sukhaṃ nivasanti, aññepi tattha rukkhā sujātā sabbadāpi pupphitaggaṃ tiṭṭhanti. Jalāsayāpi vikasitakamalakuvalayapuṇḍarīkasogandhikādipupphasañchannā sabbakālaṃ paramasugandhaṃ samantato pavāyantaṃ tiṭṭhanti. Sarīrampi tesam atidīghādidosarahitaṃ ārohapariñāhasampannaṃ jarāya anabhibhūtattā valitapalitādidosavirahitaṃ yāvātāyukaṃ aparikkhīṇajavabalaparakkamasobhameva hutvā tiṭṭhati. Anuṭṭhānaphalūpajīvitāya na ca nesam kasivañijjādivasena āhārapariyeṭṭhivasena dukkhaṃ atthi, tato eva na dāsādāsikammakarādīpariggaho atthi, na ca tattha sītuṇḍhaḍamsamakasavātātapasarīsapavāḷādīparissayo atthi. Yathā nāmettha gimhānaṃ pacchime māse paccūsavelāyaṃ samasītuṇḍho utu hoti, evameva sabbakālaṃ tattha samasītuṇḍhova utu hoti, na ca nesam koci upaghāto vihesā vā uppajjati. Akatṭhapākimeva sāliṃ akaṇaṃ athusaṃ suddhaṃ sugandhaṃ taṇḍulapphalaṃ paribhuñjanti. Taṃ bhuñjantānaṃ nesam kuṭṭhaṃ, gaṇḍo, kilāso, soso, kāso, sāso, apamāro, jaroti evamādiko na koci rogo uppajjati, na ca te khujjā vā vāmanā vā kāṇā vā kuṇī vā khañjā vā pakkhahatā vā vikalāṅgā vā vikalindriyā vā honti.

Itthiyopi tattha nātidīghā, nātirassā, nātikisā, nātitūlā, nātikālā, naccodātā, sobhaggappattarūpā honti. Tathā hi dīghaṅgulī, tambanakhā, alambathanā, tanumajjhā, puṇṇacandamukhī, visālakkhī, mudugattā, sahitōrū, odātadantā, gambhīranābhī, tanujaṅghā, dīghanīlavellitakesī, puthulasussoṇī, nātilomā, nālomā, subhagā, utusukhasamphassā, saṅhā, sakhilā, sukhasambhāsā, nānābharaṇavibhūsitā vicaranti. Sabbadāpi soḷasavassuddesikā viya honti, purisā ca pañcavīsativassuddesikā viya. Na puttadāresu rajjanti. Ayaṃ tattha dhammatā.

Sattāhikameva ca tattha itthipurisā kāmaratiyā viharanti. Tato vītarāgā viya yathāsakaṃ gacchanti, na tattha idha viya gabbhokkantimūlakaṃ, gabbhapariharaṇamūlakaṃ, vijāyanamūlakaṃ vā dukkhaṃ hoti. Rattakañcukato kañcanaṇaṭṭimā viya dārakā mātukucchito amakkhitā eva semhādīnā sukheneva nikkhamanti. Ayaṃ tattha dhammatā.

Mātā pana puttaṃ vā dhītaraṃ vā vijāyitvā te vicaraṇakappadese ṭhapetvā anapekkhā yathāruci gacchati. Tesam tattha sayitānaṃ ye passanti purisā vā itthiyo vā, te attano aṅguliyo upanāmenti. Tesam kammabalena tato khīraṃ pavattati, tena te dārakā yāpentī. Evaṃ pana vaḍḍhentā katipayadivaseheva laddhabalā hutvā dārikā itthiyo upagacchanti, dārakā purise. Kapparukkhato eva ca tesam tattha vatthābharaṇāni nipphajjanti. Nānāvīrāgavaṇṇavicittāni hi sukhumāni mudusukhasamphassāni vatthāni tattha tattha kapparukksesu olambantāni tiṭṭhanti. Nānāvidharasmijālasamujjalavividhavaṇṇaratanavinaddhāni anekavidhamālākammalatākammabhittikammavicittāni sīsūpagagīvūpagahatthūpagakaṭṭūpagapādūpagāni sovaṇṇamayāni ābharaṇāni kapparukkhato olambanti. Tathā vīṇāmudiṅgapaṇavasammataḷasañkhavaṃsavetāḷaparivādīnīvallakīpabhutikā tūriyabhaṇḍāpi tato tato olambanti. Tattha bahū phalarukkhā kumbhamattāni phalāni phalanti madhurarasāni, yāni paribhuñjitvā te sattāhampi khuppipāsāhi na bādhiyanti.

Najjopi tattha suvisuddhajalā suppatitthā ramaṇīyā akaddamā vālukatalā nātisītā naccuṇhā surabhigandhīhi jalajapupphehi sañchannā sabbakālaṃ surabhī vāyantiyo sandanti, na tattha kaṇṭakikā kakkhalaḷagacchalatā hontī, akaṇṭakā pupphaphalasaṃpannā eva hontī, candananāgarukkhā sayameva rasaṃ paggharanti, nahāyitukāmā ca nadītitthe ekajjhaṃ vatthābharaṇāni ṭhapetvā nadīm otarivā nhatvā uttiṇṇuttiṇṇā upariṭṭhimaṃ upariṭṭhimaṃ vatthābharaṇaṃ gaṇhanti, na tesam evaṃ hoti “idaṃ mama, idaṃ parassā”ti. Tato eva na tesam koci viggaho vā vivādo vā. Sattāhikā eva ca nesam kāmaratikīḷā hoti, tato vītarāgā viya vicaranti. Yattha ca rukke sayitukāmā hontī, tattheva sayanaṃ upalabbhati. Mate ca satte disvā na rodanti na socanti. Tañca maṇḍayitvā nikkhipanti. Tāvadeva ca nesam tathārūpā

sakuṇā upagantvā matam dīpantaram nenti, tasmā susānam vā asuciṭṭhānam vā tattha natthi, na ca tato matā nirayaṃ vā tiracchānayanim vā pettivisayaṃ vā upapajjanti. Dhammatāsiddhassa pañcasīlassa ānubhāvena te devaloke nibbantanti vadanti. Vassasahassameva ca nesam sabbakālam āyuppanānam, sabbametaṃ tesam pañcasīlam viya dhammatāsiddhamevāti.

Tiṭṭhānasuttavaṇṇanā niṭṭhitā.

3. Taṇhāmūlakasuttavaṇṇanā

23. Tatiye (dī. ni. ṭi. 2.103) **esanataṇhāti** bhogānam pariyesanavasena pavattā taṇhā. **Esitataṇhāti** pariyaṭṭhesu bhogesu uppajjamānataṇhā. Paritassanavasena pariyesati etāyāti **pariyesanā**, āsayato payogato ca pariyesanā tathāpavatto cittuppādo. Tenāha “**taṇhāya sati hoti**”ti. **Rūpādiārammaṇappaṭilābhoti** savatthukānam rūpādiārammaṇānam gavesanavasena paṭilābho. Yam pana aperiyaṭṭhaṃyeva labbhati, tampi atthato pariyesanāya laddhameva nāma tathārūpassa kammaṃ pubbekatattā eva labbhanato. Tenāha “**so hi pariyesanāya sati hoti**”ti.

Sukhavinicchayanti sukhaṃ visesato nicchinotīti sukhavinicchayo. Sukhaṃ sabhāvato samudayato atthaṅgamato ādīnavato nissaraṇato ca yāthāvato jānitvā pavattañāṇamva sukhavinicchayaṃ. **Jaññāti** jāneyya. “Subhaṃ sukha”ntiādikaṃ ārammaṇe abhūtākāram vividhaṃ ninnabhāvena cinoti āropetīti **vinicchayo**, assādānupassanā taṇhā. Diṭṭhiyāpi evameva vinicchayaabhāvo veditabbo. Imasmiṃ pana sutte vitakkoyeva āgatoti yojanā. **Imasmiṃ pana sutteti** sakkapañhasutte (dī. ni. 2.358). Tattha hi “chando kho, devānaminda, vitakkanidāno”ti āgataṃ. **Idhāti** imasmiṃ sutte. **Vitakkeneva vinicchinantīti** etena “vinicchinati etenāti vinicchayo”ti vinicchayasaddassa karaṇasādhanamāha. **Ettakantiādi** vinicchayanākāradassanaṃ.

Chandanatṭhena chando, evaṃ rañjanatṭhena rāgoti **chandarāgo**. Svāyaṃ anāsevanatāya mando hutvā pavatto idhādhippetoti āha “**dubballarāgassādhivacana**”nti. **Ajjhosānanti** taṇhādiṭṭhivasena abhinivesanaṃ. “Mayhaṃ ida”nti hi taṇhāgāho yebhuyyena attaggāhasannissayova hoti. Tenāha “**ahaṃ mamanti**”ti. **Balavasanniṭṭhānanti** ca tesam gāhānam thirabhāvappattimāha. **Taṇhādiṭṭhivasena pariggahakaraṇanti** ahaṃ mamanti balavasanniṭṭhānavasena abhiniviṭṭhassa attattaniyaggāhavatthuno aññāsādhāraṇam viya katvā pariggahetvā ṭhānam, tathāpavatto lobhasahagatacittuppādo. Attanā pariggahitassa vatthuno yassa vasena **parehi sādharmaṇabhāvassa** asahamāno hoti puggalo, so dhammo **asahanatā**. **Evaṃ vacanatthaṃ vadanti** niruttinayena. Saddalakkhaṇena pana yassa dhammassa vasena macchariyayogato puggalo maccharo, tassa bhāvo, kammaṃ vā **macchariyaṃ**, maccharo dhammo. Macchariyassa balavabhāvato ādarena rakkhaṇam **ārakkhoti** āha “**dvāra...pe... suṭṭhu rakkhaṇa**”nti.

Attano phalaṃ karotīti karaṇam, yaṃ kiñci kāraṇam. Adhikaṃ karaṇanti **adhikaraṇam**, visesakāraṇam. Visesakāraṇaṃca bhogānam ārakkhadāṇādānānāntasambhavassāti vuttam “**ārakkhādhikaraṇa**”ntiādi. **Paranisedhanatthanti** māraṇādinā paresam vibādhanaṭṭham. Ādiyanti etenāti ādānam, daṇḍassa ādānam **daṇḍādānam**, daṇḍam āharitvā paraviheṭhanacittuppādo. **Satthādānēpi** eseva nayo. Hatthaparāmāsādivasena kāyena kātabbo kalaho **kāyakalaho**. Mammaghaṭṭanādivasena vācāya kātabbo kalaho **vācākalaho**. Virujjhanavasena virūpaṃ gaṇhāti etenāti **viḅḅaho**. Viruddhaṃ vadati etenāti **vivādo**. “Tuvaṃ tuva”nti agāravavacanasahacaraṇato **tuvamtuvaṃ**. Sabbepi te tathāpavattadosasahagatā cittuppādā veditabbā. Tenāha bhagavā “**aneke pāpakā akusalā dhammā sambhavanti**”ti.

Taṇhāmūlakasuttavaṇṇanā niṭṭhitā.

4-5. Sattāvāsasuttādivaṇṇanā

24-25. Catutthe sattā āvasanti etesūti **sattāvāsā**, nānattasaññiādibhedā sattanikāyā. Yasmā te te sattanivāsā tappariyāpannānaṃ sattānaṃ tāya eva tappariyāpannatāya ādhāro viya vattabbaṃ arahanti. Samudāyācāro hi avayavassa yathā “rukkhe sākā”ti, tasmā “**sattānaṃ āvāsā, vasanaṭṭhānānīti attho**”ti vuttaṃ. **Suddhāvāsāpi sattāvāsova** “na so, bhikkhave, sattāvāso sulabharūpo, yo mayā anāvutthapubbo iminā dīghena addhunā aññatra suddhāvāsehi devehī”ti (dī. ni. 2.91) vacanato. Yadi evaṃ te kasmā idha na gahitāti tattha kāraṇamāha “**asabbakālikattā**”tiādi. Vehapphalā pana catuttheyeva sattāvāse bhajantīti daṭṭhabbaṃ. Pañcamaṃ uttānameva.

Sattāvāsasuttādivaṇṇanā niṭṭhitā.

6. Silāyūpasuttavaṇṇanā

26. Chaṭṭhe pamāṇamajjhimaṃ purissa catuvīsataṅguliko hattho **kukku**, “kakkū”tipi tasseva nāmaṃ. **Aṭṭha kukkū upari nemassāti** aṭṭha hatthā āvāṭassa upari uggantvā ṭhitā bhaveyyuṃ. Sesamettha uttānameva.

Silāyūpasuttavaṇṇanā niṭṭhitā.

7. Paṭhamaverasuttavaṇṇanā

27. Sattame (saṃ. ni. ṭī. 2.241) **yatoti** yasmim kāle. Ayañhi to-saddo dā-saddo viya idha kālavisayo, yadāti vuttaṃ hoti. **Bhayāni verānīti** bhīyate **bhayaṃ**, bhayena yogā, bhāyitabbena vā bhayaṃ eva verappasavaṭṭhena **veranti** ca laddhanāmā cetanādayo. Pāṇātipātādayo hi yassa pavattanti, yañca uddissa pavattiyanti, ubhayesañca verāvahā, tato eva cete bhāyitabbā verasañjanakā nāmāti. Sotassa ariyamaggassa ādito pajjanaṃ paṭipatti adhiṃgamo sotāpatti. Tadatthāya tattha paṭiṭṭhitassa ca āṅgāni **sotāpattiyaṅgāni**. Duvidhañhi (saṃ. ni. aṭṭha. 2.2.41) sotāpattiyaṅgaṃ sotāpattiattāya ca āṅgaṃ kāraṇaṃ, yaṃ sotāpattimaggappaṭilābhato pubbabhāge sotāpattippaṭilābhāya saṃvattati, “sappurisasamsevo saddhammassavanaṃ yonisomanasikāro dhammānudhammapaṭipatti”ti (dī. ni. 3.311) evaṃ āgataṃ. Paṭiladdhaguṇassa ca sotāpattiṃ patvā ṭhitassa āṅgaṃ, yaṃ “sotāpanassa āṅga”ntipi vuccati “sotāpano āṅgīyati nīyati etenā”ti katvā, buddhe aveccappasādādīnaṃ etaṃ adhivacanaṃ. Idamidhādhippetam.

Khīṇanirayotiādīsu āyatim tattha anuppajjanatāya khīṇo nirayo mayhati, so ahaṃ khīṇanirayo. Esa nayo sabbattha. **Sotāpannoti** maggasotaṃ āpanno. **Avinipātadhammoti** na vinipātasabhāvo. **Niyatoti** paṭhamamaggasaṅkhātena sammattaniyāmena niyato. **Sambodhiparāyaṇoti** uparimaggattayasāṅkhāto sambodhi paraṃ ayaṇaṃ mayhanti sohaṃ sambodhiparāyaṇo, sambodhiṃ avassaṃ abhisambujjanakoti attho.

Pāṇātipātapaccayāti pāṇātipātakammaṃ karaṇahetu. **Bhayaṃ veranti** atthato ekaṃ. Veraṃ vuccati virodho, tadeva bhāyitabbato “bhaya”nti vuccati. Tañca panetaṃ duvidhaṃ hoti – bāhiraṃ, ajjhattikanti. Ekena hi ekassa pitā mārito hoti. So cinteti “etena kira me pitā mārito, ahampi taṃyeva māressāmī”ti nisitaṃ satthaṃ ādāya carati. Yā tassa abbhantare uppannā veracetanā, idaṃ **bāhiraṃ veraṃ** nāma tassa verassa mūlabhūtaṃ verakārapuggalato bahibhāvattā. Yā pana itarassa “ayaṃ kira maṃ māressāmīti carati, ahameva naṃ paṭhamataraṃ māressāmī”ti cetanā uppajjati, idaṃ **ajjhattikaṃ veraṃ** nāma. Idaṃ tāva ubhayampi diṭṭhadhammikameva. Yā pana taṃ niraye uppannaṃ disvā “etaṃ paharissāmī”ti jalitaṃ ayamuggaraṃ gaṇhantassa nirayapālassa cetanā uppajjati, idamassa samparāyikaṃ bāhiraṃ veraṃ. Yā cassa “ayaṃ niddosaṃ maṃ paharissāmīti āgacchati, ahameva naṃ paṭhamataraṃ paharissāmī”ti cetanā uppajjati, idamassa samparāyikaṃ ajjhattaṃ veraṃ. Yaṃ panetaṃ bāhiraṃ veraṃ, taṃ aṭṭhakathāsu “puggalavera”nti vuccati. **Dukkhaṃ domanassanti** atthato ekameva. Yathā cettha, evaṃ sesesupi “iminā mama bhaṇḍaṃ haṭṭaṃ, mayhaṃ dāresu cārittaṃ āpannaṃ, musā vatvā attho bhaggo, surāmadamattena idaṃ nāma kata”ntiādinā nayena verappavatti veditabbā.

Aveccappasādenāti adhigatena acalappasādena. **Ariyakantehī**ti pañcahi sīlehi. Tāni hi ariyānaṃ kantāni piyāni bhavanti, bhavantaragatāpi ariyā tāni na vijahanti, tasmā “ariyakantāni”ti vuccanti. Sesamettha yaṃ vattabbaṃ siyā, taṃ sabbaṃ **visuddhimagge anussatiniddese** vuttanti veditabbaṃ.

Paṭhamaverasuttavaṇṇanā niṭṭhitā.

9. Āghātavatthusuttavaṇṇanā

29. Navame vasati ettha phalaṃ tannimittatāya pavattatīti **vatthu**, kāraṇanti āha “**āghātavatthūni**”ti. Kopo nāmāyaṃ yasmaṃ vatthusmiṃ uppajjati, na tattha ekavārameva uppajjati, atha kho punapī uppajjatevāti vuttaṃ “**bandhati**”ti. Atha vā yo paccayavisesena uppajjamāno āghāto savisaye baddho viya na vigacchati, punapī uppajjateva. Taṃ sandhāyāha “**āghātaṃ bandhati**”ti. Taṃ panassa paccayavasena nibbattaṃ uppādanamevāti vuttaṃ “**uppādeti**”ti.

Āghātavatthusuttavaṇṇanā niṭṭhitā.

10. Āghātaṭṭhavinayasuttavaṇṇanā

30. Dasame **taṃ kutettha labbhāti** ettha tanti kiriyāparāmasanaṃ. Padajjhāhārena ca attho veditabboti “**taṃ anattacaraṇaṃ mā ahoṣi**”tiādīmāha. **Kena kāraṇena laddhabbaṃ** niratthakabhāvato. Kammassakā hi sattā. Te kassa ruciyaṃ dukkhitā sukhitā vā bhavanti, tasmā kevalaṃ tasmīṃ mayhaṃ anattacaraṇaṃ, taṃ kutettha labbhāti adhippāyo. Atha vā **taṃ kopakāraṇaṃ ettha puggale kuto labbhā** paramatthato kujjhitabbassa kujjhanakassa ca abhāvato. Saṅkhāramattañhettaṃ, yadidaṃ khandhapañcakaṃ yaṃ “satto”ti vuccati, te saṅkhārā ittarakhaṇikā, kassa ko kujjhatīti attho. **Lābhā nāma ke siyūṃ** aññātra anattuppattito.

Āghātaṭṭhavinayasuttavaṇṇanā niṭṭhitā.

11. Anupubbanirodhasuttavaṇṇanā

31. Ekādasame **anupubbanirodhāti** anupubbena anukkamena pavattetabbanirodhā. Tenāha “**anupaṭipāṭinirodhā**”ti.

Anupubbanirodhasuttavaṇṇanā niṭṭhitā.

Sattāvāsavaggavaṇṇanā niṭṭhitā.

4. Mahāvaggo

1. Anupubbavihārasuttavaṇṇanā

32. Catutthassa paṭhame anupubbato viharitabbāti **anupubbavihārā**. **Anupaṭipāṭiyāti** anukkamena. **Samāpajjitabbavihārāti** samāpajjitvā samaṅgino hutvā viharitabbavihārā.

Anupubbavihārasuttavaṇṇanā niṭṭhitā.

2-3. Anupubbavihārasamāpattisuttādivaṇṇanā

33-34. Dutiye chātaṃ vuccati taṇhādīṭṭhiyo kāmānaṃ pātabbato tāsāṃ vasena vattanato,

tanninnattā natthi etesu chātanti **nicchātā**. Tenāha “**taṇhādiṭṭhicchātāna**”ntiādi. Tatiye natthi vattabbaṃ.

Anupubbavihārasamāpattisuttādivaṇṇanā niṭṭhitā.

4. Gāvīupamāsuttavaṇṇanā

35. Catutthe **pabbatacārinī**ti pakatiyā pabbate bahulacārinī. **Akhettaññūti** (visuddhi. mahāṭi. 1.77) agocaraññū. Samādhiparipantānaṃ visodhanānabhiññatāya **bālo**. Jhānassa paguṇabhāvāpādanaveyyattiyassa abhāvena **abyatto**. Uparijhānassa padaṭṭhānabhāvānavabodhena **akhettaññū**. Sabbathāpi samāpattikosallābhāvena **akusalo**. Samādhinimittassa vā anāsevanāya **bālo**. Abhāvanāya **abyatto**. Abahulīkārena **akhettaññū**. Sammadeva anadhiṭṭhānato **akusaloti** yojetabbaṃ. **Ubhato bhaṭṭhoti** ubhayato jhānato bhaṭṭho. So hi appaguṇatāya na suppatiṭṭhitatāya saussāhopi vināsato asāmatthiyato ca jhānadvayato parihīno.

Gāvīupamāsuttavaṇṇanā niṭṭhitā.

5. Jhānasuttavaṇṇanā

36. Pañcame **aniccatoti** iminā niccappaṭikkhepato tesam aniccatamāha. Tato eva udayavayavantato vipariṇāmato tāvakālikato ca te aniccāti jotitaṃ hoti. Yañhi niccaṃ na hoti, taṃ udayavayaparicchinnajarāya maraṇena cāti dvedhā vipariṇataṃ ittarakkhaṇameva ca hoti. **Dukkhatoti** na sukhato. Iminā sukhappaṭikkhepato tesam dukkhatamāha. Tato eva ca abhiṇhappaṭipīlanato dukkhatvathuto ca te dukkhāti jotitaṃ hoti. Udayavayavantatāya hi te abhiṇhappaṭipīlanato nirantaradukkhatāya dukkhasseva ca adhiṭṭhānabhūto. Paccayayāpanīyatāya rogamūlatāya ca **rogato**. Dukkhatāsūlayogato kilesāsucipaggharato uppādajarābhangehi uddhumātapakkabhijjanato ca **gaṇḍato**. Pīlājananato antotudanato dunnīharaṇato ca **sallato**. Avaḍḍhiāvahanato aghavatthuto ca **aghatto**. Aseribhāvajanato ābādhappaṭiṭṭhānatāya ca **ābādhato**. Avasavattanato avidheyyatāya ca **parato**. Byādhijarāmarañehi palujjanīyatāya **palokato**. Sāminivāsīkarakavedakaadhiṭṭhāyakavirahato **suññato**. Attappaṭikkhepaṭṭhena **anattato**. Rūpādidhammāpi yathā na ettha attā atthīti **anattā**, evaṃ sayampi attā na hontīti **anattā**. Tena abyāpārato nirīhato tucchato anattāti dīpitaṃ hoti.

Lakkhaṇattayameva sukhāvabodhanatthaṃ ekādasahi padehi vibhajtvā gahitanti dassetuṃ “**yasmā aniccato**”tiādi vuttaṃ. **Antosamāpattiyanti** samāpattīnaṃ sahaṇatāya samāpattīnaṃ abbhantare cittaṃ paṭisaṃharatīti tappaṭibaddhachandarāgādikilesavikkhambhanena vipassanācittaṃ paṭisaṃharati. Tenāha “**moceti apaneti**”ti. **Savanavasena**ti “sabbasankhārasamatho”tiādinā savanavasena. **Thutivasena**ti theva thomanāvasena guṇato saṃkittanavasena. **Pariyattivasena**ti tassa dhammassa pariyaṇāvanavasena. **Paññattivasena**ti tadatthassa paññāpanavasena. Ārammaṇakaraṇavaseneva upasaṃharati maggacittaṃ, “etaṃ santa”ntiādi pana avadhāraṇanivattitathadassanaṃ. Yathā vipassanā “etaṃ santaṃ etaṃ paṇīta”ntiādinā asaṅkhatāya dhātuyā cittaṃ upasaṃharati, evaṃ maggo nibbānaṃ sacchikiriyābhisamayavasena abhisamento tattha labbhamāne sabbepi visese asammohato paṭivijjhanto tattha cittaṃ upasaṃharati. Tenāha “**iminā pana ākārenā**”tiādi.

So **tattha ṭhitoti** so adandhavipassako yogī tattha tāya aniccādilakkhaṇattayārammaṇāya vipassanāya ṭhito. **Sabbasoti** sabbattha tassa tassa maggassa adhigamāya nibbattitasamathavipassanāsu. **Asakkonto anāgāmī hotīti** heṭṭhimaggāvahāsu eva samathavipassanāya chandarāgaṃ pahāya aggamaggāvahāsu nikantiṃ pariyādātuṃ asakkonto anāgāmitāyameva saṅṭhāti.

Samatikkantattāti samathavasena vipassanāvasena cāti sabbathāpi rūpassa samatikkantattā. Tenāha “**ayaṃ hī**”tiādi. **Anenāti** yoginā. **Taṃ atikkammāti** idaṃ yo paṭhamaṃ pañcavokāraekavokārapariyaṇāpanne dhamme sammadeva sammasitvā te vissajjetvā tato arūpasamāpattiṃ

samāpajjitvā arūpadhamme sammasati, taṃ sandhāya vuttaṃ. Tenāha “**idāni arūpaṃ sammasati**”ti.

Jhānasuttavaṇṇanā niṭṭhitā.

6. Ānandasuttavaṇṇanā

37. Chatṭhe okāsaṃ avasaraṃ adhigacchati etenāti **okāsādhigamo**, maggaphalasukhādhigamāya okāsabhāvato vā okāso, tassa adhigamo **okāsādhigamo**. Ettha ca dīghanikāyeneva (dī. ni. 2.288) pana suttantadesanāyaṃ paṭhamajjhānaṃ, catutthajjhānaṃ, arahattamaggoti tayo okāsādhigamā āgatā. Tattha (dī. ni. aṭṭha. 2.288) paṭhamaṃ jhānaṃ pañca nīvaraṇāni vikkhambhetvā attano okāsaṃ gahetvā tiṭṭhatīti “**paṭhama okāsādhigamo**”ti vuttaṃ. Catutthajjhānaṃ pana sukhadukkhaṃ vikkhambhetvā attano okāsaṃ gahetvā tiṭṭhatīti **dutiyo okāsādhigamo**. Arahattamaggo sabbakilese vikkhambhetvā attano okāsaṃ gahetvā tiṭṭhatīti “**tatiyo okāsādhigamo**”ti vutto. Idha pana vakkhamānāni tīṇi arūpajjhānāni sandhāya “**okāsādhigamo**”ti vuttaṃ. Tesaṃyeva ca gahaṇe kāraṇaṃ sayameva vakkhati.

Sattānaṃ visuddhiṃ pāpanatthāyāti rāgādīhi malehi abhijjhāvisamalobhādīhi ca upakkilesehi kiliṭṭhacittānaṃ sattānaṃ visuddhipāpanatthāya samatikkamanatthāya. Āyatiṃ anuppajjanañhi idha “**samatikkamo**”ti vuttaṃ. **Atthaṃ gamanatthāyāti** kāyikadukkhasa ca cetasikadomanassassa cāti imesaṃ dvinnāṃ atthaṅgamāya, nirodhāyāti attho. Nāyati nicchayena kamati nibbānaṃ, taṃ vā nāyati paṭivijjhīyati etenāti **ñāyo**, samucchadabhāvo ariyamaggoti āha “**sahavipassanakassa maggassā**”ti. **Paccakkhakarāṇatthāyāti** attapaccakkhatāya. Parapaccayena vinā paccakkhakarāṇāñhi “**sacchikiriya**”ti vuccati. **Asambhinnanti** pittasemhādīhi apalibuddhaṃ anupahataṃ.

Rāgānugato samādhi **abhinato** nāma hoti ārammaṇe abhimukhābhāvena pavattiyā, dosānugato pana **apanato** apagamānavasena pavattiyā, tadubhayappaṭikkhepena “**na cābhinato na cāpanato**”ti vuttanti āha “**rāgavasenā**”tiādi. **Na sasaṅkhārenaniggayhavāritagatoti** lokiyajjhānacittāni viya na sasaṅkhārena sappayogena tadaṅgappahānavikkhambhanappahānavasena ca niggahetvā vāretvā ṭhito. Kiñcarahi kilesānaṃ chinnante uppanno. Tathābhūtaṃ phalasaṃmādhim sandhāyetaṃ vuttaṃ. Tenāha “**na sasaṅkhārena...pe... chinnante uppanno**”ti.

Ānandasuttavaṇṇanā niṭṭhitā.

7. Lokāyatikasuttavaṇṇanā

38. Sattame **lokāyatavādakāti** āyatiṃ hitaṃ loko na yatati na viruhati etenāti lokāyataṃ, vitaṇḍasatthaṃ. Tañhi ganthaṃ nissāya sattā puññakiriyaṃ cittaṃpi na uppādentī, taṃ vadantīti **lokāyatavādakā**.

Daḷhaṃ thiraṃ dhanu etassāti daḷhadhanvā (a. ni. ṭī. 2.4.45-46; saṃ. ni. ṭī. 1.1.107), so eva “**daḷhadhammā**”ti vutto. Paṭisattavidhamanattaṃ dhanuṃ gaṇhātīti **dhanuggaho**. So eva usuṃ saraṃ asati khīpatīti **issāso**. **Dvisahassathāmanti** lohādibhāraṃ vahituṃ samatthaṃ dvisahassathāmaṃ. Tenāha “**dvisahassathāmaṃ nāmā**”tiādi. **Daṇḍeti** dhanudaṇḍe. **Yāva kaṇḍappamāṇāti** dīghato yattakaṃ kaṇḍassa pamāṇaṃ, tattake dhanudaṇḍe ukkhittamatte āropitesuyeva jiyādaṇḍesu so ce bhāro pathavito muccati, evaṃ idaṃ dvisahassathāmaṃ nāma dhanūti daṭṭhabbaṃ. **Uggahitasippoti** uggahitadhanusippo. **Katahatthoti** thirataṃ lakkhesu avirajjhanasarakkhepo. Īdiso pana tattha vasibhūto **katahattho** nāma hotīti āha “**ciṇṇavasibhāvo**”ti. Kataṃ rājakulādīsu upecca asanaṃ etena so **katūpāsanoti** āha “**rājakulādīsu dassitasippo**”ti. **Evaṃ katanti** evaṃ antosusirakaraṇādīnā sallahukaṃ kataṃ.

Lokāyatikasuttavaṇṇanā niṭṭhitā.

8-9. Devāsurasāṅgāmasuttādivaṇṇanā

39-40. Aṭṭhame **abhiyimsūti** kadā abhiyiṃsu? Yadā balavanto ahesuṃ, tadā.

Tatrāyamanupubbikathā (saṃ. ni. aṭṭha. 1.1.247; sāratta. ṭi. 1.verañjakaṇḍavaṇṇanā) – sakko kira magadharaṭṭhe macalagāmake magho nāma māṇavo hutvā tettiṃsa purise gahetvā kalyāṇakammaṃ karonto satta vatapadāni pūretvā tatha kālaṅkato devaloke nibbatti. Taṃ balavakammānubhāvena sapariṣaṃ sesadevatā dasahi ṭhānehi adhigaṇhantaṃ disvā “āgantukadevaputtā āgatā” ti nevāsikā gandhapānaṃ sajjayiṃsu. Sakko sakapariṣāya saññaṃ adāsi “mārisā mā gandhapānaṃ pivittha, pivānākāramattameva dassethā” ti. Te tathā akāṃsu. Nevāsikadevatā suvaṇṇasarakehi upanītaṃ gandhapānaṃ yāvadatthaṃ pivitvā mattā tatha tatha suvaṇṇapathaviyaṃ patitvā sayiṃsu. Sakko “gaṇhatha puttahatāya putte” ti te pādesu gahetvā sinerupāde khipāpesi. Sakkassa puññatejēna tadanuvattakāpi sabbe tattheva patiṃsu. Te sineruvemajjhakāle saññaṃ labhitvā, “tātā, suraṃ na pivimha, suraṃ na pivimhā” ti āhaṃsu. Tato paṭṭhāya **asurā** nāma jātā. Atha nesam kammaṃ paccaya utusamuttānaṃ sinerussa heṭṭhimatale dasayojanasahassaṃ asurabhavanaṃ nibbatti. Sakko tesam nivattitvā anāgamanatthāya āraṅkhaṃ ṭhapesi. Yaṃ sandhāya vuttaṃ –

“Antarā dvinnaṃ ayujjhapurānaṃ,
Pañcavidhā ṭhapitā abhirakkhā;
Uruga-karoṭi-payassa ca hārī,
Madanayutā caturo ca mahatthā” ti. (saṃ. ni. aṭṭha. 1.1.247; sāratta. ṭi. 1.1
verañjakaṇḍavaṇṇanā);

Dve nagarāni hi yuddhena gahetuṃ asakkuṇeyyatāya **ayujjhapurāni** nāma jātāni devanagaraṇca asuranagaraṇca. Yadā hi asurā balavanto honti, atha devehi palāyitvā devanagaraṃ pavisitvā dvāre pidahite asurānaṃ sataśahassaṃ kiñci kātuṃ na sakkoti. Yadā devā balavanto honti, athāsūrehi palāyitvā asuranagaraṃ dvāre pidahite sakkānaṃ sataśahassaṃ kiñci kātuṃ na sakkoti. Iti imāni dve nagarāni ayujjhapurāni nāma. Tesam antarā etesu uragādīsū pañcasu ṭhānesu sakkena āraṅkhā ṭhapitā. Tatha **uragasaddena** nāgā gahitā. Te hi uduke balavanto honti, tasmā sinerussa paṭhamālinde etesaṃ āraṅkhā. **Karoṭisaddena** supaṇṇā gahitā. Tesam kira karoṭi nāma pānabhojanaṃ, tena taṃ nāmaṃ labhiṃsu, dutiyālinde tesam āraṅkhā. **Payassahārisaddena** kumbhaṇḍā gahitā, dānavarakkhasā kira te, tatiyālinde tesam āraṅkhā. **Madanayutasaddena** yakkhā gahitā. Visamacārino kira te yujjhasonḍā, catutthālinde tesam āraṅkhā. **Caturo ca mahattāti** cattāro mahārājāno vuttā, pañcamālinde tesam āraṅkhā, tasmā yadi asurā kupitāvilacittā devapuraṃ upayanti yujjhitaṃ. Yaṃ girino paṭhamam paṭibhaṇḍam, taṃ uragā paṭibāhayanti. Evaṃ sesesu sesā.

Te pana asurā āyuvaṇṇayasaissariyasampattīhi tāvatimsasadisāva, tasmā antarā attānaṃ ajānitvā pāṭaliyā pupphitāya “na idaṃ devanagaraṃ, tatha pāricchattako pupphati, idha pana cittapāṭalī, jarasakkenāmhākaṃ suraṃ pāyevā vañcitā, devanagaraṇca no gahitaṃ, gacchāma, tena saddhiṃ yujjhissāma” ti hatthiassarathe āruya suvaṇṇarajatamaṇiphalakāni gahetvā yuddhasajjā hutvā asurabheriyo vādentā mahāsamudde udakaṃ dvidhā bhettvā utṭhahanti. Te deve vuttṭhe vammikamakkhikā vammikaṃ viya sineruṃ āruhituṃ ārabhanti. Atha nesam paṭhamam nāgehi saddhiṃ yuddham hoti. Tasmim kho pana yuddhe na kassaci chavi vā cammaṃ vā chijjati, na lohitaṃ uppajjati, kevalam kumārakānaṃ dāruṃḍakayuddham viya aññaṃaññasantāsanamattameva hoti. Koṭisatāpi koṭisahasāpi nāgā tehi saddhiṃ yujjhitaṃ te asurapuraṃyeva pavesetvā nivattanti. Yadā pana asurā balavanto honti, atha nāgā osakkitvā dutiye ālinde supaṇṇehi saddhiṃ ekatova hutvā yujjhanti. Esa nayo supaṇṇādīsūpi. Yadā pana tāni pañcapi ṭhānāni asurā maddanti, tadā ekato sampiṇḍitānipi tāni pañca balāni osakkanti. Atha cattāro mahārājāno gantvā sakkassa taṃ pavattiṃ ārocenti. Sakko tesam vacanaṃ sutvā diyaḍḍhayaṃjanasatikam vejayantarathaṃ āruya sayam vā nikkhamati, ekaṃ puttaṃ vā peseti. Yadā devā puna apaccāgamanāya asure jiniṃsu, tadā sakko asure palāpetvā pañcasu ṭhānesu āraṅkhaṃ

datvā vediyapāde vajirahatthā indapaṭimāyo ṭhapesi. Asurā kālena kālaṃ utṭhahitvā paṭimāyo disvā “sakko appamatto tiṭṭhātī”ti tatova nivattanti. Idha pana yadā asurānaṃ jayo ahosi, devānaṃ parājayo, taṃ sandhāyetaṃ vuttaṃ – “parājitā ca, bhikkhave, devā apayiṃsueva uttarenābhimukhā, abhiyiṃsu asurā”ti.

Dakkhiṇābhimukhā hutvāti cakkavāḷapabbatābhimukhā hutvā. Asurā kira devehi parājitā palāyantā cakkavāḷapabbatābhimukhaṃ gantvā cakkavāḷamahāsamuddapiṭṭhiyaṃ rajatapaṭṭavaṇṇe vālikāpuline yattha paṇṇakuṭiyo māpetvā isayo vasanti, tattha gantvā isīnaṃ assamapadena gacchantā “sakko imehi saddhiṃ mantevā amhe nāseti, gaṇhatha puttahatāya putte”ti kupitā assamapade pānīyaghaṭacaṅkamanapaṇṇasālādīni viddhaṃsenti. Isayo araṇṇato phalāphalaṃ ādāya āgatā disvā puna dukkhena paṭipākatikaṃ karonti, tepi punappunaṃ tatheva parājitā gantvā vināsenti. Tena vuttaṃ – “parājitā ca kho, bhikkhave, asurā apayiṃsueva dakkhiṇābhimukhā”ti. Navamaṃ uttānatthameva.

Devāsurasāṅgāmasuttādivaṇṇanā niṭṭhitā.

10. Tapussasuttavaṇṇanā

41. Dasame **pakkhandatī**ti pavisati. **Pasīdatī**ti pasādaṃ abhiruciṃ āpajjati, patitṭhātī vimuccatīti attho. **Kathāpābhatanti** kathāya mūlaṃ. Mūlañhi “pābhata”nti vuccati. Yathāha –

“Appakenapi medhāvī, pābhatena vicakkhaṇo;
Samuṭṭhāpeti attānaṃ, aṇuṃ aggiṃva sandhama”nti. (jā. 1.1.4);

Tenevāha “**kathāpābhatanti kathāmūla**”nti. Vitakkaggahaṇeneva taṃsahacarito vicāropi gahito. Tenevettha bahuvacananiddeso katoti āha “**vitakkesūti vitakkavicāresū**”ti.

Tapussasuttavaṇṇanā niṭṭhitā.

Mahāvaggavaṇṇanā niṭṭhitā.

5. Sāmaññavaggo

1-10. Sambādhasuttādivaṇṇanā

42-51. Pañcamassa paṭhame **udāyī**ti tayo therā udāyī nāma kāḷudāyī, lāḷudāyī, mahāudāyīti, idha kāḷudāyī adhippetoti āha “**udāyīti kāḷudāyitthero**”ti. **Sambādheti** sampīḷitatanṇhāsaṃkilesādinā sauppīḷānatāya paramasambādhe. Ativiya saṅkaraṭṭhānabhūto hi nīvaraṇasambādho adhippeto. **Okāsoti** jhānassetāṃ nāmaṃ. Nīvaraṇasambādhabhāvena hi jhānaṃ idha “okāso”ti vuttaṃ. **Paṭilīnanisabhoti** vā paṭilīno hutvā seṭṭho, paṭilīnaṃ vā seṭṭhoti **paṭilīnanisabho**. Paṭilīnā nāma pahīnamānā vuccanti mānussayavasena uṇṇatābhāvato. Yathāha “kathaṅca, bhikkhave, bhikkhu paṭilīno hoti? Idha, bhikkhave, bhikkhuno asmimāno pahīno hoti ucchinnamūlo tālāvattukato anabhāvaṃgato āyatim anuppādadharmo”ti (a. ni. 4.38; mahāni. 87). Sesāṃ sabbattha uttānameva.

Sambādhasuttādivaṇṇanā niṭṭhitā.

Iti manorathapūraṇiṃyā āṅguttaranikāya-aṭṭhakathāya

Navakanipātavaṇṇanāya anuttānatthadīpanā samattā.

Namo tassa bhagavato arahato sammāsambuddhassa

Āṅuttaranikāye

Dasakanipāta-ṭikā

1. Paṭhamapaṇṇāsakaṃ

1. Ānisaṃsavaggo

1. Kimatthiyasuttavaṇṇanā

1. Dasakanipātassa paṭhame **avippaṭṭisārattḥānī**ti avippaṭṭisārappayojanāni. **Avippaṭṭisārānisaṃsānī**ti avippaṭṭisārudayāni. Etena avippaṭṭisāro nāma sīlasssa udayamattam, saṃvaddhitassa rukkhassa chāyāpupphasadisam, añño eva panānena nipphādetabbo samādhiādiguṇoti dasseti. “Yāva maggāmaggañānadassanavisuddhi, tāva taruṇavipassanā”ti hi vacanato upakkilesavimuttaudayabbayaññāto param ayañca vipassanā virajjati yogāvacaro viratto puriso viya bhariyāya saṅkhārato etenāti virāgo.

Kimatthiyasuttavaṇṇanā niṭṭhitā.

2-5. Cetanākaraṇīyasuttādivaṇṇanā

2-5. Dutiye saṃsāramahoghasa paratīrabhāvato yo naṃ adhigacchati, taṃ pāreti gametīti **pāram**, nibbānaṃ. Tabbidūratāya natthi ettha pāranti **apāram**, saṃsāro. Tenāha “**orimatīrabhūtā tebhūmakavaṭṭā**”tiādi. Tatiyādīsu natthi vattabbaṃ.

Cetanākaraṇīyasuttādivaṇṇanā niṭṭhitā.

6. Samādhisuttavaṇṇanā

6. Chaṭṭhe **santaṃ santanti appetvā nisinnassā**tiādīsu santaṃ santaṃ paṇītaṃ paṇītantiādīni vadati. Iminā pana ākārena taṃ paṭivijjhivā tattha cittaṃ upasaṃharato phalasaṃpattisaṅkhāto cittuppādo tathā pavattatīti veditaṃ. Sesam sabbattha uttānameva.

Samādhisuttavaṇṇanā niṭṭhitā.

Ānisaṃsavaggavaṇṇanā niṭṭhitā.

2. Nāthavaggo

1-4. Senāsanasuttādivaṇṇanā

11-14. Dutiya paṭhame **nātidūranti** gocarāṭṭhānato aḍḍhagāvutato orabhāgatāya nātidūraṃ. **Nāccāsannanti** pacchimena pamāṇena gocarāṭṭhānato pañcadhanusatikatāya na atīāsannaṃ. Tāya ca pana nātidūranāccāsannatāya gocarāṭṭhānapaṭiparissayādirahitamaggatāya ca gamanassa ca āgamanassa ca uttarūpattā **gamaṇāgamaṇasampannaṃ**. Divasabhāge mahājanasaṃkiṇṇatābhāvena **divā appākiṇṇaṃ**. Abhāvatto hi ayaṃ **appa**-saddo “appiccho”tiādīsu viya. Rattiyam manussasaddābhāvena **rattiṃ appasaddaṃ**. Sabbadāpi janasaṃnipātanigghosābhāvena

appanigghosaṃ.

Appakasirenāti akasirena sukheveva. Sīlādiguṇānaṃ thirabhāvappattiyā **therā**. Suttageyyādi bahu suttaṃ etesanti **bahussutā**. Tamuggahadhāraṇena sammadeva garūnaṃ santike āgamitabhāvena ca āgato pariyattidhammasaṅkhāto āgamo etesanti **āgatāgamā**. Suttābhidhammasaṅkhātassa dhammassa dhāraṇena **dhammadharā**. Vinayassa dhāraṇena **vinayadharā**. Tesam dhammavinayānaṃ mātikāya dhāraṇena **mātikāddharā**. Tattha tattha dhammaparipucchāya **paripucchati**. Atthaparipucchāya **paripaṇhati** vīmaṃsati vicāreti. **Idaṃ, bhante, kathaṃ, imassa ko atthoti** paripucchāparipaṇhākāradassanaṃ. **Avivaṭaṇceva** pāliyaṃ atthaṃ padesantarapālidassanena āgamato **vivaranti**. **Anuttānikataṇca** yuttivibhāvanena **uttāniṃ karonti**. **Kaṅkhāṭhāniyesu dhammesu** saṃsayuppattiyā hetutāya gaṇṭhiṭṭhānabhūtesu pālippadesesu yāthāvato vinicchayappadānena **kaṅkhaṃ paṭivinodenti**.

Ettha ca nātidūraṃ nāccāsannaṃ gamanāgamanasampannanti ekaṃ aṅgaṃ, divā appākiṇṇaṃ, rattim appasaddaṃ, appanigghosanti ekaṃ, appaḍaṃsamakasavātātapasarīsapasamphassanti ekaṃ, tasmim kho pana senāsane viharantassa...pe... parikkhārāti ekaṃ, tasmim kho pana senāsane therā... pe... kaṅkhaṃ paṭivinodenti ekaṃ. Evaṃ pañca aṅgāni veditabbāni. Dutiyādīni uttānatthāni.

Senāsanasuttādivaṇṇanā niṭṭhitā.

5-6. Appamādasuttādivaṇṇanā

15-16. Pañcame **kārāpakaappamādo** nāma “ime akusalā dhammā pahātabbā, ime kusalā dhammā upasampādetabbā”ti taṃtaṃparivajjetabbavajjanasampādetabbasampādanavasena pavatto appamādo. **Esāti** appamādo. **Lokiyova** na lokuttaro. **Ayaṇcāti** ca **esāti** ca appamādameva vadati. **Tesanti** cātubhūmakadhammānaṃ. **Paṭilābhakattenāti** paṭilābhāpanakattena.

Jaṅgalānanti jaṅgalacārīnaṃ. Jaṅgala-saddo cettha kharabhāvasāmaññena pathavīpariyāyo, na anupaṭṭhānavidūradesavācī. Tenāha “**pathavītalacārīna**”nti. Padānaṃ vuccamānattā “**sapādakapāṇāna**”nti visesetvā vuttaṃ. **Samodhānanti** antogadhabhāvaṃ. Tenāha “**odhānaṃ pakkhepa**”nti. “Upakkhepa”ntipi paṭhanti, upanetvā pakkhipitabbanti attho. Vassikāya pupphaṃ **vassikaṃ** yathā “āmalakiyā phalaṃ āmalaka”nti. **Mahātalasminti** uparipāsāde. Chaṭṭhaṃ uttānameva.

Appamādasuttādivaṇṇanā niṭṭhitā.

7-8. Paṭhamaṇāthasuttādivaṇṇanā

17-18. Sattame yehi sīlādīhi samannāgato bhikkhu dhammasaraṇatāya dhammeneva nāthati āsīsati abhibhavatīti nātho vuccati, te tassa nāthabhāvakarā dhammā **nāthakaraṇāti** vuttatī āha “**attano sanāthabhāvakarā paṭiṭṭhakarāti attho**”ti. Tattha **attano paṭiṭṭhakarāti** yassa nāthabhāvakarā, tassa attano paṭiṭṭhāvīdhāyino. Appaṭiṭṭho anātho, sappatiṭṭho sanāthoti paṭiṭṭhattho nātha-saddo. Kalyāṇaguṇayogato kalyāṇāti dassento “**sīlādiguṇasampannā**”ti āha. Mijjanalakkhaṇā mettā etassa atthīti **mitto**. So vuttanayena kalyāṇo assa atthīti tassa atthitāmatam kalyāṇamittapadena vuttaṃ. Assa tena sabbakālaṃ avijahitavāsoti taṃ dassetuṃ “kalyāṇasahāyo”ti vuttanti āha “**tevassā**”ti. **Te eva** kalyāṇamittā **assa** bhikkhuno. **Saha ayanatoti** saha pavattanato. Asamodhāne cittena, samodhāne pana cittena ceva kāyena ca **sampavaṅko**. Sukhaṃ vaco etasmim anukūlagāhimhi ādaragāravavati puggaleti **suvaco**. Tenāha “**sukhena vattabbo**”tiādi. **Khamoti** khanto. Tamevassa khamabhāvaṃ dassetuṃ “**gāḷhenā**”tiādi vuttaṃ. **Vāmatoti** micchā, ayoniso vā gaṇhāti. **Paṭippharatīti** paṭāṇikabhāvena tiṭṭhati. **Padakkhiṇaṃ gaṇhāti**ti sammā, yoniso vā gaṇhāti.

Uccāvacānīti vipulakhuddakāni. **Tatrupagamaniyāyāti** tatra tatra mahante khuddake ca kamme sādhanavasena upāyena upagacchantiyā, tassa tassa kamma nippādane samatthāyāti attho. **Tatrupāyāyāti** vā tatra tatra kamme sādhetabbe upāyabhūṭāya.

Dhamme assa kāmoti dhammakāmoti byadhikaraṇānampi bāhirattho samāso hotīti katvā vuttaṃ. Kāmetabbato vā piyāyitabbato kāmo, dhammo. Dhammo kāmo assāti **dhammakāmo**. **Dhammoti** pariyattidhammo adhippetoti āha “**tepiṭakaṃ buddhavacanaṃ piyāyatīti attho**”ti. Samudāharaṇaṃ kathanāṃ samudāhāro, piyo samudāhāro etassāti **piyasamudāhāro**. **Sayañcāti** ettha **ca-saddena** “sakkacca”nti padaṃ anukaḍḍhati. Tena sayañca sakkaccaṃ desetukāmo hotīti yojanā. **Abhidhammo satta pakaraṇāni** “adhiko abhivisiṭṭho ca pariyattidhammo”ti katvā. **Vinayo ubhatovibhaṅgā** vinayanato kāyavācānaṃ. **Abhivinayo khandhakaparivārā** visesato ābhisamācārikadhammakittanato. **Ābhisamācārikadhammapāripūrivāseneva** hi ādibrahmacariyakadhammapāripūrī. **Dhammo eva** piṭakadvayassapī pariyattidhammabhāvato. **Maggaphalāni abhidhammo** “nibbānadhammassa abhimukho”ti katvā. **Kilesavūpasamakaraṇaṃ** pubbhāgiyā tisso sikkhā saṅkhepato vivaṭṭanissito samatho vipassanā ca. **Uḷārapāmojjoti** balavapāmojjo. **Kāraṇattheti** nimittatthe. Kusaladhammanimittāṃ hissa vīriyārambho. Tenāha “**tesaṃ adhigamattāyā**”ti. **Kusalesu dhammesūti** vā nippādetabbe bhuttaṃ yathā “cetaso avūpasame ayonisomanasikārapadaṭṭhāna”nti. Aṭṭhame natthi vattabbaṃ.

Paṭhamanāthasuttādivaṇṇanā niṭṭhitā.

9. Paṭhamaariyāvāsasuttavaṇṇanā

19. Navame ariyānaṃ eva āvāsāti **ariyāvāsā** anariyānaṃ tādisānaṃ asambhavato. **Ariyāti** cettha ukkaṭṭhaniddesena khīṇāsavā gahitā. Te ca yasmā tehi sabbakālaṃ avijahitavāsā eva, tasmā vuttaṃ “**te āvasimsu āvasanti āvasissanti**”ti. Tattha **āvasimsūti** nissāya āvasimsu. Pañcaṅgavippahīnatādayo hi ariyānaṃ apassayā. Tesu pañcaṅgavippahānapaccekasaccapanodanaesanāosaṭṭhāni, “saṅkhāyekaṃ paṭisevati, adhivāseti parivajjeti vinodeti”ti (dī. ni. 3.308; ma. ni. 2.168; a. ni. 10.20) vuttasu apassenesu vinodanañca maggakiccāneva, itare maggena ca samijjantīti.

Paṭhamaariyāvāsasuttavaṇṇanā niṭṭhitā.

10. Dutiyariyāvāsasuttavaṇṇanā

20. Dasame kasmā pana bhagavā kuruṣu viharanto imaṃ suttaṃ abhāsīti āha “**yasmā**”tiādi. Kururaṭṭhaṃ kira tadā tannivāsīsattānaṃ yonisomanasikāravantaṭṭhādinā yebhuyyena suppaṭipannatāya pubbe ca katapuññatābalena vā tadā utuādisampattiyuttameva ahosi. Keci pana “pubbe pavattakuruvattadhammānuṭṭhānavāsānāya uttarakuru viya yebhuyyena utuādisampannameva hoti. Bhagavato kāle sātisaṃ utusappāyādiyuttaṃ raṭṭhaṃ ahosī”ti vadanti. Tattha bhikkhū bhikkhuniyo upāsakā upāsikāyo utupaccayādisampannattā tassa raṭṭhassa sappāyautupaccayasevanena niccaṃ kallasarīrā kallacittā ca honti. Te cittasarīrakallatāya anuggahitapaññābalā gambhīrakathaṃ paṭiggahetuṃ samatthā paṭiccasamuppādanissitānaṃ gambhīrapaññānañca kārakā honti. Tenāha “**kururaṭṭhavāsino bhikkhū gambhīrapaññākārakā**”tiādi.

Yuttappayuttāti satipaṭṭhānabhāvanāya yuttā ceva payuttā ca. Tasmīñhi (dī. ni. aṭṭha. 2.373; ma. ni. aṭṭha. 1.106) janapade catasso parisa pakatiyāva satipaṭṭhānabhāvanānuyogamanuyuttā viharanti, antamaso dāsakammakaraparijanāpī satipaṭṭhānapaṭisaṃyuttameva kathaṃ kathenti. Udatatthasuttakantaṭṭhānādīsūpi niratthakakathā nāma nappavattati. Sace kāci itthī, “amma, tvaṃ kataraṃ satipaṭṭhānabhāvanaṃ manasi karosī”ti pucchitā “na kiñci”ti vadati, taṃ garahanti “dhīratthu tava jīvitam, jīvamānāpī tvaṃ matasadisā”ti. Atha naṃ “mā dāni puna evamakāsī”ti ovaditvā aññataraṃ satipaṭṭhānaṃ uggaṇhāpentī. Yā pana “ahaṃ asukaṃ satipaṭṭhānaṃ nāma manasi karomī”ti

vadati, tassā “sādhu sādhu”ti sādhu-kāraṃ datvā “tava jīvitam sujīvitam, tvam nāma manussattam pattā, tavatthāya sammāsambuddho uppanno”tiādīhi pasamsanti. Na kevalañcetta manussajātikāyeva satipaṭṭhānāmanasikārayuttā, te nissāya viharantā tiracchānagatāpi.

Tatridam vatthu – eko kira naṭako suvapotaṃ gahetvā sikkhāpento vicarati. So bhikkhuniupassayaṃ upanissāya vasitvā gamanakāle suvapotaṃ pamussitvā gato. Taṃ sāmaṇeriyo gahetvā paṭijaggimsu, “buddharakkhito”ti cassa nāmaṃ akamsu. Taṃ ekadivasam purato nisinnam disvā mahātherī āha “buddharakkhita”ti. Kiṃ, ayyoti. Atthi te koci bhāvanāmanasikāroti? Natthayyeti. Āvuso, pabbajitānaṃ santike vasantena nāma vissatṭhaattabhāvena bhavitum na vaṭṭati, kocideva manasikāro icchitabbo, tvam pana aññaṃ na sakkhissasi, “atṭhi atṭhī”ti sajjhāyaṃ karohīti. So theriyā ovāde ṭhatvā “atṭhi atṭhī”ti sajjhāyānto carati.

Taṃ ekadivasam pātova toraṇagge nisīditvā bālātapaṃ tapamānaṃ eko sakuṇo nakhapañjarena aggahesi. So “kiri kirī”ti saddamakāsi. Sāmaṇeriyo sutvā, “ayye, buddharakkhito sakuṇena gahito, mocema na”nti leḍḍuādīni gahetvā anubandhitvā mocesuṃ. Taṃ ānetvā purato ṭhapitaṃ therī āha, “buddharakkhita, sakuṇena gahitakāle kiṃ cintesi”ti. Ayye, na aññaṃ cintesiṃ, “atṭhipuñjova atṭhipuñjaṃ gahetvā gacchati, katarasmim ṭhāne vippakirissati”ti evaṃ, ayye, atṭhipuñjameva cintesinti. Sādhu sādhu, buddharakkhita, anāgate bhavakkhayassa te paccayo bhavissatīti. Evaṃ tattha tiracchānagatāpi satipaṭṭhānāmanasikārayuttā.

Dīghanikāyādīsu mahānidānādīniti dīghanikāye mahānidānaṃ (dī. ni. 2.95 ādayo) satipaṭṭhānaṃ (dī. ni. 2.372 ādayo) majjhimanikāye satipaṭṭhānaṃ (ma. ni. 1.105 ādayo) sāropamaṃ (ma. ni. 1.307 ādayo) rukkhopamaṃ raṭṭhapālaṃ māgaṇḍiyaṃ āneñjasappāyanti (ma. ni. 3.66 ādayo) evamādīni.

Ñāṇādayoti ñāṇaṅceva taṃsāmpayuttadhammā ca. Tenāha “**ñāṇanti vutte**”tiādi. **Ñāṇasāmpayuttacittāni labbhanti** tehi vinā sampajānatāya asambhavato. **Mahācittānīti** atṭhapi mahākiriya-cittāni labbhanti “satatavihārā”ti vacanato ñāṇupattipaccayarahitakālepi pavattijotanato. **Dasa cittānīti** atṭha mahākiriya-cittāni hasituppādavoṭṭhabbanacittehi saddhiṃ dasa cittāni labbhanti. Arajjanādussanavasena pavatti tesampi sādharmaṇāti. “Upekkhako viharatī”ti vacanato chaḷaṅgupekkhāvasena āgatānaṃ imesaṃ satatavihārānaṃ somanassaṃ kathaṃ labbhātīti āha “**āsevanavasena labbhati**”ti. Kiñcāpi khīṇāsavo iṭṭhāniṭṭhepi ārammaṇe majjhatto viya bahulaṃ upekkhako viharati attano parisuddhapakatibhāvāvijahanato. Kadāci pana tathā cetobhisaṅkhārābhāve yaṃ taṃ sabhāvato iṭṭhaṃ ārammaṇaṃ, tattha yāthāvasabhāvaggahaṇavasenaṃ arahato cittaṃ somanassasahagataṃ hutvā pavattateva, tañca kho pubbāsevanavasena. Tena vuttaṃ “**āsevanavasena labbhati**”ti. **Ārakkhakkiccam sādheti** sativepullappattattā. **Caratoti**ādīnā nīccasamādānaṃ dasseti, taṃ vikkhepābhāvena daṭṭhabbaṃ.

Pabbajjūpagatāti yaṃ kiñci pabbajjaṃ upagatā, na samitapāpā. **Bhovādinoti** jātimattabrāhmaṇe vadati. **Pātekkasaccānīti** tehi tehi diṭṭhigatikehi pāṭiyekkaṃ gahitāni “idameva sacca”nti abhinivīṭṭhāni diṭṭhisaccādīni. Tānīpi hi “idameva sacca”nti gahaṇaṃ upādāya “saccānī”ti voharīyanti. Tenāha “**idamevā**”tiādi. **Nīhaṭānīti** attano santānato nīharitāni apanītāni. **Gahitaggahaṇassāti** ariyamaggādhigamato pubbe gahitassa diṭṭhiggāhassa. **Vissatṭhabhāvavevacanānīti** ariyamaggena sabbaso pariccāgabhāvassa adhivacanāni.

Natthi etāsaṃ vayo vekallanti **avayāti** āha “**anūnā**”ti, anavasesoti attho. **Esanāti** kāmesanādayo. **Maggassa kiccanipphatti kathitā** rāgādīnaṃ pahīnabhāvādīpanato. **Paccavekkhaṇaphalaṃ kathitanti** paccavekkhaṇamukhena ariyaphalaṃ kathitaṃ. Adhigate hi aggaphale sabbaso rāgādīnaṃ anuppādadhamaṃ pajānāti, tañca pajānaṃ paccavekkhaṇaññanti.

Dutiyaariyāvāsasuttavaṇṇanā niṭṭhitā.

Nāthavaggavaṇṇanā niṭṭhitā.

3. Mahāvaggo

1. Sīhanādasuttavaṇṇanā

21. Tatiyassa paṭhame **visamaṭṭhānesūti** papātādīsu visamaṭṭhānesu. “**Aññehi asādhāraṇānī**”ti kasmā vuttaṃ, nanu cetāni sāvakānampi ekaccānaṃ uppajjantīti? Kāmaṃ uppajjanti, yādisāni pana buddhānaṃ ṭhānāṭṭhānañānādīni, na tādisāni tadaññesaṃ kadācīpi uppajjantīti aññehi asādhāraṇānīti. Tenāha “**tathāgatasseva balānī**”ti. Imameva hi yathāvuttalesaṃ apekkhitvā tadabhāvato āsayānusayañānādīsu eva asādhāraṇasamaññā niruḷhā. Kāmaṃ ñāṇabalānaṃ ñāṇasambhāro visesapaccayo, puññasambhāropi pana nesam paccayo eva. Ñāṇasambhārasapi vā puññasambhārabhāvato “**puññussayasampattiyā āgatānī**”ti vuttaṃ.

Pakatihatthikulanti (saṃ. ni. ṭī. 2.2.22) giricaranadicaravanacarādippabhedā gocariyakālāvakanāmā sabbāpi balena pākatikā hatthijāti. **Dasannaṃ purisānanti** thāmamajjhimanānaṃ dasannaṃ purisānaṃ. Ekassa tathāgataṃ kāyabalanti ānetvā sambandho. **Ekassāti** ca tathā heṭṭhā kathāyaṃ āgatattā desanāsotena vuttaṃ. **Nārāyanasaṅghātabalanti** ettha nārā vuccanti rasmiyo. Tā bahū nānāvīdhā ito uppajjantīti nārāyanaṃ, vajiraṃ, tasmā **nārāyanasaṅghātabalanti** vajirasaṅghātabalanti attho. Ñāṇabalaṃ pana pāliyaṃ āgatameva, na kāyabalaṃ viya aṭṭhakathāruḷhamevāti adhippāyo.

Samyuttake (saṃ. ni. 2.33) **āgatāni tesattati ñāṇāni, sattaṃ sattaṃ ñāṇānīti** vuttaṃ, tatha (vibha. mūlaṭī. 760) pana nidānavagge sattaṃ sattaṃ āgatāni catucattārīsaṅga. Tesattati pana **paṭisambhidāmagge** (paṭi. ma. 1.1) sutamayādīni āgatāni dissanti, na samyuttake. **Aññānipīti** etena **ñāṇavattuvibhaṅge** (vibha. 751 ādayo) ekakādivasena vuttāni, aññattha ca “pubbante ñāṇa”ntiādīnā (dha. sa. 1063) brahmajālādīsu ca “tayidaṃ tathāgato pajānāti ‘imāni diṭṭhiṭṭhānāni evaṃ gahitānī’ti”ādīnā (dī. ni. 1.36) vuttāni anekāni ñāṇappabhedāni saṅgaṇhāti. Yathāvappaṭivedhato sayaṅga akampiyaṃ puggalaṅga taṃsamaṅgināṃ neyyesu adhibalaṃ karotīti āha “**akampiyaṭṭhena upatthambhanaṭṭhena cā**”ti.

Usabhassa idanti **āsabhaṃ**, seṭṭhatṭhānaṃ. Sabbaññutapaṭijānanavasena abhimukhaṃ gacchanti, aṭṭha vā parisā upasaṅkamantīti **āsabhā**, pubbabuddhā. **Idaṃ panāti** buddhānaṃ ṭhānaṃ sabbaññutameva vadati. **Tiṭṭhamānovāti** avadantopi tiṭṭhamānova paṭijānāti nāmāti attho. **Upagacchatīti** anujānāti.

Aṭṭhasu parisāsūti “abhijānāmi kho panāhaṃ, sārīputta, anekasataṃ khattiyaparisaṃ...pe... tatra vata maṃ bhayaṃ vā sārājjaṃ vā okkamissatīti nimittametam, sārīputta, na samanupassāmi”ti (ma. ni. 1.151) vuttāsu aṭṭhasu parisāsu. **Abhītanādaṃ nadatīti** parato dassitañāṇayogena dasabalohanti abhītanādaṃ nadati.

Paṭivedhaniṭṭhattā arahattamaggañānaṃ paṭivedhoti “**phalakkhaṇe uppannaṃ nāmā**”ti vuttaṃ. Tena paṭiladdhassapi desanāñāṇassa kiccanipphatti parassa avabujjhanamattena hotīti “**aññāsikoṇḍaṇḍassa sotāpattiphalakkhaṇe pavattaṃ nāmā**”ti vuttaṃ. Tato paraṃ pana yāva parinibbānā desanāñāṇapavatti tasseva pavattitassa dhammacakkassa ṭhānanti veditabbaṃ pavattitacakkassa cakkavattino cakkaranassa ṭhānaṃ viya.

Tiṭṭhatīti vuttaṃ, kiṃ bhūmiyaṃ puriso viya, noti āha “**tadāyattavuttitāyā**”ti. **Ṭhānanti** cettha attalābho dharamānatā ca, na gatinivattīti āha “**uppajjati ceva pavattati cā**”ti. Yattha panetaṃ dasabalañānaṃ vitthāritaṃ, taṃ dassento “**abhidhamme panā**”tiādīmāha. Sesesupi eseva nayo.

Samādiyantūti **samādānāni**, tāni pana samādiyitvā katāni hontīti āha “**samādiyitvā katāna**”nti. **Kammameva vā kammamādānanti** etena **samādānasaddassa** apubbathābhāvaṃ dasseti muttagatasadde gatasaddassa viya. **Gatīti** nirayādigatiyo. **Upadhīti** attabhāvo. **Kāloti** kammassa vipaccanārahakālo. **Payogoti** vipākuppattiyā paccayabhūtā kiriyā.

Agatigāmininti nibbānagāminim. Vuttañhi “nibbānañcāhaṃ, sārīputta, pajānāmi nibbānagāminiñca paṭipada”nti (ma. ni. 1.153). Bahūsupi manussesu ekameva pāṇaṃ ghātentesu kāmaṃ sabbesampi cetanā tassevekassa jīvitindriyārammaṇā, taṃ pana kammaṃ tesam nānākāraṃ. Tesu (vibha. aṭṭha. 811) hi eko ādarena chandajāto karoti, eko “ehi tvampi karohi”ti parehi nippīlito karoti, eko samānacchando viya hutvā appaṭibāhamāno vicarati. Tesu eko teneva kammena niraye nibbattati, eko tiracchānayoniyam, eko pettivisaye. Taṃ tathāgato āyūhanakkhaṇeyeva “iminā nīhārena āyūhitattā esa niraye nibbattissati, esa tiracchānayoniyam, esa pettivisaye”ti jānāti. Niraye nibbattamānampi “esa mahāniraye nibbattissati, esa ussaniraye”ti jānāti. Tiracchānayoniyam nibbattamānampi “esa apādako bhavissati, esa dvipādako, esa catuppado, esa bahuppado”ti jānāti. Pettivisaye nibbattamānampi “esa nijjhāmatāṇhiko bhavissati, esa khuppiṇṇasiko, esa paradattūpajīvi”ti jānāti. Tesu ca kammesu “idaṃ kammaṃ paṭisandhiṃ ākaḍḍhissati, idaṃ aññena dinnāya paṭisandhiyā upadhivepakkaṃ bhavissati”ti jānāti.

Tathā sakalagāmaṃvāsikesu ekato piṇḍapātaṃ dadamānesu kāmaṃ sabbesampi cetanā piṇḍapātārammaṇāva, taṃ pana kammaṃ tesam nānākāraṃ. Tesu hi eko ādarena karotīti sabbaṃ purimasadisam, tasmā tesu keci devaloke nibbattanti, keci manussaloke. Taṃ tathāgato āyūhanakkhaṇeyeva jānāti. “Iminā nīhārena āyūhitattā esa manussaloke nibbattissati, esa devaloke. Tatthāpi esa khattiyakule, esa brāhmaṇakule, esa vessakule, esa suddakule, esa paranimmitavasavattīsu, esa nimmānarattīsu, esa tusitesu, esa yāmesu, esa tāvatimmesu, esa cātumahārājikesu, esa bhummadevesu”tiādinā tattha tattha hīnapaṇītasuvaṇṇadubbaṇṇaappaparivāramahāparivāratādibhedam taṃ taṃ visesaṃ āyūhanakkhaṇeyeva jānāti.

Tathā vipassanaṃ paṭṭhapentesuyeva “iminā nīhārena esa kiñci sallakkhetuṃ na sakkhissati, esa mahābhūtamattameva vavathapessati, esa rūpariggaheyyeva ṭhassati, esa arūpariggaheyyeva, esa nāmarūpariggaheyyeva, esa paccayapariggaheyyeva, esa lakkhaṇārammaṇikavipassanāyameva, esa paṭhamaphaleyyeva, esa dutiyaphaleyyeva, esa tatiyaphaleyyeva, esa arahattaṃ pāpuṇissati”ti jānāti. Kasiṇaparikkammaṃ karontesupi “imassa parikkammattameva bhavissati, esa nimittaṃ uppādessati, esa appanaṃ eva pāpuṇissati, esa jhānaṃ pādakaṃ katvā vipassanaṃ paṭṭhapetvā arahattaṃ gaṇhissati”ti jānāti. Tenāha “**imassa cetanā**”tiādi.

Kāmanato kāmetabbato kāmappaṭisaṃyuttato ca dhātu **kāmadhātu**. **Ādi**-saddena byāpādadhāturūpadhātuādīnaṃ saṅgaho. **Vilakkhaṇatāyāti** visadisasabhāvatāya. **Khandhāyatanadhātulokanti** anekadhātuṃ nānadhātuṃ khandhalokaṃ āyatanalokaṃ dhātulokaṃ yathābhūtaṃ pajānātīti yojanā. “Ayaṃ rūpakkhandho nāma...pe... ayaṃ viññāṇakkhandho nāma. Tesupi ekavidhena rūpakkhandho, ekādasavidhena rūpakkhandho. Ekavidhena vedanākkhandho, bahuvividhena vedanākkhandho. Ekavidhena saññākkhandho...pe... saṅkhārakkhandho...pe... viññāṇakkhandho, bahuvividhena viññāṇakkhandho”ti evaṃ tāva khandhalokassa, “idaṃ cakkhāyatanam nāma...pe... idaṃ dhammāyatanam nāma. Tattha dasāyatanā kāmāvacarā, dve cātubhūmakā”tiādinā āyatanalokassa, “ayaṃ cakkhūdhātu nāma...pe... ayaṃ manoviññāṇadhātu nāma. Tattha soḷasa dhātuyo kāmāvacarā, dve cātubhūmakā”tiādinā dhātulokassa anekasabhāvaṃ nānāsabhāvañca pajānāti. Na kevalam upādinnaṃsaṅkhāralokasseva, atha kho anupādinnaṃsaṅkhāralokassapi “imāya nāma dhātuyā ussannattā imassa rukkhassa khandho seto, imassa kāḷo, imassa maṭṭho, imassa sakaṇṭako, imassa bahalattaco, imassa tanuttaco, imassa pattaṃ vaṇṇasaṅghānādivasena evarūpaṃ, imassa pupphaṃ nīlam pītaṃ lohitaṃ odātaṃ sugandham duggandham, imassa phalaṃ khuddakaṃ mahantaṃ dīgham vaṭṭam susaṅghānaṃ dussaṅghānaṃ maṭṭham pharusaṃ sugandham duggandham madhuraṃ tittakaṃ kaṭukaṃ ambilaṃ kasāvaṃ, imassa kaṇṭako tikhiṇo kuṇṭho ujuko kuṭilo tambo kāḷo odāto hoti”tiādinā pajānāti.

Sabbaññubuddhānaṃ eva hi etaṃ balaṃ, na aññesaṃ.

Nānādhimuttikatanti nānājjhāsayaṃ. Adhimutti nāma ajjhāsayadhātu ajjhāsayasabhāvo. So pana hīnapañītatāsamaññena pāḷiyaṃ dvidhāva vuttopi hīnapañītādibhedena anekavidhoti āha “**hīnādīhi adhimuttīhi nānādhimuttikabhāva**”nti. Tattha ye ye sattā yaṃyaṃmadhimuttikā, te te taṃtadadhimuttike eva sevanti bhajanti payirupāsanti dhātusabhāgato. Yathā gūthādīnaṃ dhātūnaṃ sabhāvo eso, yaṃ gūthādīhi eva saṃsandanti samenti, evaṃ hīnājjhāsaya dussīlādīheva saṃsandanti samenti, sampannasīlādayo ca sampannasīlādīheva. Taṃ nesaṃ nānādhimuttikataṃ bhagavā yathābhūtaṃ pajānātīti.

Vuddhiṃ hāniñcāti paccayavisesena sāmattiyaṃ adhikataṃ anadhikatañca. Indriyaparopariyattaññāniddese (vibha. 814; paṭi. ma. 113) “āsayaṃ jānāti, anusayaṃ jānāti”ti āsayādijānaṃ kasmā niddiṭṭhanti? Āsayajānañādinā yehi indriyehi paroparehi sattā kalyāṇapāpāsayaḍikā honti, tesāṃ jānaṃsa vibhāvanato. Evañca katvā indriyaparopariyattaāsayaññānaṃ visuṃ asādhāraṇatā, indriyaparopariyattanānādhimuttikatāññānaṃ visuṃ balavatā ca siddhā hoti. Tattha āsayanti yathā sattā nivasanti, taṃ tesāṃ nivāsaṭṭhānaṃ, diṭṭhigataṃ vā yathābhūtaññānaṃ vā **āsayo, anusayo** appahīnabhāvena thāmagato kilesa. Taṃ pana bhagavā sattānaṃ āsayāṃ jānanto tesāṃ tesāṃ diṭṭhigatānaṃ vipassanāmaggaññānañca appavattikkhaṇepi jānāti. Vuttañhetā –

“Kāmaṃ sevantaṃyeva bhagavā jānāti – ‘ayaṃ puggalo kāmagaruko kāmasayo kāmadhimutto’ti. Kāmaṃ sevantaṃyeva jānāti – ‘ayaṃ puggalo nekkhammagaruko nekkhammasayo nekkhammadhimutto’ti. Nekkhammaṃ sevantaṃyeva jānāti. Byāpādaṃ, abyāpādaṃ, thinamiddhaṃ, ālokasaññaṃ sevantaṃyeva jānāti – ‘ayaṃ puggalo thinamiddhagaruko thinamiddhāsayo thinamiddhadhimutto’”ti (paṭi. ma. 1.113).

Paṭhamādīnaṃ catunnaṃ jhānānanti rūpāvacarānaṃ paṭhamādīnaṃ paccanīkajjhāpanaṭṭhena ārammaṇūpanijjhāpanaṭṭhena ca jhānānaṃ. Catukkanayena hetāṃ vuttaṃ. **Aṭṭhannaṃ vimokkhānanti** ettha paṭipāṭiyā satta appitappitakkhaṇe paccanīkadhammehi vimuccanato ārammaṇe ca adhimuccanato vimokkhā nāma. Aṭṭhamo pana sabbaso saññāvedayitehi vimuttatā apagamavimokkho nāma. Catukkanayapañcakanayesu paṭhamajjhānasamādhi savitakkasavicāro nāma. Pañcakanaye dutiyajjhānasamādhi avitakkavicāramatto. Nayadvayepi upari tīsu jhānesu samādhi avitakkaavicāro. Samāpattīsu paṭipāṭiyā aṭṭhannaṃ samādhītipi nāmaṃ, samāpattītipi cittekaggatāsabbhāvato, nirodhasamāpattiyā tadabhāvato na samādhīti nāmaṃ. **Hānabhāgiyadhammanti** appaṇeḥi paṭhamajjhānādīhi vuṭṭhitassa saññāmanasikārānaṃ kāmadīnupakkhandanaṃ. **Visabhāgiyadhammanti** paṇeḥi paṭhamajjhānādīhi vuṭṭhitassa saññāmanasikārānaṃ dutiyajjhānādīpakkhandanaṃ. Iti saññāmanasikārānaṃ kāmadīdutyajjhānādīpakkhandāni hānabhāgiyavisesabhāgiyā dhammāti dassitāni. Tehi pana jhānānaṃ taṃsabhāvatā ca dhammasaddena vuttā. **Tasmāti** vuttamevatthaṃ hetubhāvena paccāmasati. **Vodānanti** paṇatāsānkhātāṃ vodānaṃ. Tañhi paṭhamajjhānādīhi vuṭṭhahitvā dutiyajjhānādīadhiḡamaṃsa paccayattā “vuṭṭhāna”nti vuttaṃ. Keci pana “nirodhato phalasaṃpattiyā vuṭṭhānanti pāḷi natthī”ti vadanti. Te “nirodhā vuṭṭhahantassa nevasaññānāsāññāyatanāṃ phalasaṃpattiyā anantarapaccayena paccayo”ti imāya **pāḷiyā** (paṭṭhā. 1.1.417) paṭisedhetabbā. Yo samāpattīlābhī samāno eva “na lābhīmhi”ti, kammaṭṭhānaṃ samānaṃ eva “na kammaṭṭhāna”nti saññī hoti, so sampattiṃyeva samānaṃ “vipattī”ti paccetīti veditabbo.

Na tathā daṭṭhabbanti yathā paravādinā vuttaṃ, tathā na daṭṭhabbaṃ. **Sakasakakiccomeva jānātīti** thānāṭṭhānājanānādisakasakameva kiccaṃ kātuṃ jānāti, yathāsakameva visayaṃ paṭivijjhatīti attho. **Tampīti** tehi dasabalaññeḥi jānītabbampi. **Kammavipākantaramevāti** kammantarassa vipākantarameva jānāti. Cetanācetanāsampayuttadhamme nirayādinibbānagāminippaṭipadābhūte kammanti gahetvā āha “**kammaparicchedamevā**”ti. Dhātunānattañca dhātunānattakāraṇaṃca **dhātunānattakāraṇanti** ekadesasarūpekaseso daṭṭhabbo. Tañhi ñānaṃ tadubhayampi jānāti. “Imāya

nāma dhātuyā ussannattā”tiādīnā (vibha. aṭṭha. 812) tathā ceva saṃvaṇṇitaṃ.

Saccaparicchedamevā pariññābhīsamayādivasena saccānaṃ paricchīnameva. **Appetum na sakkoti** aṭṭhamanavamabalāni viya taṃsadisaṃ, iddhividhaññaṃamiva **vikubbitum**. Etenassa balasadisatañca nivāreti. Jhānādīññaṃ viya vā **appetum vikubbituñca**. Yadipi hi jhānādīpaccavekkhaṇaṇaṃ sattaṃabalanti tassa savitakkasavicāratā vuttā, tathāpi jhānādīhi vinā paccavekkhaṇā natthīti jhānādisahagataṃ ññaṃ tadantogadhaṃ katvā **evam** vuttanti veditabbaṃ. Atha vā sabbaññutaññaṃ jhānādīkiccaṃ viya na sabbaṃ balakiccaṃ kātuṃ sakkotīti dassetum “**jhānaṃ hutvā appetum, iddhi hutvā vikubbituñca na sakkoti**”ti vuttaṃ, na pana kassaci balassa jhānaiddhibhāvatoṭi daṭṭhabbaṃ.

Evam kiccavisesavasenapi dasabalaññaṃsabbaññutaññaṃvisevaṃ dassetvā idāni vitakkatikabhūmantaravasenapi taṃ dassetum “**apicā**”tiādī vuttaṃ. **Paṭipāṭiyā**tiādīto paṭṭhāya paṭipāṭiyā.

Anupadavaññaṃ ñatvā veditabbānīti sambandho. Kilesāvaraṇaṃ niyatamicchādīṭṭhi. Kilesāvaraṇassa abhāvo āsavakkhayaññādhigamassa ṭhānaṃ, tabbhāvo aṭṭhānaṃ. Anadhigamassa pana tadubhayampi yathākkamaṃ aṭṭhānaṃ ṭhānañcāti tattha kāraṇaṃ dassento “**lokiya...pe... dassanato cā**”ti āha. Tattha lokiyasammādīṭṭhiyā ṭhīti āsavakkhayaññādhigamassa ṭhānaṃ kilesāvaraṇābhāvassa kāraṇatā. Sā hi tasmīṃ sati na hoti, asati ca hoti. Etena tassā aṭṭhītiyā tassa aṭṭhānatā vuttā eva. **Nesaṃ** veneyyasattānaṃ. **Dhātuvemattadassanato**ti kāmādhātuādīnaṃ pavattibhedadassanato, yadaggena dhātuvemattaṃ jānāti, tadaggena cariyādivisesampi jānāti. **Dhātuvemattadassanato**ti vā dhammadhātuvemattadassanato. Sabbāpi hi cariyā dhammadhātupariyāpannā evāti. **Payogaṃ anādiyitvāpi** santatimahāmatādīnaṃ viya. **Dibbacakkhānubhāvato pattabbenāti** ettha dibbacakkhunā parassa hadayavatthusannissayalohitavaññadassanamukhena tadā pavattamānacittajānanatthaṃ parikammakaraṇaṃ nāma sāvakaṇaṃ, tañca kho ādikammikānaṃ, yato dibbacakkhuññubhāvato cetopariyaññaṃ pattaṃbatā siyā. Buddhānaṃ pana yadipi āsavakkhayaññādhigamato pageva dibbacakkhuññādhigamo, tathāpi tathāparikammakaraṇaṃ natthi vijjāttayasiddhiyā sijjhanato. Sesābhīññāttaye cetopariyaññaṃ dibbacakkhuññādhigamena pattanti ca vattaṃbatam labhatīti tathā vuttanti daṭṭhabbaṃ.

Sīhanādasuttavaññaṇā niṭṭhitā.

2-4. Adhivuttipadasuttādivaṇṇanā

22-24. Dutiye **adhivacanapadānanti** paññattipadānaṃ. Dāsādīsu sirivaḍḍhakādisaddā viya vacanamattameva adhikāraṃ katvā pavattiyā adhivacanaṃ paññatti. Atha vā adhisaddo uparibhāge. Vuccatīti vacanaṃ, upari vacanaṃ adhivacanaṃ, upādābhūtarūpādīnaṃ upari paññāpiyamānā upādāpaññattīti attho, tasmā paññattidīpakapadānīti attho daṭṭhabbo. Tassa padāni padaṭṭhānāni **adhivacanapadāni**. Tenāha “**tesaṃ ye**”tiādī. **Tesanti** adhivacanānaṃ. **Yeti** khandhādayo. Adhivuttitāya **adhivuttiyoti diṭṭhiyo vuccanti**. Adhikañhi sabhāvadhammesu sassatādīṃ, pakatiādīṃ, drabyādīṃ, jīvādīṃ, kāyādīṃ, abhūtaṃ atthaṃ ajjhāropetvā diṭṭhiyo pavattantīti. Tenāha “**atha vā**”tiādī. Tatiyacatutthāni suviññeyyāni.

Adhivuttipadasuttādivaṇṇanā niṭṭhitā.

5. Kasiṇasuttavaññaṇā

25. Pañcame **sakalaṭṭhenāti** nissesatṭhena. Anavasesapharaṇavasena cettha sakalaṭṭho veditabbo, asubhanimittādīsu viya ekadese aṭṭhatvā anavasesato gahetabbaṭṭhenāti attho. **Tadārammaññaṃ dhammānanti** taṃ kasiṇaṃ ārabba pavattanakadhammānaṃ. **Khettaṭṭhenāti** uppattiṭṭhānaṭṭhena. **Adhiṭṭhānaṭṭhenāti** pavattiṭṭhānabhāvena. Yathā khettaṃ sassānaṃ uppattiṭṭhānaṃ vaḍḍhanaṭṭhānañca, evameva taṃ ta jhānaṃ sampayuttadhammānanti. Yogino vā sukhavisesānaṃ kāraṇabhāvena.

Paricchinditvāti idam “uddham adho tiriya”nti etthāpi yojetabbaṃ. Paricchinditvā eva hi sabbattha kasiṇaṃ vaḍḍhetabbaṃ. **Tena tena vā kāraṇena**ti tena tena upariādīsu kasiṇavaḍḍhanakāraṇena. Yathā kinti āha “**ālokamiva rūpadassanakāmo**”ti. Yathā dibbacakkhunā uddham ce rūpaṃ daṭṭhukāmo, uddham ālokaṃ pasāreti. Adho ce, adho. Samantato ce rūpaṃ daṭṭhukāmo, samantato ālokaṃ pasāreti, evaṃ sabbakasiṇanti attho. **Ekassā**ti pathavīkasiṇādīsu ekekassa. **Aññabhāvānupagamanatthanti** aññakasiṇabhāvānupagamanadīpanattham, aññassa vā kasiṇabhāvānupagamanadīpanattham. Na hi aññena pasāritakasiṇaṃ tato aññena pasāritakasiṇabhāvāṃ upagacchati, evampi nesaṃ aññakasiṇasambhedābhāvo veditabbo. **Na aññaṃ** pathavīdi. Na hi udakena ṭhitatṭhāne sasambhārapathavī atthi. **Aññakasiṇasambhedoti** āpokasiṇādinā saṅkaro. **Sabbatthāti** sabbesu sesakasiṇesu.

Ekadese aṭṭhatvā anavasesapharaṇaṃ pamāṇassa aggahaṇato **appamāṇaṃ**. Teneva hi nesaṃ kasiṇasamaññā. Tathā cāha “**tañhī**”tiādi. Tattha **cetasā pharantoti** bhāvanācittena ārammaṇaṃ karonto. Bhāvanācittañhi kasiṇaṃ parittaṃ vā vipulaṃ vā sakalameva manasi karoti, na ekadesaṃ. Kasiṇugghāṭimākāse pavattaviññāṇaṃ pharaṇaappamāṇavasena viññāṇakasiṇanti vuttaṃ. Tathā hi taṃ viññāṇanti vuccati. **Kasiṇavasena**ti ugghāṭitakasiṇavasena kasiṇugghāṭimākāse uddhamadhotiriyatā veditabbā. Yattakañhi ṭhānaṃ kasiṇaṃ pasāritaṃ, tattakaṃ ākāśabhāvanāvasena ākāsaṃ hotīti. Evaṃ yattakaṃ ṭhānaṃ ākāsaṃ hutvā upaṭṭhitaṃ, tattakaṃ sakalameva pharivā viññāṇassa pavattanato āgamanavasena viññāṇakasiṇepi uddhamadhotiriyatā vuttāti āha “**kasiṇugghāṭimākāsavasena tattha pavattaviññāṇe uddhamadhotiriyatā veditabbā**”ti.

Kasiṇasuttavaṇṇanā niṭṭhitā.

6. Kālīsuttavaṇṇanā

26. Chaṭṭhe **atthassa pattinti** ekantato hitānuppattiṃ. **Hadayassa santinti** paramacittūpasamaṃ. **Kilesasenanti** kāmaguṇasaṅkhātāṃ paṭhamāṃ kilesasenaṃ. Sā hi kilesasena accharāsaṅghātasabhāvāpi paṭipatthayamānā piyāyitabbaicchitabbarūpasabhāvato piyarūpasātarūpā nāma attano kiccavasena. **Ahaṃ ekova jhāyantoti** ahaṃ gaṇasaṅgaṇikāya kilesasaṅgaṇikāya ca abhāvato eko asahāyo lakkhaṇūpanijjhānena jhāyanto. **Anubujjhinti** anukkamena maggaṭipāṭiyā bujjhiṃ paṭivijjhīṃ. Idam vuttaṃ hoti – piyarūpaṃ sātārūpaṃ senaṃ jinitvā ahaṃ ekova jhāyanto “atthassa pattim hadayassa santi”nti saṅkhaṃ gataṃ arahattasukhaṃ paṭivijjhīṃ, tasmā janena mittasanthavaṃ na karomi, teneva ca me kāraṇena kenaci saddhiṃ sakkhī na sampajjatīti. **Atthābhinibbatesunti** itisaddalopenāyaṃ niddesoti āha “**atthoti gahetvā**”ti.

Kālīsuttavaṇṇanā niṭṭhitā.

7. Paṭhamamahāpañhasuttavaṇṇanā

27. Sattame **vuccethāti** vucceyya. **Dutiyapadeṭī** “anusāsaniyā vā anusāsani”nti evaṃ dutiyavākyepi. **Te kira** bhikkhū. **Na ceva sampāyissanti**ti na ceva sammadeva pakārehi gahessanti ñāpessanti. Tenāha “**sampādetvā kathetuṃ na sakkhissanti**”ti. Yasmā avisaye pañhaṃ pucchitā honti, tasmā vighātaṃ āpajjissanti ti yojanā. **Aññathā ārādhanaṃ nāma natthīti** iminā sapaccayanāmarūpānaṃ yāthāvato avabodho eva ito bāhirakānaṃ natthi, kuto pavedanāti dasseti. **Ārādhanaṃ**ti yāthāvapavedanena cittassa paritosanaṃ.

Eko pañhoti eko pañhamaggo, ekaṃ pañhagavesananti attho. **Eko uddesoti** ekaṃ uddisaṇaṃ atthassa saṃkhattavacanaṃ. **Veyyākaraṇanti** niddisaṇaṃ atthassa vivarivā kathaṇaṃ. **Hetunāti** “antavantaṃ anaccantikato tāvakālikato niccappaṭikkhepatō”ti evamādinā nayena yathā ime saṅkhārā etarahi, evaṃ atīte anāgate ca aniccā saṅkhatā paṭiccasamuppannā khayadhammā vayadhammā virāgadhammāti atītānāgatesu nayena.

Sabbe sattāti anavasesā sattā. Te pana bhavabhedato saṅkhepeneva bhinditvā dassento “**kāmabhavādīsū**”tiādīmāha. Byadhikaraṇānampi bāhiratthasamāso hoti yathā “**urasilomo**”ti āha “**āhārato ʒhiti etesanti āhāraʒḥitikā**”ti. Tiʒḥati etenāti vā ʒhiti, āhāro ʒhiti etesanti **āhāraʒḥitikā**ti evaṃ vā ettha samāsaviggaho daʒḥabbo. **Āhāraʒḥitikā**ti paccayaʒḥitikā, paccayāyattavuttikāti attho. Paccayattho hettha āhārasaddo “**ayamāhāro anuppannassa vā kāmaccchandassa uppādāyā**”tiādīsū (saṃ. ni. 4.232) viya. Evañhi “**sabbe sattā**”ti iminā asaṅḥāsattā pariggahitā honti. Sā panāyaṃ āhāraʒḥitikatā nippariyāyato saṅkhāradhammo. Tenāhu aʒḥakathācariyā “**āhāraʒḥitikāti āgataʒḥāne saṅkhāraloko veditabbo**”ti (pārā. aʒḥa. 1.1 verañjakaṇḍavaṇṇanā; visuddhi. 1.136). Yadi evaṃ “**sabbe sattā**”ti idaṃ kathanti? Puggalādhiʒḥānadesanāti nāyaṃ doso. Tenevāha – “**ekadhamme, bhikkhave, bhikkhu sammā nibbindamāno sammā virajjamāno sammā vimuccamāno sammā pariyantadassāvī sammadatthaṃ abhisamecca ditḥeva dhamme dukkhassantakaro hoti. Katamasmiṃ ekadhamme? Sabbe sattā āhāraʒḥitikā**”ti. Yvāyaṃ puggalādhiʒḥānāya kathāya sabbesaṃ saṅkhārānaṃ paccayāyattavuttitāya āhārapariyāyena sāmāññato paccayadhammo vutto, ayaṃ āhāro nāma eko dhammo.

Codako vuttampi atthaṃ yāthāvato appaʒivijjhamāno neyyatthaṃ suttapadaṃ nītatthato dahanto “**sabbe sattā**”ti vacanamatte ʒatvā “**nanu cā**”tiādīnā codeti. Ācariyo aviparītaṃ tattha yathādhippetamatthaṃ pavedento “**na virujjhati**”ti vatvā “**tesaṅhi jhānaṃ āhāro hoti**”ti āha. **Jhānanti** ekavokārabhavāvahaṃ saṅḥāya virajjanavasena pavattarūpāvacaracatutthajjhānaṃ. Pāḷiyaṃ pana “**anāhārā**”ti vacanaṃ asaṅḥābhava catunnaṃ āhārānaṃ abhāvaṃ sandhāya vuttaṃ, na paccayāhārassa abhāvato. **Evaṃ santepīti** idaṃ sāsane yesu dhammesu visesato āhārasaddo niruḷho, “**āhāraʒḥitikā**”ti ettha yadi teyeva gayhanti, abyāpitadosamāpanno. Atha sabbopi paccayadhammo āhāroti adhippeto, imāya āhārapāḷiyā virodho āpannoti dassetuṃ āraddhaṃ. “**Na virujjhati**”ti yenādhippāyena vuttaṃ, taṃ vivaranto “**etasmīṅhi sutte**”tiādīmāha. Kabaḷikārāhārādīnaṃ ojaʒḥamakarūpāharaṇādi nippariyāyena āhārabhāvo. Yathā hi kabaḷikārāhāro ojaʒḥamakarūpāharaṇena rūpakāyaṃ upatthambhenti, evaṃ phassādayo vedanādiāharaṇena nāmākāyaṃ upatthambhenti, tasmā satipi janakabhāve upatthambhakabhāvo ojaḍīsū sātisayo labbhamāno mukhyo āhāraʒḥoti te eva **nippariyāyena āhāralakkhaṇā dhammā vuttā**.

Idhāti imasmiṃ sutte pariyāyena paccayo āhāroti vutto, sabbo paccayadhammo attano phalaṃ āharatīti imaṃ pariyāyaṃ labhatīti. Tenāha “**sabbadhammānaṅhi**”tiādi. Tattha **sabbadhammānanti** sabbesaṃ saṅkhatadhammānaṃ. Idāni yathāvuttamatthaṃ suttena samatthetuṃ “**tenevāhā**”tiādi vuttaṃ. **Ayanti** paccayāhāro. **Nippariyāyāhāropi gahitova hotīti** yāvataṃ sopi paccayabhāveneva janako upatthambhako ca hutvā taṃ taṃ phalaṃ āharatīti vattabbaṃ labhatīti.

Tatthāti pariyāyāhāro, nippariyāyāhāroti dvīsū āhāresu asaṅḥābhava yadipi nippariyāyāhāro na labbhati, pariyāyāhāro pana labbhateva. Idāni tamevatthaṃ vitthārato dassetuṃ “**anuppanne hi buddhe**”tiādi vuttaṃ. Uppanne buddhe tiʒḥakaramatanissitānaṃ jhānabhāvanāya asijjhanato “**anuppanne buddhe**”ti vuttaṃ. Sāsānikā tādisaṃ jhānaṃ na nibbattenti “**tiʒḥāyatane pabbajitā**”ti vuttaṃ. Tiʒḥiyā hi upapattiviseso vimuttisaṅḥino saṅḥāvīrāgāvīrāgesu ādīnavānisasādasassinova hutvā asaṅḥāsamāpattim nibbattetvā akkhaṇabhūmiyaṃ uppajjanti, na sāsānikā. **Vāyokasiṇe parikkammaṃ katvāti** vāyokasiṇe paʒḥamādīni tīṇi jhānāni nibbattetvā tatiyājḥāne ciṇṇavasī hutvā tato vuʒḥāya catutthajjhānādhiḡamāya parikkammaṃ katvā. Tenevāha “**catutthajjhānaṃ nibbattetvā**”ti.

Kasmā (dī. ni. ʒī. 1.68-73; dī. ni. abhi. ʒī. 1.68-73) panettha vāyokasiṇeyeva parikkammaṃ vuttanti? Vuccate, yatheva hi rūpapaʒibhāḡabhūtesu kasiṇavisesesu rūpavibhāvanena rūpavīrāḡabhāvanāsaṅkhāto arūpasamāpattiviseso sacchikarīyati, evaṃ aparibyattaviggahatāya arūpapaʒibhāḡabhūte kasiṇaviseso arūpavibhāvanena arūpavīrāḡabhāvanā saṅkhāto rūpasamāpattiviseso adhiḡamīyatīti. Ettha ca “**saṅḥā rogo, saṅḥā ḡaṇḡo**”tiādīnā (ma. ni. 3.24), “**dhi cittaṃ, dhi vatetaṃ citta**”ntiādīnā ca nayena arūpappavattiyā ādīnavadassanena tadabhāve ca santapaṇitabhāvasanniʒḥānena rūpasamāpattiyā abhisāṅkharānaṃ arūpavīrāḡabhāvanā. Rūpavīrāḡabhāvanā pana saddhiṃ upacārena arūpasamāpattiyā, tatthāpi visesena paʒḥamārūppajjhānaṃ. Yadi evaṃ “**paricchinnākāsakasiṇepī**”ti vattabbaṃ, tassāpi

arūpapaṭibhāgatā labbhatīti? Icchitamevetam, kesañci avacanam panettha pubbācariyehi aggahitabhāvena. Yathā hi rūpavirāgabhāvanā virajjanīyadhammābhāvamattena parinipphannā, virajjanīyadhammaparibhāsabhūte ca visayavisesse pātubhavati, evaṃ arūpavirāgabhāvanāpīti vuccamāne na koci virodho. Titthiyeveva pana tassā samāpattiyā paṭipajjitabbatāya tesañca visayapathe sūpanibandhanasseva tassa jhānassa paṭipattito diṭṭhivantehi pubbācariyehi catuttheyeva bhūtakasiṇe arūpavirāgabhāvanāparikkammaṃ vuttanti daṭṭhabbam. Kiñca vaṇṇakasiṇesu viya purimabhūtakasiṇattayepi vaṇṇappaṭicchāyāva paṇṇatti ārammaṇam jhānassa lokavohārānurodheneva pavattito. Evañca katvā **visuddhimagge** (visuddhi. 1.57) pathavīkasiṇassa ādāsacandaṃḍalūpamavacanañca samatthitaṃ hoti, catutthaṃ pana bhūtakasiṇam bhūtaṃ paṭicchāyameva jhānassa gocarabhāvaṃ gacchatīti tassevaṃ arūpapaṭibhāgatā yuttāti vāyokasiṇeyeva parikkammaṃ vuttanti veditabbam.

Dhīti jigucchanatthe nipāto, tasmā **dhi cittanti** cittaṃ jigucchāmi. **Dhi vatetaṃ cittanti** etaṃ mama cittaṃ jigucchitaṃ vata hotu. **Vatāti** sambhāvane. Tena jigucchanam sambhāvento vadati. **Nāmāti** ca sambhāvane eva. Tena cittassa abhāvaṃ sambhāveti. Cittassa bhāvābhāvesu ādīnavānisamse dassetuṃ “**cittañhī**”tiādi vuttaṃ. **Khantiṃ ruciṃ uppādetvāti** cittassa abhāvo eva sādhu suṭṭhūti imaṃ diṭṭhinijjhānakkhantiṃ tattha ca abhiruciṃ uppādetvā. Tathā bhāvitassa jhānassa ṭhitibhāgiyabhāvappattiyā **aparihīnājjhānā**. Titthāyatane pabbajitasseva tathā jhānabhāvanā hotīti āha “**manussaloke**”ti. **Paṇihito ahoṣīti** maraṇassa āsannakāle ṭhapīto ahoṣi. Yadi ṭhānādinā ākārena nibbatteyya kammabalena, yāva bheda tenevākārena tiṭṭheyyāti āha “**tena iriyāpathenā**”tiādi. **Evarūpānampīti** evaṃ acetanānampi. **Pi**-saddena pageva sacetanānanti dasseti. Kathaṃ pana acetanānam nesaṃ paccayāhārassa upakappananti codanam sandhāya tattha nidassanam dassento “**yathā**”tiādimāha. Tena na kevalamāgamoyeva, ayamettha yuttīti dasseti. **Tāva tiṭṭhantīti** ukkaṃsato pañca mahākappasatāni tiṭṭhanti.

Ye utṭhānavīriyena divasaṃ vītināmetvā tassa nissandaphalamattaṃ kiñciveva labhitvā jīvikam kappenti, te **utṭhānaphalūpajīvino**. Ye pana attano puññaphalameva upajīvanti, te **puññaphalūpajīvino**. Nerayikānam pana neva utṭhānavīriyavasena jīvikakappanam, puññaphalassa pana lesopi natthīti vuttaṃ “**ye pana nerayikā...pe... jīvīti vuttā**”ti. Paṭisandhiviññāṇassa āharaṇena manosañcetanā āhāroti vuttā, na yassa kassaci phalassāti adhippāyena “**kiṃ pañca āhārā atthī**”ti codeti. Ācariyo nippariyāyāhāre adhippete “**siyā tava codanā avasarā, sā pana ettha anavasarā**”ti ca dassento “**pañca, na pañcāti idaṃ na vattabba**”nti vatvā pariyāyāhārasseva panettha adhippetabhāvaṃ dassento “**nanu paccayo āhāro’ti vuttameta**”nti āha. **Tasmāti** yassa kassaci paccayassa āhāroti icchitattā. Idāni vuttamevatthaṃ pāḷiyā samatthento “**yam sandhāyā**”tiādimāha.

Mukhyāhāravasenapi nerayikānam āhāraṭṭhitikataṃ dassetuṃ “**kabaḷikārāhāram...pe... sādheti**”ti vuttaṃ. Yadi evaṃ nerayikā sukhappaṭisaṃvedinopi hontīti? Noti dassetuṃ “**kheḷo hī**”tiādi vuttaṃ. **Tayoti** tayo arūpāhārā kabaḷikārāhārassa abhāvato. **Avasesānanti** asaññasattehi avasesānam kāmabhavādīsu nibbattasattānam. Paccayāhāro hi sabbesaṃ sādharāṇoti.

Paṭhamamahāpañhasuttavaṇṇanā niṭṭhitā.

8-9. Dutiyamahāpañhasuttādivaṇṇanā

28-29. Aṭṭhame **evamṇāmake**ti kajaṅgalāti evaṃ itthilingavasena laddhanāmake majjhimappadesassa mariyādabhūte nagare. “**Nigame**”tipi vadanti, “**niculavane**”tipi vadanti. Niculam nāma ekā rukkhajāti, “**nīparukkho**”tipi vadanti. Tena sañchanno mahāvanasaṅḍo, tattha viharatīti attho. **Hetunā nayanāti** ca heṭṭhā vuttameva. Nanu ca “**eso ceva tassa attho**”ti kasmā vuttaṃ. Bhagavatā hi cattārotiādi pañhabyākaraṇā cattāro āhārā, pañcupādānakkhandhā, cha ajjhātikāni āyatanāni, satta viññāṇaṭṭhitiyo, aṭṭha lokadhammā dassitā. Bhikkhunīyā pana cattāro satipaṭṭhānā, pañcindriyāni, cha nissāraṇīyā dhātuyo, satta bojjaṅgā, ariyo aṭṭhaṅgiko maggoti dassitadhammā aññoyevattho

bhikkhuniyā dassitoti codanaṃ sandhāyāha “**kiñcāpī**”tiādi. Navame natthi vattabbaṃ.

Dutiyamahāpañhasuttādivaṇṇanā niṭṭhitā.

10. Dutiyakosalasuttavaṇṇanā

30. Dasame uggantvā yujjhati etāyāti **uyyodhikā**, sathappahārehi yujjhitassettaṃ adhivacanaṃ. Uggantvā yujjhanaṃ vā **uyyodhiko**, sathappahāro. Tenāha “**yuddhato nivatto**”ti. **Upassutivasena yujjhitabbākāraṃ ṇatvāti** jetavane kira dattatthero dhanuggahatissattheroti dve mahallakattarā vihārapaccante pañnasālāya vasanti. Tesu dhanuggahatissatthero pacchimayāme pabujjhitvā utṭhāya nisinno dattattheraṃ āmantetvā “ayaṃ te mahodaro kosalo bhuttabhāttameva pūtiṃ karoti, yuddhavicāraṇaṃ pana kiñci na jānāti, parājītotveva vadāpetī”ti vatvā tena “kiṃ pana kātuṃ vaṭṭatī”ti vutte – “bhante, yuddho nāma padumabyūho cakkabyūho sakaṭabyūhoti tayo byūhā honti, ajātasattaṃ gaṇhitukāmena asukasmim nāma pabbatakucchismim dvīsu pabbatabhittīsu manusse ṭhapetvā purato dubbalaṃ dassetvā pabbatantaraṃ pavīṭṭhabhāvaṃ jānitvā pavīṭṭhamaggaṃ rundhitvā purato ca pacchato ca ubhosu pabbatabhittīsu vaggitvā naditvā jālapakkhittamacchaṃ viya katvā sakkā gahetu”nti. Tasmim khaṇe “bhikkhūnaṃ kathāsallāpaṃ suṇāthā”ti rañño pesitacarapurisā taṃ sutvā rañño ārocesuṃ. Taṃ sutvā rājā saṅgāmaḥherim paharāpetvā gantvā sakaṭabyūhaṃ katvā ajātasattaṃ jīvaggāhaṃ gaṇhi. Tena vuttaṃ “**upassutivase...pe... ajātasattaṃ gaṇhī**”ti.

Doṇapākanti doṇataṇḍulānaṃ pakkabhattaṃ. **Doṇanti** catunālīkānametamadhivacanaṃ. **Manujassāti** sattassa. **Tanukassāti** tanukā appikā assa puggalassa, bhuttapaccayā visabhāgavedanā na honti. **Saṇīkanti** mandaṃ mudukaṃ, aparissayamevāti attho. **Jīratīti** paribhuttāhāro paccati. **Āyu pālayanti** nirogo avedano jīvitaṃ rakkhanto. Atha vā **saṇīkaṃ jīratīti** so bhojane mattaññū puggalo parimitāhāratāya saṇīkaṃ cirena jīrati jaraṃ pāpuṇāti jīvitaṃ pālayanto.

Imaṃ ovādaṃ adāsīti ekasmim kira (dha. pa. aṭṭha. 2.203 pasenadikosavattthu) samaye rājā taṇḍuladoṇassa odanaṃ tadupiyena sūpabyañjanaṃ bhuñjati. So ekadivasam bhuttapātarāso bhattasammaḍaṃ avinodetvā sattu santikaṃ gantvā kilantarūpo ito cito ca samparivattati, niddāya abhībhuyamānopi lahukaṃ nipajjituṃ asakkonto ekamantaṃ nisīdi. Atha naṃ sathā āha “kiṃ, mahārāja, avissamitvāva āgatosī”ti. Āma, bhante, bhuttakālato paṭṭhāya me mahādukkhaṃ hotīti. Atha naṃ sathā, “mahārāja, atibahubhojīnaṃ etaṃ dukkhaṃ hotī”ti vatvā –

“Midhī yadā hoti mahagghaso ca,
Niddāyitā samparivattasāyī;
Mahāvarāhova nivāpapuṭṭho,
Punappunaṃ gabbhamupeti mando”ti. (dha. pa. 325; netti. 26, 90) –

Imāya gāthāya ovaditvā, “mahārāja, bhojanaṃ nāma mattāya bhuñjituṃ vaṭṭati, mattabhōjino hi sukhaṃ hotī”ti uttaripi puna ovadanto “manujassa sadā satīmato”ti (saṃ. ni. 1.124) imaṃ gāthamāha.

Rājā pana gāthaṃ uggaṇhituṃ nāsakkhi, samīpe ṭhitaṃ pana bhāgineyyaṃ sudassanaṃ nāma māṇavaṃ “imaṃ gāthaṃ uggaṇha tātā”ti āha. So taṃ gāthaṃ uggaṇhitvā “kiṃ karomi, bhante”ti sathāraṃ pucchi. Atha naṃ sathā āha, “māṇava, imaṃ gāthaṃ naṭo viya pattapattaṭṭhāne mā avaca, rañño pātarāsaṃ bhuñjanaṭṭhāne ṭhatvā paṭhamapiṇḍādisupi avatvā avasāne piṇḍe gahite vadeyyāsī, rājā sutvā bhattapiṇḍaṃ chaḍḍessati. Atha rañño hatthesu dhotesu pātim apanetvā sithhāni gaṇetvā tadupiyaṃ byañjanaṃ ṇatvā punadivase tāvatake taṇḍule hāreyyāsī. Pātarāse ca vatvā sāyamāse mā vadeyyāsī”ti. So “sādhū”ti paṭissuṇitvā taṃ divasaṃ rañño pātarāsaṃ bhutvā gatattā sāyamāse bhagavato anusīṭṭhīniyāmena gāthaṃ abhāsī. Rājā dasabalassa vacanaṃ saritvā bhattapiṇḍaṃ pātiyaṃyeva chaḍḍesi. Rañño hatthesu dhotesu pātim apanetvā sithhāni gaṇetvā punadivase tattake taṇḍule harimsu, sopi māṇavo divase divase tathāgatassa santikaṃ gacchati. Dasabalassa vissāsiko ahosi. Atha naṃ

ekadivasam pucchi “rājā kittakam bhujjati”ti? So “nālikodana”nti āha. Vaṭṭissati ettāvātā purisabhāgo esa, ito paṭṭhāya gātham mā vadīti. Rājā tatheva saṅghāsi. Tena vuttam “**nālikodanaparamatāya saṅghāsi**”ti. Rattaññutāya vaḍḍhitam sīlam assa atthīti **vaḍḍhitasi**. **Apothujjanikehi sīlehi** catupārisuddhisīlehi sīlam ariyam suddham. Tena vuttam “**ariyasi**”ti. Tadekam anavajjaṭṭhena kusalam. Tena vuttam “**kusalasi**”ti.

Dutiyakosalasuttavaṇṇanā niṭṭhitā.

Mahāvaggavaṇṇanā niṭṭhitā.

4. Upālivaggo

1. Upālisuttavaṇṇanā

31. Catutthassa paṭhame **atthavaseti** vuddhivisesse, sikkhāpadapaññattihetu adhigamanīye hitaviseseti attho. Atthoyeva vā **atthavaso**, dasa atthe dasa kāraṇānīti vuttam hoti. Atha vā attho phalam tadadhīnavuttitāya vaso etassāti **atthavaso**, hetūti evampettha attho daṭṭhabbo. “Ye mama sotabbaṃ saddahātabbaṃ maññissanti, tesam tam assa dīgharattam hitāya sukhāyā”ti vuttattā “**yo ca tathāgatassa vacanam sampaṭicchati, tassa tam dīgharattam hitāya sukhāya samvattati**”ti vuttam. **Asampaṭicchane ādīnavanti** bhaddālisutte viya asampaṭicchane ādīnavam dassetvā. Sukhavihārābhāve sahaṅgāmanassa abhāvato sahaṅgīvitāpi sukhavihārova vutto. **Sukhavihāro** nāma catunnam iriyāpathavihārānam phāsutā.

Maṅkutanti nittejātam. **Dhammenā**tiādīsu **dhammoti** bhūtam vatthu. **Vinayoti** codanā ceva sārāṇā ca. **Satthusāsananti** ñattisampadā ceva anussāvanasampadā ca.

Piyasīlananti sikkhākāmānam. Tesañhi sīlam piyam hoti. Tenevāha “**sikkhāttayapāripūriyā ghaṭamānā**”ti. **Sandiddhamanā**ti saṃsayam āpajjamaṇā. **Ubbalāhā** **hontīti** pīlītā honti. **Saṅghakammānīti** satipi uposathapavāraṇānam saṅghakammabhāve gobalībaddaṇāyena uposatham pavāraṇāna ṭhapetvā upasampadādīsesasaṅghakammānam gahaṇam veditabbaṃ. Samaggānam bhāvo **sāmaggī**.

“Nāham, cunda, diṭṭhadhammikānaṃyeva āsavānam saṃvarāya dhammam desemi”ti (dī. ni. 3.182) ettha vivādamūlabhūtā kilesā āsavāti āgatā.

“Yena devūpapatyassa, gandhabbo vā vihaṅgamo;
Yakkhattam yena gaccheyyam, manussattaṅca abbaje;
Te mayham āsavā khīṇā, viddhastā vinalīkatā”ti. (a. ni. 4.36) –

Ettha tebhūmakam kammaṃ avasesā ca akusalā dhammā. Idha pana parūpavādavipparisāravadhābandhādayo ceva apāyadukkhabhūtā ca nānappakārā upaddavā **āsavāti** āha “**asamvare ṭhitena tasmīyeva attabhāve pattabbā**”tiādi. Yadi hi bhagavā sikkhāpadam na ca paññapeyya, tato asaddhammapaṭisevanaadinnādānapāñātipātādihetu ye uppajjeyyūṃ parūpavādādayo diṭṭhadhammikā nānappakārā anattā, ye ca tannimittameva nirayādīsu nibbattassa pañcavidhābandhanakammakāraṇādivasena mahādukkhānubhavanappakārā anattā, te sandhāya idaṃ vuttam “**diṭṭhadhammikānam āsavānam saṃvarāya samparāyikānam āsavānam paṭighātāyā**”ti. Diṭṭhadhammo vuccati paccakkho attabhāvo, tatha bhavā **diṭṭhadhammikā**. Tena vuttam “**tasmīyeva attabhāve pattabbā**”ti. Sammukhā garahaṇam **akitti**, parammukhā garahaṇam **ayaso**. Atha vā sammukhā parammukhā garahaṇam **akitti**, parivārahāni **ayasoti** veditabbaṃ. **Āgamanamaggathakanāyāti** āgamanadvārapidahanattāyā. Samparettabato pecca gantabbato

samparāyo, paralokoti āha “**samparāye narakādīsū**”ti.

Methunādīni **rajjanatṭhānāni**. Pāṇātipātādīni **dussanatṭhānāni**.

Samvaravinayoti sīlasamvaro, satisamvaro, ñāṇasamvaro, khantisamvaro, vīriyasamvaroti pañcavidho samvaro. Yathāsakaṃ samvaritabbānaṃ vinetabbānañca kāyaduccaritādīnaṃ samvaraṇato samvaro, vinayanato vinayoti vuccati. **Pahānavinayoti** tadaṅgappahānaṃ vikkhambhanappahānaṃ, samucchedappahānaṃ, paṭipassaddhippahānaṃ, nissaraṇappahānanti pañcavidhaṃ pahānaṃ yasmā cāgaṭṭhena pahānaṃ, vinayaṭṭhena vinayo, tasmā “pahānavinayo”ti vuccati. **Samathavinayoti** satta adhikaraṇasamathā. **Paññattivinayoti** sikkhāpadameva. Sikkhāpadapaññattiyā hi vijjamañāya eva sikkhāpadasambhavato paññattivinayopi sikkhāpadapaññattiyā anuggahito hoti. Sesamettha vuttatthameva.

Upālisuttavaṇṇanā niṭṭhitā.

Upālivaggavaṇṇanā niṭṭhitā.

5. Akkosavaggo

1-8. Vivādasuttādivaṇṇanā

41-48. Pañcamassa paṭhamādīni uttānatthāni. Chaṭṭhe khaṇabhaṅguratāya na niccā na dhuvāti **aniccā**. Tato eva paṇḍitehi na iccā na upagantabbātipi **aniccā**. Svāyaṃ nesam aniccaṭṭho udayavayaparicchinnatāya veditabboti āha “**hutvā abhāvino**”ti, uppajjivā vinassakāti attho. **Sārarahitā**ti niccasārarduvasāraattasāravirahitā. **Musāti** visamvādanaṭṭhena musā, ekaṃsena asubhādisabhāvā te bālānaṃ subhādibhāvena upaṭṭhahanti, subhādiggahaṇassa paccayabhāvena satte visamvādentī. Tenāha “**niccasubhasukhā viyā**”tiādi. **Na passanasabhāvāti** khaṇapabhaṅguratāittarapaccupaṭṭhānatāya dissamānā viya hutvā adassanapakatikā. Ete hi khettaṃ viya vatthu viya hiraññasuvaṇṇaṃ viya ca paññāyitvāpi katipāheneva supinake diṭṭhā viya na paññāyanti. Sattamaṭṭhamāni suviññeyyāni.

Vivādasuttādivaṇṇanā niṭṭhitā.

9-10. Sarīraṭṭhadhammasuttādivaṇṇanā

49-50. Navame punabbhavadānaṃ punabbhavo uttarapadalopena, punabbhavo sīlamassāti **ponobhaviko**, punabbhavadāyakoti attho. Tenāha “**punabbhavanibbattako**”ti. **Bhavasāṅkharāṇakammanti** punabbhavanibbattanakammaṃ. Dasame natthi vattabbaṃ.

Sarīraṭṭhadhammasuttādivaṇṇanā niṭṭhitā.

Akkosavaggavaṇṇanā niṭṭhitā.

Paṭhamapaṇṇāsakaṃ niṭṭhitaṃ.

2. Dutiyapaṇṇāsakaṃ

(6) 1. Sacittavaggo

1-10. Sacittasuttādivaṇṇanā

51-60. Dutiyassa paṭhamādīni uttānathāni. Dasame pittaṃ samuṭṭhānametesanti **pittasamuṭṭhānā**, pippaccayāpittahetukāti attho. **Semhasamuṭṭhānā**dīsipi eseva nayo. **Sannipātikāti** tiṇṇampi pippādīnaṃ kopena samuṭṭhitā. **Utupariṇāmajāti** visabhāgututo jātā. Jaṅgaladesavāsīnaṃhi anūpadese vasantānaṃ visabhāgo ca utu uppajjati, anūpadesevāsīnaṃca jaṅgaladeseti evaṃ parasamuddatīrādivasenapi utuvisabhāgatā uppajjatiyeva. Tato jātāti **utupariṇāmajā**. Attano pakaticariyānaṃ visayānaṃ visamaṃ kāyaparihāraṇavasena jātā **visamaparihārajā**. Tenāha **“aticiraṭṭhānanisajjādīnā visamaparihārena jātā”**ti. **Ādi**-saddena mahābhāravahanasudhākoṭṭanādīnaṃ saṅgaho. Parassa upakkamato nibbattā **opakkamikā**. Bāhiraṃ paccayaṃ anapekkhitvā kevalaṃ kammavipākato va jātā **kammavipākajā**. Tattha purimehi sattahi kāraṇehi uppannā sārīrikā vedanā sakkā paṭibhāhituṃ, kammavipākajānaṃ pana sabbabhesajjānīpi sabbaparittānīpi nālaṃ paṭighātāya.

Sacittasuttādivaṇṇanā niṭṭhitā.

Sacittavaggavaṇṇanā niṭṭhitā.

(7) 2. Yamakavaggo

1-7. Avijjāsuttādivaṇṇanā

61-67. Dutiyassa paṭhamādīni uttānathāni. Sattame **naḷakapānake**ti evaṃnāmake nigame. Pubbe kira (jā. aṭṭha. 1.1.19 ādayo) amhākaṃ bodhisatto kapiyoniyāṃ nibbatta mahākāyo kapirājā hutvā anekasatavānārasahassaparivuto pabbatapāde vicari, paññāvā kho pana hoti mahāpañño. So parisāṃ evaṃ ovadati, “tātā, imasmiṃ pabbatapāde visaphalāni honti, amanussapariggahitā pokkharāṇikā nāma honti, tumhe pubbe khāditapubbāneva phalāni khādatha, pītapubbāneva pānīyāni pivatha, ettha vo paṭipucchitakiccaṃ natthī”ti. Te apītapubbaṃ disvā sahasāva apivivā samantā paridhāvitvā mahāsattassa āgamaṃ olokayamānā nisīdiṃsu. Mahāsatto āgantvā “kiṃ, tātā, pānīyaṃ na pivathā”ti āha. Tumhākaṃ āgamaṃ olokemāti. “Sādhu, tātā”ti samantā padaṃ pariyesamāno otiṇṇapadaṃyeva addasa, na uttiṇṇapadaṃ. Adisvā “saparissayā”ti aññāsi. Tāvadeva ca tattha abhinibbattaamanusso udakaṃ dvedhā katvā utthāsi – setamukho, nīlakucchi, rattathapādo, mahādāṭhiko, vantadāṭho, virūpo, bībhaccho, udakarakkhaso. So evamāha – “kasmā pānīyaṃ na pivatha, madhuraṃ udakaṃ pivatha, kiṃ tumhe etassa vacanaṃ suṇāthā”ti. Mahāsatto āha “tvāṃ adhivattho amanusso”ti? **Āmāhanti**. “Tvāṃ idha otiṇṇe labhasī”ti āha. **Āma**, tumhe pana sabbe khādissāmīti. Na sakkhissasi yakkhāti. Pānīyaṃ pana pivissathāti. **Āma**, pivissāmīti. Evam sante ekampi vānaraṃ na muñcissanti. “Pānīyaṃ pivissāma, na ca te vasaṃ gamissāmā”ti naḷaṃ āharāpetvā koṭiyāṃ gahetvā dhāmi. Sabbo ekacchiddo ahoṣi. Tīre nisīditvāva pānīyaṃ pivi. Sesavānārānampi paṭiyekkaṃ naḷaṃ āharāpetvā dhamitvā adāsi. Sabbe te passantasseva pānīyaṃ pivīṃsu. Vuttampi cetāṃ –

“Disvā padamanuttiṇṇaṃ, disvānotaritaṃ padaṃ;
Naḷena vāriṃ piṣṣāma, neva maṃ tvāṃ vadhissasi”ti. (jā. 1.1.20);

Tato paṭṭhāya yāva ajjadivasā tasmīṃ thāne naḷā ekacchiddāva honti. Imasmiṃhi kappe kappapṭhiyapāṭihāriyāni nāma cande sasalakkhaṇaṃ (jā. 1.4.61 ādayo), vaṭṭajātake (jā. 1.1.35) saccakiriyaṭṭhāne aggijālassa āgamanupacchedo, ghaṭṭikārassa mātāpītūnaṃ vasanaṭṭhāne anovassanaṃ (ma. ni. 2.291), pokkharāṇiyā tīre naḷānaṃ ekacchiddabhāvoti. Iti sā pokkharāṇī naḷena pānīyassa pivitattā “naḷakapānakā”ti nāmaṃ labhi. Aparabhāge taṃ pokkharāṇiṃ nissāya nigamo patiṭṭhāsi, tassapi “naḷakapāna”ntveva nāmaṃ jātaṃ. Taṃ pana sandhāya vuttaṃ “naḷakapāne”ti. **Palāsavaneti** kiṃsukavane.

Tuṇhībḥūtaṃ tuṇhībḥūtaṃ byāpanicchāyaṃ idaṃ āmeḍitavacananti dassetuṃ “yaṃ yaṃ disa’ntiādi vuttaṃ. **Anuviloketvāti** ettha **anu**-saddo “parī”ti iminā samānatthoti āha “**tato tato viloketvā**”ti. **Kasmā āgilāyati** koṭisahassahatthināgānaṃ balaṃ dhārentassāti codakassa adhippāyo. Ācariyo panassa “esa saṅkhārānaṃ sabhāvo, yadidaṃ aniccatā. Ye pana aniccā, te ekanteneva udayavayappaṭipīḷitāyā dukkhā eva. Dukkhasabhāvesu tesu satthukāye dukkhuppattiyā ayaṃ paccayo”ti dassetuṃ “**bhagavato**”tiādi vuttaṃ. **Piṭṭhivāto uppajji**, so ca kho pubbekatakammaṃpaccayā. Etthāha “kiṃ pana taṃ kammaṃ, yena aparimāṇakālaṃ sakkaccaṃ upacitavipulapuññasambhāro sathā evarūpaṃ dukkhavipākamanubhavaṭi”ti? Vuccate – ayameva bhagavā bodhisattabhūto atītajātiyaṃ mallaputto hutvā pāpajanasevī ayonisomanasikārabahulo carati. So ekadivasāṃ nibbuddhe vattamāne ekaṃ mallaputtaṃ gahetvā gāḷhataṃ nippīḷesi. Tena kammena idāni buddho hutvāpi dukkhamanubhavi. Yathā cetāṃ, evaṃ ciñcamāṇavikādīnamitthīnaṃ yāni bhagavato abbhakkhānādīni dukkhāni, sabbāni pubbekatassa vipākāvasesāni, yāni kammapiḷitkānīti vuccanti. Vuttañhetāṃ **apadāne** (apa. therā 1.39.64-96) –

“Anotattasarāsanne, ramaṇīye silātale;
Nānāratanaṃpajjote, nānāgandhavanantare.

“Mahatā bhikkhusaṅghena, pareto lokanāyako;
Āsīno byākarī tattha, pubbakammāni attano.

“Suṇātha bhikkhavo mayhaṃ, yaṃ kammaṃ pakataṃ mayā;
Pilotikassa kammaṃ, buddhattepi vipaccati.

1. “Munāḷi nāmahaṃ dhutto, pubbe aññāsu jātisu;
Paccekaṃbuddhaṃ surabhiṃ, abbhācikkhiṃ adūsakaṃ.

“Tena kammavipākena, niraye saṃsariṃ ciraṃ;
Bahū vassasahassāni, dukkhaṃ vedesi vedanaṃ.

“Tena kammāvasesena, idha pacchimake bhava;
Abbhakkhānaṃ mayā laddhaṃ, sundarikāya kāraṇā.

2. “Sabbābhībhussa buddhassa, nando nāmāsi sāvako;
Taṃ abbhakkhāya niraye, ciraṃ saṃsariṃ mayā.

“Dasa vassasahassāni, niraye saṃsariṃ ciraṃ;
Manussabhāvaṃ laddhāhaṃ, abbhakkhānaṃ bahuṃ labhiṃ.

“Tena kammāvasesena, ciñcamāṇavikā mamaṃ;
Abbhācikkhi abhūtena, janakāyassa aggato.

3. “Brāhmaṇo sutavā āsiṃ, ahaṃ sakkatapūjito;
Mahāvane pañcasate, mante vācesi māṇave.

“Tatthāgato isi bhīmo, pañcābhīṇṇo mahiddhiko;
Tañcāhaṃ āgataṃ disvā, abbhācikkhiṃ adūsakaṃ.

“Tatohaṃ avacaṃ sisse, kāmaḥhogī ayaṃ isi;
Mayhampi bhāsamānassa, anumodimsu māṇavā.

“Tato māṇavakā sabbe, bhikkhamānaṃ kule kule;

Mahājanassa āhaṃsu, kāmabhogī ayaṃ isi.

“Tena kammavipākena, pañca bhikkhusatā ime;
Abbhakkhānaṃ labhuṃ sabbe, sundarikāya kāraṇā.

4. “Vemātubhātaraṃ pubbe, dhanahetu haniṃ ahaṃ;
Pakkhipiṃ giriduggasmiṃ, silāya ca apimsayiṃ.

“Tena kammavipākena, devadatto silaṃ khiṃpi;
Aṅguṭṭhaṃ piṃsayī pāde, mama pāsāṇasakkharā.

5. “Purehaṃ dārako hutvā, kīlamāno mahāpathe;
Paccekabuddhaṃ disvāna, magge sakalikaṃ khiṃpiṃ.

“Tena kammavipākena, idha pacchimake bhava;
Vadhatthaṃ maṃ devadatto, abhimāre payojayi.

6. “Hatthāroho pure āsiṃ, paccekamunimuttamaṃ;
Piṇḍāya vicarantaṃ taṃ, āsādesiṃ gajenahaṃ.

“Tena kammavipākena, bhanto nāḷagirī gajo;
Giribbaje puravare, dāruṇo samupāgami.

7. “Rājāhaṃ patthivo āsiṃ, sattiyā purisaṃ haniṃ;
Tena kammavipākena, niraye paccisaṃ bhusaṃ.

“Kammuno tassa sesena, idāni sakalaṃ mama;
Pāde chaviṃ pakappesi, na hi kammaṃ vinassati.

8. “Ahaṃ kevaṭṭagāmasmiṃ, ahuṃ kevaṭṭadārako;
Macchake ghātīte disvā, janayiṃ somanassakaṃ.

“Tena kammavipākena, sīsadukkhaṃ ahū mama;
Sabbe sakkā ca haññiṃsu, yadā hani viṭaṭṭubho.

9. “Phussassāhaṃ pāvacane, sāvake paribhāsayiṃ;
Yavaṃ khādatha bhuñjatha, mā ca bhuñjatha sālāyo.

“Tena kammavipākena, temāsaṃ khāditaṃ yavaṃ;
Nimantito brāhmaṇena, verañjāyaṃ vasiṃ tadā.

10. “Nibbuddhe vattamānamhi, mallaputtaṃ nihethayiṃ;
Tena kammavipākena, piṭṭhidukkhaṃ ahū mama.

11. “Tikicchako ahaṃ āsiṃ, seṭṭhiputtaṃ virecayiṃ;
Tena kammavipākena, hoti pakkhandikā mama.

12. “Avacāhaṃ jotipālo, sugataṃ kassapaṃ tadā;
Kuto nu bodhi muṇḍassa, bodhi paramadullabhā.

“Tena kammavipākena, acariṃ dukkaraṃ bahuṃ;

Chabbassānuruvelāyaṃ, tato bodhimapāpuṇiṃ.

“Nāhaṃ etena maggena, pāpuṇiṃ bodhimuttamaṃ;
Kummaggena gavesissaṃ, pubbakammaena vārito.

“Puññapāpaparikkhīṇo, sabbasantāpavajjito;
Asoko anupāyāso, nibbāyissamanāsavo.

“Evaṃ jino viyākāsi, bhikkhusaṅghassa aggato;
Sabbābhiññābalappatto, anotatte mahāsare”ti. (apa. thera 1.39.64-96);

Avijjāsuttādivaṇṇanā niṭṭhitā.

9-10. Paṭhamakathāvatthusuttādivaṇṇanā

69-70. Navame (dī. ni. ṭī. 1.17; dī. ni. abhi. ṭī. 1.17; saṃ. ni. ṭī. 2.5.1080) duggatito saṃsārato ca niyyāti etenāti niyyānaṃ, saggamaggo, mokkhamaggo ca. Taṃ niyyānaṃ arahati, niyyāne vā niyuttā, niyyānaṃ vā phalabhūtaṃ etissā atthīti niyyānikā. Vacīduccaritasamkilesato niyyātīti vā ikārassa rassattaṃ, yakārassa ca kakāraṃ katvā niyyānikā, cetanāya saddhiṃ samphappalāpā veramaṇi. Tappaṭipakkhato aniyyānikā, tassā bhāvo aniyyānikattaṃ, tasmā **aniyyānikattā. Tiracchānabhūtaṃ** tirokaraṇabhūtaṃ. **Gehassitakathā**ti gehappaṭisaṃyuttā. **Kammaṭṭhānabhāveti** aniccatāpaṭisaṃyuttacatusaccakammaṭṭhānabhāve.

Saha atthenāti **sāttakam**, hitappaṭisaṃyuttanti attho. “Surākathā”tipi pāṭhoti āha “**surākathanti pāliyaṃ panā**”ti. Sā panesā kathā “evarūpā navasurā pītā ratijanaṇi hoti”ti assādasena na vaṭṭati, ādīnavavasena pana “ummattakasaṃvattanikā”tiādīnā nayena vaṭṭati. Tenāha “**anekavidhaṃ...pe... ādīnavavasena vaṭṭati**”ti. **Visikhā**ti gharasanniveso. Visikhāgahaṇena ca tannivāsino gahitā “gāmo āgato”tiādīsu viya. Tenevāha “**sūrā samatthā**”ti ca “**saddhā pasannā**”ti ca. Kumbhaṭṭhānappadesena kumbhadāsiyo vuttāti āha “**kumbhadāsikathā vā**”ti.

Rājakathādipurimakathāya, lokakkhāyikādīpacchimakathāya vā vinimuttā purimacchimakathā **vimuttā**. Uppattiṭṭhitisaṃhārādivasena lokaṃ akkhāyatīti **lokakkhāyikā. Asukena nāmā**ti pajāpatinā brahmunā, issarena vā. **Vitaṇḍasallāpakathā**ti “atṭhīnaṃ setattā setoti na vattabbo, pattānaṃ kālattā kāloti pana vattabbo”ti evamādīkā. **Ādi**-saddena “selapupphalakāni viya jīvidāvīrapārayattivīsālā natthi, yaṃ yo koci tiriyāmanā katattā”ti evamādīnaṃ saṅgaho datṭhabbo. **Sāgaradevenā**ti sāgaraputtarājūhi. **Khatoti** etaṃ ekavacanaṃ tehi paccekam khatattā “sāgaradevena khatattā”ti vuttaṃ. Sahamuddā samuddoti vutto. Bhavati vaddhati etenāti **bhavo**. Bhavābhavā hontīti **itibhavābhavakathā**. Ettha ca **bhavoti** sassataṃ, **abhavoti** ucchedaṃ. **Bhavoti** vuddhi, **abhavoti** hāni. **Bhavoti** kāmasukhaṃ, **abhavoti** attakilamathoti iti imāya chabbidhāya itibhavābhavakathāya saddhiṃ bāttiṃsa tiracchānakathā nāma honti. Atha vā pāliyaṃ sarūpato anāgatāpi araññapabbatanadīpapakathā itisaddena saṅgaṇhitvā bāttiṃsa tiracchānakathā vuttā. Dasame natthi vattabbaṃ.

Paṭhamakathāvatthusuttādivaṇṇanā niṭṭhitā.

Yamakavaggavaṇṇanā niṭṭhitā.

(8) 3. Ākaṅkhavaggo

1-4. Ākaṅkhasuttādivaṇṇanā

71-74. Tatiyassa paṭhame sīlassa anavasesasamādānena akhaṇḍādibhāvāpattiyā ca **paripunṇasīlā**. Samādānato paṭṭhāya avicchindanato **sīlasamaṅgino**. **Ettāvata kirāti** (a. ni. 2.37) **kira**-saddo arucisūcanattho. Tenettha ācariyavādassa attano aruccanabhāvaṃ dīpeti. **Sampannasīlāti** anāmaṭṭhavisesaṃ sāmāññato sīlasankhepena gahitaṃ. Tañca catubbidhanti ācariyatthero “**catupārisuddhisīlaṃ uddisitvā**”ti āha. **Tatthāti** catupārisuddhisīle. **Jeṭṭhakasīlanti** (saṃ. ni. 5.412) padhānasīlaṃ. **Ubhayatthāti** uddesaniddese. Idha niddese viya uddeseṇi pātimokkhasaṃvaravaro bhagavatā vutto “sampannasīlā”ti vuttattāti adhippāyo. Sīlaggahaṇaṇhi pāliyaṃ pātimokkhasaṃvaravasena āgataṃ. Tenāha “**pātimokkhasaṃvaroyevā**”tiādi. Tattha avadhāraṇena itaresaṃ tiṇṇaṃ ekadesena pātimokkhanatogadhatā dīpeti. Tathā hi anolokiyolokane ājīvaṇetu chasikkhāpadavītikame gilānapaccayassa apaccavekkhitaparibhoge ca āpatti vihitāti. **Tiṇṇī** indriyasaṃvarasīlādīni. **Sīlanti vuttaṭṭhānaṃ nāma atthīti** sīlapariyāyena tesāṃ katthaci sutte gahitaṭṭhānaṃ nāma kiṃ atthi yathā pātimokkhasaṃvaroti ācariyassa sammukhattā appaṭikkhipantova upacārena pucchanto viya vadati. Tenāha “**ananujānanto**”ti. **Chadvārarakkhāmattakamevāti** tassa sallahukabhāvamāha cittādhiṭṭhānamattena paṭipākatikabhāvāpattito. Itaresuṇi eseva nayo. **Paccayuppattimattakanti** phalena hetuṃ dasseti. Uppādanahetukā hi paccayānaṃ uppatti. **Idamatthanti** idaṃ payojanaṃ imassa paccayassa paribhuñjaneti adhippāyo. **Nippariyāyenāti** iminā indriyasaṃvarādīni tiṇṇi padhānassa sīlassa parivāravasena pavattiyā pariyāyasīlāni nāmāti dasseti.

Idāni pātimokkhasaṃvarasseva padhānabhāvaṃ byatirekato anvayato ca upamāya vibhāvetuṃ “**yassā**”tiādimāha. Tattha **soti** pātimokkhasaṃvaravaro. **Sesānīti** indriyasaṃvarādīni. **Tasse vāti** “sampannasīlā”ti ettha yaṃ sīlaṃ vuttaṃ, tasseva. **Sampannapātimokkhāti** ettha pātimokkhaḅgahaṇena vevacanaṃ vatvā **taṃ vitthāretvā...pe... ādimāha**. Yathā aññatthāpi “idha bhikkhu sīlavā hoti”ti puggalādhiṭṭhānāya desanāya uddiṭṭhaṃ sīlaṃ “pātimokkhasaṃvarasaṃvuto viharatī”ti (vibha. 508) niddiṭṭhaṃ. **Kasmā āradhanti** desanāya kāraṇapucchā. **Sīlānisamsadassanatthanti** payojananiddeso. “Sīlānisamsadassanattha”nti hi ettha byatirekato yaṃ sīlānisamsassa adassanaṃ, taṃ imissā desanāya kāraṇanti kasmā āradhanti? Veneyyānaṃ sīlānisamsassa adassanatoti atthato āpanno eva hoti. Tenāha “**sacepī**”tiādi. **Sīlānisamsadassanatthanti** pana imassa atthaṃ vivarituṃ “**tesa**”ntiādi vuttaṃ. **Ānisamsoti** udayo. “Sīlavā sīlasampanno kāyassa bhedaṃ paraṃ maraṇā sugatiṃ saggamaṃ lokamaṃ upapajjati”tiādīsu (dī. ni. 3.316; a. ni. 5.213; mahāva. 285) pana vipākaphalampi “ānisamsa”ti vuttaṃ. **Ko visesoti** ko phalaviseso. **Kā vaḍḍhīti** ko abbhudayo. Vijjamaṇopi guṇo yāthāvato vibhāvito eva abhiruciṃ uppādeti, na avibhāvito, tasmā ekantato ānisamsakittanaṃ icchitabbamevāti dassetuṃ “**appeva nāmā**”tiādimāha.

Piyoti piyāyitabbo. Piyassa nāma dassanaṃ ekantato abhinanditabbaṃ hotīti āha “**piyacakkhūhi sampassitabbo**”ti. Pītisamuṭṭhānappasannasommarūpariḅgahaṇhi cakkhu “piyacakkhū”ti vuccati. **Tesanti** sabrahmacārīnaṃ. **Manavaḍḍhanakoti** pītimanassa paribrūhanato uparūpari pīticittasseva uppādanako. **Garuṭṭhāniyoti** garukaraṇassa ṭhānabhūto. **Jānaṃ jānātīti** ñāṇena jānitabbaṃ jānāti. Yathā vā aññe ajānantāpi jānantā viya pavattanti, na evamayaṃ, ayaṃ pana jānanto eva jānāti. **Passaṃ passatīti** dassanabhūtena paññācakkhunā passitabbaṃ passati, passanto eva vā passati. **Evamaṃ sambhāvanīyoti** evaṃ viññutāya paṇḍitabhāvena sambhāvetabbo. **Sīlesvevassa paripūrakārīti** sīlesu paripūrakārī eva bhavēyyāti. Evamaṃ uttarapadāvadhāraṇaṃ daṭṭhabbaṃ. Evañhi iminā padena uparisikkhādvayaṃ anivattitameva hoti. Yathā pana sīlesu paripūrakārī nāma hoti, taṃ phalena dassetuṃ “**ajjhatta**”ntiādi vuttaṃ. Vipassanādhiṭṭhānasamādhisaṃvattanikatāya hi idha sīlassa pāripūrī, na kevalaṃ akhaṇḍādibhāvamattaṃ. Vuttañhetuṃ “yāni kho pana tāni akhaṇḍāni...pe... samādhisaṃvattanikāni”ti. Evañca katvā uparisikkhādvayaṃ sīlassa sambhārabhāvena gahitanti sīlassevettha padhānaggahaṇaṃ siddhaṃ hoti. Sīlanurakkhakā hi cītekaggatāsankhārapariggahā. **Anūnenāti** akhaṇḍādibhāvena, kassaci vā ahāpanena upapannena. **Ākārenāti** karaṇena sampādanena.

Ajjhattanti vā **attanoti** vā ekaṃ ekatthaṃ, byañjanaṃ nānaṃ. Bhummatthe cetamaṃ, “**samatha**”nti upayogavacanaṃ “anū”ti iminā upasaggena yoge siddhanti āha “**attano cittasamathē yutto**”ti. Tattha **cittasamatheti** cittassa samādhāne. **Yuttoti** aviyyutto pasuto. Yo sabbena sabbamaṃ

jhānabhāvanāya ananuyutto, so taṃ bahi nīharati nāma. Yo ārabhitvā antarā saṅkocaṃ āpajjati, so taṃ vināseti nāma. Yo pana īdiso ahutvā jhānaṃ upasampajja viharati, so anirākatajjhānoti dassento “**bahi anīhaṭajjhāno**”tiādimāha. Nīharaṇavināsathañhi idaṃ nirākaraṇaṃ nāma. “Thambhaṃ niraṃkatvā nivātavutti”tiādīsu (su. ni. 328) cassa payogo daṭṭhabbo.

Sattavidhāya anupassanāyāti ettha aniccānupassanā, dukkhānupassanā, anattānupassanā, nibbidānupassanā, virāgānupassanā, nirodhānupassanā, paṭinissaggānupassanāti imā sattavidhā anupassanā. Suññāgāragato bhikkhu tattha laddhakāyavivekatāya samathavipassanāvasena cittavivekaṃ paribrūhento yathānusiṭṭhapaṭipattiyā lokaṃ sāsanañca attano viśesādhigamaṭṭhānabhūtaṃ suññāgārañca upasobhayamāno guṇavisesādhīṭṭhānabhāvāpādanena viññūnaṃ atthato taṃ brūhento nāma hotīti vuttaṃ “**brūhetā suññāgārāna**”nti. Tenāha “**ettha cā**”tiādi. Ekabhūmakādīpāsāde kurumānopi pana neva suññāgārānaṃ brūhetāti daṭṭhabbo. Suññāgāraggaṇaṇena cettha araṇṇarukkhamūlādi sabbhaṃ padhānānuyogakkhamaṃ senāsanaṃ gahitanti daṭṭhabbaṃ.

Ettāvatā yathā taṇhāvicaritadesanā paṭhamaṃ taṇhāvasena āradhāpi taṇhāpadaṭṭhānattā mānadiṭṭhīnaṃ mānadiṭṭhiyo osarītvā kamena papañcattayadesanā jātā, evamayaṃ desanā paṭhamaṃ adhisīlasikkhāvasena āradhāpi sīlapadaṭṭhānattā samathavipassanānaṃ samathavipassanāyo osarītvā kamena sikkhāttayadesanā jātāti vedītabbā. Ettha hi “sīlesvevassa parīpūrakārī”ti ettāvatā adhisīlasikkhā vuttā, “ajjhataṃ cetosamathamanuyutto anirākatajjhāno”ti ettāvatā adhīcittasikkhā, “vipassanāya samannāgato”ti ettāvatā adhipaññāsikkhā. “Brūhetā suññāgārāna”nti iminā pana samathavasena suññāgāraṇaḍḍhane adhīcittasikkhā, vipassanāvasena adhipaññāsikkhāti evaṃ dvepi sikkhā saṅgahetvā vuttā. Ettha ca “ajjhataṃ cetosamathamanuyutto anirākatajjhāno”ti imehi padehi sīlānurakkhikā eva cīttekaggatā kathitā, “vipassanāyā”ti iminā padena sīlānurakkhiko saṅkhārapariggaho.

Kathaṃ cīttekaggatā sīlamanurakkhati? Yassa hi cīttekaggatā natthi, so byādhimhi uppanne vihaññati, so byādhipihato vikkhittacitto sīlaṃ vināsetvāpi byādhipūpasamaṃ kattā hoti. Yassa pana cīttekaggatā atthi, so taṃ byādhidukkhaṃ vikkhambhetvā samāpattim samāpajjati, samāpannakkhaṇe dukkhaṃ dūragataṃ hoti, balavataraṃ sukhamuppajjati. Evaṃ cīttekaggatā sīlamanurakkhati. Kathaṃ saṅkhārapariggaho sīlamanurakkhati? Yassa hi saṅkhārapariggaho natthi, tassa “mama rūpaṃ mama viññāna”nti attabhāve balavamamattaṃ hoti, so tathārūpesu dubbhikkhabyādhibhayādīsu sampattesu sīlaṃ nāsetvāpi attabhāvaṃ poseṭā hoti. Yassa pana saṅkhārapariggaho atthi, tassa attabhāve balavamamattaṃ vā sineho vā na hoti, so tathārūpesu dubbhikkhabyādhibhayādīsu sampattesu sacepissa antāni bahi nikkhamanti, sacepi ussatti visatti, khaṇḍākhāṇḍiko vā hoti satadhāpi saḥassadhāpi, neva sīlaṃ vināsetvā attabhāvaṃ poseṭā hoti. Evaṃ saṅkhārapariggaho sīlaṃ anurakkhati.

“Brūhetā suññāgārāna”nti iminā pana tasseva ubhayassa brūhanā vaḍḍhanā sātaccakiriyā dassitā. Evaṃ bhagavā yasmā “sābrahmacārīnaṃ piyo cassaṃ...pe... bhāvanīyo cā”ti ime cattāro dhamme ākaṅkhaṇtena natthaññaṃ kiñci kātabbaṃ, aññadatthu sīlādiguṇasamannāgateneva bhavitabbaṃ. Īdiso hi sābrahmacārīnaṃ piyo hoti manāpo garu bhāvanīyo. Vuttampi hettaṃ –

“Sīladassanasampannaṃ, dhammaṭṭhaṃ saccavedīnaṃ;
Attano kamma kubbānaṃ, taṃ jano kurute piya”nti. (dha. pa. 217);

Tasmā “ākaṅkheyya ce, bhikkhave, bhikkhu sābrahmacārīnaṃ piyo cassaṃ...pe... sīlesvevassa parīpūrakārī...pe... suññāgārāna”nti vatvā idāni yasmā paccayaḷābhādīṃ patthayantenapi idameva karaṇīyaṃ, na aññaṃ kiñci, tasmā “ākaṅkheyya ce, bhikkhave, bhikkhu lābhī assa”ntiādimāha. **Lābhī assanti** lābhāsāya saṃvarasīlaparīpūraṇaṃ pāliyaṃ āgataṃ. Kimīdisaṃ bhagavā anujānātīti? Na bhagavā sabhāvena īdisaṃ anujānāti, mahākāruṇikatāya pana puggalajjhāsāyena evaṃ vuttanti dassento “**na bhagavā**”tiādimāha. Tattha **ghāsesanaṃ chinnakatho, na vācaṃ payuttaṃ bhaṇeti** chinnakatho mūgo viya hutvā obhāsaparikathānimittaviññātipayuttaṃ ghāsesanaṃ vācaṃ na bhaṇe, na katheyyāti

attho. **Puggalajjhāsavāsena**ti saṅkhepato vuttamattham vivaranto “**yesam hī**”tiādīmāha. Raso sabhāvabhūto ānisamsa **rasānisamsa**.

Paccayadānakārāti cīvarādipaccayadānavasena pavattakārā. **Mahapphalā mahānisamsā**ti ubhayametam atthato ekaṃ, byañjanameva nānaṃ. “Pañcime, gahapatayo, ānisamsā”tiādīsu (mahāva. 285) hi ānisamsasaddo phalapariyāyopi hoti. Mahantaṃ vā lokiyasukhaṃ phalanti pasavanti **mahapphalā**, mahato lokuttarasukhassa paccayā honti **mahānisamsā**. Tenāha “**lokiyasukhena phalabhūtenā**”tiādi.

Peccabhavam gatāti petūpapattivasena nibbattiṃ upagatā. Te pana yasmā idha katakālakiriya kālana katajīvitupacchedā honti, tasmā vuttam “**kālakatā**”ti. Sassusasurā ca tappakkhikā ca **sassusasurapakkhikā**. Te nātiyonisambandhena āvāhavivāhasambandhavasena sambaddhā **nāti**. **Sālohitā**ti yonisambandhavasena. **Ekalohitabaddhā**ti ekena samānena lohitasambandhena sambaddhā. **Pasannacittoti** pasannacittako. Kālakato pitā vā mātā vā petayoniyaṃ uppannoti adhikārato viññāyatīti vuttam. **Mahānisamsameva hotī**ti tassa tathāsīlasampannattāti adhippāyo.

Ajjhottharītāti madditā. **Na ca maṃ arati saheyyā**ti maṃ ca arati na abhibhaveyya na maddeyya na ajjhotthareyya. **Uppannanti** jātam nibbattam. Sīlādiguṇayutto hi aratiñca ratiñca sahati ajjhottharati, madditvā tiṭṭhati, tasmā īdisamattānaṃ icchantenapi sīlādiguṇayutteneva bhavitabbanti dasseti. **Cittutrāso** bhāyatīti **bhayaṃ, ārammaṇaṃ** bhāyati etasmāti **bhayaṃ**. Tam duvidhampi bhayaṃ bheravañca sahati abhibhavatīti **bhayabheravasaho**. Sīlādiguṇayutto hi bhayabheravaṃ sahati ajjhottharati, madditvā tiṭṭhati ariyakoṭiyavāsī mahādattatthero viya.

Thero kira maggaṃ paṭipanno aññataraṃ pāsādikam araññaṃ disvā “idhevajja samaṇadhammaṃ katvā gamissāmī”ti maggā okkamma aññatarasmim rukkhamūle saṅghāṭim paññapetvā pallaṅkaṃ ābhujitvā nisīdi. Rukkhadēvatāya dārakā therassa sīlatejena sakabhāvena saṅghāṭum asakkontā vissaramakamsu. Devatāpi sakalarukkham cālesi. Thero acalova nisīdi. Sā devatā dhūmāyi pajjali. Neva sakkhi theram cāletum. Tato upāsakavaṇṇenāgantvā vanditvā aṭṭhāsi. “Ko eso”ti vuttā “ahaṃ, bhante, tasmim rukkhe adhivatthā devatā”ti avoca. Tvaṃ ete vikāre akāsīti. Āma, bhanteti. “Kasmā”ti ca vuttā āha “tumhākaṃ, bhante, sīlatejena dārakā sakabhāvena saṅghāṭum asakkontā vissaramakamsu, sāhaṃ tumhe palāpetum evamakāsi”nti. Thero āha “atha kasmā ‘idha, bhante, mā vasatha, mayhaṃ aphāsuka’nti paṭikacceva nāvācāsi, idāni pana mā maṃ kiñci avaca, ‘ariyakoṭiyamahādatto amanussabhayena gato’ti vacanato lajjāmi, tenāhaṃ idheva vasissam, tvaṃ pana ajjekadivasam yattha katthaci vasāhī”ti. Evaṃ sīlādiguṇayutto bhayabheravasaho hoti, tasmā īdisamattānaṃ icchantenapi sīlādiguṇayutteneva bhavitabbanti dasseti. Dutiyādīni uttānatthāni.

Ākaṅkhasuttādivaṇṇanā niṭṭhitā.

5-10. Migasālāsuttādivaṇṇanā

75-80. Pañcame **imassa hi puggalassa sīlavirahitassa paññā sīlaṃ paridhovatī**ti akhaṇḍādibhāvāpādanena sīlaṃ ādimajjhapariyosānesu paññāya suvisodhitam karoti. Yassa hi abhantare sīlasamvaro natthi, ugghaṭṭitaññutāya pana cātuppādikagāthāpariyosāne paññāya sīlaṃ dhovitvā saha paṭisambhidāhi arahattaṃ pāpuṇāti, ayaṃ paññāya sīlaṃ dhovati nāma seyyathāpi santatimahāmatto.

Sīlavā pana paññaṃ dhovati. Yassa (dī. ni. aṭṭha. 1.317) hi puthujjanassa sīlaṃ saṭṭhāsītivassāni akhaṇḍam hoti, so maraṇakālepi sabbakilese ghātetvā sīlena paññaṃ dhovitvā arahattaṃ gaṇhāti kandasālāpariveṇe mahāsaṭṭhivassatthero viya. There kira maraṇamañce nipajjitvā balavavedanāya nitthunante tissamahārājā “theram passissāmī”ti gantvā pariveṇadvāre ṭhito tam saddam sutvā pucchi “kassa saddo aya”nti. Therassa nitthunanasaddoti. “Pabbajjāya saṭṭhivassena

vedanāpariggahamattampi na kataṃ, idāni na taṃ vandissāmī”ti nivattitvā mahābodhiṃ vanditum gato. Tato upaṭṭhākadaharo theram āha “kiṃ no, bhante, lajjāpetha, saddhopi rājā vipphaṇṇāsi hutvā ‘na vandissāmī’ti gato”ti. Kasmā, āvusoti? Tumahākaṃ nitthunanasaddaṃ sutvāti. “Tena hi me okāsaṃ karoṭhā”ti vatvā vedanaṃ vikkhambhetvā arahattaṃ patvā daharassa saññaṃ adāsi “gacchāvuso, idāni rājānaṃ amhe vandāpehī”ti. Daharo gantvā “idāni kira theram vandathā”ti āha. Rājā susumārapatitena theram vandanto “nāhaṃ ayyassa arahattaṃ vandāmi, puthujjanabhūmiyaṃ pana tathavā rakkhitasīlameva vandāmi”ti āha. Evaṃ sīlena paññaṃ dhovati nāma. Sesam vuttameva. Chaṭṭhādīsu natthi vattabbaṃ.

Migasālāsuttādivaṇṇanā niṭṭhitā.

Ākaṅkhavaggaṇṇanā niṭṭhitā.

(9) 4. Theravaggo

1-8. Vāhanasuttādivaṇṇanā

81-88. Catutthassa paṭhame **vimariyādīkatena**ti nimmariyādīkatena. **Cetasā**ti evaṃvidhena cittena viharati. Tattha dve mariyādā kilesamariyādā ca ārammaṇamariyādā ca. Sace hissa rūpādike ārabha rāgādayo uppajjeyyūṃ, kilesamariyādā tena katā bhavēyya. Tesu panassa ekopi na uppannoti kilesamariyādā natthi. Sace panassa rūpādīdhamme āvajjentassa ekacce āpāthaṃ nāgaccheyyūṃ, evamassa ārammaṇamariyādā bhavēyya. Te panassa dhamme āvajjentassa āpāthaṃ anāgatadhammo nāma natthīti ārammaṇamariyādāpi natthi. Idha pana kilesamariyādā adhippetāti āha “**kilesamariyādaṃ bhinditvā**”tiādi. Tatiyādīsu natthi vattabbaṃ.

Vāhanasuttādivaṇṇanā niṭṭhitā.

9-10. Kokālikasuttādivaṇṇanā

89-90. Navame (saṃ. ni. ṭī. 1.1.181) kokālikanāmakā dve bhikkhū. Tato idhādhippetam niddhāretvā dassetuṃ “**koyaṃ kokāliko**”ti pucchā. Suttassa aṭṭhuppattim dassetuṃ “**kasmā ca upasaṅkamī**”ti pucchā. **Ayaṃ kirāti**ādi yathākkamaṃ tāsam vissajjanaṃ. Vivekavāsaṃ vasitukāmatā appicchatāya ca **mā no kassaci...pe... vasimsu. Āghātaṃ uppādesi** attano icchāvighātanato. **Therā bhikkhusaṅghassa niyyādayimsu** payuttavācāya akatattā therehi ca adāpitattā. **Pubbepi...pe... maññeti** iminā therānaṃ kohaññe tithabhāvaṃ āsaṅkati avaṇe vaṇaṃ passanto viya, suparisuddhe ādāsatale jallaṃ uṭṭhāpento viya ca.

Aparajjhivāti bhagavato sammukhā “pāpabhikkhū jātā”ti vatvā. **Mahāsāvajjadassanattanti** mahāsāvajjabhāvadassanattaṃ, ayameva vā pāṭho. **Māhevanti** mā evamāha, mā evaṃ bhāṇi. Saddhāya ayo uppādo saddhāyo, taṃ āvahaṭṭi **saddhāyikoti** āha “**saddhāya āgamakaro**”ti. **Saddhāyikoti** vā saddhāya ayitabbo, saddheyyoti attho. Tenāha “**saddhātabbavacano vā**”ti.

Pīlakā nāma bāhirato paṭṭhāya aṭṭhīni bhindanti, imā pana paṭhamameva aṭṭhīni bhinditvā uggatā. Tenāha “**aṭṭhīni bhinditvā uggatāhi pīlakāhi**”ti. **Taruṇabeluvamattiyoti** taruṇabillaphalamattiyoti. **Visagilitoti** khittapaharaṇo. Tañca baḷisaṃ visasamañña loke. Ārakkhadevatānaṃ saddaṃ sutvāti padaṃ ānetvā sambandho.

Brahmaloketi suddhāvāsaloke. **Varākoti** anuggahavacanametam. Hīnapariyāyoti keci. **Piyasīlāti** iminā etasmiṃ atthe niruttinayena pesalāti padasiddhīti dasseti. **Kabarakkhīnīti** byādhibalena paribhinnavaṇṇatāya kabarabhūtāni akkhīni. **Yattakanti** bhagavato vacanaṃ aññathā karontena

yattakaṃ tayā aparaddhaṃ, tassa pamāṇaṃ natthīti attho. Yasmā anāgāmino nāma pahīnakāmacchandabyāpādā honti, tvañca diṭṭhikāmacchandabyāpādavasena idhāgato, tasmā yāvañca te idaṃ aparaddhanti evamettha attho daṭṭhabbo.

Adiṭṭhippattoti appattadiṭṭhiko. **Gilitaviso viya** visam gilitvā ṭhito viya. **Kuṭhārisadisā** mūlapacchindanaṭṭhena. **Uttamattheti** arahatte. **Khīṇāsavoti vadati** sunakkhatto viya acelaṃ korakkhattiyaṃ. **Yo** aggasāvako viya **pasamsitabbo khīṇāsavo**, taṃ “dussīlo aya”nti vadati. **Vicinātīti** ācīnoti pasavati. Pasamsiyaṇindā tāva sampannaguṇaparidhamśanavasena pavattiyā sāvajjatāya kaṭukavipākā, nindiyappasamsā pana kathaṃ tāya samavipākāti? Tatha avijjamānaguṇasamāropanena attano paresañca micchāpaṭipattihetubhāvato pasamsiyena tassa samabhāvakaraṇato ca. Lokepi hi asūraṃ sūrena samaṃ karonto gārayho hoti, pageva duppaṭipannaṃ suppaṭipannaṃ samaṃ karontoti.

Sakena dhanenāti attano sāpateyyena. **Ayaṃ appamattako aparādho** diṭṭhadhammikattā sappatikārattā ca tassa. **Ayaṃ mahantataro kali** katūpacitassa samparāyikattā appatikārattā ca.

Nirabbudoti gaṇanāvīseso esoti āha “**nirabbudagaṇanāyā**”ti, sataśahassaṃ nirabbudānanti attho. **Yamariyagarahī nirayaṃ upetīti** ettha yathāvuttaāyuppaṃāṇaṃ pākatikavasena ariyūpavādinā vuttanti veditabbaṃ. Aggasāvakaṇaṃ pana guṇamahantatāya tatopi ativiya mahantataramevāti vadanti.

Atha kho brahmā sahampatīti ko ayaṃ brahmā, kasmā ca pana bhagavantaṃ upasaṅkamitvā etadavocāti? Ayaṃ kassapassa bhagavato sāsane sahako nāma bhikkhu anāgāmi hutvā suddhāvāsesu uppanno, tatha sahampati brahmāti sañjānanti. So panāhaṃ bhagavantaṃ upasaṅkamitvā “padumanirayaṃ kittessāmi, tato bhagavā bhikkhūnaṃ ārocessati, athānusandhikusalā bhikkhū tathāyuppaṃāṇaṃ pucchissanti, bhagavā ācikkhanto ariyūpavāde ādīnavaṃ pakāsessati”ti iminā kāraṇena bhagavantaṃ upasaṅkamitvā etadavoca.

Magadharatṭhe saṃvohārato **māgadhako pattho**, tena. **Paccitabbaṭṭhānassāti** nirayadukkheṇa paccitabbappadesassa etaṃ abbudoti nāmaṃ. **Vassagaṇanāti** ekato paṭṭhāya dasaguṇitaṃ abbudaāyumi tato aparaṃ vīsatiṃguṇitaṃ nirabbudādīsu vassagaṇanā veditabbā. Ayañca gaṇanā aparicitānaṃ dukkarāti vuttaṃ “**na taṃ sukaraṃ saṅkhātu**”nti. Keci pana “tatha tatha paridevanānattena kamma kāraṇanānattenapi imāni nāmāni laddhāni”ti vadanti, apare “sītanarakā ete”ti. **Sabbatthāti** ababādīsu padumapariyosānesu sabbesu nirayesu. **Esa nayoti** heṭṭhimato uparimassa vīsatiṃguṇataṃ atidisati. Dasame natthi vattabbaṃ.

Kokālikasuttādivaṇṇanā niṭṭhitā.

Theravaggavaṇṇanā niṭṭhitā.

(10) 5. Upālivaggo

1-4. Kāmabhogīsuttādivaṇṇanā

91-94. Pañcamassa paṭhamādīni uttānattāni. Catutthe tapanam santapanam kāyassa khedanam tapo, so etassa atthīti tapassī, taṃ **tapassim**. Yasmā tathābhūto tapanissito, tapo vā tannissito, tasmā āha “**tapanissitaka**”nti. Lūkhaṃ pharusaṃ sādhusammatācāravirahato na pasādanīyaṃ ājīvati vattatīti lūkhājīvī, taṃ **lūkhājivim**. **Upakkosatīti** uppaṇḍeti, upahasānavaśena paribhāsati. **Upavadatīti** avaññāpubbakaṃ apavadati. Tenāha “**hīleti vambheti**”ti.

Kāmabhogīsuttādivaṇṇanā niṭṭhitā.

5. Uttiyasuttavaṇṇanā

95. Pañcame paccante bhavaṃ **paccantimaṃ**. Pākārassa thirabhāvaṃ uddhamuddhaṃ pāpetīti **uddhāpaṃ**, pākāramūlaṃ. **Ādi**-saddena pākāradvārabandhaparikhādīnaṃ saṅgaho veditabbo. Paṇḍitadovārikaṭṭhāniyaṃ katvā bhagavā attānaṃ dassesīti dassento “**ekadvāranti kasmā āhā**”ti codanaṃ samuṭṭhāpesi. Yassā paññāya vasena puriso paṇḍitoti vuccati, taṃ **paṇḍiccanti** āha “**paṇḍiccena samannāgato**”ti. Taṃtaṃtikattabbatāsu chekabhāvo byattabhāvo **veyyattiyaṃ**. Medhati sammohaṃ hiṃsati vidhamatīti medhā, sā etassa atthīti **medhāvī**. Tḥāne tḥāne uppatti etissā atthīti **tḥānuppattikā**, tḥānaso uppajjanapaññā. Anupariyāyanti etenāti anupariyāyo, so eva pathoti **anupariyāyapatho**, parito pākārassa anusamāyānamaggo. Pākārabhāgā sandhātābbā etthāti **pākārasandhi**, pākārassa phullitappadeso. So pana heṭṭhimantena dvinnampi iṭṭhakānaṃ vigamena evaṃ vuccatīti āha “**dvinnaṃ iṭṭhakānaṃ apagataṭṭhāna**”nti. **Chinnaṭṭhānanti** chinnabhinnappadeso, chiddaṭṭhānaṃ vā. Tañhi vivaranti vuccati.

Uttiyasuttavaṇṇanā niṭṭhitā.

6-8. Kokanudasuttādivaṇṇanā

96-98. Chaṭṭhe **kandhāpi diṭṭhiṭṭhānaṃ** ārammaṇaṭṭhena “rūpaṃ attato samanupassati”tiādivacanato. **Avijjāpi diṭṭhiṭṭhānaṃ** upanissayādibhāvena pavattanato. Yathāha “assutavā, bhikkhave, puthujjano ariyānaṃ adassāvī ariyadhammassa akovido”tiādi (dha. sa. 1007). **Phassopi diṭṭhiṭṭhānaṃ**. Yathā cāha “tadapi phassapaccayā (dī. ni. 1.118-130) phussa phussa paṭisaṃvediyanti”ti (dī. ni. 1.144) ca. **Saññāpi diṭṭhiṭṭhānaṃ**. Vuttañhettaṃ “saññānidānā hi papañcasāṅkhā (su. ni. 880; mahāni. 109), pathavito saññatvā”ti (ma. ni. 1.2) ca ādi. **Vitakkopi diṭṭhiṭṭhānaṃ**. Vuttampi cettaṃ “takkañca diṭṭhīsu pakappayitvā, saccaṃ musāti dvayadhammāhū”ti (su. ni. 892; mahāni. 121), “takki hoti vīmaṃsī”ti (dī. ni. 1.34) ca ādi. **Ayonisomanasikāropi diṭṭhiṭṭhānaṃ**. Tenāha bhagavā – “tassevaṃ ayoniso manasikaroto channaṃ diṭṭhīnaṃ aññatarā diṭṭhi uppajjati, atthi me attāti tassa saccato thetato diṭṭhi uppajjati”tiādi (ma. ni. 1.19).

Yā diṭṭhīti idāni vuccamānānaṃ aṭṭhārasannaṃ padānaṃ sādharānaṃ mūlapadaṃ. Diṭṭhiyeva **diṭṭhigataṃ** gūthagataṃ viya, diṭṭhīsu vā gataṃ idaṃ dassanaṃ dvāsaṭṭhidiṭṭhīsu antogadhattātipi **diṭṭhigataṃ**, diṭṭhiyā vā gataṃ **diṭṭhigataṃ**. Idañhi “atthi me attā”tiādi diṭṭhiyā gamanamattameva, natthettha attā vā nicco vā kocīti vuttaṃ hoti. Sā cāyaṃ diṭṭhi dunniggamanaṭṭhena **gahanaṃ**. Duratikkamaṭṭhena sappaṭibhayaṭṭhena ca **kantāro** dubbhikkhakantāravālakantāradayo viya. Sammādiṭṭhiyā vinivijjanaṭṭhena, vilomaṇaṭṭhena vā **visūkaṃ**. Kadāci sassatassa, kadāci ucchedassa vā gahaṇato virūpaṃ phanditanti **vipphanditaṃ**. Bandhanaṭṭhena **saṃyojanaṃ**. Diṭṭhiyeva anto tudanaṭṭhena dunnīharaṇīyaṭṭhena ca sallanti **diṭṭhisallaṃ**. Diṭṭhiyeva pīlākaraṇaṭṭhena sambādhoti **diṭṭhisambādho**. Diṭṭhiyeva mokkhāvaraṇaṭṭhena palibodhoti **diṭṭhipalibodho**. Diṭṭhiyeva dummocanīyaṭṭhena bandhanaṇti **diṭṭhibandhanaṃ**. Diṭṭhiyeva duruttaraṇaṭṭhena papātoti **diṭṭhipapāto**. Diṭṭhiyeva thāmagataṭṭhena anusayoti **diṭṭhānusayo**. Diṭṭhiyeva attānaṃ santāpetīti **diṭṭhisantāpo**. Diṭṭhiyeva attānaṃ anudahaṭṭi **diṭṭhiparilāho**. Diṭṭhiyeva kilesakāyaṃ gantheṭīti **diṭṭhigantho**. Diṭṭhiyeva bhusaṃ ādiyati **diṭṭhupādānaṃ**. Diṭṭhiyeva “sacca”ntiādivasena abhinivisati **diṭṭhābhiniveso**. Diṭṭhiyeva “idaṃ para”nti āmasati, parato vā āmasati **diṭṭhiparāmāso**, samuṭṭhāti etenāti samuṭṭhānaṃ, kāraṇaṃ. Samuṭṭhānaṃ bhāvo samuṭṭhānaṭṭho, tena **samuṭṭhānaṭṭhena**, kāraṇabhāvenāti attho. Sattamaṭṭhamesu natthi vattabbaṃ.

Kokanudasuttādivaṇṇanā niṭṭhitā.

9-10. Upālisuttādivaṇṇanā

99-100. Navame ajjhogāhetvā adhippetamatthaṃ sambhavitum sādhetum dukkhāni **durabhisambhavāni**. Aṭṭhakathāyaṃ pana tattha nivāsoyeva dukkhoti dassetuṃ “**sambhavitum dukkhāni dussahāni**”ti vuttaṃ. **Araññavanapatthānī**ti araññalakkhaṇappattāni vanasaṇḍāni. Vanapatthasaddo hi saṇḍabhūte rukkkhasamūhepi vattatīti araññaggahaṇaṃ. **Pavivekanti** pakārato, pakārehi vā vivecanaṃ, rūpādiputhuttārammaṇe pakārato gamanādiiriyāpathappakārehi attano kāyassa vivecanaṃ, gacchatopi tiṭṭhatopi nisajjatopi nipajjatopi ekasseva pavatti. Teneva hi vivecetabbānaṃ vivecanākārassa ca bhedato bahuvidhattā te ekattena gahetvā “paviveka”nti ekavacanena vuttaṃ. **Dukkaraṃ pavivekanti** vā pavivekaṃ kattuṃ na sukhanti attho. **Ekībhāveti** ekattabhāve. **Dvayaṃdvayārāmoti** dvinnaṃ dvinnaṃ bhāvābhīrato. **Haranti viyāti** saṃharanti viya vighātuppādanena. Tenāha “**ghasanti viyā**”ti. Bhayasantāsuppādanena khāditum āgatā yakkharakkhasapisācādayo viyāti adhippāyo. **Īdisassāti** aladdhasamādhino. **Tiṇapaṇṇamigādisaddehī**ti vāteritānaṃ tiṇapaṇṇādīnaṃ migapakkhīdīnaṃca bhīsanakehi bheravehi saddehi. **Vividhehi ca** aññehi khāṇuādīhi yakkhādiākārehi upaṭṭhitehi **bhīsanakehi**. Ghaṭena kīlā **ghaṭikāti** eke. Dasamaṃ uttānameva.

Upālisuttādivaṇṇanā niṭṭhitā.

Upālivaggavaṇṇanā niṭṭhitā.

Dutiyaṇṇāsakaṃ niṭṭhitam.

3. Tatiyaṇṇāsakaṃ

(11) 1. Samaṇasaññāvaggo

1-12. Samaṇasaññāsuttādivaṇṇanā

101-112. Tatiyassa paṭhamādīni uttānāni. Chaṭṭhe **nijjarakāraṇānī**ti pajahanakāraṇāni. Imasmiṃ maggo kathīyatīti katvā “**ayaṃ heṭṭhā...pe... puna gahitā**”ti vuttaṃ. Kiñcāpi nijjiṇṇā micchādīṭṭhīti ānetvā sambandhitabbaṃ. Yathā micchādīṭṭhi vipassanāya nijjiṇṇāpi na samucchinnāti samucchadappahānadassanattaṃ puna gahitā, evaṃ micchāsaṅkappādayopi vipassanāya pahīnāpi asamucchinnatāya idha puna gahitāti ayamatto “micchāsaṅkappassā”tiādīsu sabbapadesu vattabboti dasseti “**evaṃ sabbapadesu yojetabbo**”ti iminā. **Ettha cāti** “sammāvimuttipaccayā ca aneke kusalā dhammā bhāvanāpāripūriṃ gacchantī”ti etasmiṃ pālīpade. Ettha ca samucchadavasena ca paṭippassaddhivasena ca paṭipakkhadhammānaṃ sammadeva vimuccanaṃ **sammāvimutti**. Tappaccayā ca maggaphalesu aṭṭha indriyāni bhāvanāpāripūriṃ upagacchantīti maggasampayuttānīpi saddhādīni indriyāni uddhaṭāni. Maggavasena hi phalesu bhāvanāpāripūrī nāmāti. **Abhinandanaṭṭhenāti** ativiya sinehanaṭṭhena. Idañhi somanassindriyaṃ ukkaṃsagatasātasabhāvato sampayuttadhamme sinehantaṃ tementaṃ viya pavattati. **Pavattasantaṭṭhipateyyaṭṭhenāti** vipākasantānassa jīvane adhipatibhāvena. **Evantiādi** vuttasseva atthassa nigamaṃ. Sattamādīni uttānatthāni.

Samaṇasaññāsuttādivaṇṇanā niṭṭhitā.

Samaṇasaññāvaggavaṇṇanā niṭṭhitā.

(12) 2. Paccorohaṇivaggo

1-4. Paṭhamaadhammasuttādivaṇṇanā

113-6. Dutiyassa paṭhamadutiyāni uttānatthāni. **Tatiye jānaṃ jānātīti** sabbaññutaññāṇena jānitabbaṃ sabbaṃ jānāti eva. Na hi padesaññaṇe t̥hito jānitabbaṃ sabbaṃ jānāti. Ukkatṭhaniddesena hi avisesaggahaṇena ca “jāna”nti iminā niravasesaṃ ñeyyajātaṃ pariggayhatīti tabbisayāya jānanakiriyāya sabbaññutaññāṇameva karaṇaṃ bhavituṃ yuttaṃ, pakaraṇavasena “bhagavā”ti saddantarāsannidhānena ca ayamatto vibhāvetabbo. **Passitabbameva passatīti** dibbacakkhupaññācakkhuddhammacakkhubuddhacakkhusamantacakkhusaṅkhātehi ñāṇacakkhūhi passitabbaṃ passati eva. Atha vā **jānaṃ jānātīti** yathā añña savipallāsā kāmarūpapariññāvādino jānantāpi vipallāsavasena jānanti, na evaṃ bhagavā. Bhagavā pana pahīnavipallāsattā jānanto jānāti eva, diṭṭhidassanassa abhāvā passanto passatiyevāti attho. **Cakkhu viya bhūto**ti dassanapariñāyakaṭṭhena cakkhu viya bhūto. Yathā hi cakkhu sattānaṃ dassanatthaṃ pariṇeti sādheti, evaṃ lokassa yāthāvadassanasādhanatopi dassanakiccapariñāyakaṭṭhena cakkhu viya bhūto, paññācakkhumayattā vā sayambhuññaṇena paññācakkhuṃ bhūto pattoti vā cakkhubhūto.

Ñāṇasabhāvoti viditakaraṇaṭṭhena ñāṇasabhāvo. Aviparītasabhāvaṭṭhena pariyattidhammappavattanato vā hadayena cintetvā vācāya nicchāritadhammamayoti **dhammabhūto**. Tenāha “**dhammasabhāvo**”ti. Dhammā vā bodhipakkiyā tehi uppannattā lokassa ca taduppādanato, anaññasādhāraṇaṃ vā dhammaṃ patto adhigatoti **dhammabhūto**. Seṭṭhaṭṭhena brahmabhūtoti āha “**seṭṭhasabhāvo**”ti. Atha vā brahmā vuccati maggo, tena uppannattā lokassa ca taduppādanato, tañca sayambhuññaṇena pattoti **brahmabhūto**. Catusaccadhammaṃ vadatīti **vattā**. Ciraṃ saccappaṭivedhaṃ pavattento vadatīti **pavattā**. **Atthaṃ niharitvāti** dukkhādiatthaṃ tatthāpi pīlanādiatthaṃ uddharitvā. Paramatthaṃ vā nibbānaṃ pāpayitā **ninnetā**. Amatādhigamaṃ paṭipattidesanāya amatasacchikiriyāṃ sattesu uppādentu amatāṃ dadātīti **amatassa dātā**. Bodhipakkiyadhammānaṃ tadāyattabhāvato **dhammasāmī**. Catutthe natthi vattabbaṃ.

Paṭhamaadhammasuttādivaṇṇanā niṭṭhitā.

5-42. Saṅgāravasuttādivaṇṇanā

117-154. Pañcame **appakāti** thokā, na bahū. **Athāyaṃ itarā pajāti** yā panāyaṃ avasesā pajā sakkāyadīṭṭhīrameva anudhāvati, ayameva bahutarāti attho. **Sammadakkhāte**ti sammā akkhāte sukathite. **Dhammeti** tava desanādhamme. **Dhammānuvattinoti** taṃ dhammaṃ sutvā tadanucchavikaṃ paṭipadaṃ pūretvā maggaphalāsacchikaraṇena dhammānuvattino. **Maccuno t̥hānabhūtanti** kilesamārasaṅkhātassa maccuno nivāsaṭṭhānabhūtaṃ. **Suduttaraṃ taritvā pāramessantīti** ye janā dhammānuvattino, te etaṃ suduttaraṃ duratikkamaṃ mārādheyyaṃ taritvā atikkamitvā nibbānapāraṃ gamissanti.

Kaṇhaṃ dhammaṃ vipphāyāti kāyaduccarītādibhedāṃ akusalaṃ dhammaṃ jahitvā. **Sukkaṃ bhāvēthāti** paṇḍito bhikkhu abhinikkhamaṇato paṭṭhāya yāva arahattamaggā kāyasucarītādibhedāṃ sukkaṃ dhammaṃ bhāveyya. **Okā anokamāgammāti** okaṃ vuccati ālayo, anokaṃ vuccati anālayo. Ālayato nikkhamitvā anālayasaṅkhātāṃ nibbānaṃ paṭicca ārabha.

Tatrābhiratimiccheyyāti yasmim̐ anālayasaṅkhāte viveke nibbāne imehi sattehi durabhiraṃ, tatrābhiratimiccheyya. **Duvidhepi kāmeti** vatthukāmakilesakāme. **Cittaklesehīti** pañcahi nīvaraṇehi **attānaṃ pariyoḍapeyya** voḍapeyya, parisodheyyāti attho.

Sambodhiyaṅgesūti sambojjhaṅgesu. **Sammā cittaṃ subhāvitanti** sammā hetunā nayena cittaṃ suṭṭhu bhāvitaṃ vaḍḍhitaṃ. **Jutimantoti** ānubhāvavanto, arahattamaggaññajutiyā khandhādibhede dhamme jotetvā t̥hitāti attho. **Te loke parinibbutāti** te imasmim̐ khandhādiloke parinibbutā nāma arahattappattito paṭṭhāya kilesavaṭṭassa khepitattā saupādisesena, carimacittanirodhena khandhavaṭṭassa khepitattā anupādisesena cāti dvīhi parinibbānehi parinibbutā, anupādāno viya padīpo apaṇṇattikabhāvaṃ gatāti attho.

Ito param yāva tatiyo paṇṇāsako, tāva uttānatthameva.

Saṅgāravasuttādivaṇṇanā niṭṭhitā.

Tatiyapaṇṇāsakaṃ niṭṭhitam.

4. Catutthapaṇṇāsakaṃ

155-166. Catutthassa paṭhamavaggo uttānatthoyeva.

1-44. Brāhmaṇapaccorohaṇīsuttādivaṇṇanā

167-210. Dutiye ca paṭhamādīni uttānatthāni. Dasame **pacchābhūmivāsinoti** paccantadesavāsino. **Sevālamālikāti** pāto va udakaṃ orohitvā sevālañceva uppalādīni ca gahetvā attano udakasuddhikabhāvajānanatthañceva “lokassa ca udakena suddhi hotī”ti imassa atthassa jānanatthañca mālāṃ katvā pīlandhanakā. **Udakorohakāti** pāto majjhanhe sāyanhe ca udakaorohaṇakā. Tenāha “**sāyatatiyakaṃ udakorohaṇānuyogamanuyuttā**”ti. Ekādasamādīni uttānatthāni. Catutthe paṇṇāsake natthi vattabbaṃ.

Brāhmaṇapaccorohaṇīsuttādivaṇṇanā niṭṭhitā.

Catutthapaṇṇāsakaṃ niṭṭhitam.

(21) 1. Karajakāyavaggo

1-536. Paṭhamanirayasaggasuttādivaṇṇanā

211-746. Pañcamassa paṭhamādīni uttānatthāni. Navame yasmiṃ santāne kāmāvacarakammaṃ mahaggatakammañca katūpacitaṃ vipākādāne laddhāvasaraṃ hutvā ṭhitaṃ, tesu kāmāvacarakammaṃ itaraṃ nīharitvā sayam tattha ṭhatvā attano vipākaṃ dātuṃ na sakkoti, mahaggatakammameva pana itaraṃ paṭibāhitvā attano vipākaṃ dātuṃ sakkoti garubhāvato. Tenāha “**taṃ mahogho parittaṃ udakaṃ viyā**”tiādi. Ito param sabbattha uttānameva.

Paṭhamanirayasaggasuttādivaṇṇanā niṭṭhitā.

Iti manorathapūraṇiyā aṅguttaranikāya-aṭṭhakathāya

Dasakanipātavaṇṇanāya anuttānatthadīpanā samattā.

Namo tassa bhagavato arahato sammāsambuddhassa

Aṅguttaranikāye

Ekādasakanipāta-ṭīkā

1. Nissayavaggo

1-10. Kimatthiyasuttādivaṇṇanā

1-10. Ekādasakanipātassa paṭhamādīni uttānatthāneva. Dasame **janitasminti** kammakilesehi nibbatte, jane etasminti vā **janetasmiṃ**, manussesūti attho. Tenāha “**ye gottapaṭisārino**”ti. Janitasmim-saddo eva vā i-kārassa e-kāraṃ katvā “janetasmi”nti vutto. **Janitasminti** ca janasminti attho veditabbo. Janitasminti sāmāññaggahaṇepi yattha catuvaṇṇasamaññā, tattheva manussaloke. **Khattiyo seṭṭho**ti ayaṃ lokasamaññāpi manussalokeyeva, na devakāye brahmakāye vāti dassetuṃ “**ye gottapaṭisārino**”ti vuttaṃ. **Paṭisaranṭi** “ahaṃ gotamo, ahaṃ kassapo”ti paṭi paṭi attano gottaṃ anussaranti paṭijānanti vāti attho.

Kimatthiyasuttādivaṇṇanā niṭṭhitā.

Nissayavaggavaṇṇanā niṭṭhitā.

2. Anussativaggo

1-4. Paṭhamamahānāmasuttādivaṇṇanā

11-14. Dutiya paṭhamādīni uttānatthāni. Tatiye **kabalīkārāhārabhakkhānanti** kabalīkārāhārūpajīvīnaṃ. Ko pana devānaṃ āhāro, kā āhāraṇelāti? Sabbesampi kāmāvacaradevānaṃ sudhā āhāro. Sā heṭṭhimehi heṭṭhimehi uparimānaṃ uparimānaṃ paṇītataṃ hoti, taṃ yathāsakaṃ divasavaseneva divase divase bhuñjanti. Keci pana “biḷārapadappamaṇaṃ sudhāhāraṃ bhuñjanti, so jivhāya ṭhapitamatto yāva kesagganakhaggā kāyaṃ pharati, tesamyeva divasavasena satta divase yāpanasamattho hoti”ti vadanti. **Asamayavimuttiyā vimuttoti** maggavimokkhena vimutto. Aṭṭhannañhi samāpattīnaṃ samāpajjanassa samayopi atthi tassa asamayopi, maggavimokkhena pana vimuccanassa samayo vā asamayo vā natthi. Yassa saddhā balavatī, vipassanā ca āradhā, tassa gacchantassa tiṭṭhantassa nisīdantassa nipajjantassa khādantassa bhuñjantassa ca maggaphalappaṭivedho nāma na hotīti na vattabbaṃ. Iti maggavimokkhena vimuccantassa samayo vā asamayo vā natthīti maggavimokkho asamayavimutti nāma. Catutthe natthi vattabbaṃ.

Paṭhamamahānāmasuttādivaṇṇanā niṭṭhitā.

5. Mettāsuttavaṇṇanā

15. Pañcame **sesajanāti** mettāya cetovimuttiyā alābhino. **Samparivattamānāti** dakkhiṇeneva passena asayitvā sabbaso parivattamānā. **Kākacchamānāti** ghurughurupassāsavasena vissaraṃ karontā. **Sukhaṃ supatīti** ettha duvidhā supanā sayane piṭṭhippasāraṇalakkhaṇā kiriyāmayacittehi avokiṇṇabhavaṅgappavattilakkhaṇā ca. Tatthāyaṃ ubhayatthāpi sukhaṃ eva supatī. Yasmā saṅikaṃ nipajjitvā āṅgapaccāṅgāni samodhāya pāsādikena ākārena sayati, niddokkamanepi jhānaṃ samāpanno viya hoti. Tenāha “**evaṃ asupitvā**”tiādi.

Niddākāle sukhaṃ alabhitvā dukkhena suttatā eva paṭibujjhanakāle sarīrakhedena nitthunanaṃ vijambhanaṃ ito cito ca viparivattanañca hotīti āha “**nitthunantā vijambhantā samparivattantā dukkhaṃ paṭibujjhanti**”ti. Ayaṃ pana sukkena suttatā sarīrakhedābhāvato nitthunādivirahitova paṭibujjhati. Tena vuttaṃ “**evaṃ appaṭibujjhitvā**”tiādi. Sukhappaṭibodho ca sarīravikārābhāvenāti āha “**sukhaṃ nibbikāra**”nti.

Bhaddakameva supinaṃ passatīti idaṃ anubhūtapubbavasena devatūpasamhāravasena cassa bhaddakameva supinaṃ hoti, na pāpakanti katvā vuttaṃ. Tenāha “**cetiyaṃ vandanto viyā**”tiādi. Dhātukkhobhahetukampi cassa bahulaṃ bhaddakameva siyā yebhuyyena cittajarūpānuguṇatāya

utuāhārajarūpānaṃ.

Ure āmukkamuttāhāro viyāti gīvāya bandhitvā ure lambitamuttāhāro viyāti kehici taṃ ekāvalivasena vuttaṃ siyā, anekaratanāvalisamūhabhūto pana muttāhāro aṃsappadesato paṭṭhāya yāva kaṭippadesassa heṭṭhābhāgā palambanto ure āmukkoyeva nāma hoti.

Visākhathero viyāti (visuddhi. 1.258) so kira pāṭaliputte kuṭumbiyo ahoṣi. So tattheva vasamāno assosi “tambapaṇṇidīpo kira cetiyamālālaṅkato kāsāvapajjoto, icchiticchitaṭṭhāneyevettha sakkā nisīdituṃ vā nipajjituṃ vā, utusappāyaṃ senāsanasappāyaṃ puggalasappāyaṃ dhammassavanasappāyanti sabbamettha sulabha”nti. So attano bhogakkhandhaṃ puttadārassa niyyātetvā dussante baddhena ekakahāpaṇeṇeva gharā nikkhamitvā samuddatīre nāvaṃ udikkhamāno ekaṃ māsaṃ vasi. So vohārakusalatāya imasmiṃ ṭhāne bhaṇḍaṃ kiṇitvā asukasmīṃ vikkiṇanto dhammikāya vaṇijjāya tenevantaramāseṇa sahaṣsaṃ abhisamhari. Iti anupubbena mahāvihāraṃ gantvā pabbajjaṃ yācati. So pabbājanatthāya sīmaṃ nīto taṃ sahaṣsatthavikaṃ ovaṭṭikantarena bhūmiyaṃ pātesi. “Kimeta”nti ca vutte “kahāpaṇasahaṣsaṃ, bhante”ti vatvā, “upāsaka, pabbajitakālato paṭṭhāya na sakkā vicāretuṃ, idāneva naṃ vicārehi”ti vutte “visākhassa pabbajjaṭṭhānaṃ āgatā mā rittahatthā gamiṃsū”ti muñcitvā sīmāmālake vikkiritvā pabbajitvā upasampanno. So pañcavasso hutvā dvemātikā paguṇā katvā attano sappāyaṃ kammaṭṭhānaṃ gaheṭvā ekekasmīṃ vihāre cattāro cattāro māse samapavattavāsaṃ vasamāno cari. Evaṃ caramāno –

“Vanantare ṭhito thero, visākho gajjamānako;
Attano guṇamesanto, imamatthaṃ abhāsatha.

“Yāvataṃ upasampanno, yāvataṃ idha māgato;
Etthantare khalitaṃ natthi, aho lābho te mārisā”ti. (visuddhi. 1.258);

So cittalapabbatavihāraṃ gacchanto dvedhāpathaṃ patvā “ayaṃ nu kho maggo, udāhu aya”nti cintayanto aṭṭhāsi. Athassa pabbate adhivatthā devatā hatthaṃ pasāretvā “eso maggo”ti dasseti. So cittalapabbatavihāraṃ gantvā tattha cattāro māse vasitvā “paccūse gamissāmī”ti cintetvā nipajji. Caṅkamasīse maṇilarukkhe adhivatthā devatā sopānaphalake nisīditvā parodi. Thero “ko eso”ti āha. Ahaṃ, bhante, maṇiliyāti. Kissa rodasīti? Tumhākaṃ gamaṇaṃ paṭiccāti. Mayi idha vasante tumhākaṃ ko guṇoti? Tumhesu, bhante, idha vasantesu amanussā aññaṃaññaṃ mettaṃ paṭilabhanti, te dāni tumhesu gatesu kalahaṃ karissanti, duṭṭhullampi kathayissantīti. Thero “sace mayi idha vasante tumhākaṃ phāsuvihāro hoti, sundara”nti vatvā aññepi cattāro māse tattheva vasitvā puna tattheva gamanacittaṃ uppādesi. Devatāpi puna tattheva parodi. Eteneva upāyena thero tattheva vasitvā tattheva parinibbāyīti. Evaṃ dhamattāvihārī bhikkhu amanussānaṃ piyo hoti.

Balavapiyacittatāyāti iminā balavapiyacittatāmattenapi satthaṃ na kamati, pageva mettāya cetovimuttiyāti dasseti. **Khippameva cittaṃ samādhīyati**, kenaci paripanthena parihīnajjhānassa byāpādassa dūrasamussarītabhāvato khippameva samādhīyati, “āsavānaṃ khayāyā”ti keci. Sesam suviññeyyameva. Ettha ca kiñcāpi ito aññakammaṭṭhānavasena adhigatajjhānānampi sukhasupanādayo ānisaṃsā labbhanti. Yathāha –

“Sukhaṃ supanti munayo, ajjhattaṃ susamāhitā;
Suppabuddhaṃ pabujjhanti, sadā gotamasāvaka”ti. (visuddhi. mahāṭī. 1.258); Ca ādi –

Tathāpime ānisaṃsā brahmavihāralābhino anavasesā labbhanti byāpādādīnaṃ ujuvipaccanīkabhāvato brahmavihārānaṃ. Tenevāha “nissaraṇaṃ hettaṃ, āvuso, byāpādassa, yadidaṃ mettācetovimutti”tiādi (dī. ni. 3.326; a. ni. 6.13). Byāpādādivasena ca sattānaṃ dukkhasupanādayoti tappaṭipakkhabhūtesu brahmavihāresu siddhesu sukhasupanādayo hatthagatā eva hontīti.

Mettāsuttavaṇṇanā niṭṭhitā.

6. Aṭṭhakanāgarasuttavaṇṇanā

16. Chaṭṭhe **beluvagāmaketi** vesāliyā dakkhiṇapasse avidūre beluvagāmakō nāma atthi, taṃ gocaragāmaṃ katvāti attho. **Sārappattakulagaṇanāyāti** mahāsāramahappattakulagaṇanāya. **Dasame ṭhāneti** aññe aññeti dasagaṇanaṭṭhāne. Aṭṭhakanagare jāto bhavoti **aṭṭhakanāgaro**. **Kukkuṭārāmoti** pāṭaliputte kukkuṭārāmo, na kosambiyam.

Pakatathappaṭiniddeso ta-saddoti tassa “bhagavatā” tiādīhi padehi samānādhikaraṇabhāvena vuttassa yena abhisambuddhabhāvena bhagavā pakato adhigato supākaṭo ca, taṃ abhisambuddhabhāvaṃ saddhiṃ āgamaṇiyapaṭipadāya atthabhāveneva dassento “**yo so...pe... abhisambuddho**” ti āha. Satipi ñānadassanasaddānaṃ idha paññāvevacanabhāve tena tena visesena nesam visayavisesa pavattidassanatham asādhāraṇaṇāṇavisesavasena, vijjāttayavasena, vijjābhīññānāvaraṇavasena, sabbaññutaññānamasacakkhavasena paṭivedhadesanāññāvasena ca tadattham yojetvā dassento “**tesam tesa**” ntiādīmāha. Tattha **āsayānusayam jānatā** āsayānusayaññāna, **sabbaññeyyadhammam passatā** sabbaññutānāvaraṇaṇāññehi. **Pubbenivāsādīhīti** pubbenivāsāsavakkhayaññāñehi. **Paṭivedhapaññāyāti** ariyamaggapaññāya. **Desanāpaññāya passatāti** desetabbadhammānaṃ desetabbappakāraṃ bodhaneyyapuggalānañca āsayānusayacaritādhimuttiādibhedam dhammam desanāpaññāya yāthāvato passatā. **Arīnanti** kilesārīnaṃ, pañcavidhamārānaṃ vā sāsanassa vā paccatthikānaṃ aññatitthiyānaṃ. Tesam pana hananaṃ pāṭihāriyehi abhibhavanaṃ appaṭibhānatākaraṇam ajjupekkhaṇaṇca. Kesivinayasuttañcetha nidassanaṃ. Tathā ṭhānāṭṭhānādīni **jānatā**. Yathākammūpage satte **passatā**. Savāsanānamāsavānaṃ khīṇattā **arahatā**. Abhiññeyyādibhede dhamme abhiññeyyādito aviparītāvabodhato **sammāsambuddhena**.

Atha vā tīsu kālesu appaṭihataññānatāya **jānatā**. Kāyakammādivasena tiṇṇampi kammānaṃ ñāñānuparivattito nisammakāritāya **passatā**. Davādīnampi abhāvasādhikāya pahānasampadāya **arahatā**. Chandādīnaṃ ahānietubhūtāya akkhayaṇapaṭibhānasādhikāya sabbaññutāya **sammāsambuddhenāti** evaṃ dasabalaṭṭhārasaṇeṇikabuddhadhammasavenapi yojanā kātābā.

Abhisankhatanti attano paccayehi abhisammukhabhāvena samecca sambhuyya kataṃ. Svāssa katabhāvo uppādanena vedītabbo, na uppanassa paṭisaṅkharaṇenāti āha “**uppādita**” nti. Te cassa paccayā cetanāpadhānāti dassetuṃ pāṭiyam “abhisankhataṃ abhisankhetayita” nti vuttanti “**cetayitam kappayita**” nti atthamāha. **Abhisankhataṃ abhisankhetayitanti** ca jhānassa pātubhāvadassanamukhena viddhamsanabhāvaṃ ullīṅgeti. Yañhi ahutvā sambhavati, taṃ hutvā paṭiveti. Tenāha pāṭiyam “**yam kho panā**” tiādī. **Samathavipassanādhimme ṭhitoti** ettha samathadhamme ṭhitattā samāhito vipassanaṃ paṭṭhapetvā aniccānupassanādīhi niccasaññādayo pajahanto anukkamena taṃ anulomaññānaṃ pāpetā hutvā vipassanādhimme ṭhito. Samathavipassanāsankhātesu dhammesu rañjanaṭṭhena **rāgo**. Nandanaṭṭhena **nandī**. Tattha sukhumā apekkhā vuttā. Yā nikantīti vuccati.

Evaṃ santeti evaṃ yathārutavaseneva imassa suttapadassa atthe gahetabbe sati. **Samathavipassanāsu chandarāgo kattabboti** anāgāmiphalaṃ anibbattetvā tadatthāya samathavipassanāpi anibbattetvā kevalam tattha chandarāgo kattabbo bhavissati. Kasmā? Tesu samathavipassanāsankhātesu dhammesu chandarāgamattena anāgāminā laddhabbassa aladdhaanāgāmiphalaṇepi laddhabbattā. Tathā sati tena anāgāmiphalaṃ laddhabbameva hoti. Tenāha “**anāgāmiphalaṃ paṭiladdham bhavissati**” ti. Sabhāvato rasitabbattā aviparīto attho eva **attharaso**.

Aññāpi kāci sugatīyoti vinipātike sandhāyāha. **Aññāpi kāci duggatīyoti** asurakāyamāha.

Appam yācītena bahum dentena ulārapurisena viya ekaṃ dhammam pucchitena “ayampi

ekadhammo’’ti kathitattā ekādasapi dhammā pucchāvasena ekadhammo nāma jāto paccekam vākyaparisaṃpanāṇāyena. **Pucchāvasenā**ti ‘‘atthi nu kho, bhante ānanda, tena...pe... sammāsambuddhena ekadhammo sammadakkhāto’’ti evaṃ pavattapucchāvasena.

Amatuppattiatthenāti amatabhāvassa uppattihetutāya, sabbānīpi kammaṭṭhānāni ekarasāpi amatādhigamassa paṭipattiyāti attho. Evamettha aggaphalabhūmi anāgāmiphalaabhūmīti dveva bhūmiyo sarūpato āgatā, nānantariyatāya pana heṭṭhimāpi dve bhūmiyo atthato āgatā evāti daṭṭhabbāti. Pañca satāni aggho etassāti **pañcasatam**. Sesamettha uttānameva.

Aṭṭhakanāgarasuttavaṇṇanā niṭṭhitā.

7. Gopālasuttavaṇṇanā

17. Sattame **tisso kathā**ti tisso aṭṭhakathā, tividhā suttassa atthavaṇṇanāti attho. Ekekaṃ padaṃ nālaṃ mūlaṃ etissāti evaṃsaññitā **ekanālikā**. Ekekaṃ vā padaṃ nālaṃ atthaniggamanamaggo etissāti **ekanālikā**. Tenāha ‘‘**ekekassa padassa atthakathana**’’nti. Cattāro aṃsā bhāgā atthasallakkaṇūpāyā etissāti **caturassā**. Tenāha ‘‘**catukkaṃ bandhitvā kathana**’’nti. Niyamato nisinnassa āraddhassa vatto saṃvatto etissā atthīti **nisinnavattikā**, yathāraddhassa atthassa viṣuṃ viṣuṃ pariyoṣāpikāti attho. Tenāha ‘‘**paṇḍitagopālakam dassetvā**’’tiādi. Ekekassapi padassa piṇḍatthadassanavasena bahūnaṃ padānaṃ ekajjhaṃ attham akathetvā ekamekassa padassa atthavaṇṇanā ayaṃ sabbattha labbhati. **Catukkaṃ bandhitvā**ti kaṇhapakkhe upamopameyyadvayaṃ, tathā sukkapakkheti idaṃ catukkaṃ yojetvā. Ayaṃ edisesu eva suttasu labbhati. **Pariyoṣānagamananti** keci tāva āhu ‘‘kaṇhapakkhe upamaṃ dassetvā upamā ca nāma yāvadeva upameyyasampaṭipādanatthāti upameyyattham āharitvā saṃkilesapakkhaniddeso ca vodānapakkhavibhāvanatthāyāti sukkapakkhampi upamopameyyavibhāgena āharitvā suttatthassa pariyoṣāpanaṃ. Kaṇhapakkhe upameyyaṃ dassetvā pariyoṣānagamanādīsipi eseva nayo’’ti. Apare pana ‘‘kaṇhapakkhe, sukkapakkhe ca taṃtaṃupamūpameyyatthānaṃ viṣuṃ viṣuṃ pariyoṣāpetvāva kathanaṃ pariyoṣānagamana’’nti vadanti. **Ayanti** nisinnavattikā. **Idhāti** imasmiṃ gopālakasutte. **Sabbācariyānaṃ āciṇṇāti** sabbehipi pubbācariyehi ācaritā saṃvaṇṇitā, tathā ceva pāli pavattāti.

Āngīyanti avayavabhāvena nāyantīti **āngāni**, koṭṭhāsā. Tāni panettha yasmā sāvajjasabhāvāni, tasmā āha ‘‘**āṅgehīti aṅṅakoṭṭhāsehi**’’ti. **Gomaṇḍalanti** gosamūhaṃ. **Pariharitunti** rakkhituṃ. Taṃ pana parihaṇaṃ pariggahetvā vicaraṇanti āha ‘‘**pariggahetvā vicaritu**’’nti. **Vaḍḍhinti** gunnaṃ bahubhāvaṃ bahugorasatāsankhātaṃ parivuddhiṃ. ‘‘Ettakamida’’nti rūpiyatīti **rūpaṃ**, parimāṇaparicchedopi sarīrarūpampīti āha ‘‘**gaṇanato vā vaṇṇato vā**’’ti. **Na pariyesati** vinaṭṭhabhāvasseva aṅānato. **Nīlāti** ettha **iti**-saddo ādiattho. Tena setasabalādivaṇṇaṃ saṅgaṇhāti.

Dhanusattisūlādīti ettha issāsācariyānaṃ gāvīsu kataṃ **dhanulakkhaṇaṃ**. Kumārabhattigaṇānaṃ gāvīsu kataṃ **sattilakkhaṇaṃ**. Issarabhattigaṇānaṃ gāvīsu kataṃ **sūlalakkhaṇanti** yojanā. **Ādi**-saddena rāmaṃvāsudevagaṇādīnaṃ gāvīsu kataṃ pharasucakkādīlakkhaṇaṃ saṅgaṇhāti.

Nīlamakkhikāti piṅgalamakkhikā, khuddakamakkhikā eva vā. Saṭṭati rujati etāyāti sāṭikā, saṃvaḍḍhā sāṭikā **āsāṭikā**. Tenāha ‘‘**vaḍḍhanti**’’tiādi. **Hāretāti** apānetā.

Vākenāti vākaṭṭhena. **Cīrakenāti** pilotikena. **Antovasseti** vassakālassa abbhantare. **Niggāhanti** susumārādiggāharahitaṃ. **Pīṭanti** pānīyassa pīṭabhāvaṃ. Sīhabyagghādi-parissayena **sāsāṅko sappaṭibhaya**.

Pañca ahāni ekassāti pañcāhiko, so eva vāroti, **pañcāhikavāro**. Evaṃ **sattāhikavāro**pi vedītabbo. **Ciṇṇaṭṭhānanti** caritaṭṭhānaṃ gocaraggahitaṭṭhānaṃ.

Pitīṭhānanti pitarā kātabbaṭṭhānaṃ, pitarā kātabbakiccanti attho. **Yathāruciṃ gahetvā**

gacchantī gunnaṃ rucianurūpaṃ gocarabhūmiṃ vā nadipāraṃ vā gahetvā gacchanti.
Gobhattanti kappāsaṭṭhikādissaṃ gobhuñjitabbaṃ bhattaṃ. Bhattaggahaṇeṇeva yāgupi saṅgahitā.

Dvīhākārehīti vuttaṃ ākāradvayaṃ dassetuṃ “**gaṇanato vā samuṭṭhānato vā**”ti vuttaṃ. **Evam pāliyaṃ āgatā**ti “upacayo santatī”ti jātiṃ dvidhā bhinditvā hadayavatthum aggahetvā dasāyatanāni pañcadasa sukhumarūpānīti evaṃ **rūpakaṇḍapāliyaṃ** (dha. sa. 666) āgatā. **Pañcavīsati rūpakoṭṭhāsā**ti salakkhaṇato aññaṃaññasankarābhāvato rūpabhāgā. **Rūpakoṭṭhāsā**ti vā visuṃ visuṃ appavattitvā kalāpabhāveṇeva pavattanato rūpakalāpā. **Koṭṭhāsā**ti ca aṃsā avayavāti attho. **Koṭṭhanti** vā sarīraṃ, tassa aṃsā kesādayo koṭṭhāsāti aññepi avayavā koṭṭhāsā viya **koṭṭhāsā**.

Seyyathāpītiādi upamāsaṃsandanaṃ. Tattha **rūpaṃ pariggahetvā**ti yathāvuttaṃ rūpaṃ salakkhaṇato ñāṇena pariggaṇhitvā. **Arūpaṃ vavatthapetvā**ti taṃ rūpaṃ nissāya ārammaṇaṅca katvā pavattamāne vedanādiḥ cattāro khandhe arūpanti vavatthapetvā. **Rūpārūpaṃ pariggahetvā**ti puna tattha yaṃ rūpanalakkhaṇaṃ, taṃ rūpaṃ. Tadaññaṃ arūpaṃ. Ubhayavinimuttaṃ kiñci natthi attā vā attaniyaṃ vāti evaṃ rūpārūpaṃ pariggahetvā. Tadubhayaṅca avijjādinā paccayena sapaccayanti **paccayaṃ sallakkhetvā**, aniccatādilakkhaṇaṃ āropetvā yo kalāpasammasanādikkamena kammaṭṭhānaṃ matthakaṃ pāpetuṃ na sakkoti, so na vaḍḍhatīti yojanā.

Ettakaṃ rūpaṃ ekasamuṭṭhānanti cakkhāyatanam, sotāyatanam, ghānāyatanam, jivhāyatanam, kāyāyatanam, itthindriyam, purisindriyam, jīvitindriyanti aṭṭhavidhaṃ kammavasena; kāyaviññatti, vacīviññattīti idaṃ dvayaṃ cittavasenāti ettakaṃ rūpaṃ ekasamuṭṭhānaṃ. Saddāyatanamekaṃ utucittavasena **dvisamuṭṭhānaṃ**. Rūpassa lahutā, mudutā, kammaññatāti ettakaṃ rūpaṃ utucittāhāravasena **tisamuṭṭhānaṃ**. Rūpāyatanam, gandhāyatanam, rasāyatanam, phoṭṭhabbāyatanam, ākāśadhātu, āpodhātu, kabalīkāro āhāroti ettakaṃ rūpaṃ utucittāhārakammavasena **catusamuṭṭhānaṃ**. Upacayo, santati, jaratā, rūpassa aniccatāti ettakaṃ rūpaṃ **na kutoci samuṭṭhātīti na jānāti**. **Samuṭṭhānato rūpaṃ ajānantoti**ādisu vattabbaṃ “gaṇanato rūpaṃ ajānanto”tiādisu vuttanayeneva veditabbaṃ.

Kammalakkhaṇoti attanā kataṃ duccharitakammaṃ lakkhaṇaṃ etassāti kammalakkhaṇo, bālo. Vuttañhetam – “tīṇimāni, bhikkhave, bālassa bālalakkhaṇāni. Katamāni tīṇi? Duccintitacintī hoti, dubbhāsītabhāsī, dukkaṭṭakammakārī. Imāni kho...pe... lakkhaṇāni”ti (ma. ni. 3.246; a. ni. 3.3). Attanā kataṃ sucaritakammaṃ lakkhaṇaṃ etassāti kammalakkhaṇo, paṇḍito. Vuttampi cetam “tīṇimāni, bhikkhave, paṇḍitassa paṇḍitalakkhaṇāni. Katamāni tīṇi? Sucintitacintī hoti, subhāsītabhāsī, sukatakammakārī. Imāni kho...pe... paṇḍitalakkhaṇāni”ti (ma. ni. 3.253; a. ni. 3.3). Tenāha “**kusalākusalakammaṃ paṇḍitabālalakkhaṇa**”nti.

Bāle vajjetvā paṇḍite na sevātīti yaṃ bālapuggale vajjetvā paṇḍitasevanaṃ atthakāmena kātabbaṃ, taṃ na karotī. Tathābhūtaṃ ca ayamādīnavoti dassetuṃ puna “**bāle vajjetvā**”tiādi vuttaṃ. Tattha yaṃ bhagavatā “idaṃ vo kappatī”ti anuññātaṃ, tadanulomaṅce, taṃ **kappiyaṃ**. Yaṃ “idaṃ vo na kappatī”ti paṭikkhittaṃ, tadanulomaṅce, taṃ **akappiyaṃ**. Yaṃ kosallasambhūtaṃ, taṃ **kusalaṃ**, tappaṭipakkhaṃ **akusalaṃ**. Tadeva **sāvajjaṃ**, kusalaṃ **anavajjaṃ**. Āpattito ādito dve āpattikkhandhā **garukaṃ**, tadaññaṃ **lahukaṃ**. Dhammato mahāsāvajjaṃ **garukaṃ**, appasāvajjaṃ **lahukaṃ**. Sappaṭikāraṃ **satekicchaṃ**, appaṭikāraṃ **atekicchaṃ**. Dhammatānugataṃ **kāraṇaṃ**, itaraṃ **akāraṇaṃ**. **Taṃ ajānantoti** kappiyākappiyaṃ, garuka-lahukaṃ, satekicchātekkicchaṃ ajānanto suvisuddhaṃ katvā silaṃ rakkhituṃ na sakkoti. Kusalākusalaṃ, sāvajjānavajjaṃ, kāraṇākāraṇaṃ ajānanto khandhādisu akusalatāya rūpārūpapariggahampi kātuṃ na sakkoti, kuto tassa kammaṭṭhānaṃ gahetvā vaḍḍhanā. Tenāha “**kammaṭṭhānaṃ gahetvā vaḍḍhetuṃ na sakkoti**”ti.

Govaṇasadise attabhāve uppajjitvā tattha dukkhuppattihetuto micchāvitakkā āsāṭikā viyāti **āsāṭikā**ti āha “**akusalavitakkaṃ āsāṭikaṃ ahāretvā**”ti.

“Gaṇḍoti kho, bhikkhave, pañcannetaṃ upādānakkhandhānaṃ adhivacana”nti (saṃ. ni. 4.103; a. ni. 8.56; 9.15) vacanato chahi vaṇamukhehi vissandamānayūso gaṇḍo viya pilotikākhaṇḍena chadvārehi vissandamānakilesāsuci attabhāvavaṇo satisaṃvarena pidahitabbo, ayaṃ pana evaṃ na karotīti āha “**yathā so gopālako vaṇaṃ na paṭicchādeti, evaṃ saṃvaram na sampādeti**”ti.

Yathā dhūmo indhanaṃ nissāya uppajjamāno saṅho sukhumo, taṃ taṃ vivaraṃ anupavissa byāpento sattānaṃ ḍaṃsamakasādīparissayaṃ vinodeti, aggijālāsamuṭṭhānassa pubbaṅgamo hoti, evaṃ dhammadesanāññānassa indhanabhūtaṃ rūpārūpadhammajātaṃ nissāya uppajjamānā saṅhā sukhumā taṃ taṃ khandhantaraṃ āyatanantarañca anupavissa byāpeti, sattānaṃ micchāvitakkādīparissayaṃ vinodeti, ñāṇaggijālāsamuṭṭhāpanassa pubbaṅgamo hoti, tasmā dhūmo viyāti **dhūmoti** āha “**gopālako dhūmaṃ viya dhammadesanādhūmaṃ na karotī**”ti. Attano santikaṃ upagantvā nisinnassa kātābbā tadanucchavikā dhammakathā **upanisinnakakathā**. Katassa dānādīpuññassa anumodanakathā **anumodanā**. Tatoti dhammakathādīnaṃ akaraṇato. “**Bhussuto guṇavāti na jānanti**”ti kasmā vuttaṃ? Nanu attano jānāpanatthaṃ dhammakathādi na kātābbamevāti? Saccaṃ na kātābbameva, suddhāsayaena pana dhamme kathite tassa guṇajānaṃ sandhāyetaṃ vuttaṃ. Tenāha bhagavā –

“Nābhāsamānaṃ jānanti, missaṃ bālehi paṇḍitaṃ;
Bhāsaye jotaye dhammaṃ, paggaṇhe isinaṃ dhaja”nti.

Taranti otaranti etthāti **titthaṃ**, naditaḷākādīnaṃ nahānapānādiatthaṃ otaraṇaṭṭhānaṃ. Yathā pana taṃ udakena otiṇṇasattānaṃ sarīramalaṃ pavāheti, parissamaṃ vinodeti, visuddhiṃ uppādeti, evaṃ bahussutā attano samīpaṃ otiṇṇasattānaṃ dhammodakena cittamalaṃ pavāhenti, parissamaṃ vinodenti, visuddhiṃ uppādenti, tasmā te titthaṃ viyāti **titthaṃ**. Tenāha “**titthabhūte bahussutabhikkhū**”ti. **Byañjanaṃ kathaṃ ropetabbanti**, bhante, idaṃ byañjanaṃ ayaṃ saddo kathaṃ imasmiṃ atthe ropetabbo, kena pakārena imassa atthassa vācako jāto. “Nirūpetabba”nti vā pāṭho, nirūpetabbaṃ ayaṃ sabhāvanirutti kathamettha nirūḷhāti adhippāyo. **Imassa bhāsītassa ko atthoti** saddatthaṃ pucchati. **Imasmiṃ ṭhāneti** imasmiṃ pālīppadesa. **Pāli kiṃ vadatīti** bhāvatthaṃ pucchati. **Attho kiṃ dīpetīti** bhāvatthaṃ vā? Saṅketatthaṃ vā. **Na paripucchatīti** vimaticchedanapucchāvasena sabbaso pucchamaṃ na karoti. **Na paripaṇhatīti** pari pari attano ñātuṃ icchaṃ na ācikkhati, na vibhāveti. Tenāha “**na jānāpetī**”ti. **Teti bahussutabhikkhū**. Vivaraṇaṃ nāma atthassa vibhajitvā kathananti āha “**bhājetvā na desenti**”ti. **Anuttānikatanti** ñāṇena apākaṭikataṃ gūyaṃ paṭicchannaṃ. **Na uttāniṃ karontīti** sinerupādamūle vālikaṃ uddharanto viya pathavīsandhārodakaṃ vivaritvā dassento viya ca uttānaṃ na karonti.

Evaṃ yassa dhammassa vasena bahussutā “tittha”nti vuttā pariyāyato. Idāni tameva dhammaṃ nipariyāyato “tittha”nti dassetuṃ “**yathā vā**”tiādi vuttaṃ. Dhammo hi taranti otaranti etena nibbānaṃ nāma taḷākanti “tittha”nti vuccati. Tenāha bhagavā sumedhabhūto –

“Evaṃ kilesamaladhovaṃ, vijjante amatantaḷe;
Na gavesati taṃ taḷākaṃ, na doso amatantaḷe”ti. (bu. vaṃ. 2.14) –

Dhammasseva nibbānassotaraṇatitthabhūtassa otaraṇākāraṃ ajānanto “**dhammatitthaṃ na jānātī**”ti vutto.

Pītāpītanti gogaṇe pītaṃ apītañca gorūpaṃ na jānāti, na vindati. Avindanto hi “**na labhatī**”ti vutto. “**Ānisamsaṃ na vindatī**”ti vatvā tassa avindanākāraṃ dassento “**dhammassavanaggaṃ gantvā**”tiādimāha.

Ayaṃ lokuttaroti padaṃ sandhāyāha “**ariya**”nti. Paccāsattiñāyena anantarassa hi vipaṭisedho vā. Ariyasaddo vā niddosapariyāyo daṭṭhabbo. **Aṭṭhaṅgikanti** ca visuṃ ekajjhañca aṭṭhaṅgikaṃ upādāya gahetabbaṃ, aṭṭhaṅgatā bhāhullato ca. Evañca katvā sattaṅgassapi ariyamaggassa saṅgaho siddho hoti.

Cattāro satipaṭṭhānetiādīsu avisesena satipaṭṭhānā vuttā. Tattha kāyavedanācittadhammārammaṇā satipaṭṭhānā lokiyā, tattha sammohaviddhamsanavasena pavattā nibbānārammaṇā lokuttarāti evaṃ **“ime lokiyā, ime lokuttarā”**ti yathābhūtaṃ nappajānāti.

Anavasesaṃ duhatīti paṭiggahaṇe mattaṃ ajānanto kismiñci dāyake saddhāhāniyā, kismiñci paccayaḥāniyā anavasesaṃ duhati. Vācāya abhihāro **vācābhihāro**. Paccayānaṃ abhihāro **paccayābhihāro**.

“Ime amhesu garucittikāraṃ na karontī”ti iminā navakānaṃ bhikkhūnaṃ sammāpaṭipattiyā abhāvaṃ dasseti ācariyupajjhāyesu pitupemassa anupaṭṭhāpanato, tena ca sikkhāgāravatābhāvadīpanena saṅghassa abhājanabhāvaṃ, tena therānaṃ tesu anuggahābhāvaṃ. Na hi sīlādiguṇehi sāsane thirabhāvappattā ananuggahetabbe sabrahmacārī anuggaṇhanti, nīratthakaṃ vā anuggahaṃ karontī. Tenāha **“navake bhikkhū”**tiādi. **Dhammakathābandhanti** paveniāgataṃ pakiṇṇakadhammakathāmaggaṃ. Saccasattappaṭisandhipaccayākārappaṭisamyuttaṃ suññatādīpanaṃ **guḷhaganthaṃ. Vuttavipallāsavasena**ti “na rūpaññū”tiādīsu vuttassa paṭisedhassa paṭikkhepavasena aggahaṇavasena. **Yojetvāti** “rūpaññū hotīti gaṇanato vā vaṇṇato vā rūpaṃ jānāti”tiādinā, “tassa gogaṇopi na parihāyati, pañcagorasaparibhogatopi na paribāhiro hotī”tiādinā ca atthaṃ yojetvā. **Veditabboti** tasmīṃ tasmīṃ pade yathārahaṃ attho veditabbo. Sesāṃ sabbattha uttānamevāti.

Gopālasuttavaṇṇanā niṭṭhitā.

Iti manorathapūraṇiyā aṅguttaranikāya-aṭṭhakathāya

Ekādasakanipātavaṇṇanāya anuttānatthadīpanā samattā.

Niṭṭhitā ca manorathapūraṇiyā aṅguttaranikāya-aṭṭhakathāya

Anuttānatthapadavaṇṇanā.

Nigamanakathāvaṇṇanā

Mahāaṭṭhakathāya sāranti aṅguttaramahāaṭṭhakathāya sāraṃ. **Ekūnasaṭṭhimattoti** thokaṃ ūnabhāvato mattasaddaggaṇaṃ. **Mūlaṭṭhakathāsāranti** pubbe vuttaaṅguttaramahāaṭṭhakathāya sārāmeva anunigamavasena vadati. Atha vā **mūlaṭṭhakathāsāranti** porāṇaṭṭhakathāsu atthasāraṃ. Tenedaṃ dasseti – aṅguttaramahāaṭṭhakathāya atthasāraṃ ādāya imaṃ manorathapūraṇiṃ karonto sesamahānikāyānampi mūlaṭṭhakathāsu idha viniyogakkhamaṃ atthasāraṃ ādāya evamakāsinti. **Mahāvihārādhivāsīnanti** ca idaṃ purimacchimapadehi saddhiṃ sambandhitabbaṃ “mahāvihārādhivāsīnaṃ samayaṃ pakāsayaṃti, mahāvihārādhivāsīnaṃ mūlaṭṭhakathāsāraṃ ādāyā”ti. **Tenāti** puññaena. **Hotu sabbo sukhī lokoti** kāmāvacarādivibhāgo sabbo sattaloko yathārahaṃ bodhittayādhigamavasena sampattena nibbānasukhena sukhī sukhito hotūti sadevakassa lokassa accantaṃ sukhādhigamāya attano puññaṃ pariṇāmeti.

Ettāvatā samattāva, sabbaso vaṇṇanā ayaṃ;
Vīsatiyā sahassehi, ganthehi parimāṇato.

Porāṇānaṃ kathāmagga-sāraṃmettha yato ṭhitāṃ;
Tasmā **sāratthamañjūsā**, iti nāmena vissutā.

Ajjhesito narindena, sohaṃ **parakkamabāhunā**;
Saddhammaṭṭhitikāmena, sāsanaṃjotakārinā.

Teneva kārīte ramme, pāsādasatamaṇḍite;
Nānādumagaṇākiṇṇe, bhāvanābhiratālaye.

Sītālūdakasampanne, vasaṃ **jetavane** imaṃ;
Atthabyañjanasampannaṃ, akāsiṃ sādhusammaṭaṃ.

Yaṃ siddhaṃ iminā puññaṃ, yaṃ caññaṃ pasutaṃ mayā;
Etena puññaakammena, dutiye attasambhave.

Tāvatiṃse pamodento, sīlacāraguṇe rato;
Alaggo pañcakāmesu, patvāna paṭhamaṃ phalaṃ.

Antime attabhāvamhi, metteyyaṃ munipuṅgavaṃ;
Lokaggapuggalaṃ nāthaṃ, sabbasattahite rataṃ.

Disvāna tassa dhīrassa, sutvā saddhammadesanaṃ;
Adhigantvā phalaṃ aggaṃ, sobheyyaṃ jinasāsaṃ.

Sadā rakkhantu rājāno, dhammeneva imaṃ pajaṃ;
Niratā puññaakammesu, jotentu jinasāsaṃ.

Ime ca pāṇino sabbe, sabbadā nirupaddavā;
Niccaṃ kalyāṇasaṅkappā, pappontu amataṃ padanti.

Āṅguttaraṭṭikā samattā.